

अध्यात्म बारहखड़ी

रचनाकार

पण्डित दौलतराम कासलीवाल

सम्पादक

ज्ञानचन्द बिल्टीवाला



जैनविद्या संस्थान

दिगम्बर जैन अतिशय क्षेत्र श्रीमहावीरजी

राजस्थान

आरम्भिक व प्रकाशकीय

अध्यात्म-प्रेमी पाठकों के हाथों में पण्डित दौलतराम कासलीवाल कृत 'अध्यात्म बारहखड़ी' समर्पित करते हुए हर्ष का अनुभव हो रहा है।

बसवा में जन्मे पण्डित दौलतराम कासलीवाल ढूँढारी भाषा के जाने-माने कवि हैं। इन्होंने 'अध्यात्म-बारहखड़ी' की रचना संवत् 1798 (सन् 1741) में उदयपुर में की थी। इसमें शुद्ध आत्मा/परमात्मा/जिनेन्द्र की भक्ति में 'अ' से लेकर 'ह' तक को बारहखड़ी से बननेवाले पदों से रचना की गई है। अध्यात्म रस से भरी इस रचना में कवि ने 'अविनाशी आनन्दमय आत्मराम' को गाया है।

कवि धर्म के क्षेत्र में ऊँच-नीच को मान्यता को स्वीकार नहीं करते। जो प्रभु को भजता है वह उनका हो जाता है। कवि साधर्मो उसे ही मानते हैं जो परमात्मा की भक्ति में लीन है तथा जो विमुख हैं वे विधर्मो हैं।

आध्यात्मपरक इस ग्रन्थ में शान्त, वैराग्य, भक्तिरस के अतिरिक्त शृंगार, वीर, वीभत्स आदि सभी रसों को यथाअवसर स्थान प्राप्त हुआ है। अरित, त्रिभंगी, इन्द्रवज्रा, मोतोदान, भुजंगीप्रवात, दोहा, चौपाई, छप्पय, सवैया, सोरठा आदि विविध छन्दों का कुशल प्रयोग कवि ने किया है।

हमें लिखते हुए हर्ष है कि शास्त्र-मर्मज्ञ श्री ज्ञानचन्द बिल्टीवाला ने इस ग्रन्थ का सम्पादन कर जैनविद्या संस्थान को प्रकाशित करने के लिए सौंपा, इसके लिए हम उनके आभारी हैं। दिगम्बर जैन अतिशय क्षेत्र श्री महावीरजी द्वारा संचालित 'जैनविद्या संस्थान' जैनधर्म दर्शन एवं संस्कृति ही बहुआयामी दृष्टि को सामान्यजन एवं विद्वानों के समक्ष प्रस्तुत करने हेतु प्रयत्नशील है। इसका प्रकाशन इसी उद्देश्य की पूर्ति में सहायक है।

पुस्तक प्रकाशन के लिए जैनविद्या संस्थान के कार्यकर्ता एवं जयपुर प्रिन्टर्स प्राइवेट लिमिटेड, जयपुर धन्यवादाह हैं।

नरेन्द्रकुमार पादनी
मंत्री

नरेशकुमार सेठी
अध्यक्ष

डॉ. कमलचन्द सोगाणी
संयोजक

प्रबन्धकारिणी कमेटी

जैनविद्या संस्थान

दिगम्बर जैन अतिशय क्षेत्र श्री महावीरजी

प्रस्तावना

पं. दौलतराम कासलीवाल का जन्म जयपुर रियासत के बसवा कस्बे में हुआ था। आपके पिता का नाम आनन्दराम था। आप जयपुर के राजा जगतसिंह की सेवा में उदयपुर में थे तब वहाँ ही उनकी अध्यात्म सैली (सहैली/मंडली) के साथी श्री पृथ्वीराज, चतुर्भुज, चीमा पंडित आदि की प्रेरणा से इस ग्रन्थ की रचना संवत् १७९८ में की गई थी। इस 'अध्यात्म रस की भरी' रचना में कवि ने 'अविनासी आनन्दमय आत्मराम' को गाया है (३००/१०,११)।

पं. दौलतराम कासलीवाल ढूँढ़ारी भाषा के जाने-माने जैन कवि हैं। आपके सरस भजन गायकों और श्रोताओं को भगवद्भक्ति और अध्यात्म का रस पिलाते रहे हैं। भजनों के अतिरिक्त आपकी अन्य कृतियाँ भी हैं। अब तक १८ रचनाओं की खोज की जा चुकी है।^१ इन रचनाओं को हम निम्न तीन भागों में विभाजित कर सकते हैं -

(i) मौलिक रचनाएँ

१. त्रेपन क्रियाकोश, २. जीवंधर चरित, ३. अध्यात्म बारहखड़ी, ४. विवेक विलास, ५. श्रेणिकचरित, ६. श्रीपालचरित, ७. चौबीस दण्डक, ८. सिद्ध पूजाष्टक।

(ii) अनूदित रचनाएँ (भाषा वचनिका)

१. पुण्याखव कथाकोष, २. पद्मपुराण, ३. आदिपुराण, ४. पुरुषार्थ सिद्धयुपाय, ५. हरिवंशपुराण, ६. परमात्मप्रकाश, ७. सारसमुच्चय।

(iii) टब्बा टीकाएँ

१. तत्त्वार्थसूत्र टब्बा टीका, २. वसुनन्दि ब्रावकाचार टब्बा टीका, ३. स्वामी कार्तिकेयानुप्रेक्षा टब्बा टीका।

१. महाकवि दौलतराम कासलीवाल : व्यक्तित्व एवं कृतित्व, प्रस्तावना, पृ. ४१-४२, डॉ. कस्तूरचंद कासलीवाल, साहित्य शोध विभाग, श्री दिगम्बर जैन अतिशय क्षेत्र श्रीमहावीरजी, ई. सन् १९७३।

अध्यात्म बारहखड़ी आपकी एक श्रेष्ठ प्रौढ़ रचना है। इसके पारायण से कवि की भाषा-विशेषज्ञता के साथ भाषा के सम्बन्ध में उनका तात्त्विक बोध भी उजागर होता है। वे भाषा को मात्र अर्थ संप्रेषण का साधन ही नहीं मानते, वरन् वे पुनः-पुनः शब्द-शब्द में प्रभु स्वरूप देखते हैं और कहते हैं 'सर्वाक्षर मूरति तू क्यों जक्कार में न होय' (१३१/८)।

अध्यात्म बारहखड़ी रचना को कवि 'भक्त्याक्षर मालिका' कहते हैं। इसमें शुद्ध आत्मा/परमात्मा/जिनेन्द्र की भक्ति में पद रचना की गई है। यह उनकी चेतन देव और सुचेतना देवी की भक्ति में की गई रचना है। वे कहते हैं -

नाम अनंत सुदेव के, देवी नाम अनंत।

आपुन माहैं पाइए भगवति अर भगवंत।

सख अक्षर-माहि हैं, सकल जेय हैं जेय।

देवी हू सब मैं लसैं विरला बुझी भेव॥ (२९८/४०-४१)

अपने कर्मबद्ध संसारो रूप के प्रति कवि को बड़ा क्षोभ है। कर्मों ने उनके शुद्ध स्वरूप से अंतर कर दिया है और इस अंतर को मिटाने हेतु वे जिनेन्द्र से प्रार्थना करते हैं —

हांतौ पारधी नाथ, कर्म मैं मेरी तोतैं।

हाथ पकरि अब देव, खींच लैं अपनैं पुर मैं॥ (२८७/१२)

कवि अच्छी तरह जानते हैं कि जिनेन्द्र स्वयं से अभिन्न हैं और उनसे तथा अन्य सभी ज्ञेयों से भिन्न हैं।

तू हि अभिन्न व्यापकौ स्वामी, निजगुन पर्यय माहि।

भिन्न व्यापको सकल जेय मैं, राग दोष मैं नाहि॥ (२९७/२७)

प्रभु रागो द्वेषो नहीं हैं कि भिन्न पदार्थों के प्रति उपकार में प्रवृत्त हों। ऐसे वीतरागी प्रभु जिनमें अन्य के उपकार करने की इच्छा भी उत्पन्न नहीं होती कैसे भक्त को हाथ पकड़ कर अपने 'पुर' में खींच लेंगे? पर कवि जानते हैं कि भक्त को अपने भावों का, परिणामों का फल मिल जाता है, उसके पाप कर्म गल जाते हैं, आवरण कर रहे कर्मों का क्षयोपशम हो जाता है और भक्त की आत्मा दीप्तिमान

हो उठती है। प्रभु तो आलम्बन हैं, जगत के सभी पदार्थ आलम्बन हैं और उनके आलम्बनपूर्वक बनने वाले हमारे भावों/परिणामों से हमारी सुगति अथवा दुर्गति की रचना हो जाती है। कवि स्पष्ट जानते हैं कि आदेय स्वरूप एक केवल आत्मा है, अन्य कुछ नहीं —

आतम विनु सब हेय, एक आदेय स्वरूपा। (२८९/२१)

ग्रन्थ के आरंभ में परमात्मा को विविध नामों से अर्थ सहित स्तुति की गई है। आगे ओंकार के सम्बन्ध में कवि ने पद रचना की है और कहा है कि बिना प्रणव के कोई मन्त्र रचना नहीं होती, वह कार्यकारी नहीं होता। आगे श्री को लेकर कुछ पद रचना करने के बाद 'अ' से लेकर 'ह' तक की बारहखड़ी से बनने वाले कतिपय पदों से कवि ने शुद्ध आत्मा/परमात्मा/जिनेन्द्र की भक्ति की है। ये ही हरि हैं, हर हैं, बुद्ध हैं, सुगत हैं, रुद्र हैं, शिव हैं (परिशिष्ट में कतिपय अन्य नाम भी संकलित किये गये हैं) तथा राधा, भवानी, चण्डी आदि इनकी अपने से अभिन्न स्वभावभूत शक्तियाँ हैं। अन्य जो शिव, हरि, माधव आदि हैं वे इन्हीं का ध्यान करते हैं (१०/११४)। वास्तव में जितने भी आस्तिक, आध्यात्मिक पुरुष हैं वे अपने ही चेतन-स्व के सत्-चित्-आनन्द लोक में मग्न होते हैं और कौन आज तक अपने चेतन-स्व को छोड़कर अन्य में प्रवेश कर पाया, अन्य को ग्रहण कर पाया। यह ही चेतन-स्व अपने शुद्ध परमात्मस्वरूप में, जिनेन्द्रस्वरूप में कवि को इष्ट है। मुनिजन गृह-परिवार त्याग कर रूखा-सूखा आहार देह को देकर एकान्त वन में इसी शुद्ध आत्मा/परमात्मा की भक्ति करते हैं, ध्यान करते हैं। आत्मरसिक रुचि वाले गृहस्थ के लिये कवि कहते हैं कि वह घर में राहगीर, पाहुने की भाँति अलिप्त भाव से रहता है और परमात्मा की भक्ति का रसपान करता है।

जो साधु होकर बाह्य धन्ये में पड़ जाते हैं उनके लिए कवि कहते हैं कि वे गूढ़ तत्त्व को प्राप्त नहीं कर पाते। मुँह से जाप करना भी छोड़ अजपा जाप करने को प्रभुदर्शन/आत्मदर्शन का कवि प्रबल साधन मानते हैं (२९१/३१)। कवि दुरी-भली दोनों करणियों (कायों) को पाप-पुण्य की रचना करने वाली होने से आत्मोपलब्धि में बाधक मानते हैं (२०९/४९, १७२/६५)। आत्मोपलब्धि इनसे परे है।

परमात्मा सदा ही प्राणी के निकट है (१४६/९)। कवि कहते हैं कि हम में इडा, पिंगला, सुषुम्ना आदि नाड़ियों से निरन्तर सोहं-सोहं का नाद गूँज रहा है, पर विरले जन ही उसे सुन-समझ पाते हैं (४०/३३, ३४), अन्य जन उसे सुनते हुए भी अपने परमात्मस्वरूप से बेखबर हैं (९/१०६, १११)। जब भव्यों के घट में इस नाद की गर्जना होती है तो मोह भाग खड़ा होता है (४८/९१)।

कवि की परमात्मा की भक्ति में बड़ी श्रद्धा है। भक्ति भुक्ति एवं मुक्ति की माता है (५३/२२), वह गुणों की जननी होने से सुरमाता है (५६/८)। परमात्मा की भक्ति में बड़ी शक्ति है। कास, सास और अन्य रोग परमात्मा के नाम से, भक्ति से पलायन कर जाते हैं (७७/३८), सर्प घर में प्रवेश नहीं करता, क्रूर पशु आक्रमण नहीं करते, राजदण्ड से मानव मुक्त रहता है। जिस प्रदेश में परमात्मा की भक्ति होती रहती है वहाँ अकाल नहीं पड़ता (७९/६३-६४)। परमात्मा का भक्त निर्भय होता है, ज्ञानी, वीर होता है। संसारी मिथ्यादृष्टिजन मृत्यु के आगे कातर हो जाते हैं (५९/३७), निरन्तर भयभीत रहते हैं।

जो जन हिंसक होते हैं, दूसरे प्राणियों को कष्ट देते हैं, उन्हें परमात्मा की भक्ति प्राप्त नहीं हो सकती (३६/५४-५५)। मांस-भक्षण तो प्रकट निंद्य है ही, शाकाहारी भोजन में भी बासा, द्विदल मिश्रित, कांजा, बहुबीजा आदि परमात्मा के भक्त ग्रहण नहीं करते। विशेष दयालु तो हरी मात्र का त्याग कर देते हैं। कवि कहते हैं भव-रोग मिटाने हेतु जिनवाणोरूप औषध के साथ अभक्ष्य के त्यागरूप पथ्य आवश्यक है।

कवि धर्म के क्षेत्र में नीच-ऊँच की मान्यता को स्वीकार नहीं करते हैं। प्रभु को तजने पर ऊँचा नीचा हो जाता है और प्रभु को भजने पर नीचा ऊँचा हो जाता है। प्रभु तो शूद्रों का भी नाथ है (२/१९)। प्रभु को जो भजता है वह उसका हो जाता है (७८/५५)। कवि साधर्मों उसे ही मानते हैं जो परमात्मा की भक्ति में लीन है तथा जो विमुख हैं वे विधर्मों हैं (२७४/५२)।

मूर्तिपूजा के सम्बन्ध में पृ. १३४/१०-११ पर कवि कहते हैं कि ज्ञानानन्द-स्वरूप पुरुषाकार, निराकार, निराधार निजमूर्ति को पाने हेतु जिनेन्द्र की कृत्रिम-अकृत्रिम मूर्तियों का भव्यजन दर्शन, पूजन करते हैं।

सदासुखदासजी, भूधरदासजी, बुधजनजी आदि अनेक कवि, विद्वानों द्वारा गद्य-पद्य में ग्रन्थ रचना द्वारा सरस्वती के भण्डार में वृद्धि हुई थी, वहाँ ही समाज में सामान्यजन का रत्नत्रय निर्मल था, चरित्र उज्ज्वल था, इतर जन राजा आदि तक उनकी चरित्रिक दृढ़ता के कायल थे, गाँव से लेकर नगर तक सर्वत्र वे सम्मान्य थे, प्रतिष्ठा प्राप्त थे। उनके प्रभाव से बिना उपदेश और प्रेरणा के ही इतर जन दयावान शाकाहारी थे।

अध्यात्म बारहखड़ी उन ग्रंथ रत्नों में से एक है जो मुद्रण के इस युग में आज तक अमुद्रित, अप्रकाशित है। यह पहली बार जैनविद्या संस्थान, श्रीमहावीरजी द्वारा प्रकाशित किया जा रहा है। कुछ वर्ष पूर्व तपस्वी सम्राट १०८ आचार्य श्री सन्मत्तिसागरजी महाराज एवं आर्यिका माता विजयमतिजी जब चातुर्मास प्रवास में जयपुर में ससर्ध विराजमान थे तब चौकड़ी मोदीखाना स्थित छोटे दीवानजी के मन्दिर में इसका चतुर्विध संघ की उपस्थिति में नित्य अपराह्न पारायण हुआ था। आचार्यश्री एवं विदुषी माताश्री अपने श्रीमुख से पद्यों का अर्थ स्पष्ट करते थे एवं परस्पर चर्चा से उपस्थित जनसमुदाय पद्यों के अर्थ गाम्भीर्य को हृदयंगम करता था। सभी की उस समय से यह इच्छा थी कि यह ग्रन्थ रत्न जिनवाणी के उपासक सभी जनसमुदाय के लाभार्थ प्रकाशित होना चाहिए। उस समय से चली आयी इस भावना को मैंने डॉ. कमलचन्दजी सोगानी, संयोजक जैनविद्या संस्थान, श्रीमहावीरजी को व्यक्त किया तो उन्होंने तत्काल संस्थान द्वारा प्रकाशित करना स्वीकार किया और यह अब पाठकों के सामने है।

इस ग्रन्थ की प्रति डॉ. वीरसागर जैन, प्राध्यापक, केन्द्रीय संस्कृत विद्यापीठ, देहली से प्राप्त हुई थी और वह ही इस प्रकाशन का आधार बन रही है। अतः डॉ. जैन विशेषतः धन्यवाद के पात्र हैं। प्रति में दो पद्य अपूर्ण हैं उन्हें अपूर्ण ही मुद्रित किया गया है। विज्ञानों को अन्यत्र किसी प्रति में वे पूरे मिलें तो हमें सूचित करें।

जयपुर
९ मार्च, २००२

ज्ञानचन्द बिल्टीवाला

अध्यात्म बारहखड़ी

॥ ॐ नमः परमात्मने ॥ श्लोक ॥

वंदे ज्ञानात्मकं धीरं, वीरं गंभीरं शासनं।
भक्तिदं भुक्तिमुक्तीशं, योगिनं कर्म दूरणं ॥ १ ॥
गुरुन्महामुनीन्त्रत्वा, दृष्ट्वानेकांतं पद्धतिं।
नत्वा जितांहिपद्येव, वक्षे नामावलीं प्रभो ॥ २ ॥

— दोहा —

वंदां आदि अनादि को, जो युगादि जगदीश।
कर्म दलन खलबल हरन, तारनतरन अधीश ॥ १ ॥
केवल ज्ञानानंदमय, परमानंद स्वभाव।
गुण अनंत अतिनाम जो, शक्ति अनंत प्रभाव ॥ २ ॥
शुद्ध बुद्ध अविबुद्ध जो, अति समृद्ध अघनीश।
ऋद्धि सिद्धि धर वृद्धि कर, ईश्वर परम मुनीश ॥ ३ ॥
शक्ति व्यक्ति धर मुक्तिकर, सदा ज्ञप्तिधर संत।
वीतराग सरवज्ञ जो, सो श्रीधर भगवंतः ॥ ४ ॥
केवलराम अनाम जो, रामि जो रहौ सब मांहि।
ऐसी ठौर न देखिए, जहाँ देव वह नांहि ॥ ५ ॥
केवल रूप अनूपकौ, हर हरि गणप दिनेश।
अतुल शक्ति मुनिवर कहै, सो विधि बुद्ध जिनेश ॥ ६ ॥
बंधन हर हर नाम धर, हरी पराक्रम रूप।
तमहर दिनकर देव जो, गणनायक जगभूप ॥ ७ ॥

शक्ति अनंतानंत जो, अतुलशक्ति गुणधाम ।
 विधि कर्ता सु विरंचि जो, प्रतिबोधक बुधनाम ॥ ८ ॥
 मदन जीत जगजीत जो, जिनवर जगत निधान ।
 रम्यरमण अभिराम जो, ज्ञानवान भगवान ॥ ९ ॥
 परमात्मादक चंद जो, सुरपति क्षेत्राधीश ।
 नरपति अखिल प्रपाल जो, आदिपुरुष आदीश ॥ १० ॥
 संत महंत अनंत जो, रमाकंत भगवंत ।
 अरि रागादि निहंतको, अंत रहित अरहंत ॥ ११ ॥
 रमैं शुद्ध चिद्रूप मैं, शुद्ध चेतना जोय ।
 कमला विमला जो रमा, शक्ति प्रभू की सोय ॥ १२ ॥
 ईश निरीश अनीश जो, धीश अधीश मुनीश ।
 जगत शिरोमणि सिद्ध जो, श्री जगपति अवनीश ॥ १३ ॥
 आतमराम अकाम जो, काम रूप निर्नाम ।
 रामदेव मनराम जो, सुंदर सरस विराम ॥ १४ ॥
 अखिल वेद विद्वान जो, अति उज्जल परभाव ।
 महाराज द्विजराज जो, शुक्ल रूप भव नाव ॥ १५ ॥
 क्षिति पालक भय टालको, शरणागत प्रतिपाल ।
 धनुरद्धर धरणीधरो, क्षत्री कहियत लाल ॥ १६ ॥
 तुलाधार अविकार जो, सुवर्ण रूप प्रशस्त ।
 ज्ञान तुला मैं तोलिया, लोकालोक समस्त ॥ १७ ॥
 शर्मा वर्मा गुप्त जो, समिति गुप्ति धर धीर ।
 दासनि कौ आधार जो, महाव्रती अतिवीर ॥ १८ ॥
 सुश्रूषा प्रतिभास जो, अखिल कर्म ज्ञातार ।
 शूद्रनि हूं कौ नाथ जो, स्याम सकल दातार ॥ १९ ॥
 शुक्ल रक्त अति पीत जो, सुवर्ण वर्ण विशाल ।
 हरयोभयो घनस्याम जो, रहित स्यामता लाल ॥ २० ॥

अवरण वरण कृपाल जो, रूप अरूपी नाथ।
 मूरतिवंत अमूरती, जाकैं निजगुण साथ ॥ २१ ॥
 ब्रती ब्रह्मचारी सदा, जित्यै घट पर माँहि ॥
 अति गृहस्थ प्रभो स्वस्थ जो, यामैं संशय नाँहि ॥ २२ ॥
 वन विहार निरधार जो, वानप्रस्थ हू नांम।
 जिती जितेन्द्री धीर जो, महावीर गुणधाम ॥ २३ ॥
 पातक सकल निपातको, मायाचार निपात।
 अविनस्वर अनिपात जो, सो श्रीपति श्रीपात ॥ २४ ॥
 दंडै मन इंद्रि सवै, खंडै विषय विकार।
 मंडै ज्ञान विराग जो, सो दंडी अविकार ॥ २५ ॥
 त्रिविध कर्म दंडै प्रभु, नाम त्रिदंडी सोइ।
 चंडी प्रकृति धरै महा, मायारूप न होइ ॥ २६ ॥
 हंसनि को आधार जो, परमहंस जग भूप।
 हिंसाकर्म निवारको, धर्म अहिंसा रूप ॥ २७ ॥
 भयटारक भट्टारको, भवतारक भ्रम दूर।
 कारक परम समाधि को, सकल उपाधि प्रचूर ॥ २८ ॥
 श्रीगुर सूरि अध्यापको, उपाध्याय गुनपूर।
 उपन्यास निज पास को, रागादिक चकचूर ॥ २९ ॥
 शमी दमी प्रभू संयमी, साधु अवाध सुजांन।
 ऋषि मुनि यति श्री पूज्य जो, अणागार भगवान् ॥ ३० ॥
 आचारिज आरिज प्रभू, अति संविग्न कृपाल।
 संबेगी निर्वेद जो, जैन धर्म प्रतिपाल ॥ ३१ ॥
 निराभर्ण जगभूषणो, दिगपट दीनदयाल।
 प्रभू दिगंबर देव जो, धिर चर को रछिपाल ॥ ३२ ॥
 योगी योगारूढ़ जो, जंगमथावर ईश।
 यती तपोधन श्रुतिधरौ, संन्यासी जुगदीश ॥ ३३ ॥

सं कहिये सम्यक दसा, न्यास कहावै थाप।
 सम्यक थापक शुद्ध जो, संन्यासी निहपाप ॥ ३४ ॥
 प्रेमी प्रेम प्रकाश जो, प्रेमाप्रेम वितीत।
 प्रेमलछिना भक्ति धरि, ध्यावैं जाहि अतीत ॥ ३५ ॥
 विरक्त वैरागी महा, भौतिक भूति स्वरूप।
 अति विभूति अनुभूति जो, रहित प्रसूति अरूप ॥ ३६ ॥
 गोरक्षक है नाथ जो, शंकर सुखकर वीर।
 वीतराग परब्रह्म जो, करुणाकारण धीर ॥ ३७ ॥
 दासक लज्ज कल्याण को, तावैं इन कहाय।
 शिव कल्याण स्वरूप जो, परमेश्वर जिनराय ॥ ३८ ॥
 निर्गुण निरबंधन प्रभु, सगुण अगुण हैं दूर।
 व्यापक विश्व अत्रिश्च जो, राम रमा भरपूर ॥ ३९ ॥
 सब देवनि कौ देव जो, परम उपासन रूप।
 सदा उभयनय भास जो, एकानेक स्वरूप ॥ ४० ॥
 वैदिक तांत्रिक तत्त्व जो, सिद्धांती अतिसिद्धि।
 शुद्धि वृद्धिधर सिद्ध जो, धारक अतुल समृद्धि ॥ ४१ ॥
 शिवमारग पारग प्रभु, जिनमारग कौ मूल।
 करुणासिंधु अगाधजो, पालक सूषिम धूल ॥ ४२ ॥
 धर्मराय जिनराय जो, देव धर्म गुर सोय।
 परमगुरु मर्म जु गुरु, कर्मगुरु हरि होय ॥ ४३ ॥
 और न दूजौ देवता, और न दूजौ पंथ।
 शिव विरंचि हरि बुद्ध सो, जो जिनवर निरग्रंथ ॥ ४४ ॥
 सूत्री आगम धारको, श्रुति संमृति कौ मूल।
 पौराणिक परवीण जो, अध्यात्म अनुकूल ॥ ४५ ॥
 जो स्वरूप व्यापी सदा, पर रूपी न कदापि।
 स्वस्थ समाहित स्वगत जो, सर्वातीत उदापि ॥ ४६ ॥

व्यापि रह्यो प्रभु ज्ञान करि, लोक अलोक हु मांहि।
 लोक शिखर राजै सदा, सर्वगतो सब पांहि ॥ ४७ ॥
 सब वामैं वह सबनि मैं, वह है सबतैं भिन्न।
 वातैं सबही भिन्न हैं, वह भिन्नो हु अभिन्न ॥ ४८ ॥
 नरहरि धर्म धुरंधरो, धरणीधर जगभूप।
 कर्मनाग निरदलन जो, अतिवीरज गुण रूप ॥ ४९ ॥
 पर कहिये बलवान् कौ, सिंह महाबलवान्।
 महाबली नरसिंह जो, पुरुषोत्तम भगवान् ॥ ५० ॥
 स्वैतस्व स्त्रिष्टी सबै, विरचै अततनि तैं जु।
 वही विरंचि न दूसरों, सही वसैं शिव मैं जु ॥ ५१ ॥
 महाकाल हर कष्टहर, महादेव निज देव।
 सो प्रभु महा महेश्वरो, जिन वर देव अछेव ॥ ५२ ॥
 कर्त्ता आत्म भाव कौ, धर्त्ता धृति कौ सोय।
 हर्त्ता सकल विभाव कौ, भर्त्ता जग कौ जोय ॥ ५३ ॥
 गुन अनंत के जोगतैं, जोगी कहिये सोय।
 अतुलित परमानंद कौ, भोगनहारी होय ॥ ५४ ॥
 जोगी भोगी हरि सही, और न जोगी जोग।
 और न भोगी भोग है, करि जन जिन संजोग ॥ ५५ ॥
 सर्वग सर्वज्ञो प्रभु, गुणधर गणधर साथ।
 जयकारी जगदीस जो, सो गणेश गणनाथ ॥ ५६ ॥
 जो गुण गण कौ ईस है, जाकैं ईश न कोय।
 परब्रह्म परमात्मा, परिपूरण प्रभु सोइ ॥ ५७ ॥
 जगनायक शिवनायको, मुनि नायक मुनि भेस।
 विनुनायक परमेश्वरो, अखिल रूप अखिलेश ॥ ५८ ॥
 देव विनायक और नहिं, सोइ विनायक देव।
 नायक देव अदेव कौ, दायक सकल अछेव ॥ ५९ ॥

बुद्धि निवास कुबुद्धि हर, परणति शुद्ध धरेय।
 शक्ति अंगत विनिंदि जो, आप लज्जाल करेय॥६०॥
 शक्तिरूप सद्रूप जो, चिनमूरति चिद्रूप।
 कर्मशत्रु निरनासनो, महारुद्र तद्रूप॥६१॥
 दयावान दैवान जो, धिरचर को प्रतिपाल।
 परमदयाल कृपाल जो, जोगी जुगति विशाल॥६२॥
 सुगत सुगति दातार जो, सुमति कूमति तैं दूर।
 नागर नित्य निरंजनो, निरवाणी भरपूर॥६३॥
 भृथर गोधर गोप्य जो, प्रगट रहित गति च्यारि।
 जाकौं जग जंजाल की, लागै नांहि वयारि॥६४॥
 भुक्ति मुक्ति कौ मूल जौ, गोस्वामी गुणपाल।
 जग जीवन जगनाथ जो, जग त्यागी जगभाल॥६५॥
 केवलज्ञान प्रकाश मैं, सर्व प्रकाशैं जेय।
 आकरषै निजभाव जो, सो निज चेतन धेय॥६६॥
 आकर्षण तैं कृश्र सो, व्यापक विश्व असेस।
 जिज पूज्य जगदीश जो, त्रिशा रहित अलेश॥६७॥
 आराधै आराध्य कौं, निज आराधन सोय।
 सब बाधातैं रहित जो, परणति प्रभु की होय॥६८॥
 निज सत्ता निजभूति जो, ज्ञान चेतना जोय।
 परमाह्लादनि शक्ति जो, रामा रूप न कोय॥६९॥
 द्रव्य थकी नहि दूसरी, द्रव्य हि की परजाय।
 सो राधा परमेश्वरी, परमेश्वर की काय॥७०॥
 सो तामैं प्रभु ताहि मैं, वस्तु अभेद विलास।
 तातैं राधारमण सों, शक्ति व्यक्ति परकास॥७१॥
 गोपै निज मैं निज कला, प्रगटै आपुहि मांहि।
 कला गोपिका जा विषै, विषै रूप सो नांहि॥७२॥

गोपीनाथ अनाथ सो, नित्य विहारी सोच।
 अमित प्रदेश विहारवन, आपुहि माँहें होय ॥ ७३ ॥
 विमलभाव नाटक नटै, नटवा अदभुत जोय।
 नटघरलाल रसाल सो, रंग विहारी होय ॥ ७४ ॥
 प्रभु त्रिभंगी लाल जो, सकल त्रिभंगी भास।
 सप्तभंग प्रतिभास जो, धारै अतुल विलास ॥ ७५ ॥
 एकानेक स्वरूप जो, भेदाभेद प्ररूप।
 नित्यानित्य निरूपको, अस्तित्नास्ति द्वय रूप ॥ ७६ ॥
 हानिवृद्धि तैं रहित जो, जाहि न छ्यापै काल।
 सदा एकस्स देव जो, धिरचर कौ प्रतिपाल ॥ ७७ ॥
 गुण पर्याय स्वभाव जो, सर्व विभाव वितीत।
 अतुल प्रभा अगणित कला, जगनाथो जगजीत ॥ ७८ ॥
 वहिरंगा संगी तजै, अमला कमला पासि।
 सो कमलापति ईस जो, काटै जग की पासि ॥ ७९ ॥
 कमला नाम न और कौ, कमला निज अनुभूति।
 हृदै कमल राजै सदा, आत्मशक्ति प्रभूति ॥ ८० ॥
 नाहि प्रदेश विभिन्न है, कमला अर प्रभु के जु।
 आप वस्तु सो वस्तुता, एक रूप अधिके जु ॥ ८१ ॥
 आप ईश सो ईश्वरी, आप शांत सो शांति।
 आप पद्म पद्मा वहै, आप कांत सो कांति ॥ ८२ ॥
 पद्मा घरणति पद्म की, वसै पद्म कै माहि।
 पद्मनाभ कौ छानि कै, जाय और कहुं नाहि ॥ ८३ ॥
 कमला क्रिया कृपाल की, करता तैं नहि भिन्न।
 कर्ता कर्म क्रिया त्रिधा, एक हि वस्तु अभिन्न ॥ ८४ ॥
 विद्या विभा विशाल की, स्वाभाविक परजाय।
 कर्म कलंकहि नहि लिपै, कमल समान रहाय ॥ ८५ ॥

न्यारी होय न नाथ सौं, नाथ हि कौ बह रूप।
 भामा लारन स्ने पाव, सन स्वप्न अनूप॥८६॥
 जल तरंग दुविधा नहीं, भानु रस्मि नहि भेद।
 तैसे कमला हरि विषै, श्रुति गावै जु अभेद॥८७॥
 रत्न रत्नद्युति भेद नहि, ससि अर जौंह न भेद।
 तैसे चेतन चेतना, एक हि रूप अभेद॥८८॥
 पुरुष न नारि कदापि जे, वस्तु अमूरत शुद्ध।
 चिनमूरत चैतन्य जे, देवी देव प्रबुद्ध॥८९॥
 सब घटमंदिर मैं प्रभु, सदा वसैं निज रूप।
 विरला दरसन पावई, सम्यग्दृष्टि अनूप॥९०॥
 रमैं सकल मैं धीर जो, महावीर गंभीर।
 रमता राम विराम सो, रमा रमण वर वीर॥९१॥
 सुर नर असुर सुखेचरा, चारण चित्त हरेय।
 अति अभिराम सुधाम सो, राम नाम जग ध्येय॥९२॥
 सब क्षेत्रनि मैं रमि रहौ, क्षेत्रपति भगवान।
 क्षेत्री क्षेत्रनिधान जो, अति क्षेत्रज्ञ सुजान॥९३॥
 सिद्धक्षेत्र कौ नाथ जो, सब क्षेत्रनि कौ नाथ।
 क्षेत्र कहावै देह हू, जाकै देह न साथ॥९४॥
 असंख्यात परदेस जो, वस्तु तनों विस्तार।
 सो जिन कौ निजक्षेत्र है, नित्यानंद विहार॥९५॥
 परक्षेत्र जु परद्रव्य हैं, जड़ चेतन बहु रूप।
 मूरत और अमूरता, नित्य अनित्य स्वरूप॥९६॥
 लोक मांहि सब पाइए, न हि अलोक मैं कोय।
 तहां अकेलौ गगन ही, क्षेत्र अनंतौ होय॥९७॥
 लोकालोक समस्त ही, अवलोकै भगवान।
 राखै अवगम उदर मैं, ज्ञायक परम सुजान॥९८॥

स्वपरक्षेत्र पालक प्रभू, क्षेत्रपाल प्रतिपाल।
 क्षेत्र न परि कोय कौ, करुणासिंधु विशाल॥१९॥
 क्षेत्राधिप नहि दूसरी, जिन विन जगत मझार।
 सब क्षेत्रनि में सो वसै, लसै आप में सार॥१००॥
 आप अकेलौ सर्वधर, सर्वेश्वर सब रूप।
 अनेकांत आगम प्रगट, अनुभव रूप अनूप॥१०१॥
 और न दूजो देवता, एक देव अतिभेव।
 केवल भाव प्रभाव जो, परमानंद अछेव॥१०२॥
 क्षमाधार क्षम देव जो, निर्मल सलिल स्वभाव।
 पाप भस्म कर अनल सो, निस्संगी समवाय॥१०३॥
 प्रभु अलिप्त आकाश सो, सोम समो अति शांत।
 अर्क समो अति भास जो, अतुल तेज अतिकांत॥१०४॥
 यज्य यजन यजमान सो, अष्टमूरती देव।
 दिगाधीश दिगपाल जो, सुरनर धारहि सेव॥१०५॥
 सो कमलाधर जगप्रभू, वसै सदा मो मांहि।
 मैं मूरख न्यारो रहौं, मो सम मूरख नांहि॥१०६॥
 वाही के परसाद तैं, खोलू मिथ्या ग्रन्थि।
 तब वासीं विछुरूं नहीं, ध्याऊँ हूँ निरग्रन्थ॥१०७॥
 हृदै कमल पधरायकरि, केवलदास कहाय।
 पूजौं अह्निसि भावकरि, चिंता सकल विहाय॥१०८॥
 रहौं सदा हरि के निकट, तजौं न हरि कौ संग।
 जिन रंगें रत्ता रहूं, तजिकै द्विविधा संग॥१०९॥
 नमो नमो वा देव कौं, द्रव्यभाव मन लाय।
 सब ते न्यारौ होय कैं, सेऊँ वाके पाय॥११०॥
 सेवक सेव्य सुभाव इह, साधकता मैं होय।
 साध्य अवस्था आप ही, और न दूजौ कोय॥१११॥

— छंद नाराय —

प्रकृत्यभाव दूरगो, तू ही जिनो हरो हरी,
प्रभु हिरण्यगर्भ जो, अगर्भ जो परापरी।
महा स्वशक्ति पूरणो, पुराण जो रमापती,
रमा जु नाम भाम नांहि, शक्तिरूप है छती ॥ ११२ ॥

प्रभु विसेस है असेस, शक्ति कौ निवास है,
सुचिद्विलास ज्ञान शक्ति, व्यक्तता विकास है।
अवांतरो महा सुसत्त्व, तू जु है विधिंकरो,
शिवंकरो भयंहरो, तमंहरो दिनंकरो ॥ ११३ ॥

रमावरो उमावरो, जपै जु ताहि माधरो,
सुधातरो मुधाहरो, कहै सुपंथ पाधरो।
सुयोगिनाथ नायको, महामुयोग हायको,
अनायको विनायको, अकायको अमायको ॥ ११४ ॥

अनंतभाव ज्ञायको, सबै जु वात लायको,
महा विमोहघायको, धरै जु बोध सायको।
शिवोभवो धवो सदा, शिवो सही रमा धरो,
विभू प्रभू महाप्रभू, स्वभू अभू क्षमा धरो ॥ ११५ ॥

महा सुदेवदेव देव, है अनंत भेव जो,
नरोत्तमो सुरोत्तमो, धुरोत्तमो अछेव जो।
तुही तुही तुही सही, न तो समोन्य दूज ही,
जहाँ तहाँ लखैं सुसाधु, एक तोहि पूज ही ॥ ११६ ॥

अणाधि को जु आधि को, प्रभु नराधिनाथ को,
विभूतिनाथ नाथ है, सदा जु सर्व साथ को।
परंपरो परापरो, पुराण पूरणो प्रभू,
सही जु तीर्थंकरो हितंकरो महाविभू ॥ ११७ ॥

प्रभा प्रभूर केयरी, अनाद्यन्त ज्ञायको,
सुरासुरा सुपायको, दयाल देव नाथको।
जनोत्तमो जिनोत्तमो, जितोत्तमो जगोत्तमो,
परोत्तमो पुरोत्तमो, गुरोत्तमो वरोत्तमो ॥ ११८ ॥

चिदात्म है सुखात्म है, अनंत भाव आत्म है,
भवांत है अघांत है, तमांत है परात्म है।
सुव्यापको अव्यापको, महामुनी अलिप्तजो,
सदा समाधि रूप नाथ, धीरवीर त्रिप्त जो ॥ ११९ ॥

निरीह जो नृसीह जो, अवीह जो निरीश्वरो,
मुनीश्वरो अनीश्वरो, प्रभास्वरो यतीश्वरो।
सही जु राम नाम है, विराम हे अकांम है,
अनांम है सुधांम है, अनंत नाम ठाम है ॥ १२० ॥

नही जु और कांम को, वही जु एक कांम को,
प्रभु अनेक ग्राम को, धनी अनंत दाम को।
सुसिद्ध है प्रसिद्ध है, विरुद्ध काँ विनास है,
सही जु अर्हदेव है, अनंतज्ञान भास है ॥ १२१ ॥

सुसूरि है प्रभूरि है, दिव्या शिष्या प्रदायको,
अध्यातमी अध्यापकों, अलोक लोक ज्ञायको।
सुसाध है अगाध है, असाध को असाध्य है,
सुसाध्य है असाध्य है, उपाधिनां अवाध्य है ॥ १२२ ॥

प्रजापती सुगोपती, सदा सुगोरखोजती,
तु ही अनंत बोध दे, सुदत्त है धरापती।
अमूरती असूरती, अधूरतो निरंतरो,
महा अनंतमूरतो, विभाव हैं अनंतरो ॥ १२३ ॥

अद्वैत भाव मुक्त जो, सद्वैत भाव मुक्त जो,
अनेक एक दोय रूप, है अरूप युक्त जो।
निराकृति जु साकृति, विशेष भाव देव जो,
स्वभाव भाव रूप जो, सुभूप है अछेव जो ॥ १२४ ॥

सदा सुबुद्धिराधिका, पती मुनीश ईश जो,
सवै कुबुद्धि खंडनो, महाद्वती अतीश जो।
सुविप्रवर्ण तारणो, जु क्षत्रि वंश धारणो,
सुवैश्य वंसतारणो, त्रयी उधार कारणो ॥ १२५ ॥

जु पुंस नारि औ नपुंस, शूद्र हू सुधारणो,
सुरासुरा सुनारकी, पसुगणा उवारणो।
सही अनादिनाथ है, मुनिंद आदिनाथ जो,
प्रभु युगादि देव है, सदा जु सर्व साथ जो ॥ १२६ ॥

महायती अजीत जो, असंभवो सुशंभवो,
सदाभिनंदनो जिनो, मतीश नाथ ब्रंभवो।
सुपद्मनाभ पद्मजोनि, पद्मनाथ धीर जो,
सही सुपास है प्रभु, रहै जु पास वीर जो ॥ १२७ ॥

सुचन्द्रनाथ चन्द्रधार, चन्द्र कोटि ज्योतिसो,
अनंत ज्योति धार जो, अगां सूरि छोटि सो।
सुकुंद पुष्प तुल्य दंत, पुष्पदंत कंत सो,
सुशीतलो श्रियंकरो, श्रियांसनाथ संत सो ॥ १२८ ॥

सदा सुवास देव पूज्य, वासुपूज्य देव जो,
सुनिर्मलो अनंत जो, सुधर्मनाथ सेव जो।
प्रभू जु शांतिनाथ जो, प्रशांत सर्वकारनो,
विभू जु कुंथवादि जीव, रासि कष्ट टारनो ॥ १२९ ॥

सुकुंथनाथ कीटनाथ, चक्रनाथ देव जो,
अरो अजो रजो हरो, हमैं जु देहु सेव जो।
त्रिलोकनाथ मल्लनाथ, मोह मल्लजीत जो,
अनंत जीत है अजीत, सुव्रतो अतीत जो ॥ १३० ॥

मुनि सुव्रत दायको, प्रभू धनी सुव्रत को,
नमैं सुरासुरानरा, नमीशनां अव्रत को।
नही जु कृष्णभाव सो, सही जु कृष्ण रूप सो,
सदा जु कृष्ण ध्येय है, सु नेमिनाथ भूप सो ॥ १३१ ॥

सदा जु पासनाथ जो, रहै नजीक नाथ जो,
 महा सुवीरनाथ जो, अतिंत धीर नाथ जो।
 सदाजु बद्धमांन जो, नहीं जु हीयमांन जो,
 मतिकरो गतिकरो, जु सन्मती अमांन जो॥१३२॥
 इत्यादि अनंत नाम, देव वीतराग जो,
 पुनीत है अनंत धाम, वाहि सौं जु लाग जो।
 महा विदेह खेतरी, अखेतरी अनेक जो,
 अनादि है अनंत रूप, तीर्थनाथ एक जो॥१३३॥
 नमो नमो जु अहं सिद्ध केवली निरंजना,
 गणाधिपा श्रुताधिपा, व्रताधिपा अरंजना।
 सुरंजना सबै जु लोक, भारती जिनोद्धवा,
 मुझे जु देहु शुद्ध तत्त्व, ईश्वरी मुखोद्धवा॥१३४॥

— दोहा —

सर्वग के मुख तैं भई सदा सारदा देवि।
 वहाँ ईश्वरी भारती सुर नर मुनि जन सेवि॥१३५॥
 अक्षर जो न क्षरै कभी, प्रभू अक्षरातीत।
 सोई अक्षर बांवनी प्रकट करै जग जीत॥१३६॥
 तेतीसों बिंजन कहै, सुर चौदा सब होय।
 जिह्वा मूली पुलतअर, गज कुंभाकृति जोय॥१३७॥
 अनुस्वारो जु विसर्ग है, ए सब बांवन अंक।
 संयोगी द्वित अक्षरा, सब कौ प्रगट शिवांक॥१३८॥
 सब अक्षर के आदि ही, राजै प्रणव स्वरूप।
 ॐकार अपार प्रभु, आपै आप अनूप॥१३९॥
 सो अक्षर नहि और है, अक्षर रूप सुआप।
 तातैं ॐ आप है, हरै सकल संताप॥१४०॥
 देव शास्त्र गुरु की कृपा, तातैं आनंद पूत।
 भाषै अक्षर बांवनी, नमि जिन मुनि जिन सूत॥१४१॥

आगै प्रणव स्वरूप भगवान् कीं नमस्कार करि, अध्यात्म बारहखड़ी
 आरंभियै है॥६॥

— श्लोक —

प्रणवं प्रथमं वंदे, यज्जिनेन्द्रैक शाशनं।
सर्वाक्षर प्रजा यस्य, राजते श्रुति वर्द्धिनी ॥ १ ॥

— दूहा —

वंदौ श्री भगवान् कौं, श्रीवल्लभ जो देव।
श्रीधर श्रीपरणति धरे, प्रणव रूप अतिभेव ॥ २ ॥
प्रणवो प्राण वहै प्रभु, राजै श्रुति की आदि।
प्रणव समांन न और है, भगवत रूप अनादि ॥ ३ ॥

— चौपड़ी —

ॐ कार परमरस रूप, ॐ कार सकल जगभूप।
ॐ कार अखिल मत सार, ॐ कार निखिल ततधार ॥ ४ ॥
ॐ कार सबै जपमूल, ॐ कार भवोदधि कूल।
ॐ कार मयी जगदीश, ॐ कार सुअक्षर सीस ॥ ५ ॥
ॐ दरसी श्री भगवंत, ॐ परसी मुनिवर संत।
ॐ ध्यायक श्रीपति स्वांमी, ॐ ज्ञायक अंतरजामी ॥ ६ ॥
ॐ भासक श्री जिनदेव, ॐ विथरित गणधर देव।
ॐ कार जिनागमसार, ॐ धारण मुनिवर धार ॥ ७ ॥
ॐ कार महाअघनाश, ॐ कार सकल श्रुति भास।
ॐ भेद न जानै मूढ़, ॐ कार परमपद गूढ़ ॥ ८ ॥

— छंद बेसरी —

ॐ सम को मंत्र जु नाहीं, पंच परम पद याकै मांहीं।
ॐ मंत्र जु भगवत रूपा, ॐ श्रुति संमृति को भूपा ॥ ९ ॥
ॐ मृत्यु काल जे ध्यावैं, ते उरध गति निश्चय पावैं।
ॐ ध्यावत प्राण जु त्यागैं, ते सदगति कौं माग लागैं ॥ १० ॥
ॐ अक्षर सीस विराजै, ॐ मय जिनवर धुनि गाजै।
ॐ एकाक्षर मंत्र जु भाई, मेदि जु भवधिति शिवहँ मिलाई ॥ ११ ॥

सकल त्यागी जे आसा पाशा, मोह त्यागि जे हौंहि निरासा ।
 ते साधु याकौ तत पावैं, या विनु जग जन जनम गुमावैं ॥ १२ ॥
 प्रणवा सकल ग्रंथ कै आदी, इह प्रणवा है तंत्र अनादी ।
 महा मुनीश्वर यामैं लागैं, याकौ पाय परम रस पागैं ॥ १३ ॥
 तीन वरण करि प्रणव कहाया, अवरण उवरण मम्मि लिभाया ।
 पंच इष्ट हैं याके मांही, इष्ट मंत्र या सम को नाहीं ॥ १४ ॥
 करि कुंभक जिन प्रणव जु ध्यायो, तित निर्वाण पुरी पथ पायो ।
 प्राणायाम जु तीन स्वरूपा, पूरक कुंभक रैचक रूपा ॥ १५ ॥
 ॐ स्वेत वर्ण जे ध्यावैं, लबधरि चित्त न कहूँ वहांवैं ।
 ते पावैं निज शुद्ध स्वरूपा, ब्रह्म बीज है प्रणव अनूपा ॥ १६ ॥
 सुवर्ण वर्ण प्रणव जे ध्यावैं, स्तंभन हेतु सवैं श्रुति गावैं ।
 पवन चित्त ए दोऊ थंभै, दोऊ थंभी जु शिव उपलंभै ॥ १७ ॥
 रंग सुरंग सु ॐ मंत्रा, ध्यायें होय वशीकृत तंत्रा ।
 और न काहू कौ वसि पारै, मनहि वशी करि निज मैं धारैं ॥ १८ ॥
 स्याम रंग इह प्रणव जु ध्यायौ, शत्रु नाश कर जिनहि बतायौ ।
 जीव तणों अरि कोई न जीया, रागादिक अरि हौंहि सदीवा ॥ १९ ॥
 रागादिक नाशन कै हेतू, प्रणव स्याम कौ ध्याय सचेतू ।
 स्वेत ध्याय है शुक्लजु भावा, शुक्ल जु ॐ शुक्ल उपावा ॥ २० ॥
 ॐ कार निरंजन रूपा, ॐ कार सकल श्रुति भूपा ।
 ॐ कार निधान अनूपा, ॐ कार प्रधान निरूपा ॥ २१ ॥
 ॐ वर्जित तंत्र न सोहै, ॐ वर्जित मंत्र न मोहै ।
 ॐ विनु जंत्र न बल फोरै, ॐ विगारि न पातिग तोरै ॥ २२ ॥
 ॐ विनु विद्या नहि आवै, ॐ विनु गुरु नाहि पढावै ।
 ॐ विनु न बखान उचारै, ॐ विनु कछु धर्म न धारै ॥ २३ ॥
 ॐ विनु वर्णाश्रम नाहीं, ॐ ध्यान निराश्रम मांहीं ।
 बिंदु युक्त ॐ कारो साधू, ध्यावैं मुनिवर तत्व अराधू ॥ २४ ॥

आगम सरवस ॐ कारा, ॐ कार करण भवपारा।

ॐ अमृत और न कोई, इह जु सुधातर अदभुत होई ॥ २५ ॥

महाभाग इह अमृत चाखै, महाभाग इह निधि दिढ राखै।

ॐ कार सकल ऋषि साखै, ॐ नमि आनंदज भाखै ॥ २६ ॥

इति प्रणव स्तुति। आगे श्र अक्षर श्रीकार है ताकी द्वादस मात्रा कहै है।

— श्लोक —

श्रमणं श्राद्ध निस्तारं, श्रियोपेतं च श्रीधरं।

श्रुतीशं श्रूयमाणं च, श्रेयं पुंजं यशस्करं ॥ १ ॥

श्रैमतागम पारीणं, श्रोत्रीन्यारकरं विभुं।

श्रौत धर्म प्रणेतारं, श्रयंकं श्रस्कारकं भजे ॥ २ ॥

— दोहा —

श्रमणाधिकतर श्रमणगुर, श्रमणधुरंधर देव।

श्रमण कहैं मुनिराय कौं, श्रमण करैं प्रभु सेव ॥ १ ॥

श्रमहर भ्रमहर भ्रांतिहर, प्रभु श्रयणीय विशेष।

जाकौं श्रम उपजैं नहीं, तारै भक्त असेश ॥ २ ॥

श्रवण सु जाके गुननि कौं, करै भवोदधि पार।

श्रवण रहित ते वधिर हैं, सुनैं न प्रभु गुन सार ॥ ३ ॥

श्रद्धा द्रिढ धरि धीर धी, सेवैं प्रभु कौं जेहि।

श्रम विनु उधरैं जगत तैं, पावैं निजपुर तेहि ॥ ४ ॥

श्रद्धा करि सेवैं श्रमण, स्वगवनितादिक त्यागि।

श्रद्धा करि पूजैं हरी, गावैं गुन अनुरागि ॥ ५ ॥

श्रय रे जन जगदीस कौं, श्रय श्रय वारंवार।

अवरसकल भ्रमजार तजि, धरि भगवंत आधार ॥ ६ ॥

श्रगधरादि छंदनिकरी, धुतिकरि हरि की धीर।

जिन करि तेरी भ्रम मिटै, छुटै वंचतै वीर ॥ ७ ॥

— श्रावण छंद —

श्रद्धादैं श्राद्ध देवाश्रित जु करि प्रभू श्रीपती तू श्रुतीश।
 श्रुयंते नाथ तेरे अगणित सुगुणा श्रेयरूपामतीश॥
 श्रैमत्सिद्धांत भासैं सकल रस तु ही शुद्ध श्रोता मुनीश।
 स्वामी तू श्रौत श्रृंग श्रुति स्मृतिकरा श्रयंक शंस्कार ईश॥ ८ ॥

श्रयकैं जिनकी भक्ति तू, श्रष्टा को धरि ध्यान।
 स्वज वनिता सब त्यागि कै, करि विनती सज्ञान॥ ९ ॥

श्रद्धा तेरी मोहि भक्त अनेकनि कौं दई।
 तैसी दै जगमौर दै, श्रद्धा सम नहि और॥ १० ॥

श्राद्ध नाम् श्राद्ध परम, जे हैं श्राद्ध महंत।
 आराधैं तन मन करी, ते तौकौं हि लहंत॥ ११ ॥

श्राद्ध होय तुव गुन रटैं, देहि न काहू श्राप।
 उणमणि मुद्रा जे गहैं, लहैं न ते त्रय ताप॥ १२ ॥

श्राप दिवैं करुणा नसैं, करुणा विनु नहि भक्ति।
 श्राप न तातैं भक्त दे, हैं जिनमें अति शक्ति॥ १३ ॥

श्रावक धर्म प्रकाश तू, मुनिमत धारक देव।
 जीव दया प्रतिपाल तू, करुणा सिंधु अछेव॥ १४ ॥

श्रांत भयौ भव वन विषै, नहि पाई विश्रांति।
 दै विश्राम दयाल तूं, शांतरूप अतिक्रान्ति॥ १५ ॥

श्रावण भाद्रपदादि में, चातुर्मासिक व्रत।
 धारैं तेरे दास प्रभु, तो करि व्रत-प्रव्रत॥ १६ ॥

श्रियोपेत स्वामी परम, तूं हि श्रियंकर नाथ।
 स्त्रिष्टि तजैं स्वष्टा भजैं, तब पावैं मुनि साथ॥ १७ ॥

श्रित जु अनेक उधारिया, श्रितवत्सल तू देव।
 मोहू करि श्रित आपुनीं, देहु निरंतर सेव॥ १८ ॥

श्रीधर श्रीवर देव तू, श्रीनिवास श्रीपात।
 श्रीविलास श्रीराम तू, श्री जिन श्रीपति ख्यात॥ १९॥
 श्रीश्रित पादांबुज प्रभू, श्रीप्रधान श्रीमान।
 श्री तेरी अनुभूति है, निजविभूति भगवान्॥ २०॥
 श्री नहि तोतैं भिन्न है, तू नहि श्री तैं भिन्न।
 श्री स्वभाव पर्याय है, तू है द्रव्य अभिन्न॥ २१॥
 श्री अंतर भरपूर तू, बहिरंगा तैं दूर।
 बहिरंगा है नश्वरी, जगमायाभक्तभूर॥ २२॥
 श्री तेरी अविनश्वरी, श्री नहि त्रिय की जात।
 तू पुरुषोत्तम पुरुष नहि, पूरण परम उदात्त॥ २३॥

- छंद वेसरी -

तू श्री पालक जगत प्रपाला, श्री विश्राम सकल भ्रमटाला।
 तैं श्रीपाल उधारे केई, ते उधरैं जे तोकों लेई॥ २४॥
 श्री ही धृति कीरति बुधिराया, कमलादिक सेवैं तुव पाया।
 तू श्री बीजभूत भगवाना, भक्त उधारक भूप अमाना॥ २५॥
 श्री गुरु कृपा होइ जब देवा, तब पावैं जन तुम्हरी सेवा।
 श्रुणु देवाधिदेव भगवंता, तेरे गुन कौं नाहि जु अंता॥ २६॥
 तेरे श्रुत करि अगनित सीझे, भवभ्रम छांडि सु तोसैं रीझे।
 जब लग जन तोकों नहि पावैं, तब लग आसादास कहावैं॥ २७॥
 तेरौ रहसि लहैं जब देवा, गहैं आपुनैं रूप अभेवा।
 श्रुत परसाद सु केवल लैकैं, आवैं तुव पुरि जग जल दैकैं॥ २८॥
 श्रुतिधारक श्रुतिकारक देवा, श्रुतिपारग श्रुतिमारग सेवा।
 श्रुतिसागर श्रुतिआगर नामी, श्रुतिनायक श्रुतिदायक स्वामी॥ २९॥
 श्रुति उल्लेखक केवलरूपा, श्रुतिकेवलि गावैं जस भूपा।
 तू भावश्रुति द्रव्यश्रुती नां, तैं द्रव्यश्रुति प्रगट जु कीनां॥ ३०॥

श्रुति सुनि जिन तू ध्यायो नाहीं, ते श्रुत वर्जित बधिर कहाँहीं ।
 श्रुति संमृति अर सकल पुरांनां, प्रगट किये तू पुरुष पुरांनां ॥ ३१ ॥
 तेरौ श्रुत अमृत जगराया, पीवैं ते हैं अमरन काया ।
 शुधनाण जस तेरौ स्वांमी, मध जल पार करै शिवधामी ॥ ३२ ॥
 श्रूय जु पाणा तुव जस जीवा, शुद्ध स्वरूप हौंहि जगदीवा ।
 श्रेय नाम तेरौ ही एका, श्रेय करै दुख हरै अनेका ॥ ३३ ॥
 तू श्रेयांसनाथ अति श्रेयो, श्रेष्ठ सकल मैं सबकों प्रेयो ।
 श्रेयकरण अवहरण जु तू हीं, सरण गहैं मुनि गुन जु समूही ॥ ३४ ॥
 श्रेणि जु कहिये पंकति नामा, गुण पंकति तोमैं अभिरामा ।
 उपशम श्रेणी क्षपक जु श्रेणी, तू हि प्रकासै मुक्ति निसेणी ॥ ३५ ॥
 श्रेणिकनाथ श्रेणि सेयो तू, श्रेणि उलंघक मुनि ध्येयो तू ।
 श्रेष्टी बहुत उधारे तैं ही, तोकों अतिगति विरद फवैं ही ॥ ३६ ॥
 श्रेमत आगम तुम्हरौ स्वांमी, तुम श्रीमत श्रीपति गुण धामी ।
 श्रेमत अध्यात्म जे भावैं, ते निज आतम राम हि पावैं ॥ ३७ ॥
 श्रोता तेरे तिरे अपारा, तू वक्ता तारै संसारा ।
 श्रोत्रिय विप्र गणा बहु तारे, क्षत्रि गणा बहु तैंहि उधारे ॥ ३८ ॥
 श्रोणित आंमिष अस्थि अलीना, इन हि भरवैं ते हौंहि मलीना ।
 श्रोणित रुधिर तनों है नामा, तेरै रुधिर न अस्थि न चामा ॥ ३९ ॥
 तू अप्राकृत आनंद रूपा, अंबर रहित दिगंबर भूपा ।
 श्रौत समार्तक धर्म प्रकासा, तू पौराणिक सकल विकासा ॥ ४० ॥
 श्रौत धर्म तैं विमुख विमूढ़ा, श्रौताभास धरैं मत रूढ़ा ।
 तेरी भक्ति न उर मैं आनैं, करुणा रहित कर्म बहु ठानैं ॥ ४१ ॥
 ते बूडैं भव सागर मांहीं, तो विनु धर्मरेति कहैं नांहि ।
 श्रयंक देव तु ही श्री अंका, तो विनु और सबैं जग रंका ॥ ४२ ॥
 शृंग जू गिर कैं चढि मुनि ध्यानी, धरैं जे तेरौ ध्यान अमांनी ।
 ते जगशृंग तत्त्व तुव पावैं, लोक शृंग चढि तुव पुरि आवैं ॥ ४३ ॥

तू शृंगार विवर्जित स्वांमी, निज शृंगार मई अभिरांमी।
 सब शृंगार तजैं जे साधू, तेरे काजि हौंहि आराधू ॥ ४४ ॥
 शृंखल भव की ते भवि तौरैं, तैर पुरि आवैं तुव जौरैं।
 तैरैं शृंखल नांहि प्रभूजी, निरखंधन तू जगत विभूजी ॥ ४५ ॥
 उतशृंखल तोकों नहि पावैं, ते पावैं जे भ्रांति नसावैं।
 तेरी शृंखल मांहि सर्व ही, तोतैं कर्म कलंक दवै ही ॥ ४६ ॥
 शृंगवेर आदिक बहु कंदा, तजि करि ध्यावैं पाप निकंदा।
 सब रस तजि तैर रस लागैं, तव निश्चल हूँ तोमहि पागै ॥ ४७ ॥
 स्वंस नाम विध्वंस न ताकौ, होवै देव नाथ तू जाकौ।
 श्रः कहिये इह अंतिम मात्रा, तू सब मात्रा मांहि अगात्रा ॥ ४८ ॥

अथ द्वादश मात्रा एक कवित्त में —

सुनिकैं द्वादस मात्रिका, तजिकैं द्विदश अव्रत्त।
 तपिकैं द्वादश तप विधी, धरिकैं द्वादस व्रत्त ॥ ४९ ॥
 तोहि जपैं जग नाथ जी, ते उतरैं भवपार।
 भुक्ति मुक्ति दाता तू ही, अविनासी अविकार ॥ ५० ॥

अथ द्वादस मात्रा एक कवित्त में —

प्रणव स्वरूप तू ही श्रमण उधारक है,
 श्राद्ध होहि तोहि भजैं वंस के उजागर।
 तू तौ श्रितवत्सल जू श्री निवास लायक है,
 शृणु एक वीनती सुतारि भवसागर।
 श्रूयमाण तेरे जस श्रेय के समूह करैं,
 श्रैमत जो आगम है ऋद्धि सिद्धि आगर।
 श्रोतानि कौ तारक तू श्रौतपंथ भासक है,
 लोक शृंग श्रः प्रकास नवल सुनागर ॥ ५१ ॥

— दांहा —

श्रीजु कहैं संपति कहैं, कमला कहैं निसंक।
भाषा मैं दोलति कहैं, निज सत्ता जु अकंप ॥५२॥
इति श्री अक्षर संपूर्ण। आगैं अकार स्वर का व्याख्यान करै है।

— श्लोक —

अनादि निधनं वंदे, स्वधनं धन दायकं।
सुभक्षं लक्षणोपेत, मम राम रमीश्वरं ॥१॥

— सोरठा —

अ कहिये श्रुति मांहि, हरि हर कौ इह नाम है।
तो विनु दूजौ नांहि, हरि हर जिनवर देव तू ॥२॥

— छंद वेसरी —

अणीयान अणु हू तैं स्वामी, महीयान नभ हू तैं अतिनामी।
अमल अनूपम प्रभु चिद्रूपा, अकल अरूप भूप सद्रूपा ॥३॥
अचल अमूरत अमृत कृपा, अतुल अनंत सुमूरत रूपा।
अध्यात्म अति शुद्ध स्वरूपा, अनुभव रूपी तत्त्व प्ररूपा ॥४॥
अति अनंत गति देव अजीता, भव संतान अनंत विजीता।
अर्द्ध मात्र नांही अर कोई, अति निरवैरी अति छति होई ॥५॥
अर्द्ध जु नारीश्वर तू व्यक्ती, नाम नाम गुन गुन मैं शक्ती।
अमित चक्षु तू ईश्वर स्त्रिष्टी, अति सुपक्ष तू केवल दृष्टी ॥६॥
अतुल पराक्रम धारी राया, अपन अतिंद्री ज्ञान सुभाया।
अति अनंत सुखपिंड अखंडा, अर अपिंड परचंड अदंडा ॥७॥
अपर प्रकाश अनंत विलोकी, लोकालोक लखै अवलोकी।
अचल लब्धि कौ तू ही ईशा, प्रभू अयोनीसंभव (तू) धीशा ॥८॥
अकषाई तू अतिहि पुनीता, अनगारा ध्यावैं सुविनीता।
दान अनंत अनंत सुलाभा, भोग अनंत अनंत महाभा ॥९॥

अति अनंत उपभोगा तैरे, अति अनंत वीरज प्रभु नैरे।
 असम महासम स्वांमी तू ही, तेरी समता तूहि प्रभु ही॥१०॥
 अति अनंत विकल्प हरि मेरे, ह्वै अविकल्प भजौ पद तेरे।
 संकलपा अर सकल विकलपा, तैरे एक न तू हि अकलपा॥११॥
 अवनीपति तू परम अतीता, अलख अलेसी देव प्रतीता।
 सुख जु अतिंद्री देहु सु मोकों, धोकों द्रव्य भाव करि तोकों॥१२॥
 अजर अमर अज अति धिर रूपा, अचर अचार अकर अतिभूपा।
 अटल विहारी सकल विहारा, अविहारी कित हू न विहारा॥१३॥
 अति जग भूषन दूषन दूरा, असरण सरण दयानिधि पूरा।
 अर अशेष अविशेष गुसांई, तूं हि अमृत्यु अकाल असांई॥१४॥
 अति अचिंत्य अविनासी नांमी, चित्तऊँ कैसैं तोकों स्वांमी।
 अलं अलं पूरण अत्यर्था, तैरे नांही एक अनर्था॥१५॥
 अर्थ न एक अनर्थी तूं ही, तू हि सुअर्थी अर्थ समूही।
 अर्थ सकल ए जग के झूठे, तैरे अर्थि जती जग रूठे॥१६॥
 अदभूत देव तिहारी सोभा, तुम अधिके सवतैं विनुक्षोभा।
 अभू स्वभू परमेश्वर तू ही, विभू प्रभू तू सर्व समूही॥१७॥
 अति अनंत दीपति भगवंता, अग्रअग्रणी श्री विलसंता।
 अरज विरज अरुजो तू नाथा, अच्युत देव अवस्थित साथी॥१८॥
 अनुभव देहु मोहि सुखरासी, तू अनुभूति स्वरूप विभासी।
 अति संगी तू देव असंगा, अतिरंगी तू नाथ अरंगा॥१९॥
 अति अधर्म नासैं तुव नांमैं, नसैं अकर्म वदुरि नहि जांमैं।
 अति धर्मी तू धर्म स्वरूपा, अवनी आधिक क्षमाधर भूपा॥२०॥
 अप तैं अधिक अमल तू राधा, अनुभव अमृत रूप सुभाया।
 अधिक अनल तैं तेज अनंता, अनिल अधिक बल चिदघन संता॥२१॥
 अर अकास तैं अधिक अलिता, अस्थल अनूप अतुल्य प्रगिता।
 अहो अहिंस्य अहिंसक स्वांमी, सदा अहिंसा रूप सुनांमी॥२२॥

अनृत अदत असील निवारा, अबलरहित अकिंचन धारा।
 अदयाभाव न तेरे होई, नहीं असत्य कहै तू कोई ॥ २३ ॥
 अमरण अकरण थिरचर पाला, अक्षय अव्यय अति अधटाला।
 अजित महा अभिनंदन देवा, अमर अमरपति धारहि सेवा ॥ २४ ॥
 अप्राकृत असंस्कृत है तू, संस्कृती प्राकृत कहै तू।
 अवधि अगम्य सुरम्य महा तू, अपर अपार कहूं न फहा तू ॥ २५ ॥
 अधिकाधिक्य अधिक्ता नू ही, तू ही अधीस मुनीश अदूही।
 अविज्ञेय अवितर्क अमोघा, तो विनु और सबै जग मोघा ॥ २६ ॥
 अधिपति तू अहिपति कौ ब्राता, अधिप तू ही अस्तिति को घाता।
 अरि रागादिक नासक है ही, असुर न इनसे और कवै ही ॥ २७ ॥
 अणुब्रत अवर महाब्रत भासै, तू हि विकासै पाप प्रनासै।
 अध्यातम विनु तू नहि लैये, अमरासुर पुजित तू कैये ॥ २८ ॥
 अब्रतनासक ब्रत प्रकासा, शुभ न अशुभ तू शुद्ध विभासा।
 अक्षर तू अक्षर तैं न्यारा, प्रभू अक्षरातीत सुप्यारा ॥ २९ ॥
 अग्रज अग्रेश्वरो मुन्यों कौ, धीर धनेश्वर धनी धन्यों कौ।
 अरुचि असुचि काया तैं जाकी, भक्ति रूप है बुद्धि जु ताकी ॥ ३० ॥
 अतिरस अपरस अरस अगंधा, अवरण अरिण सुअरण अबंधा।
 शब्दातीत अभीत अशब्दा, अति भवदाह बुझावन अब्दा ॥ ३१ ॥
 अक्ष न पक्ष न कभी अघों की, रक्षा करै सदा सु सबों की।
 अमन अतन तू अतनु प्रहारी, प्रभु अलंग अभंग विहारी ॥ ३२ ॥
 अक्रोधी अभिमान वितीता, अभय अनारज भाव अतीता।
 असत अमत अततनि तैं न्यारा, अति शुचि अति ही पवित्र सुप्यारा ॥ ३३ ॥
 अपवित्र न पावैं प्रभु सेवा, नही असंयम रूप सुदेवा।
 अति तप अति त्यागी अति भागी, भजैं अकिंचन साधु विरागी ॥ ३४ ॥
 अति सुशील अति ही सुखदाई, नही अनीति अरीति न भाई।
 अविनय अनय तजैं ए जीवा, तव तोकों पावैं सुखपीवा ॥ ३५ ॥

अभयंकर अतिज्ञाता दाता, अति दुल्लभ अति वल्लभ त्राता ।
 अतिशयधर अभिप्राय जु जानै, अति पावन अति ही सुख मानै ॥ ३६ ॥
 अतिभावन तूं पाप नसावै, अज्ञ अपावन तोहि न गावै ।
 नादि अमंत अकर्तृम आषा, अत्युत्तम अनिधन निहंपापा ॥ ३७ ॥
 अर्कपती अमरेस्वर गावैं, अहमिंद्रा पूजैं मुनि ध्यावैं ।
 नहीं अविद्या तैरे काई, ब्रह्म सुविद्या दै सुखदाई ॥ ३८ ॥
 अतिहि अमल केवल अवबोधा, अखिल स्वभावमई प्रतिबोधा ।
 अखिल सुचक्री अर्द्ध जु चक्री, तोहि जु पूजैं तू अतिचक्री ॥ ३९ ॥
 अभिधाता अभिधान अहेया, तू अभिध्येय स्वज्ञेय सुसेया ।
 अमति अश्रुति अगतिन कौं तारे, अज्ञानादिक अवगुण टारे ॥ ४० ॥
 अतिगति देव अगति गति देवा, अतिपति नाथ न जाणूं भेवा ।
 अति युगईश अतुल युग खेवा, अतिजित जीत न सकिहौं सेवा ॥ ४१ ॥
 अतिशय सागर अतिशयरूपा, अतिजस अपजस रहित स्वरूपा ।
 अठविध योग प्रकाशक ईशा, अठविध कर्म रहित जगदीशा ॥ ४२ ॥
 दोष अठारा रहित विराजै, अवस अवास अनंवर गाजै ।
 गुण अठविंसति धारै जोगी, तोतैं सीखे रीति अलोगी ॥ ४३ ॥
 अठ्ठीसा हैं जीव समांसा, सबकौं पालक प्रभू अनांसा ।
 अठतालीस अधिक सौ सर्वा, प्रकृति नहि तैरे नहि गर्वा ॥ ४४ ॥
 अठावन उपरि हू सौ हैं, प्रकृतिन जीतैं अगणित जौ हैं ।
 तैरे प्रकृती एक न पैए, प्रकृति रहित तू अजड़ बतैए ॥ ४५ ॥
 अडसठि तीरथ भौतिक न्हांवैं, तो विनु शिवपुर पंथ न पावैं ।
 अठहत्तरि के आधे देवा, ऊरध लोकनि के हैं भेवा ॥ ४६ ॥
 नहि जाचौं जाचौं पद तेरे, दै निजपुर भ्रमण हरि मेरे ।
 असी करौ मोसौं जिनराया, नई नई नहि धारौं काया ॥ ४७ ॥
 अठयासी आधे चाँवाली, दोष ज्ञान के सब तौं टाली ।
 अठमद त्रय मूढत्व निकिष्टा, षट जु अनायतना मल अष्टा ॥ ४८ ॥

सप्त विसन अर हरि भय सप्ता, अतीचार पांचौं अघलिप्ता।
 ए अठयासी आधे टारौ, अठ्याणव भेदनिर्तारौ ॥ ४९ ॥
 अठ्याणव हैं जीव समासा, अठतीसनि के भेद प्रकासा।
 मूलभेद त्रस थावर प्रांती, तिनके भेद सकल ए जानी ॥ ५० ॥
 इनको रक्षक करि प्रभु मोकों, अपनी वास देहु पद धोकों।
 अहोतर सौ ऊपरि स्वांमी, मणियां माला के अभिरांमी ॥ ५१ ॥
 तेरी मंत्र जु पावै कोई, सो पावै शिव तोमय होई।
 तू अनेक अर एक असंख्या, प्रभू अनंतानंत अकंख्या ॥ ५२ ॥
 वर्णन कौलग कीजै सांई, अव्यय पद दै अटल असांई।
 अनाकार अविगत सुअनाश्री, भक्त वच्छिलत है जनिजाश्री ॥ ५३ ॥
 अवर अनहं अयोज अयूज्या, अहं योज तू पूजा योज्ञा।
 अहं न अरिहंता अरिजीता, श्री अरहंत अतिंत अजीता ॥ ५४ ॥
 अविवादी तू स्याद जु वादी, द्वयवादी अध्यात्मवादी।
 अस्ति नास्ति अर नित्य अनित्या, सब नय भासै ईश्वर नित्या ॥ ५५ ॥
 अनाहार अनिहार अवस्त्रा, प्रभु अनायुध रहित जु शस्त्रा।
 अभू अभूषन विभू अदूषा, अहो दिगंबर प्यास न भूषा ॥ ५६ ॥

— छंद —

अगणित जीवा तारे तैंही, अगणित कर्मा टारे।
 अगणित भावा हैं तोमैं ही, अगणित परणति धारे ॥ ५७ ॥
 अहो अरण्य वसैं मुनिराया, कैसैं बचन मन काया।
 राया तुझसैं नेह लगाया, तूं ही अमाया काया ॥ ५८ ॥
 अहोरात्रि ध्यावैं जोगीसा, भोगीसा गुन गावैं।
 अमित अहोकर तेज अतीसा, महा निसाहर भावैं ॥ ५९ ॥
 अर्चित तेरी अर्चा अर्चै, चरचा तेरी चरचै।
 अमर अपछरा सुर धरि सुरचैं, साधु परचि जग विरचैं ॥ ६० ॥
 अकाल अनेहा हरइ जु देहा, सब जीवनि की देवा।
 काल रहित करि प्रभू विदेहा, दै साहिब निज सेवा ॥ ६१ ॥

अणुखंधा सब तूहिं प्रकासै, तू न अणूं नहि खंधा ।
 केवल दर्शन ज्ञान विकासै, विभू विभूति प्रबन्धा ॥ ६२ ॥
 अन्न औषधी शास्त्र जु अभया, दांन अनेक बतावै ।
 अति दांनी अति ज्ञानी सदया, सकल सुरीति जतावै ॥ ६३ ॥
 अन्न पांन की छांण बीण विधि, सकल अचार बखानै ।
 नहीं अहार बिहार महारिधि, रहै अनंतर ध्यानै ॥ ६४ ॥
 अविधि न अवुधि न अव्यावाधा, विधि वुधि हू नहि पावै ।
 रहित अनात्म भाव सुसाधा, बुद्धि परै जु वतावै ॥ ६५ ॥
 असुधि असुधता भाव न जायै, भजै अवस्य मुनीश ।
 नहि भूलै अवसान दसा मैं, पद पंकज जोगीसा ॥ ६६ ॥
 अति सुगंध पद अब्ज तिहारे, तैसे नहि अरविंदा ।
 चरन सरोज महारसवारे, अलि हूँ इंद मुनिंदा ॥ ६७ ॥
 अमर सबै कहिवे के अमरा, तू अमरा जो न मरा ।
 अनुमति अमति बखानै कैसें, कहि न सकैं पति अमरा ॥ ६८ ॥
 अटल अटंकित है जु अडंकित, असंक अकंप अपंका ।
 अब्रध अब्राधक अति हि निसंकित, सरल स्वभाव अवंका ॥ ६९ ॥

— छंद मोतीदांम —

अलेष अभेष अलक्ष अपक्ष अशेष विशेष अनक्ष प्रतक्ष ।
 अशुन्य अपुन्य अपाप अताप सुशुन्य सुपुन्य अशाप अचाप ॥ ७० ॥
 अरोप अकोप अजोग अभोग अनोप अलोप अरोग असोग ।
 अदिक्ष अशिक्ष, अलेप अछेप, सुचक्ष सुलक्ष सुदक्ष अषेप ॥ ७१ ॥
 अकांम अनांम अराग अदोष, अधांम सुधांम विराग विमोष ।
 अमोह अदोह अनेह अगेह, अलोभ अषोभ अदेह विदेह ॥ ७२ ॥
 अदीन अनीन नही जु अधीन, अच्छीन प्रवीन नही सुअलीन ।
 अदंभ अचंभ अलोग अलिंग, सुब्रंभ विद्रुंभ सजोग इकंग ॥ ७३ ॥

अमान सुजान अदेस अलेस, अगाध अबाध असंख्य प्रदेश।
 अपात अतात अमात अजात, अगात अधात अघात प्रभात ॥ ७४ ॥
 अधीश अनीश अपंद अछंद, अचिंत्य अत्यंत अमंद अनंद।
 अमाम अवाम अदाम सुराम, अभाम अठाम अगाम सुदाम ॥ ७५ ॥

— छंद भुजंगी प्रयात —

अदूहो अजूहो प्रभू है पुनीता, अपायो कभी नां उपायो प्रणीता।
 अद्वंदो निकंदो महामोहमाया, अवेदो अभेदो अछेदो अकाया ॥ ७६ ॥
 अब्बादी अनादी अनंतो अनोखो, अकोषो अरोषो असोषो अमोषो।
 अनापो अमापो अधापो सथापो, नहीं कोई दूजो प्रभू एक आपो ॥ ७७ ॥
 अभक्षा तजें जे भजें जे अलक्ष्या, सुपक्षा गहैं जे दहैं मोह कक्षा।
 सुदक्षा लहैं तेहि तोकीं प्रभूजी, तू ही है निपक्षो दुपक्षो विभूजी ॥ ७८ ॥

— छप्पय —

अतिरांमो अभिरांम देवपति देव प्रबुद्धा,
 अतिधामो अतिशांत नाथ जगनाथ बिशुद्धा।
 अतिनांमो विनुनांम ईश जगदीश बिबुद्धा,
 अतिठांमो विनुठांम भाव तोमैं न अशुद्धा।
 अति सुगूढ अनगार देवा है अगूढ अवधूत तू।
 अति अरूढ सुविभूति सेवा है अमूढ अविभूत तू ॥ ७९ ॥

अतित्राता अतित्रात छात अतिपात अपाता,
 अतिदाता सुउदात पार कर तू हि प्रमाता।
 अतिगाता विनुगात शुद्ध पर्याय स्वरूपा,
 अति धाता जु विधात शुद्ध गुण राशि अरूपा।
 अति सुरूप निजरूप भूपा, अति सुरम्य भगवानं तू।
 यति सुरूप तू अति अनूपा, निरद्वंदी निरवानं तू ॥ ८० ॥

अधिकारी अविकारनाथ अति पुण्य प्ररूपा,
 अपर द्रव्य को लैस नाहि जामैं जु निरूपा
 अन्य अज्ञताभाव, थकी वह अरुण जगत का,
 अज्ञ लहैं नाहि जाहि विज्ञ वह धनी भगत का
 अर्क अनंत सुज्योति धारा, समयसार अतिसार जो।
 नहीं अलीक अनीक कोई, अजडनाथ भवपार जो ॥८१॥

अतिक्रम वितीक्रम नाहि, नाहि अनुक्रम जु अविक्रम,
 अनाचार नहि कोई धीर तू अतिगति विक्रम।
 नहीं एक अन्याय एक नाही अपराधा,
 अनुचर एक न पासि, वीर तू प्रबल अब्राधा।
 अतिसोधा अतिबोध तू ही, अमला कमला पासि है।
 अनुचित वहिरंगा न कोई, चिदानंद सुखरासि है ॥८२॥

अनिरवाच्य अविचार चार तू जगत अधारा,
 अनुचर तेरे सर्व राव तू जीव सुधारा।
 नहीं अमात्य जु कोई अचल अदभुत अवनीपा,
 मंत्र न तंत्र न कोई मंत्र तूही जगदीपा।
 अतुल अतूल अविगत गुंसाई, अवनीपति पूजैं चरन।
 अखिलोपम अर अति अनोपम, विश्वंभर अवरन वरन ॥८३॥

अहो अहो कर भास मोहि तिमर जु कौ हंता,
 ममता रजनी मेदि बोध दिवस जु प्रगटंता।
 भव्य कमल प्रतिफुल्ल करन जो पंथ चलावे,
 विषय विनोद मिटाय नादि सूते हि जगावै।
 जीव सुचकवो सुमति चकई, विषम विरह तिनकौ हरै।
 अभवि उलूक लहैं न दरसन अर्क अमितदूति तू धरै ॥८४॥

अतुल अनंत प्रताप ताप नहि तैरे सब ही,
 मिथ्या भाव सुराह तोहि वेढै नहि कव ही।

रवि कौ नाम जु मित्र तू जु है साची मित्रा,
 अर्क नहीं तो तुल्य पूजा अति रसि विविध
 अवगम नाम सुज्ञान कौ अहि नाम दिन कौ सही।
 अहिकरण अवगम मई तू अरुण अहोकरा को तु ही ॥ ८५ ॥

असु प्राणनि कौ नाम तू हि प्राणनि कौ दाता,
 असुभ्रत प्राणी जीव, पीव तू जीवनि दाता।
 तेरे प्राण न कोई ज्ञान आनंद जु प्राणा,
 सुख सत्ता अवबोध शुद्ध चैतन्य सुजाणा।
 अवधि शुद्धता की जु तू ही अवधि न अवधि न तो विषै।
 हरऊ अविद्या दै सुविद्या अतिसुगमक तू श्रुति लिखै ॥ ८६ ॥

अभय भवैं जे जीव तोहि नहि पावैं पापी,
 अगम गमैं जे नीच तोहि भावैं न सतापी।
 अगम गमक फुनि साथु गम्य जिनकी जु अगम मैं,
 रमैं अपुन मैं धीर चलन जिनको न अगम मैं।
 उनी लहैं न लहैं सुनी ही, गुनी तोहि ध्यावैं सदा।
 भनी सुकीरति श्रुतिनि माहैं, सुनी न अपकीरति कदा ॥ ८७ ॥

अप्रमत्त अविलीन प्रभू तू अभयजू, अविषय
 अगम अगोचरनाथ ज्ञान गोचर तू अतिशय।
 अश्वादिक चतुरंग सेन तजि होय असंगा
 भजैं तोहि अक्नीश ईश तू धीश अभंगा।
 तु ही अनागस है अनालस, अलंकार वर्जित सदा।
 अलंकार सब जगत कौ तू, नित्य अलंकृत विनु मदा ॥ ८८ ॥

अति समरथ अविभाव, नाहि तैं जु अभावा,
 सकल विभाव अभाव भाव तू धर्म प्रभावा।
 अतिदेवल मैं तू हि तू हि है केवल मांही,
 लोकालोकनि मांहि नित्य निवसै निज पांही।
 सही अनाशक्तो जु तू ही, अतिक्षम क्षमकर हैं प्रभू।
 अतिशम दम यम नियम भासक अति अघहर हरि हर विभू ॥ ८९ ॥

— सोरठा —

अतिशर्मा तू नाथ अतिवर्मा तू देव है।
 अतिकर्मा बड हाथ हरे, धर्म तैं ही धरे ॥ ९० ॥
 अति अलंघ्य जगदीश अलंघ्यक तू अधनि कहे।
 हौं असमर्थ अधीस, गुन वरनन कैसें कहे ॥ ९१ ॥
 अति हि अलौकिक ईश, लोक न जानैं तुव गुना।
 दोष अमंडित धीश अलपित अलप न तू सही ॥ ९२ ॥
 अलपबहुत्व सखैं हि तू भासै अति भास तू।
 तो कौं सर्व फवैहि, अति उज्जल तू देव है ॥ ९३ ॥
 अति नागर जगदीश, अति हि उजागर तू सही।
 अति सागर अबनीश, अति आगर गुन रतन कौ ॥ ९४ ॥

— अरिल छंद —

नहीं अभव्य सुभाव भव्य भावहु नहीं,
 तू शुद्धत्व स्वभाव पारनामिक सही।
 अवलोकन गुनवान अखिल दरसी तु ही,
 लहैं अपावन नाहि भक्ति तेरी जु ही ॥ ९५ ॥
 प्रभू अकर्ता तू हि तू हि अकरम सदा,
 अकरण करण स्वरूप भूप तु अति मुदा।
 तू हि असंपरदान दान दावक महा,
 अपादान अधिकरण एक तू ही कहा ॥ ९६ ॥
 अति छायो जु अछाय अजड रूपी तू ही,
 अमित छाय जगसाय पाय तेरे जु ही।
 सेवैं सुर नर नाग तू हि अविभाग है,
 महाभाग भगवान परम वैराग हैं ॥ ९७ ॥

त्रोटक छंद —

अति तू हि अनुद्धत देव वरो, अति तू हि अनुद्धित भाव धिरो।
 अति तू हि अनास्रत ईश महा, अति तू हि अदुत्ती और कहा ॥ ९८ ॥

अति तू हि अनामय ईश सही, अति तू हि अमै पददायक ही।
 अति तू हि चिदात्म है सुखिया, हम ज्ञान विना अति हि दुखिया ॥ १९ ॥
 हरि दुष्य सबै करि दास महा, प्रभु तू हि दयाल सुभावगहा।
 अति तू हि अनंदी है परमो, अति तू हि अनाकूल है धरमो ॥ १०० ॥
 नहि तू हि अनादर जोगि प्रभु, अति ध्येय तु ही जगदीस विभू।
 नहि भाव अनात्म तू हि धरै, अति देव अवाधित भानि है ॥ १०१ ॥
 अवधारन जोगि गिरा तुमरी, अविनासिक भूति प्रसूतिकरी।
 अक्षयो अव्ययो गुनरासि जु ही, अतिभाव अपूरव वस्तु तु ही ॥ १०२ ॥

— दोहा —

अनुद्वेग तू अगुरलघु, अतिभारी जु अभूल।
 अनावास अनयास तू, अनौपम्य शिवमूल ॥ १०३ ॥
 तू हि अनुत्कंठित प्रभु, अतिरंजित जु अव्यूक।
 तेहि जेहि तोकों भजे, करै करम कौ भूक ॥ १०४ ॥

— छंद त्रिभंगी —

जब लगि अतिंद्रिय बोध निरिंद्रिय इंद्रि अनिंद्रिय रहित प्रभू।
 जीवो नहि पावत तोहि न तावत अखिल सुभावत लोक विभू ॥
 तूही जु अवाच्यो मुनिजन जाच्यो कितहु न राच्यौ जगतगुरु।
 तू अखिल सुवाच्यौ नाथ अजाच्यौ निज मैं राच्यौ धर्म धुरु ॥ १०५ ॥
 जे साधु अतंद्रा वसहि जु कंद्रा मत मुनि चंद्रा दिव जु धरै।
 ते जपहि जु तोही है निरमोही छांड सबोही ध्यान करै ॥
 तू वर अनुभूति धरइ विभूती नाहि प्रसूती क्वापि करै।
 अतिरिक्त विभावो शुद्ध स्वभावो अमित प्रभावो काल हरै ॥ १०६ ॥
 अति ही अकलंको ईश चिदंको नित्य अपंको कुमति हरो।
 तू असम जु नाथो है अति साथो अति बड हाथो सुमति करो ॥
 तू ही अपरापर है जु मुधाहर पूजि सुधाकर लोकपती।
 प्रभुजी अतिपात्रो है अतिछात्रो ज्ञान हि मात्रो शुद्ध जती ॥ १०७ ॥

अति रहै अनंतर नित्य निरंतर अदभुत तंतर रोग हरा ।
 मुनि अनंत जु निवसैं रात्रि जु दिवसैं तन मन विकसैं जोग धरा ॥
 तुवपद ध्यावे कौं (तुव) पुरपावे कौं नहि जावे कौं फेरि कहैं ।
 अध्यात्म धारा अनुभव धारा तू अनिवारा रहित अहं ॥ १०८ ॥

तू अति भूतेश्वर है जु महेश्वर देव जिनेश्वर अतिथि गुरो ।
 अति अन्न विधानो अमन अमानो अतिगति ज्ञानो धर्म धुरो ॥
 प्रभुजी अति चेता मुक्ति जनेता तत्त्व प्रणेता चित्त हरो ।
 अति ही मद टारी सोधु सुधारो अभूत धारो मृत्यु हरो ॥ १०९ ॥

तू अविरति हारी विरति विहारी अरति प्रहारी अमति हरो ।
 तू है अतिकामो प्रभु अकामो राम विरामो सुगति करो ॥
 तू प्रभु अतिपूतो अति अवधूतो है जु अभूतो भूत महा ।
 अतिकर्म विनासा पाप प्रनासा धर्म प्रकासा गुरनि कहा ॥ ११० ॥

— दोहा —

अतिहि अनातंको प्रभू, अभय अभव भावेस ।
 विभू अनादेसो तू ही, सदादेस आदेस ॥ १११ ॥
 तेसौ निर्मापक नहीं, कर्ता जग मैं कोइ ।
 अनिर्मान भगवान तू, अति निरखान जु होइ ॥ ११२ ॥

— कविन —

तू अतिक्रान्ति विश्रान्ति दयाला, अरिहंता अतिशान्त मुनीश ।
 तिर नर सुर खग मुनिवर कौ मन हरइ न चौरो, अति अवनीश ॥
 नित्यानित्य जु जगत प्रपंचा, जानैं सब अर नहि रति रीस ।
 जीव रक्षिक जो, नासक कर्मा निरग्रंथो अति कर्मलाधीस ॥ ११३ ॥
 इह अदभुत गति देखहु तापैं, सो अध्यात्मधार सुसार ।
 अध्यात्म धारिनि को तारक, असुधारिनि कौ है प्रति पार ॥
 आप अनघ अवसेस नाहि को कर्मनि कौ जा मांहि लगाय ।
 सब सेना ते रहित जु स्वांमी, सेनाधर सेवैं दरवार ॥ ११४ ॥

— सर्वथा —

असिमसि कृषि और वांनिज कौ, नाम कोऊ
 नाहि तेरे पुर मैं न शिल्प पशु पालनां।
 पठन न पाठन है शिक्ष गुरुभेद नाहि,
 स्वामि अर सेवक कौ भेद न निहाल नां।
 तू तो प्रभु एक रूप ज्ञान रूप भाव तेरौ
 तेरौ पुर चैन रूप जहां वस काल नां।
 मोह नाहि द्रोह नाहि नाहि जु विभाव कोऊ,
 जहां तू विसजै देव सबै भ्रम जाल नां॥११५॥

— सोरठा —

अध्यात्म कौ मूल, भजै तोहि अध्यातमी।
 मेट हमारी भूल, दै आत्म अनुभव सही॥११६॥
 तू ही अकार स्वरूप, सकल वर्ण मात्रा तु ही।
 परमेश्वर जगभूष, दौलति करन जु तू उही॥११७॥

इति अकार स्वर संपूर्ण। आगैं आकार का व्याख्यान करै है ॥ श्री ॥

— श्लोक —

आदि देवं युगाधारं, मात्माराम पितामहं।
 वंदे साकार रूपं च, निराकारं निरंजनं॥११८॥

— सोरठा —

आ कहिये श्रुति मांहि, नाम पितामह कौ सही।
 तो विनू दुजौ नाहि, तू ही लोक पिता महा॥११९॥
 आशु शीघ्र कौ नाम, शीघ्र उधारौ जगत तैं।
 आवस्यक दै राम, समता वंदन आदि सहु॥१२०॥
 आलय घर कौ नाम, तेरे घर घरणी नहीं।
 सब घट तेरे धाम, तू आलय सबकौ सही॥१२१॥

आस्पद कहिये थान, तैरे थान न आन को ।

स्व स्वभाव भगवान, लोक सिखर राजै तु ही ॥ १२२ ॥

— छंद —

आदि धुरंधर आदि जगत गुर, आदि सकल की तू ही ।

आदिनाथ आदीश्वर स्वांमी आदि सुदेव प्रभू ही ॥ १२३ ॥

आदि आदि कर आप, आदि वर आदि परंपर आपा ।

आप आदि मुनि आप, सही मनु आदि रम्य निहपापा ॥ १२४ ॥

आसन अचल अटल प्रभु, सासन नहि आक्रोस कदापी ।

आ कहिये सामंति प्रकारैं, शुद्ध सुबुद्ध उदापी ॥ १२५ ॥

आधि न व्याधि रोग रागादिक मोहादिक कछु नांही ।

हरै आपदा जीव रासि की, नहि आताप कहां ही ॥ १२६ ॥

आलस नहि आलंबन कोई, है आलंबन सबका ।

आप्त नाम आवरण वितीता, आत्म गुण धरद वांका ॥ १२७ ॥

— चौपड़ी —

तू आकार रहित जगदेव, तू आधार वितीत अछेव ।

सबकौ तू आधार दयाल, आश्रम सबकौ त्रिभुवन पाल ॥ १२८ ॥

आदि पुरांन पुरुष परधान, तू आहार रहित भगवान ।

तैरे नहि आगार कदापि, तू आधार प्रगट्ट उदापि ॥ १२९ ॥

आखंडल सेवैं तुव पाय, इंद्रनि कौ पति तू मुनिराय ।

प्रभु आदीस आदि जोगीस, आचारिज प्रणमैं नमि सीस ॥ १३० ॥

आर्या भक्ति करैं धरि भाव, आनंदी आनंद स्वभाव ।

आद्युपचारी रहित प्रचार, आदित आदि भजैं निरधार ॥ १३१ ॥

आदि महंत न तैरे दूजि, थिरचर कौ प्रतिपालक पूजि ।

आदि न अंत न तैरे कोय, तू अनादि अनिधन प्रभू होय ॥ १३२ ॥

आदि अविद्या भेदै तू हि, आदि मनोहर रूप समूहि ।

आत्म बोध प्रदायक देव घातिकर्म (घातिकर्म) टारै जु अछेव ॥ १३३ ॥

— गाथा छंद —

आशापासि निकंदा, संतोषी तू महासुखी धीरा।
 आनंदा जिनचंदा, करि आनंदी महावीरा ॥ १३४ ॥
 आसा पूरै सबकी, तेरे आसा न तू हि निहकामी।
 आस पिसाची कवकी, मोहि लगी टारि जग स्वांमी ॥ १३५ ॥
 आसा राखौं तेरी, धरौं न आसा कदापि घर घर की।
 करि औसी बुधि मेरी, करुना पालौं हि थिरचर की ॥ १३६ ॥
 आसा मेंटि हमारी, करौं न आसा कदापि सुर नर की।
 सुनि कै वानि तिहारी, परनति जानी हि निज पर की ॥ १३७ ॥
 आतमरस दै देवा, आतम संगी तू ही जिनाधीश्वरा।
 आतम ज्ञान सु सेवा, बिनु नहि पायो किनी ईसा ॥ १३८ ॥
 आतम ज्ञान प्रकासी, तू ही ध्यानी सु आतमा रामा।
 आतम लोक विभासी, आतम गुण भर महा धामा ॥ १३९ ॥
 आरति हरणा तू ही, आपद हरणा सुसंपदा दाता।
 संपति गुण जु समूही, भक्ति तेरी सुविख्याता ॥ १४० ॥
 आपद भुगतैं सकला, सुर नर तिरजंच नारकी जीवा।
 तू ही श्रीधर कमला, अटला धारै अनंतीवा ॥ १४१ ॥
 आतम चित्त जु धारा, आवरमाना अमानमाना तू।
 आरति रौद्र निवारा, भगवाना शुद्ध ज्ञाना तू ॥ १४२ ॥
 आर्जव धर्म प्रकासा, आपा पर भासका तू ही नाथा।
 आज्ञा पालैं दासा, तेहि तिरैं सीध भुव पाथा ॥ १४३ ॥
 आज्ञा दायक शुद्धा, आगम प्रगटा सुआगमी नांमी।
 अध्यात्ममय बुद्धा, आदेसक तन्त्र का स्वामी ॥ १४४ ॥
 आदेस न काहु का, तोकाँ तू ही स्वयं गुरु देवा।
 तू तारक साधू का, आगमधर धारइ सेवा ॥ १४५ ॥

आलापैं हरि रागा, तेरे जस का करेंहि वाखांन।
 आकुल भाव न लागा, तोकीं तू देव भगवान्॥ १४६ ॥
 आश्रय आश्रम भिन्ना, नहि आवासाहु कोइ प्रभु तैरे।
 तू निज आत्म लिन्ना, आश्रय नहि तो विना मेरे॥ १४७ ॥
 अनल बुझावैं अंभा, आसानल नां बुझावई पाथा।
 तूष्णीं दाह विप्रभा, तू ही मेटे महानाथा॥ १४८ ॥
 तू आधीन न होई, ए सब तेरे हि लोक आधीना।
 आत्म गुणमय सोई, आरोज़ा तू हि स्वाधीना॥ १४९ ॥
 आतापन जोगा जैं, धारैं तौहु न तो विनां सिद्धी।
 पावैं शिव जोगा जे, तोही तैं योगिया ब्रह्मी॥ १५० ॥
 हूँ आरोज़ सरीरा, तेरे नांमैं कटैंहि भव रोगा।
 आसेव्या असरीरा, तैरे माया न संयोगा॥ १५१ ॥
 आद्र नांम रस भीनां, तू भीगा सुरस मांहि रस भोगी।
 आन न तो विनु लीनां आरूढा हूँ भजैं जोगी॥ १५२ ॥
 आदित्यादि असंख्या, देवा पावैं न तो समा क्रांती।
 आभ्यन्तर आकंष्या, मेटि हमारी हु दै शांती॥ १५३ ॥
 आखेटक करमी जे, मारैं जीवा करें हि पल भक्षा।
 हिंसक अघ करमी जे, पावैं पापी न तव पक्षा॥ १५४ ॥
 भक्ति न पावैं दुष्टा, शिष्टा पावैं हि रावरी भक्ती।
 तू करुणा रस पुष्टा, धिरचर प्रतिपाल अतिशक्ती॥ १५५ ॥
 आकासो जड़भावा, कैसैं पावैं जु ऊपमा तेरी।
 तू चिद्रूप स्वभावा, देवा हरि मूढ़ता मेरी॥ १५६ ॥
 आदेसा इह तेरा, जीवा सब आप तुल्य करि जानीं।
 परधन पांहन ढेरा, पर नारी मात सम मानीं॥ १५७ ॥
 आभासा तेरी सी, नहि पावैं तीन लोक में कोई।
 दुरबुद्धि मेरी सी, नहि कोई मांहि प्रभु होई॥ १५८ ॥

— भुजंगी प्रयात छंद —

कभी नाहि आलिप्त तू है अलेपा, चिदानंद चैतन्यरूपा अछेपा।
 तू आनंद रूपी सदानंद देवा, प्रभू है महानंद मूला अछेवा ॥ १५९ ॥
 तु आनंद रामा प्रभा पुंज धारै, महा आधि व्याधी प्रभू तू प्रहारे।
 सु आराम करी प्रभू राम तू ही, राधांस आद्यो गुरु है प्रभू ही ॥ १६० ॥
 समाधान रूपा सुभावा सुआली, सुचिच्छक्ति रूपा सुरांनी अटाली।
 नही और रांनी नही और आली, विराजै तु ही एक रूपो अकाली ॥ १६१ ॥
 न आदी न अंता तु ही नादि वस्तु, सुअस्तित्व रूपा सही है प्रसस्तु।
 नही आसना वासना नाहि तोमें, हरौ आगसा लागिया नाथ मोमें ॥ १६२ ॥
 कहैं आगसा नाम जे पापकर्मा, न तैरे जु पापा नाही कोई भर्मा।
 भजैं योगरूढ़ा द्विदासत्र धारे, समाधी सुरूपा महाभाव भारे ॥ १६३ ॥
 तु ही आदरा और त्यागे सबैही, मुन्यों नैं सबै सिद्धि पाई जवै ही।
 तुझे छांडि जे मूढ़ सबै विषै कौं, मंहा आतताई लहैं नाहि जै कौं ॥ १६४ ॥
 नही कोई आवेस तैरे प्रवेसा, तु ही है अनादेस योगी अभेसा।
 प्रभू आदि व्यक्ता तु ही आदि वक्ता, तु ही आदि सांमी महाभूति भुक्ता ॥ १६५ ॥

— गीता छंद —

आश्चर्यकारी लोकतारी आप आप निरंजन।
 आलोकपारी अतुलभारी, आस दास प्रपूर्ण ॥ १६६ ॥
 आदि आचारी युगादी आदि आसेव्यो महा।
 आचूल मूल अतुल स्वांमी अकथरूप कहैं कहा ॥ १६७ ॥
 आत्मीय भाव स्वभाव रूपा योग आध्यात्म तुही।
 आधारभूत अभूत भूपा आदि धरमी तू सही ॥ १६८ ॥
 आजि धन्य सुधन्य भागा, आसथा तेरी गही।
 आसक्तता पर भाव केरी, हरौ देव भैहर तुही ॥ १६९ ॥
 अस्ति नास्ति सबै जु भासै, आदि सासत योगत्वं।
 आक्रान्त नाहि जु काल तैं तू, न आक्रमण सुयोगित्वं ॥ १७० ॥

आदि दौलति रावरै ही तोहि तैं दौलति लहैं ।

भुक्ति मुक्ति सुमूल तू ही, चरन शरण तेरी गहैं ॥ १७९ ॥

इति आकार अक्षर वर्णनं । आगैं इकार का व्याख्यान करै हें ।

— श्लोक —

इंद्र नागेन्द्र चक्रीणा, मीश्वर जगदीश्वर ।

वंदे सर्व विभूतिनां दायक मुक्तिनायक ॥ १ ॥

— दोहा —

इ है इकार सिधंत मैं, प्रगट काम कौ नाम ।

तुम जु काम हर कामपति, काम सुधारक राम ॥ २ ॥

इंदीवर कहिये कमल, कमल कहा कमनीय ।

जैसे तेरे चरन हैं, तू अनंत रमनीय ॥ ३ ॥

• इंदीवर न सुगंध है, तन तेरी ही सुगंध ।

इंद्री प्रेरक मन इहै, तोहि न ध्यावै अंध ॥ ४ ॥

इंद्री प्रेरक चित्त सौं, भव्य कहै भजि नाथ ।

संग त्याग इंद्रीनि कौ, करि जिनवर कौ साथ ॥ ५ ॥

इंद्रीधर ए जीव हैं, पीव न इंद्री रूप ।

शुद्ध अतिंद्री देव है, भजि मन सो चिद्रूप ॥ ६ ॥

इंद्रपति अर इंदुपति, इंदु कहावै चंद ।

चंद चकोर जु है रहै, निरखत बदन मुनिंद ॥ ७ ॥

इभ हस्ती कौ नाम है, इभ न लहै वह चाल ।

हंस चाल गज चालतैं, जाकी चाल विशाल ॥ ८ ॥

कर्मरूप इभगनि कौं, इभ रिपु केहरि सोय ।

अमित पराक्रम नर हरी, सो भजि सुमनां होय ॥ ९ ॥

इंद्र तीन हैं लोक कौ, इंद्र हू कौ प्रभु इंद्र ।

इंद्राणी अर इंद्र कौं, जीवन मूल मुनिंद्र ॥ १० ॥

इषु इह नाम सुवान कौं, जाकैं बांन न चाप ।

ज्ञान चाप बत बांन धर, नासैं अखिल जु पाप ॥ ११ ॥

इंद्रीजीत अभीत जो, इष्ट सबनि कौ वीर।
 इष्टानिष्ट न भाव धर, ताहि ध्याय मन धीर॥१२॥
 इष्ट वस्तु दायक प्रभु, इष्टादिष्ट स्वभाव।
 इंद्री विषय वितीत जो, इलानाथ भवनाव॥१३॥
 इला शूरी कौ नाथ है, नाथ इंदिराभूति।
 इला इंदिरा कौ धनी, धरै अनंत विभूति॥१४॥
 इंद्री पृथक मुनिंद सो, इंद्रीधर कौ नाथ।
 तारे इंद्र अनंत मन, तू करि ताकौ साथ॥१५॥
 इभ तारे इभतार जो, इभ रिपु तारक देव।
 इन कहिये दिनकर सही, दिनकर धरै सेव॥१६॥
 इ कहिये जैसें मनां, तूं है चंचल रूप।
 तैसौ चंचल और नहि, थिर न प्रभु सो भूप॥१७॥
 इत्वरिका कुटिला त्रिया, तैसी कुमति जु सोय।
 ताकाँ तू है मिलनियां, इह तौ भलैं न होय॥१८॥

— चौपड़ी —

रे मन तूं इंद्रिनि कौ नाथ, तजि विषया करि प्रभु कौ साथ।
 सर्वस दायक वह बरवीर, निजच्छति पड़े जातैं धीर॥१९॥
 इतर भाव तैं गम्य न कोई, केवल गम्य वहै प्रभु होय।
 इतरेतर वह सब तैं भिन्न, परिपूरण निज रूप अभिन्न॥२०॥
 तासाँ करि मन बिनती एह, सुमन करे प्रभु निज में लेह।
 रे मन तू जिन सकि जिन साँ जु उलटि विषैं साँ मिलि प्रभु साँ जु॥२१॥
 सुलटि जगत गुर साँ भिलि वीर, कुटिलभाव राखै मति तीर।
 सरल सुभाव प्रभु गंभीर, तन धन आपौ वारि जु धीर॥२२॥
 इत उत कौ फिरिखो नहि भलौ, मेदि कल्पनां प्रभु साँ मिलौ।
 इत्यादिक का तोकाँ कहैं, धनि तू जो तातैं प्रभु गहैं॥२३॥
 रे मन तू मेरी परधान, जो तोतैं भेटीं भगवान।
 अनुचर कौ इह धर्म हि जान, स्वांमि काम कौ त्यारै प्रांन॥२४॥

मेरे कारिज तू मन मित्र, होहु सुमन मिलि थिरचर मित्र।
 तव तू साचौ मेरी मंत्रि, मोहि मिलावै जगपति यंत्रि॥२५॥
 इह विधि समुझायो जिय मनां, ले एकांत भव्य नैं घना।
 मन मान्यौ जिय कौ उपदेस, लग्यौ चित्त चरणां जगतेस॥२६॥
 इज्या है पूजा कौ नाम, पूज्य पुरिष प्रभु अतिगुण धाम।
 इंद्रिजित जै मुनिवर धीर, तिनकौ तारक है वर वीर॥२७॥
 इंद्रिपति मन मनसुत कांम, कांमजीत जगजीत सुरांम।
 इच्छा पूरन आप अनिच्छ, निहकामी जगदीस प्रतिच्छ॥२८॥

— त्रोटक छंद —

इह इंद्रिपती हर देवपती, इह इंद्रिय जीत कहै सुजती।
 इंही इंद्रिपती सुत मान हरै, प्रभु इंद्रिय धारक पार करै॥२९॥
 नहि आप जु इंद्रिय धारक वै, प्रभु एक अनेक अपार फवै।
 वह सर्व इच्छा परिपूरण है, परमेशुर पाप जु चूरण है॥३०॥
 तप होइ जु इच्छ निरोध कियै, तपभाव बिना नहि दास लियै।
 इह अंक इकार कह्यो प्रगटा, प्रगटै सब तूहि प्रभू अघटा॥३१॥
 इभपत्ति प्रपूजित लोक गुरं, सर्वाक्षर रूप सुरं अमरं।
 अजरं अकरं सुवरं सुपरं, निजरूप प्रभासुर सारतरं॥३२॥

— दोहा —

इडा पिंगला सुषमना, नारी तीन जु होय।
 रहै सुषमना लागि कौं, रहै तोहि सुख सोय॥३३॥
 सोहं सोहं शब्द इह, सब जीवनि कै होइ।
 सास उसासा सहज ही, विरला बूझै कोय॥३४॥
 संसय विभ्रम रूप जो, महामोह बलवान।
 पारै तोसौं आंतिरी, उपजावै अज्ञान॥३५॥
 लागौ नादि जु काल तैं, समुझ न दे निजरूप।
 भ्रमण करावै जगत में, दुख दे महा विरूप॥३६॥

ता विमोह के मारिवे, समरथ तेरे दास।
 मोह डारि निजरूप को, जानै परम प्रकास॥ ३७॥
 दास भाव इषुधा समो, इषुधा वांन निवास।
 वांन जु शम दम यम नियम, धारक प्रभु के दास॥ ३८॥
 ज्ञान चाप तैं इषु व्रता, दास चलावैं धीर।
 मार्यो जाय जु मोह सठ, जाकैं नहि पर पीर॥ ३९॥
 भक्ति मात सौं जीव काँ, मिलन न दे अति दुष्ट।
 कुमति सुता परनाय कैं, करै नाथ सौं भिष्ट॥ ४०॥
 हरै अनंत विभूति काँ, दे इंद्रिय रस रंच।
 वाट जु पारै सिद्ध की, मोह महा परपंच॥ ४१॥
 मोह जीतिवे सक नहीं, सुर नर खेचर नाग।
 जीते तेरे दास ही, निहकामा वडभाग॥ ४२॥
 मोह जीति तजि कुमति तिय, सुमति धारि सुखदात।
 मिलि कैं भक्ति सुमात सौं, लहैं परम गुर तात॥ ४३॥
 तात बतावैं वस्तु निज, सत चित आनंद रूप।
 रूप लखैं जर मरन की, नासै टेव विरूप॥ ४४॥
 इंद्र धनुष जल बुदबुदा, तडित तुल्य संसार।
 यामैं सार लगार नहि, तात जगत में सार॥ ४५॥
 जाति तात अर पूत की, ज्ञान स्वरूप अरूप।
 वह केवल निज ज्ञानमय, इह अबिबेक बिरूप॥ ४६॥
 वह तंदुल इह सालि है, इह दल वह निज धात।
 अंतर एतौ श्रुति कहै, सुत चंचल धिर तात॥ ४७॥
 मलिन नीर मिलि सिंधु सौं, निर्मल भाव धरेय।
 जीव ध्याय जगदीस काँ, कर्म कलंक हरेय॥ ४८॥
 निज दौलति पावै सही, चहुं गति आपद टारि।
 रमैं स्वरस सागर बिबैं, अचल अतुल अविकारि॥ ४९॥

इति श्री इकाराक्षर संपूर्ण। आगैं ई अक्षर का व्याख्यान करै है।

— श्लोक —

ईकाराक्षर कर्त्तारं, मीश्वरं जगदीश्वरं ।
धीश्वरं धिषणाधीश, मीशं वंदे मुनीश्वरं ॥ १ ॥

— दोहा —

ई कहिये आगम विक्षे (पै), है लक्ष्मी कौ नाम ।
लक्ष्मी तेरी शक्ति है, चिद्रूपा गुण धाम ॥ २ ॥
तू स्व द्रव्य पर्याय वह, स्वाभाविक निजरूप ।
वस्तुभेद श्रुति नहि कहै, एक स्वरूप अनूप ॥ ३ ॥
तू ईश्वर वह ईश्वरी, तू समरथ वह शक्ति ।
वह विमला तू विमल है, तू सुव्यक्त वह व्यक्ति ॥ ४ ॥

— गाथा छंद —

ईशसु ईश्वरः ईशा ईशेश्वरः ईश्वरेश्वरो नाथा ।
ईहा रहित मुनीशा, ईश करै तू हि गुण साथ ॥ ५ ॥
ईति हरै हर देवा, भीति हरै तू हि स्तेय निज सेवा ।
ईहा पूर अछेवा, वर्जित ईर्षा तु ही देवा ॥ ६ ॥
ईशानेश्वर धीशा, ईधर श्रीधर धरें जु ईश्वरता ।
ईहित दाता श्रीशा, ईर्षा दोषादि कौ हरता ॥ ७ ॥
ईप्सित दायक वीरा, ईहित ईप्सित कहैं जु वांछित कौ ।
हरै सकल की पीरा, धीरा तू भासई हित कौ ॥ ८ ॥
ईन कहावै स्वांमी, तूं स्वांमी सर्व लोक कौ देवा ।
ईज्या जोगि सुनांमी, ईज्या कहिये जु तुव सेवा ॥ ९ ॥
ईडित सब करि तू ही, ईडित कहिये जु पूजनीकनि कौ ।
ईज्यांदि गुण समूही, समिति भाषै जु ज्ञानिनि कौ ॥ १० ॥
निरखि निरखि करि चलनां, उचित हि कहनां अजोगि सब तजि कै ।
सोधि अहार जु करनां, धरनां लेनां सु सब लखि कै ॥ ११ ॥

धारैं दासा समिती, ईठ करैं तोहि त्यागी परपंचा।
जिनकै घट नहि कुमति, ईदा (ध्या) पीडा नही रंचा ॥ १२ ॥

— दोहा —

ईठ नांव है मित्र कौ, भाषा में सक नाहि।
मित्र न तोसौ दूसरी, तीन लोक कै माहि ॥ १३ ॥
ईख रसादिक मिष्ट नहि, मिष्ट इष्ट तुव नाम।
नाम रसायन जे पीवैं, अमर हौंहि अभिराम ॥ १४ ॥
ईस बल्लभा ईश अर, तोकों ध्यावैं नाथ।
तू ईशेश अलेश हैं, गुण अनंत तुव साथ ॥ १५ ॥

— छंद मांती दाम —

नही जगि ईश्वर तो बिनु कोय, हितू सवकौ प्रभू तू इक होय।
प्रभू परमेश्वर तू जु मुनीश, अनीश्वर श्रीश्वर तू अखनीश ॥ १६ ॥
तु ही शिवसागर नागर धीश, तु ही जु निरीश्वर ईश्वर धीश।
तु ही प्रभु ईश्वरतापति नाथ, अनादि अनंत अछेव असाथ ॥ १७ ॥
तु ही जडता हर दोष वितीत, प्रभू निज ज्ञान स्वरूप अभीत।
तु ही जगतात महा सुखदात, महा अघ घातक देव विख्यात ॥ १८ ॥

— सोरठा —

ई लक्ष्मी कौ नाम, लक्ष्मी धर तू शिवपती।
और न दौलति काम, दौलति दै अविनश्वरी ॥ १९ ॥
इति ईकाराक्षर संपूर्ण। आगैं उकार का व्याख्यान करै है।

— श्लोक —

उकाराक्षं महादेवं, शंकरं भुवन त्रये।
वंदे सदा शिवाधीशं, नित्यमानंदमंदिरं ॥ १ ॥
कहैं उकार सुपंडिता, शंकर सुर कौ नाम।
सुखकारी आनंदकर, तू जितवर गुणधाम ॥ २ ॥

उद्भव तेरौ जगत मैं, होय कभी न दयाल ।
 उन्मूलित कर्मा तु ही, रहित उपद्रव लाल ॥ ३ ॥
 उद्भट उद्भव तू सही, दोष उच्छिन्न उदार ।
 उर्वी नाम जु भूमि कौ, तू उर्वी मैं सार ॥ ४ ॥
 उदयंकर प्रभु उर प्रवल, उदय अस्त तैं दूर ।
 उपलब्धांतम देव तू, उपलब्धो भरिपूर ॥ ५ ॥
 उदित उधारक उपशमी, उद्धत बोध प्रचंड ।
 उद्यत उद्यम रूप तू, उपसमीप गुणमंड ॥ ६ ॥
 उपवासी उपशांत तू, उपयोगी उपयोग ।
 उपधि रहित उत्पत्ति रहित, विनु उपाधि अतिभोग ॥ ७ ॥
 उपभोगा भोगा नहीं, जोगा एक मिलै न ।
 उद्धरणो उद्धार तू, जडता मांहि भिलै न ॥ ८ ॥
 उचित उपेन्द्र उपायमय, उज्जल परम उदात ।
 उपकारी उपकारमय, उपमा अतुल सुतात ॥ ९ ॥
 उपमारहित उपेय तू, नाम उपाय न भेट ।
 भेट करैं तन मन मुनी, उपदिष्टा जु अमेष्ट ॥ १० ॥
 उपदिश्यो उपदेश तू, उपरम रूप अनूप ।
 तू उपमेय अमेय है, सकल उर्वराभूष ॥ ११ ॥
 उत्तम उर तेजस महा, आनंदी जु उदास ।
 उरि वसि नाथ सुदासकै, अह्निसि सास उतास ॥ १२ ॥
 उच्छिष्टा विषया सबै, इंद्रियनि के परपंच ।
 भुगते जगवासीनि नैं, नहि चाहैं अघसंच ॥ १३ ॥
 उभय नाम है दोय कौ, राग दोष ए दोय ।
 मेष्टि दोय है दास कौं, दरसन ज्ञान सुजोय ॥ १४ ॥
 उपशम क्षपक जु श्रेणी है, सब भासै तू देव ।
 तू उत्तंग अभंग है, विनु उनमाद अछेव ॥ १५ ॥

उज्झित जग जंजाल तैं, उतकंठा तैं दूर।
 उतकंठा मेरी हरौ, दै सेवा भरिपूर॥ १६॥
 उच्छेदक जग फंद तू, हरि मेरे उदमाद।
 उणमणि मुद्रा दास कौं, दै जोगी अविवाद॥ १७॥
 उनमांन जु तेरी नहीं, उनमतता नहि नाथ।
 तू उनमन स्वभाव में, रमें रमा कै साथ॥ १८॥
 रमा शुद्ध सत्ता महा, द्रव्य गुणात्म रूप।
 चिनमुद्रा निजशक्ति जो, गौरी अतुल अनूप॥ १९॥
 उल्लासालातम इह जगत, या सम और न सिंधु।
 उपरि जगत कै तू सही, काटि हमारे बंधः॥ २०॥
 उच्च महा उतकिष्ट तू, जपैं उमापति तोहि।
 उपसर्गा सब दूरि हैं, तोतैं सब सुख होहि॥ २१॥
 उत्सर्गी उत्सर्गमय, इहैं त्याग कौ नाम।
 तू त्यागी संसारकौ, उपशांती अभिराम॥ २२॥

— छंद पद्धरी —

उपवास देहु निजवास देव, अति है सुउजागर अतुल भेव।
 उदितोदित तात उपाधि चूरि, मुनि उपाध्याय ध्यावैं सुसूरि॥ २३॥
 उदईक विभाव गहै न तोहि, उन्मीलित प्रगटित तू हि होहि।
 उतकिष्टा उतकिष्ट जु असाथ, तेरी सुउपासन देहु नाथ॥ २४॥
 उल्हास खिलास अपार देव, तू परम उपास्य अनंत भेव।
 तू है न उपासक शुद्ध तत्व, सब तोहि उपासै अतुल सत्व॥ २५॥
 उपहासन ते रहितू असंग, प्रभु उर अंतर भासै अभंग।
 उद्योतमान अति उदयवान, उदवेग वितीत अनंत ज्ञान॥ २६॥
 उतकौं इतकौं न फिरैहि तूहि, तू है सुउतारक भव समूहि।
 उतशृंखल भाव न एक पासि, तु उतशृंखल स्वांमी अपासि॥ २७॥

उल्लंघक है तू उदधि लोक, उपरोध नहीं तू है असोक ।
 तेरे न उपाश्रय कोई नाथ, उत्साहमई जतिनाथ साथ ॥ २८ ॥
 उत्तमता तो सम कौन धार, तू उग्रोग्र जु जगदेव सार ।
 उर उग्रतपा मुनिराय धीर, उर अंतर धारहि तोहि वीर ॥ २९ ॥
 उत्पल दल लोचन अति विसाल, उपचारी तू अति ही रसाल ।
 उपचार न तो सम और कोई, जर मरण जनम मेटे जु सोय ॥ ३० ॥
 उत्तमश्रम आदि सबै जु धर्म, तोही करि प्रगटहि तू अभर्म ।
 प्रतिमा जु उपल अर धातु रूप, तेरी जु वनांवहि अति सुरूप ॥ ३१ ॥
 उपकर्ण न तेरहि कोइ होइ, उपयोग भाव उपकर्ण सोइ ।
 उरहार तू हि उरझार दूर, तू नाहि उपद्रित कर्म चूर ॥ ३२ ॥
 उपलब्ध तू हि उपलभ रूप, उपदेसी तू सब देस भूप ।
 उद्यानवास ऋषि करहि धीर, तोकाँ इकंत ध्यावैं सुवीर ॥ ३३ ॥
 उदवास वास करि धरि उपास, अति रमहि तो महीं परमदास ।
 उपवन वन गिरि सरिता सुगाम, पुर देस मांहि तू ही सुनाम ॥ ३४ ॥
 उत्पात सकल होवैं निपात, भूकंप उल्कपातादि जात ।
 उदधी समान उर अति अधग, तेरी मुनि गांवहि सुमग लग ॥ ३५ ॥
 उपजी सुबांनि ता मांहि देव, अमृत समान अदभुत अछेव ।
 ताकाँ सुपीय बहु जीव लोक, हूये अमृत्यु आनंद थोक ॥ ३६ ॥

— छंद बेसरी —

तेरी वांनी अमृत अर्था, और सुधारस कहिये विर्था ।
 अमरा नांम देवगति जीवा, मरण करें दुख लहै अतीव ॥ ३७ ॥
 अमरा कहिये के जु मुधा ही, तैसी वन कौ पान सुधा ही ।
 चलती कौ गाडी जन जानैं, मरतौ कौ अमराकरि मानैं ॥ ३८ ॥
 नहि अमरा न सुधा सो जानी, तू अमरा अमृत तुव वांनी ।
 उर बसि हमरै उरहर देवा, करौं उरबसि तेरी सेवा ॥ ३९ ॥
 अवर उरवसी रंभा नांमा, बहुरि तिलोतमादि अभिरांमा ।
 नही अपछरा नहि सुर लोका, चाहौं तेरी भक्ति अलोका ॥ ४० ॥

उदवासक तू इंद्रिय ग्रामा, सुवस वसावै अति गुणधामा ।
 उदक कहा जैसों तू सीता, अति निर्मल चिद्रूप अतीता ॥ ४१ ॥
 उपादेय तू जग सब हेया, उत्कीर्णो न कदापि अमेया ।
 उपादान अर निमित्त जु द्वैही, कारण भासै तू अति है ही ॥ ४२ ॥
 सर्व उत्कीरि राखिया अर्था, तेरे ज्ञान मांहि अत्यर्था ।
 निज गुन की उग्र जु है सेना, तैरे दोष नही कछु लेना ॥ ४३ ॥
 शक्ति नही कर्मनि में ऐसी, दासन हूं सों करें वहैसी ।
 उत्तरदायक एक जु तू ही, प्रश्न करैया सर्व समूही ॥ ४४ ॥
 उदभासक सु विभासक तू ही, तत्त्वज्ञान भासै जु प्रभू ही ।
 अति उदाम देव उदघाटा, सुखँ चलावै निज पुर बाटा ॥ ४५ ॥
 उश्च गुणो अग्नि में जैसैं, केवल ज्ञान आप में तैसैं ।
 जिनकै घट उदयाचल मांही, उदितो तू दिनकर सक नाहीं ॥ ४६ ॥
 तिनकै भ्रांति निसा कित पैए, शुद्ध प्रकास विभास बतैए ।
 उजलाई उत्तमता तेरी, सो संपति आनंद घनेरी ॥ ४७ ॥

— छंद गीता —

उद्धरोद्धर उत्तरोत्तर उद्धतोद्धत शुद्धत्वं ।
 उज्जलोज्जल उत्तमोत्तम, उत्कटोत्कट बुद्धत्वं ॥ ४८ ॥
 उठि उठि जीव सम्हारि आपा, जड़ में तेरी रूप नां ।
 ऐसे बिन सुनाय स्वांमी, तो सम और स्वरूप नां ॥ ४९ ॥
 उठि कै तेरी भगति बल तैं, उगलि नांखों प्रकृतिजी ।
 उलटि जग सों सुलटि तोपैं, आंऊं अतिमति सुमति जी ॥ ५० ॥

— दोहा —

प्रभु की जो उत्किष्टता, सोई कमला होइ ।
 पदमा दौलति संपदा, श्री धन लक्ष्मी सोइ ॥ ५१ ॥

आगैं ऊकार का व्याख्यान करै है ।

— श्लोक —

ऊकारं पदमं देवं, ज्ञानानन्दमयं विभुं।
परात्परतरं शुद्धं, वुद्धं वन्दे स्वरूपिणं ॥ १ ॥

— दोहा —

ऊ कहिये सिद्धांत में प्रकट विश्व कौ नाम।
सर्व व्यापको विश्व है, परम ज्योति गुणधाम ॥ २ ॥
विश्व सदाशिव हरि हरो, गुणपति त्रिपति देव।
तमहर भयहर गुणधरो, तू जगदेव अछेव ॥ ३ ॥
ऊरध लोक प्रदायको, ऊरध सबकै तू हि।
ऊर्जित जगमूरध तु ही, नहि काहू सौं दूहि ॥ ४ ॥
उषा मांहि जु ऊठि कै, जपैं तिहारौ नाम।
अहनिसि मंगल रूप ही, रहै महाविश्राम ॥ ५ ॥
उँघ नींद सब खोय कै, तजि विषयनि कौं साथ।
भजै तोहि सोई जनम, सफल करै जगनाथ ॥ ६ ॥
भजन निरंतर जोग्य है, है आवस्य त्रिसंधि।
भजन करै सोई लहै, केवल भक्ति असंधि ॥ ७ ॥
ऊग्यो जिन घट तू प्रभू, जगरवि दीन दयाल।
गयो ऊनता भाव सब, गई न्यूनता लाल ॥ ८ ॥
ऊठयो जब तू गाजि कै, भविष्यति नाद स्वरूप।
मोह गयो तव भाजि कै, विषय कषाय जु रूप ॥ ९ ॥
ऊपर दासनि कौ प्रभू, करै तो विना कौन।
दास ते हि उर अंतरैं, भजै तोहि गहि मौन ॥ १० ॥
ऊपरि नीचीं दिसि विदिसि, व्यापि रह्यो तू देव।
और न चाहैं नाथ जी, देहु रावरी सेव ॥ ११ ॥
ऊपरि सब कै तू सही, सब तैं ऊँची ईस।
तेरी ऊकस सौं मुनी, हरैं मोह कौं धीस ॥ १२ ॥

ऊठि न सकहीं तू तिनैं, ऊर्जित करै अनूप।
 ऊर्जित प्रबल सुवीर कौं, कहैं मुनी गुणरूप॥१३॥
 ऊहापोह वितीत तू, ऊहा तर्क जु नाम।
 तू अधिपति स्वरूप है, अतुल अर्क निज आप॥१४॥
 ऊर्मी नाम तरंग कौ, तोमें अतुल तरंग।
 ऊर्मीपति जलनिधि कहा, तू गुणसिंधु अभंग॥१५॥
 ऊधिम तैरे कछु नही, तू ऊधिम तैं दूरि।
 मैरे ऊधिम लागिआ, सौ हरि करि भरिपूर॥१६॥
 ऊर्णनाभि है मांकरी, उरतैं काढैं तार।
 आपहि मैं खेलै तारसौं, बहुरि सकौचै सार॥१७॥
 तैंसैं तू निज परणती, आपहि मांहि उपाय।
 आपहि मैं लय करि प्रभू, धूव राजै जिनराय॥१८॥
 नाम उर्मिला नदिनि कौं, नदी सुपरणति होय।
 तू चिद्रूप समुद्र है, अति गंभीर जु सोय॥१९॥
 ऊलर तोसों जे रहैं, फसिया विषयनि मांहि।
 ते निज निधि पावैं नहीं, भव भरमें सक नाहि॥२०॥
 ऊभौ द्वारै रावरै, करौं वीनती देव।
 द्वारै द्वारै भटकिवौ, मेटि देहु निज सेव॥२१॥
 ऊग्यो ज्ञानांकुर जवै, उर क्षेत्रें जगदीस।
 कण स्वरूप तू जब लह्यो, योग रूप अक्नीस॥२२॥
 ऊक चूक करि मोह नैं, हरयौ हमारी माल।
 चिदधन धन द्यावौ सही, ज्ञान स्वरूप विसाल॥२३॥
 दाह लगायो मोह नैं, गुन मंदिर कै मांहि।
 दाह बुझै नहि अव लगैं, ऊपर करहु न कांहि॥२४॥
 दाह बुझावो स्वरस दै, त्रिश्रा हरी अपार।
 पार देहु भव सिंधु कौ, तू तारक जग सार॥२५॥

ऊठि नहीं जु विमोह मैं, उकसि पारै रारि।
 तुझ दासनि सौं लोकजित, दास करौ अघटारि॥ २६॥
 प्रभू ऊघड़यो राजई, जानैं सब संसार।
 मोह उदै ध्यावैं नहीं, ध्यावैं निरहंकार॥ २७॥
 ऊमरादि जे निंद्य फल, भखैं अभख आहार।
 तिनकै घटि भक्ती नहीं, भक्ति दया आधार॥ २८॥

— छंद गीता —

ऊर्द्ध गांमी ऊर्द्ध धांमी ऊर्द्ध लोकी नाथत्वं।
 तू हि ऊर्द्धादूर्द्ध नाथा, वडहाथा दै साधत्वं॥ २९॥
 ऊर्द्ध भाव स्वभाव पूरा, ऊर्द्ध लोक प्रचारत्वं।
 ऊर्द्ध शक्ती अतुल युक्ती, देव वितीत विकारत्वं॥ ३०॥
 ऊंची दसा सब तैं जु तेरी, शक्ति व्यक्ति विभूति जो।
 संपति रमा पदमा सु दौलति, कमला और सुभूति जो॥ ३१॥

इति ऊकार संपूर्ण। आगै ऋ वर्ण का वर्णन करै है।

— श्लोक —

ऋकाराक्षर कर्तारं, धातारं धर्म शुक्लयो।
 ज्ञातारं सर्वभावानां, वंदे त्रातारमीश्वरं॥ १॥

— दोहा —

ऋ वरण वर्ण जु सूत्र मैं, देवमात कौ नाम।
 देव तु ही तैं नहीं, तात मात धन धाम॥ २॥
 अर देवासुर जाति जे, तेऊ गर्भज नाहि।
 देव जौनि सुर मात है, इह भाख्यो श्रुति मांहि॥ ३॥
 दासनि कै निश्चै भयो, देवमात तुव भक्ति।
 तुव दिक्षा शिक्षा विनां, देवमात नहि व्यक्ति॥ ४॥

रमें चरन पंकज बिषै, तातैं दासा देख।
 तिनकी रक्षक भक्ति ही, सुरमाता श्रुति एव॥५॥
 सतपुरषनि की मात विनु, और न है सुरमात।
 परम उदात्त अपात्त तू, दै स्वभक्ति जग तात॥६॥
 ऋषि गुर ऋषि वर देव तू, ऋषि तर ऋषि पर नाथ।
 परम धुरंधर ऋषिनि मैं, ऋषि लागे तुव साथ॥७॥
 ऋषिप ऋषीश्वर ऋषभ तू, वृषभदेव अविकार।
 ऋजु सुभाव अति सरल तू, ऋषिपति ऋषी अपार॥८॥
 ऋतुगति विपुलप्रती, ऋषी लेहि भजैं शक्तिभाव।
 केवलभाव प्रभात तू, प्रभो भवोदधि नाव॥९॥
 ऋजुता भाव विना कभी, लहिये तू न ऋषीस।
 ऋत्त्विक होता कर्म कौ, तू मुनिराय अधीस॥१०॥
 सामग्री प्रकृति सबै, अनल निजातम ज्ञान।
 तू ऋत्त्विक होमैं महा, प्रवल प्रपंच अज्ञान॥११॥
 ऋचा तिहारी बांनि है, ऋद्धि सिद्धि कौ मूल।
 ऋषिनायक सुखदायको, तू ऋषिगन कौ चूल॥१२॥

— बरवै छंद —

हौं विरवा सम हतमति जगजन मूढ,
 भव खन मांहि वसेरा अवुध अगूढ।
 पात पात करि झारिउ मिथ्यावाय,
 मधु ऋतु मायापाय जु अति अधिकाय॥१३॥
 मधु ऋतु भलिय जु इह माया ते नाथ,
 पतझर करि विरखे कौं फुनि खडहाथ।
 पात फूल फल जुत करि अति अधिकौ जु,
 बिरवै कौं रमणीय जु करहि सुमौज॥१४॥

इह माया दुखदाया भव भव देव,
 विरवै सौं भल करहि न कवहु अछेव।
 तपिउ ताप दुखया करि हौं अति ईस,
 तप ऋतु सम इह माया दाह करीस॥१५॥

झर लांवन अमृत कौ तू अति मेह,
 ज्ञानांकुर तो विनु को कई परम सनेह।
 भव्य सिखंडी हरषहि सुनि तुव गाज,
 तपति हरन तू प्रभुजी अधिक समाज॥१६॥

वरषा ऋतु जित सरस जु तुम्हरी सेव,
 दै जिनराय अधांस अनादि अछेव।
 ऋतु जु सरदसम उज्जल केवल बोध,
 तुव किरपा तैं लहिये परम प्रबोध॥१७॥

ससिर समानो जडताभाव सुमोहि,
 लगिउ जु चिरतैं हरि प्रभु बुधिहर सोहि।
 दिनकर सम तू हरि प्रभु जडता भाव,
 दै निजबोध प्रबोध मिटाय विभाव॥१८॥

हिम ऋतु सम इह सठता मोतैं टारि,
 दै परवीन स्वभाव भवोदधि तारि।
 ऋतुषट भासक ऋतुरति जीतक देव,
 ऋतुराजो ऋषिराजो तू जु अछेव॥१९॥

ऋषि सब मिलि करि लिखिया तू इकतत्त्व,
 ऋषि नरपतिया जतिया तू अति सत्व।
 ऋणनासक ऋणवीत तु ही रणजीत,
 ऋषिक न तोसौ जग में और अजीत॥२०॥

— छप्पय —

ऋद्धि प्रचंडी नाथ, तु जु है मनसुत खंडी,
 मनखंडी जु अखंड, तोहि ध्यावैं वनखंडी।
 ऋद्धि निरंतर पास, पूजि तू ऋद्धि परंपर,
 सकल ऋद्धि परकास, ऋद्धि कैवल्य धुरंधर।
 ऋद्धि सिद्धि संमृद्धि भरीया, अतुल वृद्धि परिवृद्ध तु,
 हानि वृद्धि तैं रहित देवा, योगीश्वर परसिद्ध तु॥ २१॥
 ऋतु षट पूरण धीर, खीर तू रतिपति चूरण,
 ऋद्धि अवास विभास, शुद्ध गुणशक्ति प्रपूरण।
 ऋते ज्ञान नहि मोक्ष, ज्ञान तो विनु नहि स्वांमी,
 भुक्ति चहैं न विमुक्ति निष्प्रहा भक्त सुनांमी।
 भुक्ति मुक्ति की मात भक्ती भक्त नाथ ऋषि नाथ तू,
 ऋषि राया भवपाज साईं, ऋण हर अनिवड हाथ तू॥ २२॥

— दोहा —

ऋते नांव वर्जित सही, वर्जित सकल विभाव।
 शुद्ध स्वभाव प्रभाव तु, राव भवोदधि नाव॥ २३॥
 ऋते अर्थ वर्जित कहैं, विगारि कहैं जु वितीत।
 विना कहैं रहित जु कहैं, त्यक्त कहैं जु अतीत॥ २४॥
 ऋते कर्म नोकर्म तू, भाव विभाव वितीत।
 ऋते युक्ति संसार तू, मुक्त स्वरूप प्रतीत॥ २५॥

- कुंडलिया छंद -

अनुभव रूप अकाय तू ऋ सही जु।
 रायांराय तू, विनु दायद स्वभाव।
 विनु दायद स्वभाव भाव जाके अतिगाढे।
 ऋते छाव अतिछाव कर्म सब भर्म जु ढाडे।
 जाके कछु न बिकार नहीं जग जार नहीं भव।
 ऋते क्षोभ अर लोभ नाथ राजै धर अनुभव॥ २६॥

अनुभै मूल सचूल तू ऋते छद्म अर सद्म।
 ऋते परिग्रह भिन्नतैं पद्मा रूप सुपद्म।
 पद्मा रूप सुपद्म खेद खिन्नो नहि कव ही।
 ऋते पुन्य अर पाप ताप जाकैं नहि सब ही।
 जाकैं नहीं उपाधि नहीं असमाधि नहीं भै।
 ऋते जु रामा राम नाथ राजै सुख अनुभै ॥ २७ ॥

टीकौ जग कौ रावरै, सोहै देव ललाट।
 ऋते नाम अर गाम तू, धाम रूप उदघाट।
 धाम रूप उदघाट ठाट कौ नायक तू ही।
 पाट धार शिववाट एक परवर्त्त प्रभू ही।
 तैरे नहि गुनस्थान नही परमाणु गनी।
 ऋते काल जगजाल धीर धार्यां जग टीकौ ॥ २८ ॥

— दोहा —

ऋवरण सुरमाता कही, तुव श्रुति अर तुव भक्ति।
 तू श्रीधर श्री रूप है, अति दौलति अति शक्ति ॥ २९ ॥
 इति ऋकार वर्णनं। आगै ऋ वर्ण का वर्णन करै है।

— श्लोक —

ऋकाराक्षर कर्तारं, भेत्तारं कर्म भूभृतां।
 ज्ञातारं विश्वतत्त्वानां, वंदे देवं सदोदयं ॥ १ ॥

— दोहा —

ऋकारो आगम विषै दैत्य मात कौ नाम।
 दैत्यां मोहादिक महा, रागादिक दुख धाम ॥ २ ॥
 तिनकी माता भ्रांति है, महा अविद्या रूप।
 इह दैत्यां वा ए असुर, लागि रहे जु विरूप ॥ ३ ॥
 तुव प्रताप निज दास जे, हरै भ्रांति मोहादि।
 भ्रांति हरन मोहादि रिपु, तातैं तुम जु अनादि ॥ ४ ॥

वहुरि असुर तेऊ कहे, सुर्ग विनां जे देव।
 विंतर भावन ज्योतिषी, ए भवनत्रिक भेव॥५॥
 सुर असुरनि कै जौनि ही, कहिये तिनकी मात।
 गर्भज नहि तातैं नही, तिनकै मात सुतात॥६॥
 उतपादक शज्या प्रभू, सोई राक्षस मात।
 देव मात भी वह सही, और न दूजी बात॥७॥
 देवासुर पदवी प्रभू, चाहैं नांही दास।
 चाहैं तेरी भक्ति जो, निहकामा सुखरास॥८॥
 मोहादिक अति राक्षसा, भ्रांति जनित हैं दुष्ट।
 थिर चर कौं पीडैं महा, मदमाते प्रभु पुष्ट॥९॥
 दैत्यांतक तुम देव हौ, दैत्य मात के शत्रु।
 हमरी भ्रांति निवारि हो, सब जीवनि के मित्र॥१०॥
 ऋ असुरनि की मा कही, असुर मात है भ्रांति।
 भ्रांति हरी दै दौलती, अविनासी विश्रांति॥११॥

इति ऋ वर्णनं संपूर्ण। आगैं लृ वर्ण का वर्णन करें है।

— श्लोक —

लृकाराक्षर कर्त्तारि, देव देवाधिपं परं।
 पूर्ण पुरातनं शुद्धं, वुद्धं वंदे जगत्प्रियं॥१॥

— दोहा —

कहैं लृकार सिधंत मैं, देव मात कौ नाम।
 देव कौन सो गुर कहै, सुनैं सिक्ष अभिराम॥२॥
 निज गुन उपवन मैं रमैं, प्रभू अखंड बिहार।
 ता सम और न देव है, वहै देव अविकार॥३॥
 गुरनि बतायौ देव तू, तैरे मात न तात।
 तू अनादि अनिधन प्रभू, सब कौ तात सुमात॥४॥

करें कीड भव सिंधु में, तातैं जीव हु देव।
 जीव सनातन तू कहै, एहु अनादि अछेव ॥ ५ ॥
 कहवै के अमरा प्रभू, देव कहावैं जेहु।
 तेऊ गर्भज नां कहे, औंपादिक हैं तेहु ॥ ६ ॥
 देव मात सौं कौन है, ताकौ इह विचार।
 गुन देवा लीला करें, निज स्वरूप में सार ॥ ७ ॥
 गुन जननि तुव भक्ति है, तातैं इह सुरमात।
 अथवा दासा देव हैं, इह पालक विख्यात ॥ ८ ॥
 सुर अक्षर जननी प्रभू, तव वांनी मति रूप।
 सो श्रुति सुर जननी कही, और न कोई स्वरूप ॥ ९ ॥
 सो श्रुति पड़े भक्ति तैं, भक्ति महा विश्राम।
 देव मात तुव भक्ति है, प्रथम कही अभिराम ॥ १० ॥

— छंद मोती दाम —

नही तुव भक्ति विना प्रभु और, सुदेवनि की जननी जग मौर।
 जनै सुर अक्षर रूप सबै हि, सुराजननी तुव श्रुति फवै हि ॥ ११ ॥
 धरैं अति ज्योति सु तू लखिमीस, न तेरहि कामिनि कंचन धीस।
 सु तेरिहि भूति त्रिलोकन माय, कहैं निज दास तिसै सुर माय ॥ १२ ॥
 रमैं पद पंकज मांहि सदाहि, सुदेव कहावहि दास महाहि।
 गनैं निज मात सु ते तुव भक्ति, तु ही जगदेव अमात सुसति ॥ १३ ॥
 सु देहु प्रभु निज सेव रसाल, न यातहि और कछु सुविसाल।
 नहीं कछु चाहहि दास कदापि, लखैं तुव मूरति नाथ उदापि ॥ १४ ॥

— दोहा —

सुर माता तुव भक्ति है, तू है संपति मूल।
 संपति तेरी परणती, सो दौलति अनुकूल ॥ १५ ॥
 इति लृकार संपूर्ण। आगे लृ का वर्णन करै है।

— श्लोक —

लूकासक्षर धातारं, दातारं सर्व संपदां ।
नेतारं मोक्षमार्गस्य, वंदे देवं सदोदयं ॥ १ ॥

— दोहा —

लू कहिये अहि मात कौ, नाम सुग्रंथनि मांहि ।
अहि दुर्जन ए कर्म हैं, विष भरिथा सक नांहि ॥ २ ॥
इन नागनि की मात प्रभु, नागिनि माया होय ।
कहैं अविद्या मुनि गणा, जाकौ नाम जु सोय ॥ ३ ॥
हरैं मुनी माया महा, हरैं कर्म कौ दंड ।
हरैं गहलता रूप विष, जपि तुव नाम सुअंक ॥ ४ ॥
मंत्र गारडु नाम इह, तेरौ दीन दयाल ।
सो हमकौ दै अमृता, हरि माया विष लाल ॥ ५ ॥
अहि नागा जे देवता, नागेंदर इत्यादि ।
देव दैत्य खेचर नरा, तिर नारक सब वादि ॥ ६ ॥
जो सुर जौनि सुमात है, सब देवनि की एह ।
नाग मात ही सो सही, हम न चाहैं सुर देह ॥ ७ ॥
नाग नाम गज कौ सही, ताकी हथनी मात ।
हस्ति हस्तिनी आदि कछु, दास न चाहैं तात ॥ ८ ॥
नाग नाम है साप कौ, ताकी नागिनि मात ।
तातैं अधिक सुदुष्टता, सो हरि जगत विख्यात ॥ ९ ॥
नागिनि मरन जु एकभव, करै अधिक नहि दोष ।
इह दुरजनता भव भवै, करै अधिक तन सोष ॥ १० ॥
जब तू आवै घट विषै, नागिनि कौ नहि वास ।
तू गरुडध्वज देव है, सर्व पिशुनता नास ॥ ११ ॥
नाग नाम सीसा सही, ताकी जननी खानि ।
नागादिक सब धातु की, खानि न मांगीं दानि ॥ १२ ॥

खांनि एक जाचौं प्रभू, गुन रतननि की जो हु।
 तेरी भक्ति महाप्रभू, देहू क्रिया करि सो हु॥१३॥
 नाग नांम मणिधर पुरुष, तू मणि धारी देव।
 चिंतामणि चिद्रूपमणि, धारै तू जु अछेव॥१४॥
 तेरी शक्ति सुमणि सही, अतुल विभूति सुलच्छि।
 सो श्री संपति धन रमा, दौलति है परतच्छि॥१५॥

इति लृ वर्णनं । आरौं एकार का व्याख्यान करै है ।

— श्लोक —

एकं विशुद्धमत्यक्षं, परमानंद कारणं।
 परं परात्परं देवं, वंदे स्वात्म विभूतिदं॥१॥

— दोहा —

ए कहिये सिद्धांत मैं, नांम महेश्वर देव।
 ए कहिये फुनि विश्व कौ, तुम ही देव अछेव॥२॥
 ईश्वर समरथ नांम है, तोसौं समरथ कौन।
 तातैं तू हि महेस है, भजैं मुनी गहि मौन॥३॥
 एक एव जगदेव तू, व्यापक लोकालोक।
 तातैं विश्व अत्रिश्च तू, जिनवर नित्य असोक॥४॥
 एक महाज्ञानी तु ही, एक सुकेवल ज्ञान।
 एक मुक्ति मारग तु ही, परमेश्वर भगवान्॥५॥
 एकीभाव अनेक तू, एक तत्व परधान।
 सकल तत्व भासक तु ही, अति अविचल सरधान॥६॥
 एकनाथ द्वै भेद तू, त्रिक भेदो चउ रूप।
 पंच भेद धारक तू ही, परम स्वरूप अनूप॥७॥
 एक धरम आकास इक, एक अधर्म निरूप।
 एक अणूं मिलि बहुत अणु, खंड होय जड रूप॥८॥

एक एक कालाणु वा, सकल असंखि जु होय।
 मिलै न कोई काहु सौं, अमिल शक्ति है सोय ॥ ९ ॥
 एक जाति बहु भांति के, जीव अनंत अनेक।
 पुदगल अमित अनंत है, तू भासै सुविवेक ॥ १० ॥
 एक मूर्ति पुदगलो, और सबै जु अरूप।
 जड स्वरूप पांछीं कहे, जीव रासि चिद्रूप ॥ ११ ॥
 एक रासि संसार की, एक रासि हैं सिद्ध।
 देह धरे जग जीव हैं, सिद्ध विदेह प्रसिद्ध ॥ १२ ॥
 ए संसारी सिद्ध हूँ, जे सुभव्य तुव भक्त।
 रुलैं अभवि संसार मैं, कभी न होवैं मुक्त ॥ १३ ॥
 ए तन सिद्धनि कै नही, तातैं भ्रमण न होय।
 तन तैं ए संसारि के, भ्रमण करें दुख सोय ॥ १४ ॥
 ए जु पदारथ सकल ही, नाहि विगारै नाथ।
 मेरौ कछु इह रिपु लग्यो, पुदगल मेरे साथ ॥ १५ ॥
 ए जड इनके रूप मैं, मेरौ एक न भाव।
 दै स्वभाव निजभाव तू, शुद्ध बुद्ध अविभाव ॥ १६ ॥

— छंद बेसरी —

ए जड है सब शुन्य स्वरूपा, अंक समान कह्यौ चिद्रूपा।
 तू है एक शुद्ध चिद्रूपा, दै प्रबोध स्वांमी सदृपा ॥ १७ ॥
 एक राय तू और न राया, एक स्वभाव अनंत अकाया।
 एक उपादेयो सब हेया, सकल सेय तू मैं नहि सेया ॥ १८ ॥
 एकी भाव न तातैं पायो, दुविधा धरि निजरूप न भायो।
 एक महा अविवेकी मैं ही, जीव होय हार्यौ जड मैं ही ॥ १९ ॥
 एन कहावै पाप जु कर्मा, पाप पुन्य लागे द्वय भर्मा।
 पाप महापापी जग मांही, भक्ति ज्ञान कौ रिपु सक नांही ॥ २० ॥

एन नासिवे कारन पुन्या, धरैं विवेकी दास जु धन्या ।
 पुन्य पाप तैं रहित जु होई, आवैं तुव पुरि भांति जु खोई ॥ २१ ॥
 एन भेद बहु मुख्य जु हिंसा, पुन्य भेद बहु मुख्य अहिंसा ।
 एण कहावैं मृग पशु जीवा, मृग मारैं तैं पाप अतीवा ॥ २२ ॥
 एडक कहियै पुत्र अजा कौ, निरबल जाकौं बल नहि काकौ ।
 तिनके हतैं जु करुणा नासै, करुणा बिनु नहि भक्ति प्रकासै ॥ २३ ॥
 ए मारैं ते नरकैं जावैं, मांस भखैं ते अति दुख पावैं ।
 मद्य मांस सम और न निंदा, करुणा सम और न जग बंधा ॥ २४ ॥
 एण नेत्र सम नारी नेत्रा, लखि करि डिगैं न इंद्री जेत्रा ।
 तेही द्विद भक्ती तुव पावैं, एन समस्त जु तेहि नसावैं ॥ २५ ॥
 एणांक जु सेवैं तुव पाया, नाम चन्द्रमा इहैं बताया ।
 तू त्रिभुवन कौ चंद अनंदा, चंदहु कौ तू चंद मुनिंदा ॥ २६ ॥
 एक पक्ष धारै नहीं कोई, नित्यानित्य कथक तू होई ।
 प्रभु एकांतवास एकत्वा, सदा एकता रूप सुतत्वा ॥ २७ ॥
 एक वाद नहि तैरै पैए, द्वय वादी अविवाद वतैए ।
 तू एकत्व तंत्र नैकत्वा, अदभुत गति तेरी अतिसत्वा ॥ २८ ॥

— छंद पद्धती —

एकत्व गम्य एकत्व लीन, एकत्व सार शुद्धत्व चीन ।
 एकांतवास धारैं मुनिंद, ते तोहि एक ध्यावै जिनिंद ॥ २९ ॥
 एकिंद्रियादि जीवा अनंत, एको दयाल तू ही जु कंत ।
 एतत्स्वरूप भवतारि मोहि, रुद्रा जु एकदस जपहि तोहि ॥ ३० ॥
 एकादस जु पडिमा सुसार, श्रावण धर्म भासैं अपार ।
 एकाधिवीस लक्ष्या जु आदि, गुन सर्व तू हि भासैं अनादि ॥ ३१ ॥
 एकाधितीस उदधी सुआयु, नौग्रीव जाय पावैं सुकाय ।
 तप धारि बार केई जु जीव, सुर लोक मांहि पहुंचैं अतीव ॥ ३२ ॥
 एको सुसिद्धि पथ तू हि देव, बिनु सेव जन्म धारैं अछेव ।
 एकाधिचालिसा सहस वर्ष, कलपांत काल पीछैं सहर्ष ॥ ३३ ॥

एनानिवारि मनु धीर धर्म, करि हैं प्रगटु तेरौ हि मर्म।
 एकांवना जु कोडी हि अष्ट लक्षा सहस चउरासि मिष्ट ॥ ३४ ॥
 छसै जु सत्तवीसा सिलोक, ए एक ही जु पद के सथोक।
 एद एक सौ जु वाराह कोडि, लक्षा तियासि आधिक्य जोडि ॥ ३५ ॥
 ए अटुवन्न सहसा बहोरि, पंचाधिका जु सह पद जोरि।
 भाखै जु तूहि धारै मुनिंद, गावैं सुकित्ति नागिंद इंद ॥ ३६ ॥
 ए एकसट्टि दूणा जु लेय, हैं एक सौ जु वाइस हेय।
 प्रकृति जु नाथ उदया सबै हि, मोतैं जु टारि तोतैं दवै हि ॥ ३७ ॥

— सौरठा —

एकहतरि परि एक, अधिक भयें बहतरी कला।
 सकल कला अविवेक, जौ तोकों ध्यावै नही ॥ ३८ ॥
 एक्यासी चउरासी असी पच्यासी लगि रहै।
 तेरम ठाण अपासि, जरी जेवरी सी अवल ॥ ३९ ॥
 ए सह प्रकृति चूरि, पावै तेरौ निज पुरा।
 तू है एक प्रभूरि, एकानव भी है सही ॥ ४० ॥
 एकोत्तर सौ पूत, ऋषभदेव के शिव भये।
 तोकों जपि अवधूत, तू है शिव कारन सही ॥ ४१ ॥
 एक सहस परि अष्ट, लक्षण अर नामा प्रभू।
 तेरे जपैं जु शिष्ट, अमित नाम गुण अमित तू ॥ ४२ ॥
 एष एव परसिद्ध, सब मैं तू राजै सदा।
 प्रगट होहु गुणवृद्ध, शुद्ध दसा करि दास की ॥ ४३ ॥
 ए ही तोतैं नाथ, मांगू और न एक हू।
 तू छुडाय बडहाथ, कर्म पासि तैं मोहि हू ॥ ४४ ॥
 एक एकता देव, तेरी सो कमला रमा।
 श्री पदमा जु अछेव, धन दौलति सोई सही ॥ ४५ ॥

इति एकार संपूर्ण। आगैं ऐकार का व्याख्यान करै है।

— श्लोक —

ऐकारं परमं देवं, सर्वाक्षर निरूपकं ।
वंदे देवेन्द्र वृन्दार्च्य, परमं पुरषोत्तमं ॥ १ ॥

— दोहा —

ऐ कहिये सिद्धांत मैं, नाम महेश्वर देव ।
तुम ही ईश महेश ही, और न दुजौ भेद ॥ २ ॥
ऐक्य रूप ऐश्वर्य धर, ऐक्य सुभाव अनूप ।
ऐक्य नैक्य अव्यक्त तू, अति ऐश्वर्य स्वरूप ॥ ३ ॥
ऐहिक फल मांगूं नही, परभव भोग न चाहूँ ।
निःकामा भक्ती चहुँ, तुव भजि कर्म नसाहुँ ॥ ४ ॥

— छंद पढ़डी —

ऐश्वर्य मूल ऐश्वर्य दाय, ऐरावताधिपति परहि पाय ।
ऐश्वर्य मोह कौ सर्व नासि, भासे सुतत्व आनंद रासि ॥ ५ ॥
ऐश्वर्यपार ऐश्वर्यसार, ऐश्वर्यभार आश्चर्य धार ।
परमेश्वरख्य परतक्ष देव, देवाधिदेव लोकेस एव ॥ ६ ॥
ऐरावतादि भरतादि, सर्वक्षेत्राधिपो हि, तू विगत गर्व ।
ध्यावै जु ऐलविल तोहि धीस, देवो जु ऐलविल द्रव्य ईश ॥ ७ ॥
यक्षाधिपो जु कहिये कुवेर, देविन्द्र कोसधारी घनेर ।
देवेन्द्र एलविल सर्व तोहि, ध्यावै जु तारि भवतैं जु मोहि ॥ ८ ॥

— छंद गीता —

ऐक्य रूपा नैक्य रूपा परम रूपा रूप तू ।
धर्म रूपा है अनूपा अति निकृपा भूप तू ॥ ९ ॥
ऐश्वर्यभागी अति विरागी परम भागी नाथ तू ।
अति संग त्यागी वहिरभागी वस्तु लेय न साथ तू ॥ १० ॥
ऐश्वर्यवासा अति उदासा कर्मनासा देव तू ।
हे आसवासा तारि दासा दै अनासा सेव तू ॥ ११ ॥

— मंदाक्रांता छंद —

ऐरावंतो गजपति महा इंद्र कै होय नांमी,
ताकौ स्वांमी सुरपति सदा तोहि पूजै सुधामी।
इंद्राधीशो जिनपति तु ही मोक्ष मूलो अनांमी,
नांमी तू ही प्रगट पुर सो सर्व स्वांमी अकांमी ॥ १२ ॥

तेरे दासा सुरपति दसा, नांहि चाहैं प्रभूजी,
ऐरावंतादिक गज घटा नांहि चाहैं विभूजी।
दासा तोकों द्रिढ मन चाहैं, पाय सेवैं स्वभूजी,
निःकामा जे जग नहि रूलैं, पांवड़ शुद्ध भू जी ॥ १३ ॥
कर्मा भर्मा दहति सुजनो नाथ तोकों जु ध्यावै,
पावै तोकों तुव पद रतो, ह्वै विरक्तो जु भावै।
नागेंद्रो जो, तुव तजि कभी और कौ नांहि गावै,
जिह्वानेका, करि तुव भजै, एक तोहि रिझावै ॥ १४ ॥

— सोरठा —

ऐरावतपति इंद्र, तोहि निहारै, भक्ति करि।
ध्यावैं सकल मुनिदं चंद सूर गावैं सबै ॥ १५ ॥
सहस नेत्र करि रूप निरखैं तो पनि त्रिप्त नां।
सहस चर्ण करि भूप तो ढिग नाचैं सुरपती ॥ १६ ॥
सहस हाथ करि नाथ, भाव बतावैं इंद्र से।
थाह न आवैं हाथ, तेरे गुन अंभोधि कौ ॥ १७ ॥
सहस जीभ करि देव, देवपती गावैं तुझैं।
कोई न पावै छेव सेव देहु निज दास कौं ॥ १८ ॥
अति ऐश्वर्य स्वरूप तेरी जो ऐश्वर्यता।
सो संपति जगभूप, भाषा में दौलति कहैं ॥ १९ ॥
इति ऐकार निरूपणं । आगैं ओकार का व्याख्यान करै है ।

श्लोक —

ओकारं परमं देवं, सर्वज्ञं सर्वदर्शिनं।
नाथं सुर्गाधि नाथानां, वंदे लोकेश्वरं विभुं॥१॥

— दोहा —

ओ कहिये आगम विषै, ब्रह्मा कौ है नाम।
तू हि जु ब्रह्मा हर हरी, और न दूजौ राम॥२॥
ओजस्वी अति तेजमय, तू है ओज स्वरूप।
ओज नाम है तेज कौ, तेज पूंज तू भूप॥३॥
ओक नाम घर कौ सही, तैरे घर नहि देह।
लोकालोक विषै तुही, व्यापि रहयो विनु नेह॥४॥
ओक तिहारौ ज्ञान है, निज क्षेत्रो चिद्रूप।
सर्व ज्ञेय हू ओक हैं, व्यवहारैं जु प्ररूप॥५॥
ओक तिहारै सर्व ही, सबके तुम ही ओक।
ओक तिहारौ लोक कै मांथे हैं गुन थोक॥६॥
ओप चढ़ावै ओपनी, जैसैं सिकला फेरि।
ओप चढ़ावै जीव कौं, तैसैं तू अघ घेरि॥७॥
ओज अनंत अपार धर, ओजस्वी तोसौ न।
दूजो है संसार मैं, प्रभु अति सठ मोसौ न॥८॥
ओष्ठ कहाँवैं ओठ ए तोहि न जपैं अयांन।
तातैं अधर कहाँवही, जपिवौ तोहि सयांन॥९॥
ओठ न हालैं कर फिरै, मन फेरा मिटि जाहि।
अजपा जप करि धीर धी, तो हि लहै सुखदाय॥१०॥
ओहडि राख्यौ मोहि प्रभु, कर्म मिले जु वलिष्ट।
तू ही छुडावै वंछतैं, तो सम और न इष्ट॥११॥
ओहडिवौ मन पाँन कौ, तू हि बतावै देव।
ओहडि राखे ज्ञान मैं, लोक अलोक अछेव॥१२॥

ओषद अन्न अभै महा, ज्ञान दान ए च्यारि।
 इनकै गर्भित दान बहु, भासक तू भव तारि॥१३॥
 ओज नाम पंडित कहैं, विक्रम कौ हू ईस।
 तोसौ और पराक्रमी, नाहि जु कोई अधीश॥१४॥
 ओस विंदु सम जग विभव, सो नहि संपति कोय।
 शक्ति रावरी संपदा, सोई दौलति होय॥१५॥
 इति ओकार संपूर्ण। आरौ औंकार का व्याख्यान करै है।

— श्लोक —

औंकाराक्षर कर्त्तारि, ज्ञानानंदैक लक्षणां।
 सर्वज्ञ सुगतं शुद्धं बुद्धं वंदे जगत्प्रियं॥१॥

— चौपड़ी —

औ कहिये ग्रंथनि कै मांहि, नाम अनंत जु संसय नांहि।
 तुम ही देव अनंत सुज्ञान, एक अनंत तु ही भगवान॥२॥
 औपासक श्रुति भासै तू हि, तू न उपासक देव प्रभू हि।
 औदासीन्य स्वभाव सुधार, अति आनंद मई विसतार॥३॥
 औषद रूप तु ही जगदेव, हरै व्याधि जर मरण अछेव।
 औषधीश है चन्द्र सुनांम, चंद सूर ध्यावैं तू हि राम॥४॥
 औपाधिक नहि तोमैं भाव, औत्कंठिक एको न विभाव।
 लगे भाव औपाधिक मोहि, हरी देव नहि कठिन जु तोहि॥५॥
 औदार्यादि गुणा तो मांहि, ज्ञान महानिधि देहु न कांहि।
 प्रभु अनौपम्यो इक तू हि, सर्व उपमा योज समूहि॥६॥

— मंदाक्रांता छंद —

औत्सुक्यादी तव नहि कभी, तू अनौत्सुक्य रूपो।
 औद्धत्यादी कछुहु न कभू, शांत रूपो अनूपो।
 औपाथी जे, लहहि न तुझैं, श्री गुरैं यों कही जो।
 औदार्यादी गुण धर नरा, तोहि ध्यावैं सही जो॥७॥

औचित्यादी, अति गुण भरी, औपशांती तु ही जो।
 औदैको जो, रहहि न नखैं तू न कर्मो वही जो।
 तैरे स्वांमी, रहहि न सही औपशांती हु भावा।
 नांही तैरे, क्षय उपशमा, तू हि शुद्ध स्वभावा ॥८॥
 तैरे नाथा, निज गुण मयो, ज्ञायको शुद्धभावो।
 पैए तैरे, प्रकृति रहितो, पारिणामो स्वभावो।
 औदारीकादि तन सखै नांहि, तैरे प्रभू जी।
 अप्राकृतो, सतचितमयो, तू खिदेहो विभूजी ॥९॥

— गीता छंद —

औदईको औपशांती, नांहि क्षय उपशम कभू।
 क्षायको प्रकृत्यक्ष यो जो, पारिणांमीक है प्रभू ॥१०॥
 राग दोषा मोहभावा, ए जु औपाधिक सही।
 तू न औपाधी कदापी, है उदापी गुर कही ॥११॥
 रमा न औपाधी तिहारी, स्वाभाविक परणति सही।
 गौरी सुलच्छि स्यामा जु शक्ती सोइ दौलति हू कही ॥१२॥
 इति औंकार कथनं संपूर्ण। आर्गे अं का व्याख्यान करै है।

— श्लोक —

अंकारं परम देवं, शिवं शुद्धं सनातनं।
 योगिनं भोगिनं नाथं, वंदे लोकेश्वरं विभु ॥१॥

— दोहा —

अं कहिये आगम विषै, परब्रह्म की नाम।
 परब्रह्म परमात्मा, तुम ही देव सुधाम ॥२॥
 अंक नांव है चिन्ह की, तैरे चिन्ह न कोय।
 ज्ञानानंद जु चिन्ह है, तू चिद्रूप जु होय ॥३॥
 अंक नाम अक्षर सही, तू अक्षर अविनासि।
 अंहि चरन की नाम है, सेवैं सुर नर रासि ॥४॥

अंहिप कहिये वृक्ष कौं, अदभुत तरु सुखदाय।
 तो सम सुरतरु और नहि, अति अनंत फल छाये॥५॥
 अंशु किरण कौ नाम है, किरण अनंत जु धार।
 तू अनंत दुति देव है, भानुपति अविकार॥६॥
 अंशुक कहिये वस्त्र कौं, तू हि दिगंबर देव।
 पीतांबर पूजित तु ही, निराभर्ण अति भेव॥७॥
 अंतर तैरे कछु नहीं, नित्य निरंतर ईस।
 अंतर बाहिर एक रस, अति रसिया अवनीस॥८॥
 अंतर उर मेरे सदा, वसि जगजीवन नाथ।
 अंतर मेदि दयाल तू, देहु आपुनों साथ॥९॥
 अंदर उर कै आयकैं, हरौ कुबुद्धि अपार।
 दें स्वभक्ति भव तारि तू, निरधारा आधार॥१०॥

— मालिनी छंद —

यतिपति सु चंद को, अंक जाकै न कोई।
 जग प्रभु जु अवंको, वक्रता नाहि होई।
 जग जित जु अपंको, शंक लेसो न जामैं।
 भजहु भजहु भव्या, नाहि रागादि तामैं॥११॥
 प्रभु तजि जग मैं जे, राचिया मूढ जीवा।
 नहि लहहि शिव ते, जन्म धारैं अतीवा।
 हरि भजि जग जीतैं, ते लहे स्वात्म तत्वा।
 जिन सम नहि कोऊ, और दूजौ सुसत्वा॥१२॥
 प्रभु भजहि सुभाजै, अंधको मोह नामा।
 प्रभु भजहि सभागा, त्यागि संसार रामा।
 प्रभु तजहि अभागा, तेहि अंधा न औरि।
 प्रभु सम नहि कोई, वीर बैठा जु चौरि॥१३॥

— इन्द्रवज्रा छंद —

अंभोज तेरे चरणारविंदा, सेवैं नरिंदा अमरिंद चंदा ।
 हँरे संतापा प्रभु तू हि अंभा, धीरे सुधामा नहि कोई दंभा ॥ १४ ॥
 अंभोधि तू ही गुन रत्न धारा, अंभोद तू ही वरधै सुधारा ।
 ज्ञानामृतांभो रस धार वृष्टी, तो बाहिरा धर्म मई न स्त्रिष्टी ॥ १५ ॥
 नाही जु अंभोनिधि और दूजो, तू ही गुनांभोधि विभू प्रभू जो ।
 नाही जु अंतःपुर तू हि एको, शुद्धत्व शक्ती परमो विवेको ॥ १६ ॥
 अंसा विभागा गुन भाव रूपा, अत्यंत तेरे परम स्वरूपा ।
 अंसी जु तू ही अति अंसधारी, अंतो न तेरो कबहू विहारी ॥ १७ ॥

— छंद वेसरो —

अंजन रहित निरंजन देवा, अंतर रहित देहु निज सेवा ।
 अंजन धोय निरंजन कीनें, बहुत भक्त तारे रस भीनें ॥ १८ ॥
 अंध अंधता धारक प्राणी, किये सचक्षु दास करि ज्ञानी ।
 इहै अंधता तोहि न देखैं, अंध तेहि तोकों नहि पेखैं ॥ १९ ॥
 अंबुज चरन तिहारे सेवैं, तेहि सचक्षु तोहि प्रभु लेवैं ।
 अंतक कहिये काल गुसाईं, तू अंतक कौ अंत जु साईं ॥ २० ॥
 अंत न आदि न तेरी कोई, तू अनादि अनिधन प्रभु होई ।
 अंतरभेदी अंतरजांमी, अंतरवेदी अंतर स्वांमी ॥ २१ ॥
 अंतरात्म तोहि जु ध्यावैं, बहिरात्म तुव भेद न पावैं ।
 अंतरनाथ अंतरनाथा, अंतर मेटि देहु निज साथ ॥ २२ ॥
 अंतराय हरि विधन निवारा, करि जु निरंतराय भवतारा ।
 अंतरंग दै भाव सुभक्ती, बहिरंगा बुधि मेटि अयुक्ती ॥ २३ ॥
 अंतरमुख मौकों करि देवा, जनमि जनमि दै अपनी सेवा ।
 अंतरआत्म करि जगनाथा, बहिरात्मता मेटि अनाथा ॥ २४ ॥
 अंबुधि अमृत रस कौ तू ही, अंबुद जित ध्वनि करन प्रभू ही ।
 अंबर रहित निरंबर देवा, मुनि दिगंबर धारैं सेवा ॥ २५ ॥

अंबर जड तू है चिद्रूपा, अंबर कौं अंबर सद्रूपा।
 अंबर सर्व सजायो तोहीं, ज्ञान मय तू क्यों नहि मोहीं॥ २६ ॥
 अंबरमान अमानो तू ही, ज्ञान प्रमाणो सर्व समूही।
 अंभ अंघु ए जल के नामा, जल चंदन आदिक करि रामा॥ २७ ॥
 पूजें तोहि पुनीत पुमाना, अंग विवर्जित तू हि प्रमाना।
 अंग ठपंग न तैरे कर्मा, कर्म जनित सामग्रि न भर्मा॥ २८ ॥
 अंग अनूपम अप्राकृता, पुरुषाकार जु अव्याकृता।
 अंग नाम शास्त्रनि कौ स्वांमी, सर्व अंग भासक तू नामी॥ २९ ॥
 अंग अनंत गुनात्म तैरे, तू सरवंग शुद्धता प्रेरै।
 अंगीकृत पालक तू नाथा, नित्य अनंगा अगणित साधा॥ ३० ॥
 अंगी अंग धरें ए जीवा, तू जीवनि कौ पीव सदीवा।
 अंग तिहारौ जे जु निहारैं, अंतर बाहिर ते अघ टारैं॥ ३१ ॥
 अंग विना जो काम अनंगा, ताहि निवारक तुम जु असंगा।
 अंशुक अंतहकरण स्वरूपा, ताकै अंचलि रतन अनूपा॥ ३२ ॥
 बंधि अवंध अरूप गुसाई, बलिहारी तेरी जग साई।
 अंहि तिहारे अंतर मेरे, अंतर मेरौ अंहि जु तेरे॥ ३३ ॥
 सदा वसौ इह भांति जु मेरे, पर्यौ रहूं दरवार जु तेरे।
 अंतकाल भूलौं नहि राया, जनम जनम पांऊं तुव पाया॥ ३४ ॥
 अंत मेटि करि हमैं अनंता, जनमजरा मेटौ भगवंता।
 अंतकाल कवहु नहि आवै, सो पुर दै कछु और न भावै॥ ३५ ॥

— सार्दूल विक्रीडित छंद —

तेरी देव गहैं अनन्य शरणा, ते पांवई तोहि जी।
 अंतर्भूतिमयी तुही गुणयुतो तोसौ तुही होहि जी।
 बाह्याभूति न तोहि सेव जु सकै, तू त्याग को सोहि जी।
 अंतर्भेद महा प्रपूरि जु रह्यो, तू तारि लै मोहि जी॥ ३६ ॥

अंतर्भूति विशेष तोहि जु गहै, नां बाहिरी से सकै।
 जो त्यागै बहिरंग भूति जु सबै, ताकों न कर्मा तकै।
 अंतःमध्य वसै जु तू हि तब ही रागादि भर्मा रूकै।
 तू ही देव सहाय और न परो तोतैं जु मो हो सकै ॥ ३७ ॥

अंधा तोहि जु छांडि और हि भजैं, ते पांवई दुर्गती।
 मोहांधासुर नासको जु परमो, तू दायको सद्गती।
 अंधा आंखि लहैं जु तोहि सुथकी, तू ज्ञानचक्षु यती।
 अंसा हू नहि बुद्धि मो महि प्रभू क्यों वर्णकं श्रीपती ॥ ३८ ॥

— सर्वथा : ३१ —

अंबुधि ते ऊपनी जु लक्ष्मी कखांनैं लोक,
 तेरे गुन अंबुधि मैं ऊपनी अनादि की।
 वहै गुन रूपिनी सु रावरी अनंत शुद्ध
 निज सत्ता एक दूसरी न आदि की ॥
 वहै जग अंबा अर अंबिका कहावै नाथ,
 ओर नाहि अंबा नहि अंबिका जु वादि की।
 जीवनि की घातिनी सुपापिनी कहावै देव,
 अंबिका भवानी तेरी शक्ति करुणादि की ॥ ३९ ॥

— अथ साधकी अवस्था —

अंबर ही अंबर है बोटिवे के काज जाकै
 धरा सी सुसेजु जाकै बडी है अमीरीतैं।
 दिसा परधान परधान निज भावभाई,
 ज्ञानादि अनंत जाकै भले हैं स्वसीरीतैं ॥
 गुहा गिरि गेह अर नेह सब जीवनि तैं,
 प्रज्ञा सी सुगेहिनी महेसिनी उजीरी तैं।
 रीरी नाहि भाखिबों न जाचिबों जु काहु पैहि,
 कोटिक अमीरी वारि डारुं या फकीरी पै ॥ ४० ॥

• श्रगभरा छंद —

ज्ञानी तू एक स्वांमी परम पद धरो अंबिका नाथ संतो ।
 अंवा शक्ती हि तेरी अवर नहि कभी तू जु है श्रीरमंतो ।
 पद्मा माया सुलक्ष्मी प्रगट निज गुणा अंतरा भूतिकंतो ।
 तू ही तू ही प्रभूजी अतिपति अतुलो एक शुद्धो अनंतो ॥ ४१ ॥

मो कौं भक्ती हि देहो अवर नहि चहुं, एक तो ही जु सेऊं ।
 तेरे पादांबुजा जे मधुर मधु भराहैं अलीबास लेऊं ।
 अंवा ताता सुभ्राता सकल तजि प्रभू एक तोही जु वेऊं ।
 सेऊं सेऊं हि तोही तुव मय हि भयो धर्म नावा जु खेऊं ॥ ४२ ॥

• वसंत तिलका छंद —

तोकाँ नमोस्तु जग देव विशाल मूर्ति,
 ज्ञान स्वरूप अनिरूप रसाल मूर्ती ।
 ध्यान प्ररूप जगभूष अनंतमूर्ती,
 शुद्ध स्वभाव परिभाव प्रभू अमूर्ती ॥ ४३ ॥

शुद्धात्म लब्धि उपलब्धि मई जु तू ही,
 लोकाधिनाथ जगदीस सदा प्रभू ही ।
 योगाधिरूढ अवनीश विभू अभू ही,
 सर्वस्व रूप नहि रूप महाप्रभू ही ॥ ४४ ॥

— दोहा —

तुव गुन अंबुधि मैं प्रभू, रसकल्लोल प्रतच्छि ।
 सो विभूति चंडी महा, रमा सुदौलति लच्छि ॥ ४५ ॥

इति अंकार वर्णनं । आरौं अः अक्षर का व्याख्यान करै है ।

— श्लोक —

अःकाराक्षर कर्त्तरि, देवं देवाधिपं विभुं।
सर्वाधारं निराधारं, वंदे वंद्यं सुराधिपैः॥१॥

— दोहा —

अः कहिये ग्रंथन विषै, कृष्ण नाम परतक्ष।
कृष्ण जु आकर्षण करै, गुण पर्यय अत्यक्ष॥२॥
व्यवहारैं सब ज्ञेय कौ, आकर्षण जु करेय।
सुरनर मुनिवर मन हरै, कृष्ण सुनाम धरेय॥३॥
प्रभु तुम ही कृष्ण जु महा, कृष्णभाव नहि कोय।
कृष्ण पूज्य परमात्मा, तुम परमेश्वर होय॥४॥
अः कहिये फुनि श्रुति विषै, नाम महेश्वर देव।
तुम ही ईश महेश हौ, और न दूजौ भेव॥५॥

— वरवै छंद —

अःकाराक्षर जिनवर तू जगनाथ,
सब अक्षर भासइ तू अति गुण साथ।
हमरी भूल मिटाय जु करि निजरूप,
अवर न चांहहि अति जित जगपति भूप॥६॥
सब जीवनि की आस तु ही सब पास,
पासि हरन सुख रासि करहु निजदास।
भुकति मुकति दायक तू सरवसदाय,
अवर न चांहहि राय भजंहि तुव पाय॥७॥
अ आदी अः परजंताक्षर सोल,
सकल विभासइ देव सु तू हि अडोल।
मैं मति हीन जु सचिउ विषयनि मांहि,
तोहि विसारिउ नाथ चितारिउ नांहि॥८॥

रुलित जु भव में जन्म गहे जु अनेक,
अब तारि जु भव जल तैं देहु विवेक।
तौ धिनु कानि उतारि भवजल नाथ,
इकतारक तू सुनिउ जु अति बडहाथ॥९॥

— दोहा —

रमा शक्ति चिद्रूपता, निज सत्ता है सोय।
विद्या भूति सुसंपदा, संपति दौलति होय॥१०॥

इति अः वर्णनं । आगैं एक कवित्त में षोडसाक्षर का निरूपण करै है ।

— सवैया - ३१ -

अमल अनादि देव आदिनाथ इष्ट सेव
ईश्वर उधारक है ऊरध निवास तू,
ऋषि गण ध्यावैं तोहि ॐ लृ लृ विभासक तू
एक सरवज्ञ सब एन कौ विनास तू,
ऐश्वरतापूर तू ही ऐरावतपति ईश,
ओज पुंज ज्ञान कुंज औषधी प्रकाश तू,
औपधिक भावनि में एक नाहि तैं कोऊ
अंगना न अंग संग अः प्रभु विलास तू॥६॥

इति श्री भक्त्याक्षर माला बावनी स्तवन अध्यात्म बारह खड़ी नाम ध्येय
उपासना तंत्रे सहस्रनाम एकाक्षरी नाम मालाद्यनेक ग्रंथानुसारेण भगवद्ध
जनानंदाधिकारं आनंदोद्भव दौलतिरामेन अल्पबुद्धिना उपायनी कृतेसुर
निरूपणो नाम प्रथम परिच्छेद ॥१॥ अथानंतर ककार का व्याख्यान
करै है ॥६॥

— श्लोक —

कलानिधिं कलातीतं, कामदं कामघातकं ।
किंनारकणं शिवाधारं, कीट कुंघ्यादि रक्षकं ॥ १ ॥
कुमार्गं परिहंतारं, कूट पाखंड वर्जितं ।
केवल कैतवातीतं, कोप कौटिल्य नाशकं ॥ २ ॥
कंकारं कर्म भेत्तारं, कंप कांक्षादि वर्जितं ।
वन्दे लोकेश्वरं देवं, कः स्वष्टारमतीश्वरं ॥ ३ ॥

— त्रोटक छंद —

करमामय भैषज रूप तु ही, तम झूठ विनासक भानु सही ।
दुख नांहि जु पांवहि जेहि भजैं, करमा बहु बांधहि जेहि तजैं ॥ ४ ॥
कलपा अति वीति गये अतुला, कलपा पति नाथ तु ही अचला ।
कवहू नहि तू हि विभाव गहै, जु कदापि न नाथ अभाव लहै ॥ ५ ॥
भगता कलकंठ जु तू हि मधू, कल है जु कलाधर तू रज धू ।
भगता जु कलायर तू जलदो, भवि हैं कमला रवि तू फलदो ॥ ६ ॥
भगता जु कमोदिनि तू हि ससी, तुव जोति महा उर मांहि वसी ।
कहु कौन प्रकार मिलै प्रभु तू, वह भासहु भेद महाप्रभु तू ॥ ७ ॥
करुणाकर कोप विदारक तू, कमलासन आसन धारक तू ।
कल्पित लपै नहि तू हि प्रभू, नहि धारहि दोस कदाचि स्वभू ॥ ८ ॥
नहि हैं जु कलाप अभावनि के, प्रभु है जु प्रताप स्वभावनि के ।
तुव है जु कल्याण स्वरूप प्रभु, परमा जु कल्याणक धार विभू ॥ ९ ॥

— छंद पद्धती —

कल्याणदेव कल्याणराय, कल्याण सर्व लागे जु पाय ।
कल्याण नाम तेरौ न और, धारैं जु दास हैं लोक मोर ॥ १० ॥
इह कलिय काल माहैं जु मूढ़, तुव तत्व त्यागि सेवैंहि रुढ़ ।
कण रूप तूहि तुष मिलित और, कण गहहि साधु करि कर्म चौर ॥ ११ ॥

कलकंठ तू हि औरि न कोइ, कल नांम मिष्ट भाषा जु होइ ।
 मेढौ जु सर्व मेरे कलंक, कलरहित तू हि स्वांमी निसंक ॥ १२ ॥
 कदली समान है जग असार, इकसार तू हि सरवस्व धार ।
 करुणा निधान कम कंज तुल्य, तेरे जु तू हि स्वांमी अतुल्य ॥ १३ ॥
 कलकलित ज्ञान तेरी अनंग, रह्य डहुल भोहि है जगत कंत ।
 कर्ता जु तू हि स्वभावि कर्म, करणो जु तू हि तेरे न भर्म ॥ १४ ॥
 है संप्रदान तू ही अनादि, है अपादान स्वांमी जु आदि ।
 अधिकर्ण तू हि निश्चै स्वरूप, जितकर्ण साध मन जीत भूप ॥ १५ ॥

— छंद वेसरी —

करण कहावैं इंद्रिय नांमा, तू हि अतिंद्रिय अकरण रामा ।
 कृपानाथ कृतकर्म निवारा, तू कृतकृत्य कृतारथ भारा ॥ १६ ॥
 कृपण तजक तू परम उदारा, कबहु कृपणता भाव न धारा ।
 कृती कृपानिधि कसर न कोई, कमी कजी कबहु नहि होई ॥ १७ ॥
 कलिल पाप कौ नांम कहावैं, कलिल नासकर तू हि सुहावैं ।
 कर्मठ कर्मण्यः कठिनो तू, परम कृपाल अपठ पठनो तू ॥ १८ ॥
 कवी काव्यकर रहित कलेसा, कर्मबंध निरबंध अलेसा ।
 कटुक कठोर वचन नहि बोलैं, दास तिहारे रहैं अडोलैं ॥ १९ ॥
 करकस वैन कतरणी हीये, तिनकै भक्ति जु नाहि सुनीये ।
 चित कठोरता त्यागैं संता, तब तोकों पावैं भगवंता ॥ २० ॥
 कहैं करंक सरीर जु नांमा, तजैं प्रीति तनसौं निहकामा ।
 कदरजता सब तजिकरि ध्यावैं, तब तेरी निज रूप जु पावैं ॥ २१ ॥
 कटकादिक तजि हौंहि इकता, कष्ट गिनैं न भजन में संता ।
 कलकलाट कछुहू न सुहावैं, कचकचाट कौ ना मन भावैं ॥ २२ ॥
 कबहु तोसों मन न चुरावैं, तनमन धन कछु नाहि दुरावैं ।
 तब तोकों भावैं निज दासा, तजैं कदाग्रह जगत उदासा ॥ २३ ॥

पर दुख देखि न कसकै हीयो, पर सुख हरत सकै नहि जीयो।
 तिन दुष्टनि कै तेरी भक्ती, कहाँ पाइए नाथ सुयुक्ती ॥ २४ ॥
 कहु करड कलिंद कशेरू, मंथ्यो धान जु राति बसेरू।
 कटहल कमरख अर कचनारा, तजै कठूमर दास तिहारा ॥ २५ ॥
 कच नख वृद्धि न तैरै होई, महामनोहर रूप जु सोई।
 कषा दुखनि कौ तू जिनराया, जीव रषिक तू रहित कषाया ॥ २६ ॥
 कलमष हरन करन विधि तू ही, कलह कलभ कौ सिंह प्रभू ही।
 करि तारक तू कपि जु उधारा, तू कृतज्ञ कृतघनता हारा ॥ २७ ॥
 कृतघन सम नहि पापी कोई, लहै नही निज भक्ति जु सोई।
 कृती महामुनि तेरे दासा, कनक कामिनी त्यागी उदासा ॥ २८ ॥
 करण दंडि करणी सब त्यागी, तब तेरे गुन माहि जु लागै।
 कनक कामिनी तैरै नांही, तू विरक्त जोगी जगमांही ॥ २९ ॥
 कमलापति तू परगट नाथा, कमला भामा रूप न साधा।
 कमला तेरी परणाती स्वांमी, तू परिणांमी द्रव्य सुनांमी ॥ ३० ॥
 तो सम कमलाधर नहि कोऊ, सर्वसुदायक तू हरि होऊ।
 तेरी कमला भिन्न न कोई, एक रूप एकात्म होई ॥ ३१ ॥

— छंद सालिनी —

कालातीता कालहारी जु तू ही, कामातीता काल भासै समूही।
 विधा तोपैं वंचणी काल की है, शक्ति तेरै रासि जो माल की है ॥ ३२ ॥
 सोई काली तत्व कल्लोलरूपा, तू है अव्ययी ज्ञान वारि स्वरूपा।
 काली कोई वस्तु दूजी न औरै, शक्ती तेरी नाथ राजै जु चोरै ॥ ३३ ॥
 काली हिंसा, रूप नांही जु होई, प्रांती रक्षा भासका भूति सोई।
 कालैं कौलैं, नाम काली सु जातैं, क्रांती रूपा, सोई गौरी जु तातैं ॥ ३४ ॥
 तोकौं ध्यावैं, कालकंठा सदा ही, तेरे नामैं, काल कूटा सुधा ही।
 काई दूरा, तूहि है कास्यपीशा, नाथ पासा, तू हि तारै तपीशा ॥ ३५ ॥

कार्यो तू ही, कारणो तू हि स्वांमी, काहू नैं तू, नाहि कीनां सुनांमी।
 कारूण्यो तू, जीव रासी जु पालै, काठिन्यो तू, कांम क्रोधादि टालै ॥ ३६ ॥
 कायोत्सर्गा साधु ध्यावैं जु तो ही, कामी क्रोधी मैं महा तारि मोही।
 काया माया सर्व झूठि हि स्वांमी, काया काष्ठा तो बिनां ह्वै अकांमी ॥ ३७ ॥
 लागे काटा जीव कैं नादे तैं जी, काटे काटा तू हि आदेस तैं जी।
 कास स्वासा आदि रोगा सबै ही, तेरे नामैं आधि व्याधी दवै ही ॥ ३८ ॥

— छंद बेसरी —

कारण कारिज तू हि दिखावै, कारण सिवपुर सकल सिखावै।
 कारण कारिज रहित जु तू ही, अद्वितीय आनंद समूही ॥ ३९ ॥
 कांखवांधि जे मोह पछारैं, काट जीव के सर्वजु टारैं।
 कांन मूंदि विकथारैं दूरा, ते तोकाँ पावैं गुण पूरा ॥ ४० ॥
 कातर जन तोकाँ नहि पावै, कापुरधा तुव जस नहि गावैं।
 काच खंड सम इंद्रि भोगा, जे न तजैं ते भक्ति न जोगा ॥ ४१ ॥
 कारमाण अर तैजस देहा, इनतैं छूटै होय विदेहा।
 सब जीवनि कै ए द्वय लागे, इनतैं छूटैं जे तुव पागे ॥ ४२ ॥
 कारिज अर्थ तोहि जे ध्यावैं, ते ते तोहि कारिज पावैं।
 कांक्षा मेटि करैं जे सेवा, ते दासा तोही काँ लेवा ॥ ४३ ॥
 काढि जगत के दुखतैं देवा, सकल काहिली दूर करेवा।
 दासा कालिम कांमिनी त्यागैं, काज बीज गनि तोमैं लागैं ॥ ४४ ॥
 काहल संखादिक बहु वाजा, तैरै याजैं तू जगराजा।
 सिद्धि करी प्रभु कारिज मेरा, कांत रूप है रूप जु तेरा ॥ ४५ ॥
 काय रहित तू है अतिकाया, सब कायनि काँ रक्षक राया।
 किरण अनंत अखंडित धामा, तू किनाक नासक अतिनामा ॥ ४६ ॥
 सहसकिरणि है तेरौ दासा, क्रिया रूप तू जगत उदासा।
 निज किरिया पूरण तू स्वांमी, पर किरिया तैं रहित अनांमी ॥ ४७ ॥

किरिया तेरी परणति नाथा, क्रियावंत तू अति गुण साथा ।
 तू हि किसोर सदैव जिनेसा, दिन दूलह जगपति जति भेसा ॥ ४८ ॥
 तू किसोर वय कवहू नांही, अति जूनों जोगी जगमांही ।
 किलविष कलमष तैं तू न्यारा, तू कित हू नहि रक्त जु प्यारा ॥ ४९ ॥
 किल कहिये निश्चै करि देवा, देहु आपुनी पूरन सेवा ।
 किन हूं नैं तू कीनां नांही, देव अकर्तम है सब मांही ॥ ५० ॥
 कियो किराव रमैं इह स्वांमी, विषयनि राचि भज्यौ नहि नांमी ।
 धन्य किरात हु जौ गुन गावैं, धिग विप्रा जो लव नहि लावैं ॥ ५१ ॥
 कीट पतंगादिक जे जीवा, सब कौ रक्षक तू जगदीवा ।
 कीट कालिमा तैरै नांही, कीरति तेरी सब जग मांही ॥ ५२ ॥
 तू ही कीमिया रूप भुनैदा, संसारी कौ सिद्ध करंदा ।
 गुण कीर्तन तेरौठ धारैं, कीच रूप भवतैं निज तारैं ॥ ५३ ॥
 कील रूप जो माया सल्ली, सो तैरै नांही भव वल्ली ।
 ते जग मांहि वालमति कीका, जिनहि विसार्यौ तू जगटीका ॥ ५४ ॥
 कीर जु सूवा कीर जु कीरा, तोहि जु ध्यावैं ते जग धीरा ।
 नीच ऊंच अंतर नहि कोई, तोकौं भजै सु तेरा होई ॥ ५५ ॥
 कुसलमती तू त्रिभुवन पीवा, कुकथा खंडन तू जगदीवा ।
 कुनय विहंडन सुनय प्रकासा, तू कुकर्म टारै विधि भासा ॥ ५६ ॥
 कुत्सित मारग दूरि करेवा, कुगति कुमति नासै तू देवा ।
 तू कुवेरपति कुसल करंदा, कुमदचंद्र तेरी जगचंदा ॥ ५७ ॥
 कुसमायुध नासक तू सूरा, कुटिलभाव कुटिलाई दूरा ।
 कुरजांगल आदिक बहु देसा, सब देसनि कौ नाथ महेसा ॥ ५८ ॥
 कुगुर कुदेव कुधर्म निवारा, कुलकर पूजित अतिकुल तारा ।
 कुचलन धार कुपात्र न पावैं, मूढ कुभेष धारि नहि भावैं ॥ ५९ ॥
 कुलाचार तैं तू प्रभु न्यारा, तू कुकीर्ति रहिता जग प्यारा ।
 कुल कोडि जु जीवनि के देवा, तु ही प्रकास अकुल अभेवा ॥ ६० ॥

तू कुदाल सम कर्म निकंदा, तू कुधात तैं धात करंदा।
 मिथ्या परणति सोइ कुधाता, तू कुसूत्र नासक जगत्राता ॥६१॥
 तू हि कुलाचलादि परकासा, कुर उत्तरकुर देव विभासा।
 कुकला कुमत सेय नहि पावैं, तेरे मत करि तोमैं आवैं ॥६२॥
 कुसमय काल पडै नहि देवा, जहां होइ तेरी नित सेवा।
 तू कुसंग तैं न्यारा स्वांमी, तू कुद्रिष्टि नासक गुण धांमी ॥६३॥
 कुष्ट व्याधि नासैं तुव नामैं, नसैं कुकर्म बहुरि नहि जांमैं।
 कुलटासम इह कुबुधि कुनारी, सो हम तैं न्यारी करि भारी ॥६४॥

— छंद दोहा —

कुक्कहिये आगम बिषै, पृथ्वी नाम प्रसिद्ध।
 तुम पृथ्वी धर अखिलपति, कृत्य कृत्य प्रभु सिद्ध ॥६५॥
 कुक्कहिये सिद्धांत मैं, कुत्सित वस्तु जु नाम।
 तुम सब कुत्सित रहित हौ, परमेश्वर अति धाम ॥६६॥

— छंद बेसरी —

कूट जगत कै तेरौ ठामा, कूट कपट के हम जन धामा।
 हमरी कूड निवार गुसाई, कूट लोक कौ दै जग साई ॥६७॥
 कूर भाव तेरे नहि देवा, तू अकूर कूर नहि लेवा।
 कूडी साखि भैं जे जीया, ते तोकों न लहैं जग पीवा ॥६८॥
 कूट कुलेश क्रिया जे कारैं, ते मूढा तुव भक्ति न धारैं।
 कृषमांड आदिक फल निंदा, तजै दास तेरे जगबंदा ॥६९॥
 कूट रहित तू देव अकूटा, जगत कूट कौ तू ही कूटा।
 कूर लोक तोकों नहि जानैं, कूरभाव हिरदै मैं आनैं ॥७०॥
 कूल जगत कौ तू जगनाथा, मेरी कूक सुनीं बड हाथा।
 कूखि मात की मेटी स्वांमी, करि अजरामर अज अभिरांमी ॥७१॥
 केवल रूप अनूप अकेला, केवल ज्ञानानंद जु भेला।
 केवल लब्धि मूल जग स्वांमी, केवल सम्यक रूप अनांमी ॥७२॥

केवल दायक तेरी सेवा, केचित्त करि हैं जगत अलेवा।
 केतु धार तू केवल रामा, केम दरिद्र रहितो श्री धामा ॥ ७३ ॥
 केलि कुतूहल सब ही त्यागै, तेरी केलि मांहि मुनि लागै।
 केलि रूप जो है सुर लोका, ताहि न चाहैं तेरे लोका ॥ ७४ ॥
 केन प्रकारैं तू प्रभू पैए, सो प्रकार मोकों हु बतैए।
 केर केर कीयो मुहि नाथा कर्म मिले जड रूप जु साथ ॥ ७५ ॥
 केई तो करि उतरे पारा, केहरि तू नरकेहरि भारा।
 केसरि चंदन घसि घसि देवा, करैं दास तेरी नित सेवा ॥ ७६ ॥
 केशव प्रतिकेशव हलि चक्री, तोहि जु पूजैं होय अवक्री।
 केयूरादिक तजि आभर्णा, वस्त्रादिक तजि सर्वावणा ॥ ७७ ॥
 भजै दास है जगत उदासा, निरमोही निरदोष अनासा।
 केका राव करैं निजभक्ता, जब तू गरजैं घनपति व्यक्ता ॥ ७८ ॥
 तू कैवल्य प्रकास विभासा, कैतव हारी सरल सुभासा।
 कैतव नाम कपट कौं कैये, कैतव तै कैवल्य न लैए ॥ ७९ ॥
 तू कैलाशनाथ जगनाथा, तू कैवल्य निवास असाथा।
 कैवर्त्तादिक जे नर नीचा, तोकों ध्याय भए जु अनीचा ॥ ८० ॥
 कोविद तू कोदंड वितीता, कोप निवारक क्रोध अतीता।
 कोष तजैं जे गुणगण कोषा, तुव पद ध्याय होहि भव मोषा ॥ ८१ ॥
 को न लहै भक्ती करि तोकों, भक्ति देहु तेरे पद धोकों।
 कोईक जन तेरी मत जानैं, सब ही जन तोकों न पिछानैं ॥ ८२ ॥
 कोक समान जु है संसारी, नादि कालि कौ विरही भारी।
 मेरी कोक नारि सी शक्ती, सो मैं लखी न केवल व्यक्ती ॥ ८३ ॥
 मिथ्या रैनि अनादि अनंती, भव्यापेक्षा नादि सुसांती।
 सो अब तक वीती नहि ईसा, दरसन दिवस न प्रगट्यो धीसा ॥ ८४ ॥
 कोक बधू सी शक्ति न जोई, तातैं चैन लह्यो नहि कोई।
 अटक्यो कनक कामिनी मांही, अटक्यो भव वन मैं सक नांही ॥ ८५ ॥

अब तुम सूरिज शुद्ध प्रकासौ, मेरी सत्ता मोहि विकासौ।
 कोर कसर मेटौ सब मेरी, पाऊं परणति दीन्ही तेरी॥८६॥
 कोटि अनंत चंद अर सूर, तोपरि वारूँ मुनिवर पूरा।
 कोडां कोडि जु काल अनंता, वीथ्यौ मोकों जगत वसंता॥८७॥
 अब निज वास देहु जगसाया, मेदि भरमना मूल जु माया।
 कोढ रूप इह कांम विकारा, सो मेरो मेटौ भवतारा॥८८॥
 संवर कोट देहु मम दुर्गा, मोहि न चाहिये तोतैं सुर्गा।
 कौतूहल कौतुक नहि तैरे, कोटिल्यादिक भाव सु मेरे॥८९॥
 तू आत्म कौतूहल धामा, कौतुक कारी निज विश्रामा।
 कोटिल्यादि तजै नहि जौलौं, जीव न पावै तोहि जु तोलौं॥९०॥
 कौलक कापालिक इत्यादी, तो विनु खोवैं जनम जु वादी।
 कंद निकंदक कर्मनि केरी, दीसै अतुलित शक्ति जु तेरी॥९१॥
 तू कंदर्प निवारक देवा, कंचन काई विनु अति भेवा।
 कंज समान जु तेरे पावा, मुनिभौर से करहि जु रावा॥९२॥
 कंत जगत कौ तू जग देवा, कंप वितीत अजीत अछेवा।
 कंधै तैरे मुनिमत भारा, मोहू दै प्रभु भव जल पारा॥९३॥
 कांत अधिक तू कांता त्यागी, कांक्षा मेदि जपैं वडभागी।
 कंठ सुकंठ करे गुन गावैं, सकल कांमना दूर वहांवैं॥९४॥
 किंचित मात्र विभूति न राखैं, तेरी भक्ति महारस चाखैं।
 किंकर तेरे जे हि कहांवैं, ते तेरी निज रूपहि पावैं॥९५॥
 जम किंकर कौ भैं कछु नांही, तेरी शरण गहैं उर मांहि।
 कुंद पहूप हू तैं सित चित्ता, करिकैं ध्यावैं दास पवित्ता॥९६॥
 कुंद कुंद हैं तेरे दासा, अति निर्मल निजरूप प्रकासा।
 कुंठ समाना ते जग जीवा, जे तोकों गावैं नहि पीवा॥९७॥
 कुंठादिक सब त्यागि जु शस्त्रा, भजैं भूप तोकों जु अवस्त्रा।
 कंठीरव सम तु जग दीसा, कर्म जु कुंजर जीत अधीशा॥९८॥

कंठाभरण जु तेरी वांणी, कंठी मोतिन की न वखांनी।
 कंडू सम इह मदन विकारा, मेरी मेटि जु जगत उधारा॥ ९९॥
 कुंघादिक कीटादिक प्रांणी, सब को दयापाल तू ज्ञानी।
 कूची मोक्षतनी तुंव हाथा, मांकों भक्ति देहु जिननाथा॥ १००॥

— दोहा —

कं कहिये आगम विषै, नाम सीस को स्वांमि।
 सीस नाथ वंदें तुम्हें, सुर नर मुनिवर नांमि॥ १०१॥
 कं कहिये सिद्धांत में, नांव जु सुख को ईस।
 तुम सुखदायक सिद्धिकर, शुद्ध महा जगदीस॥ १०२॥
 कं लिखियो पुस्तक विषै, नांव तोय को नाथ।
 तुम सीतल निरमल प्रभु, तपति हरण जितपाथ॥ १०३॥
 कः कहिये श्रुति के विषै, नांव प्रजापति देव।
 तुम ही देव प्रजापती और न दूजौ भेव॥ १०४॥
 कः भाष्यो ग्रंथनि विषै, नांव वायु को नाथ।
 वायु हुती अगणित गुणों, तुम में बल अति साथ॥ १०५॥
 कः गायो प्रभु सूत्र में, नांव सुर्ग को ईस।
 सुर्ग नाथ सेवें तुम्हें, जगतनाथ जगदीस॥ १०६॥
 कः भाष्यौ वांणी विषै, नांव आतमारांम।
 तुम परमात्म ब्रह्मपर, जीव सकल विश्रांम॥ १०७॥
 कः कथियो भरति विषै, नांव जु सुख को वीर।
 तुम सुखदायक जगतप्रभु, महा सुखी अतिधीर॥ १०८॥
 कः लिखियो अंगनि विषै, नांव प्रकास विख्यात।
 तुम अनंत परकासमय, आनंदी साख्यात॥ १०९॥

अथ द्वादश मात्रा एक कवित्त में।

— सवैया —

करि मोहि आपुनीं जु कारिज तु ही जु एक
 कितहू न जाऊं देव कीरति रट्यो करुं ।
 कुटिल कुभाव मेदि कूरता निवारि मेरी
 केवल दै चक्षु नाथ नांहि कबहू मरुं ।
 कैतव न भाव तोमैं कोष कौ न लेस कभी
 कौतुक न मोहि और तोहि उरमें धरुं ।
 कंठ जो सुकंठ करि तेरी ही जु गान करि
 कः प्रकास आप रूप ध्याय भौदधी तरुं ॥ ११० ॥

— दोहा —

कमला कंज निवासिनी, चरन कमल मैं वास ।
 शक्ति रावरी है रमा, सोई दौलति भास ॥ १११ ॥

इति ककार संपूर्ण । आगे कवर्गी खकार का व्याख्यान करें हैं ।

... श्लोक —

खला रागादयो सर्वे, येन ज्ञानासिना हता ।
 ख्याति कांक्षा विनिर्मुक्ता, यं भजन्ति तपश्चिनः ॥ १ ॥
 खिन्नो न क्वापि कालेपि, खी प्रकाशी महाबल ।
 है खुरी खड्ग धाराभि, विना सर्वाजिता धरा ॥ २ ॥
 खु निश्चयो स एवासो, खू सुमात्रा विभासकः ।
 खेचरैरर्चितो वरैरलभ्यो खँरतिद्रियः ॥ ३ ॥
 मूर्खो न पंडितो विज्ञो, सर्वज्ञो सर्वदर्शिकः ।
 खौघा लभ्यन्ति यं नाहो, खं समानोपि पूर्ण धी ॥ ४ ॥
 खः प्रकाशी चिदाकाशी, यस्थ दासी रमा महा ।
 यं जपन्ति सदाधीरा, स्तं वंदे परमेश्वरं ॥ ५ ॥

— दोहा —

ख कहिये आकास कौं, तू आकास स्वरूप।
 शुद्ध चिदाकास प्रभू, आनंदी सद्रूप॥६॥
 ख कहिये इंद्रिनि कौं, तू इंद्रिनि तैं दूर।
 मन वच बुद्धि सुधि कै परै, निज स्वरूप भरपूर॥७॥
 खर तीक्ष्ण कौ नाम है, खर किरण जु है भान।
 भान चंद इंद्रादि सहु, तोहि भजैं भगवान्॥८॥
 खर कठोर कौ नाम हैं, तजैं कठोर स्वभाव।
 तव तोकाँ पावैं प्रभू, तू दयाल भवनांव॥९॥
 खर समान ते नर कहे, जे नहि ध्यावैं तोहि।
 खर कै पीठि जु भार है, इनकै परिगह होहि॥१०॥

— चौपड़ी —

खल भावनि कौ त्यागि नाथ, मैं खल करछौ न तेरौ साध।
 तू ख जीत भवभाव अतीत, खगपति पूजहि तोहि अजीत॥११॥
 खरतर वात जु तोहि सुहाय, कपट न भावै तोहि जु राय।
 तोहि खगेंद्र नरेंद्र सुरेंद्र, जपहि फणिंद्र सुचंद्र मुनिंद्र॥१२॥
 खग कहिये नभ मांहि विहार, जिनकौ अथवा इंद्रिय प्रचार।
 खग जु नाम चारन मुनि होय, खग सुर असुर विद्याधर जोय॥१३॥
 सेवै सर्व खगा जग जीव, इंद्रिनि मैं विचरैं जु सदीव।
 पक्षनि हूं कौ है खग नाम, तू सब कौं सुखदायक राम॥१४॥
 खग अनंत कीनें निसतार, खगतारक तू खगपति सार।
 खड्गादिक सहु त्यागि जु शस्त्र, भजैं दिगंबर रहित जु वस्त्र॥१५॥
 वस्तु खटाय जाय तजि स्वाद, सो तेरौ श्रुति कहइ अखाद।
 सर्व अभक्ष तजैं तुख दास, श्रुति आज्ञापालैं गुन रास॥१६॥
 ख्यात रूप तू ख्याति वितीत, ख्याति त्याग ध्यावैं जु अतीत।
 ख्यात किये तैं आतम धर्म, है विख्यात महा तू मर्म॥१७॥

खात दियो घट घर कै नाथ, चोर मिले मोहादिक साथ।
 हरे रत्न दरसन अर ज्ञान, चरन तपश्चरन जु निज ध्यान॥१८॥
 ख्यात चोर ए अति बलवान, मोहिनि किण कीयो भगवान।
 राज तिहारे मोघ रखात, परै देव इह कौन जु वात॥१९॥
 ख्यात देव विख्यात सुराख, द्याव हमारी माल सुभाव।
 नहि खातिका पौलि जु कोट, नहि अटकाव नही जिय खोट॥२०॥
 अदभुत देव तिहारी राज, काज न एक वडे महाराज।
 खिन्न खेद कवहु नहि होय, निहंकटिक एकल भड सोय॥२१॥

— गाथा छंद —

खिन्न कियो भुंहि नाथा, सार्थें लागे विभाव परिणाम।
 सांति करै बडहाथा, शुद्धा बुद्धा महाधाम॥२२॥
 तू है खीण विमोहा, खीणकसाया सुखीण दोसा हू।
 खीण जु राग अखोहा, माया माणा न रोसा हू॥२३॥
 खी इंद्रिधर जीवा, ख कहिये नाथ नाम इंद्रिनि कौ।
 तू है खी पति पीवा, दीवा तू तीन लोकनि कौ॥२४॥
 खुक्कहिये निश्चै सौं, गुण गुणि भेदो न दोसई कोई।
 प्रभु तेरी ही नै सौं, निज गुण जानैं जती सोई॥२५॥
 गुण ज्ञानादि अनंता, द्रव्य गुणी शुद्ध आतमाराम।
 तू भासै भगवंता, संता सिद्धा महाधाम॥२६॥

— छंद भुजंगी प्रयात —

खुभ्यो नाहि मरै हिये तू जु स्वांमी, खुभे इंद्रियादी विकारा विकांमी।
 रुख्यो हौं जु तातैं अनंती अनादी, बह्यौ भौर जालैं तुझै त्यागि वादी॥२७॥
 खुस्यो हूं लुट्यो हूं भयो हूं बिहाला, अवै लोकनाथा करौ नै निहाला।
 खुटैं नाहि मोयें कषाया बलिष्टा, कुटैं नाहि स्वांमी विभावा जु दुष्टा॥२८॥
 तिनीं नै मुझे लूटि लीयो जु चौरै, सुदौर प्रसिद्धा त्रिलोकी हि दौरै।
 अवै लेय भक्ती मदत्ती स्वरूपा, करौं चौर चौपड़ चौरा विरूपा॥२९॥

खुरो श्रृंग धीरा पिछोरा न सजे, तुझे नाहि ध्याये आविष्टा भरा जे ।
 तु ही है जु खूटा तिहारै हि जोरै, मुनी वीतरागा विभावा जु तोरै ॥ ३० ॥
 रहै खूट सा नाथ कूटस्थ साधू, समाधि स्थिता एक तोही अराधू ।
 करै खूट सा मोहि ध्याता अकंपा, इहै तोकना नाथ मांगी अचंपा ॥ ३१ ॥
 तु ही खेचरा खेचरी मुद्रा धारै, सबै खेचरा एक तोही निहारै ।
 किये खेचरा पार तैं ही घने ही, हमों पै कहां नाथ जावैं गने ही ॥ ३२ ॥
 जु देवा सुधारे सुदैत्या सुधारे, सुविद्याधरा नाथ तैं ही उधारे ।
 सुपक्षी उधारे मुनी तैं उधारे, तु ही खेचरो खेचरानंत तारे ॥ ३३ ॥
 कहे खेचरा ते चलैं जे अकासैं, गने भूचरा भू परै जे विकासैं ।
 रमैं इंद्रियो मैं जु संसार जीवा, सु ते हू कहे खेचरा इंद्रि पीवा ॥ ३४ ॥
 तु ही जीव नाथा तु ही जीव तारा, तु ही है दयापाल जैनी अपारा ।
 असंख्यात खेदा असंख्यात ग्रामा, जु तैर तु ही राव दीसै अकामा ॥ ३५ ॥
 असी औ मसी नाथ वांणिज्य खेती, सबै धंध भावा तजैं चित्त सेती ।
 तवैं तोहि पावैं तजे सर्व खेदा, तु ही है अखेदा अभेदा अछेदा ॥ ३६ ॥

— चौपड़ी —

खेडापति तू खेल न कोय, खेवट तो सम और न होय ।
 भवसागर अति गहर अथाह, पार करैया तू जु अगाह ॥ ३७ ॥
 खैर लभ्य तू इंद्रि अगम्य, ज्ञानगम्य तू केवलरम्य ।
 खोदि करम क्षोणी तैं देव, काढे रतन सुगुन अतिभेव ॥ ३८ ॥
 खोट न तैरें घट मैं कोई, घट पटादि ज्ञायक तू होई ।
 खोसि न सकही तिनकों कोय, जिनके सिर परि तू प्रभु होय ॥ ३९ ॥
 खौघ कहावै इंद्रिय साथ, तोहि न पाय सकैं जगनाथ ।
 खौरि न तिलक न तैर सीस, त्रिभुवन तिलक तु ही जगदीस ॥ ४० ॥
 खौंटे मिथ्यादिक जु विभाव, तैं सूधे कीये जगराव ।
 खं इंद्री तू इंद्रिय दूर, खं आकास समो भरपूर ॥ ४१ ॥

खं सुर लोक तुझै सुनाथ, सेवैं तन मन करि सुर साथ।
 खं खडग जु ज्ञानातम होइ, मोहादिक नासै अरि सोई ॥ ४२ ॥
 खं कहिये फुनि सुन्य जु नांम, रागादिक तैं शुन्य सुरांम।
 खंभ लोक कौ तू हि जु एक, खंड खंड व्यापी सविवेक ॥ ४३ ॥
 आरिज खंड मलेछ जु खंड, तू हि विभासै देव अखंड।
 खंडित भाव न तेरे कोई, नित्य अखंडित अचलित होइ ॥ ४४ ॥

— सोरठा —

खखा पासि दु शुन्य, खः कहिये मात्रांतिकी।
 तू सब मांहि अशुन्य, पुन्य पाप तैं रहित तू ॥ ४५ ॥

अथ बारा मात्रा एक कवित्त मै।

— सवैया ३१ —

खल तोहि पावैं नांहि ख्यात तेरी लोक मांहि,
 खिन्न नाहि होत कभी खीण मोह तू जिना।
 खुक्कहैं जु निश्चय कौं निश्चय स्वरूप आप,
 खूंट भव्य लोकनि कौ खेचर तु ही दिना।
 खेद नाहि भेद नांहि खैरलभ्य ज्ञान गम्य
 खोदि नांखे कर्म भर्म नाथ तैं यथा तिनां।
 खीघ नांहि पावैं तोहि खंड खंड नायक तू
 खं समान तेरी रूप खः प्रकाश तू गिना ॥ ४६ ॥

— सोरठा —

ख्यात विख्यात जु नाथ, तेरी सत्ता शक्ति जो।
 संपति सो निज साथ, दौलति नित्य स्व संपदा ॥ ४७ ॥

इति खकार संपूर्ण। आगैं गकार का व्याख्यान करै है।

— श्लोक —

गणाधारं गताधारं, गात्रातीतं सुगात्रकं ।
 गिरातीतं च गीर्वाणै, संवितं गुणरूपिणं ॥ १ ॥
 गूढं रूपं जगद्देहं, ग्रेहातीतं जगत्पुरुं ।
 ग्रैवेयकादिदातारं, ज्ञानमूलं च गोपतिं ॥ २ ॥
 न गौणं सर्वथा मुख्यं, गंधरूपादि वर्जितं ।
 सुगंधं शुद्धरूपं च, गः प्रकाशं नमाम्यहं ॥ ३ ॥

— चौपड़ी —

गणनायक तू गणपति देव, गणधर आदि करें प्रभु सेव ।
 गति आगत्य रहित निरद्वंद, गतिदायक अतिसुगत अफंद ॥ ४ ॥
 गमनागमन सुतजि मुनिराय, निश्चल तोहि भजें ऋषिराय ।
 गद कहियै रोगनि कौ नाम, रगादिक सम रोग न राम ॥ ५ ॥
 सर्वरोग हर तेरौ ध्यान, गदातीत तू पूरण ज्ञान ।
 गणना तेरे गुण की नाहि, तू गणेश अतिगण तो मांहि ॥ ६ ॥
 तू गरिष्ठ अतिसिष्ठ प्रसिद्ध, गरिमा सागर अतुलित सिद्ध ।
 गरहारी तू गरल प्रहार, निरविष अमृत रूप अपार ॥ ७ ॥
 गरडध्वज पूजित गणभूष, अतिगलतां न गमक निजरूप ।
 हैं गलतां न मुनी तुहि ध्याय, तू गतमोह विगत अतिन्याय ॥ ८ ॥
 गगन रूप तू गगन सुपार, गच्छ वितीत अनिच्छ अपार ।
 गर्भ निवास रहित वरवीर, तू हिरण्यगर्भ जु धरधीर ॥ ९ ॥
 गर्भ तिहारे मैं सब लोक, गजपतिपति कौ पति गुण शोक ।
 गर्व प्रहारी गर्व वितीत, गणी गणाधिप देव अतीत ॥ १० ॥
 गहर गती अगतिनिकौ तार, तू गणाग्रणी भव दधि पार ।
 गणातीत सबगण करि पूजि, ज्ञानिनि सौं तेरे नहि दूजि ॥ ११ ॥

— बसंत तिलका छंद —

गात्रा न कोय निज ज्ञान अनंद गात्रा,
पात्रा न कोइ गुणपात्र प्रभू सुपात्रा।
पांखें न गाध मुनिराय तु ही अगाधा,
गांना न मान नहि तांन तु ही अवाधा ॥ १२ ॥

गाह्यो न जाय न हि गार स्वरूप तु ही,
नाही जु गारव मदा तुझ मैं कभू ही।
ज्ञानी महा जु सबज्ञायक ज्ञान गम्या,
जानैं न ग्राम्य जन तोहि तु ही अगम्या ॥ १३ ॥

ग्रामा असंखि गुण ग्राम जपैं मुनीसा,
ज्ञान प्रमाण जग धांनु तु ही अनीशा।
गाजै तु ही जु जग हंस अरूप राजा,
राजै प्रभू जु जगदीस असंखि वाजा ॥ १४ ॥

ग्यारा हि रुद्र जिनराय तु ही जु ध्यावैं,
होवैं जु गाफिल जिके नहि तोहि पावैं।
खोलैं जु गांठि हिय की प्रभु सम्यकी जे,
राखैं जु तोहि जिय मैं इक तोहि धीजे ॥ १५ ॥

गात्री जु जीव जग के प्रभू तू अगात्री,
सुर्गापवर्ग सुख सर्व तु ही सुदात्री।
गारी हु खांहि जग की नहि दास छांडैं,
तोकाँ न ध्याय बहिरातम जन्म भांडैं ॥ १६ ॥

— मंदाक्रांता छंद —

गाजा वाजा, करि सुरनरा, तोहि पूजैं प्रभूजी,
तैं वाजा, अगणित बजैं, ग्रामणी तू विभूजी।
धोकाँ तोकाँ, अगिनति गुना, तू गिरातीत स्वामी,
तेरी भाषी, दिदधरि गिरा, दास होवैं सुधामी ॥ १७ ॥

तेरी तुल्या, गिरपति नही, सो जडो तू सुज्ञानी,
 साधू शांता, गिरसिर तपैं, तोहि ध्यावैं सुध्यानी।
 काया माया, गिनति न धरैं, तोहि सौं लौं लगावैं,
 तू ही नाथा, गिरपति प्रभु, है गिरानाथ ध्यावैं॥ १८॥

— चौपड़ी —

गिलै काल जीवनि कौं नित्य, तू जु कालगिल जगत अनित्य।
 गिरधारी सेवैं तुव पाय, तू धरधारी देव अमाय॥ १९॥
 गिलतौ रहै काल जगदेव, तिनकौं जे तुव धारैं सेव।
 गीर्वाणाधिप तेरे दास, तू गीर्वाण पूजि सुखरास॥ २०॥
 गीत गांन करि इंद नरिंद, तोहि भजैं तू परम मुनिंद।
 गीधादिक पक्षी बहुजीव, तुव भजि पायो सौख्य अतीव॥ २१॥
 गी कहिये वांनी कौं नांम, तेरी वांनि सही गुन धाम।
 देवनि कौं गीर्वाण जु कहैं, सो तू ही मुनि दिख करि गहैं॥ २२॥
 गुणी गुणाकर तू गुण रूप, गुणनिधि गुणअंभोधि निरूप।
 गुणनायक गुणग्राम अपार, गुण निधान गुणवान जु सार॥ २३॥
 गुप्त सुप्रगट महागुणवंत, गुणि गुण रूप गणिक भगवंत।
 गुह्य गुसाईं गुरतर गुरु, गुणाधार निरधार जु धुरु॥ २४॥
 गुणछेदी निरगुण है तू हि, रहित विभाव स्वभाव समूहि।
 निज गुण रूप सुरूप अनूप, मायक गुण तैं रहिता अरूप॥ २५॥
 गुण बंधन हूं कौं गुर कहैं, तू निरबंध गुरु सरदहैं।
 गुण शमुद्र तू अगम अपार, मान गुमान रहित ततसार॥ २६॥
 गुफावास करि धरि द्विद जोग, जोगी तोहि भजैं रसभोग।
 गुप्त वारता जानैं सर्व, तेरे दास अनास अगर्व॥ २७॥
 जीव समास गुनीस जु होय, सब कौं रक्षक तू प्रभु सोय।
 रतनत्रय भेद जु गुणतीस, तू हि प्रकासै विभू जगदीस॥ २८॥

गुणतालीस ऊरधा लोक, दास न चाहैं अति सुख धोक।
 चाहैं तेरी भक्ति रसाल, भुक्ति मुक्ति की मात विसाल॥ २९॥
 नरक पाथडे हैं गुनचास, सातनि के अति ही दुखत्रास।
 तेरी भक्ति बिना जिय लहैं, दास न दूरगति कवहू गहैं॥ ३०॥
 पदवी धर त्रेसठि नर होइ, या कलपैं गुनसठि ही सोय।
 इह हुण्डावसर्पणी काल, कवहुक आवैं दोष विशाल॥ ३१॥
 अैसे हू जग में निजदास, तोहि न भूलहि जगत उदास।
 गुणहत्तरि ऊपरि सौ नरा, बडे पुरिष अति गुणगण भरा॥ ३२॥
 तूहि प्रकासै सर्व प्रकास, गुणियासीह मदन करि त्रास।
 तूहि अगुरुलघु अति गुस्तरू, अतिशय सागर सुर नर गुरू॥ ३३॥

— अरिल छंद —

गूढ स्वभाव अनंत महा तू गूढ है,
 महिमा तेरी गूढ अरूढ अमूढ है।
 तेरी भक्ति न ईश मूढ ए नहि करै,
 गूगल खेयर तुच्छ देव पूजत फिरै॥ ३४॥
 गूँथे सकल जु अंग तू हि वक्ता महा,
 सुनि तेरी धुनि दिव्य दास नैं रस लहा।
 गेह देह नहि नेह तुही जु विदेह है,
 तजैं गेह तुव ध्यायवेहि विधि एह है॥ ३५॥
 गेह मांहि धन नेह कुटुंब सनेह है,
 तो सौं लगैं न नेह चित्तव्रति एक है।
 कैयक दिन जी दास गेह हू मैं रहैं,
 पही पाहुनां तुल्य सोच मैं नहि वहै॥ ३६॥
 ज्ञेय रूप तू ज्ञेयभूष अति रूप है,
 ज्ञेयाकार जु ज्ञान अल्पेय अरूप है।
 ज्ञाता ज्ञान जु ज्ञेय त्रायी की एकता,
 तो विनु भासैं कौनं जु तत्व अनेकता॥ ३७॥

गैल तिहारी सुगुन अनंतानंत है,
 अति अनंत पर्याय स्वभाव अनंत है।
 गैल तिहारै लोक अलोका सब लगै,
 त्यागि कल्पना जाल साध तोमैं पगे ॥ ३८ ॥
 ग्रैवेयक लौं जीव गये बहुवार जी,
 तो खिनु नाथ कदापि भये नहि पार जी।
 पार पहुंचैं जोहि भाव भक्ती धरै,
 तू गोपति गोपाल तोहि लच्छमी वरै ॥ ३९ ॥
 गो इंद्री तू देव अतिंद्री नाथ है,
 गो कहैंदं जल नाम तू हि अति पाथ है।
 तपति हन सुख करन दाह हन जु तु ही,
 गो बांनी तू बांनि प्रकासै सहज ही ॥ ४० ॥
 गो कहिये सुर लोक तू हि सुर लोक दे,
 सुरपति सेवैं पाय तू हि गुन थोक दे।
 गो है वज्र सुनांम तू ही वज्रांग है,
 वज्री तेरे दास तू ही जानांग है ॥ ४१ ॥
 गो कहिये खग नाम तू हि खगपति प्रभु,
 गो है छंद हु नाम तू हि भासै विभू।
 छंद रहित तू छंद भासकर देव है,
 गो पृथ्वी कौ नाम करै भू सेव है ॥ ४२ ॥
 गोधर श्रीधर तूहि तुही गोनाथ है,
 गो किरणनि कौ नाम तेहि तुव साथ है।
 गो आकास कौ नाम तु ही आकास सौं,
 चिदाकास अतिभास तु ही प्रतिभास सौं ॥ ४३ ॥
 गो कहिये तरु नाम तू हि सुस्तरु महा,
 फल छाया दे ईश तो बिनां है कहा।
 गो रक्षक तू गोप्य अगोचर गो परैं,
 गोचर केवल मांहि नहीं को तो परैं ॥ ४४ ॥

तू गोव्यंदपती सुपूज्य जगदीस है,
 गोत न गात न धात तात अथनीस हैं।
 गौ कहिये जग मांहि गाय का नाम है,
 गौसुत सम हम मूढ भज्यो नहि राम है ॥ ४५ ॥
 गौ कहिये फुनि देवि सरसुती है महा,
 सो प्रभु तेरी वांनि और गौ नां लहा।
 गौसुतता प्रभु मेदि देहु गौ रावरी,
 प्रभु छुडावो भ्रांति लगी इह आवरी ॥ ४६ ॥
 गौण मुख्य सब भेद तू हि परगट करै,
 तू नहि गौण स्वरूप मुख्यता तू धरै।
 गौतमादि ऋषिराय भजैं तोकीं सदा,
 तू हैं ग्रंथि वितीत ग्रंथ धर नहि कदा ॥ ४७ ॥
 ग्रंथ परिग्रह नाम तू न परिग्रह गहै,
 ग्रंथि गांठि कौ नाम ग्रंथि भेदी लहै।
 ग्रंथ सूत्र सिद्धांत प्रकासै तू सही,
 अति सुगंध अतिरूप भूप धरै तू ही ॥ ४८ ॥
 गंध न रूप न शब्द सपर्शन रस धरै,
 तू अविकार अनंत सकल मल परिहरै।
 गंज गुननि कौ धरै तूहि पदमा वरै,
 तोहि न गंजै कोय पराक्रम अति धरै।
 गंगा जल सम चित्त शुद्ध करि भवि भजैं,
 गंगादिक देवी जु सेव कवहु न तजैं ॥ ४९ ॥
 करि गुजार सुशब्द तोहि जे पूज हीं,
 काम क्रोध मद मोह तिनहि नहि पूज हीं।
 गंतव्यं जिनधांम नित्य प्रति गुर कहै,
 तेरी प्रतिमा पूजि भव्य इह दिढ गहै ॥ ५० ॥

चरन कमल कौ भमर गुंजरख जो करै,
 सो पावै निजवास परम रस जो धरै।
 गंधपूति इह देह महा दुरगंध है,
 तू...दै...जान...गरीर...स्वर्ग...अगंध है ॥५१॥
 गंधहस्ति सम देह सुगंध जु जे धरै,
 ते सब देव जु आय पाय तेरे परै।
 गः कहिये स्वर नांम धारि स्वर गांवहि,
 सुर नर नाग मुनिंद तोहि प्रभु ध्यांवहि ॥५२॥
 गः कहिये फुनि गाय समूहो लोक मैं,
 गायपुत्र से लोक लगे त्रिण शोक मैं।
 कण रूपा तुव भक्ति गहै न रहै उही,
 गः कहिये गंधर्व सर्व गावैं तू ही ॥५३॥
 गः कहिये गाथांति कौहु प्रभु नाम है,
 सब गाथादिक छंद कहै तू राम है।
 नाथा तो सौ तू हि नही को दूसरी,
 तो बिनु सब संसार लगै मुहि धूसरी ॥५४॥

अथ वारा मात्रा एक सबैया मैं।

— सबैया - ३१ —

गरव कौ हारी तूज गाध नाहि लहै,
 पूज गिनती जु नाहि तेरे विभव की नाथ जी।
 गीर्वाण नायक तू गुरनि कौ गुर सदा,
 गूथे द्वादशांग देव गूढ़ अति साथ जी।
 गेह नाहि देह नाहि गैल तेरी लोक सब,
 गोपती जु गोधर तू ईस बडहाथ जी।
 गौण मुख्य सर्व भास ग्रंथि भेद गः प्रकाश,
 भवदुख पावक बुझायवे कौं पाथ जी ॥५५॥

— दोहा —

गर्व हरे सब को प्रभू, ऐसी तेरी शक्ति।
सोई कमला लच्छिमी, भाषा दौलति व्यक्ति ॥ ५६ ॥

इति गकार संपूर्ण। आगे घकार का व्याख्यान करें हैं।

— श्लोक —

घटस्थमघटं देवं, घाति चाघाति वर्जितं।
सर्वं मात्रा मयं धीरं, वीरं वंदे महोदयं ॥ १ ॥

— दोहा —

घर घर की सेवा करत, उपज्यो अति गतिखेद।
अब तू अपनी टहल दै, लै निज मांहि अभेद ॥ २ ॥
घर घरणी में हम लगे, धन धरणी की चाहि।
चाहि हमारी मेटि सब, बहु भरमावै काहि ॥ ३ ॥
घटि वधि तैरे कछु नही, तू घटि वधि तैं दूर।
घट घट अंतर जांमि तू, घटभेदी घटपूर ॥ ४ ॥
घन सम चिदघन तू सही, घन है बज्र सु नाम।
कर्म पहार प्रभंज तू, अति कठिन जु अति धाम ॥ ५ ॥
घन भाषैं जन मेह कौ, तू है मेघ स्वरूप।
अमृत झर लावै सदा, तपति हरन सुख रूप ॥ ६ ॥
घरी घरी इह जाय है, बृथा जु मेरी आय।
तेरी भक्ति बिना विफल, भक्ति देहु जगराय ॥ ७ ॥
घस्मर सूरिज नाम है, तू है त्रिभुवन सूर।
भ्रांति निसाहर बोधकर, किरण अनंत प्रपूर ॥ ८ ॥
घटातीत घनपाल तू, घटरक्षक घनजीत।
घट घट नायक अघट तू, घन प्रदेश जगजीत ॥ ९ ॥

घट पट ज्ञायक गुन सुतन, है घनस्यांम अधीस ।
 तू घट भिन्न अभिन्न है, घन स्वामी अवनीस ॥ १० ॥
 घर घरनीं तजि मुनिवरा, जपें तोहि निज रूप ।
 घर घर कौ मरमी तुही, अघट अघाट अनूप ॥ ११ ॥
 घातरहित तू घाति हर, रहित अघाति अछेव ।
 घात अघट अरि उट मैं, उरखति करै तुव सेव ॥ १२ ॥
 कालवसू या जगत मैं, हम जु है रहे घांध ।
 घांधपणों प्रभु दूरि करि, तू अति सुख की थांध ॥ १३ ॥
 घा कहिये सिद्धांत मैं, नांव किंकणी ख्यात ।
 किंकणि सम वाचालता, मेदि मौन दै तात ॥ १४ ॥
 घायल हैं हम मोह के, घाव लगे अति जोर ।
 निज औषद दै घावभरि, तूहि मोह मद मोर ॥ १५ ॥
 घास फूस सम जग विभव, हम नहि चाहें याहि ।
 कण रूपा निज भक्ति दै, और नहि कछु चाहि ॥ १६ ॥
 घां तेरी चोघै प्रभो, वहै द्रिष्टि दै नाथ ।
 औरैं घां को चौघिबौ, तू छूडाय बडहाथ ॥ १७ ॥
 घिर्यौ भरम कै घेर हूं, तू छूडाय जगदेव ।
 छूटि भरम तैं मैं सही, करि हों तेरी सेव ॥ १८ ॥
 घिण-घिणावणों इह जु तन, यामैं वास न इष्ट ।
 तन धरिबौ हमरौ जु हरि, दै निजवास प्रतिष्ट ॥ १९ ॥
 घित दधि खीर सु ईखरस, लवण आदि बहु स्वाद ।
 तेरी भक्ति समान रस, और नही अति स्वाद ॥ २० ॥
 घी जल तेल इत्यादि ए, चर्म पतित नहि लीन ।
 भाषैं तेरी श्रुति इहै, भखैं न दास अलीन ॥ २१ ॥
 घीया तेल आदि दे, जे बहु बीजा बस्तु ।
 ते न भाखैं दासा कभी, श्रुति वर्जित अप्रशस्त ॥ २२ ॥

वंदि अचेतन कै पर्यौ, मैं घीघांऊं नाथ।
 मेरी कूक सुनीं प्रभु, लेहु आपनैं साथ ॥ २३ ॥
 घींस्यो मोकीं जगत में, कर्म मिले अतिभेद।
 अध ऊरध मधि लोक में, दियो बहुत इन खेद ॥ २४ ॥
 घुण ह्वै मोकीं विधि लगे, कियो सुनिकणीं स्वामि।
 इनतैं मोहि छुड़ाव प्रभु, तू ह्वै अंतर्यामि ॥ २५ ॥
 घुग्घ होय कूडे रम्यों, कियो मोहमद पांन।
 अव तू दै निज भक्ति प्रभु, करि सचेत भगवान ॥ २६ ॥
 घूक समांन जु हौं प्रभु, नहि लखियो तू भान।
 हमरी चक्षु उघारि प्रभु, तू अनंत गुनवान ॥ २७ ॥
 घूक पणों हरि देहु जू, चकवे कौ हि स्वभाव।
 चकवौ चाहै दिवस कौं, मैं चाहौं तुव पाव ॥ २८ ॥
 घूनडता मुझ मेटि तू, दै निहकपट स्वभाव।
 घूनड लौकिक भाष मैं, कपटी कुटिल कुभाव ॥ २९ ॥
 घूमत घूमत हौं फिर्यौ, महामोहमद पीय।
 हमरी घूम मिटाय प्रभु, तू तारक अदुतीय ॥ ३० ॥
 घू कहिये आगम विषै, पीडा नाम प्रसिद्ध।
 हमरी पीर मिटाय प्रभु, तू दयाल अति सिद्ध ॥ ३१ ॥
 घूर्यमाण इन अघनितैं, हौं दुखिया जगजीव।
 सुखदाई संसार को, दुख हरि नाथ अतीव ॥ ३२ ॥
 घेरा मांहि जु हौ पर्यौ, तू घेरा तैं काढि।
 दै निज भाव सुलक्षणां, पासि हमारी वाढि ॥ ३३ ॥
 घेवर फैंनी आदि दै, तजि कै जिह्वा स्वाद।
 रूखाटूका पाय कै, करिहैं तोकीं याद ॥ ३४ ॥
 घें तेरी चोघैं प्रभु, सुर नर मुनिवर ईश।
 तो सौ देव न दूसरौ, तू हि सही जगदीश ॥ ३५ ॥

— सोरठा —

घोर वीर तप भास, घोर भाव वर्जित तू ही।
 तू प्रभु रोर विनास, आस भविनि की तू सही ॥ ३६ ॥
 घोष सवद कौ नांम, तैरे घोष न रूप जी।
 तू घोषै निज धाम, महा घोर वीरो तू ही ॥ ३७ ॥
 घोटकादि चतुरंग, सेना तजि नरपति महा।
 तो सौं लावैं रंग, तेईं तोकों पाव ही ॥ ३८ ॥

— छंद भुजंगी प्रयात —

तु ही घोर तपिश ईशो अतापी,
 नही घोर कर्मा तु ही है निपापी।
 प्रभू घोर संसार तारी तु ही है,
 तु घोषै उभै धर्म धर्मी सही है ॥ ३९ ॥
 तु ही जो निषेदै बडे घोल कांजी,
 अभक्षा बतावै दधि द्वेदलां जी।
 तु ही सत्य घोषै सदाचार गावै,
 भजैं धर्म घोषा सुरा सीस नावै ॥ ४० ॥
 तजे घोष सर्वे भये साधु मौनी,
 जु संसार माया सुलग्गी अलौनी।
 सलौनी तिहारी सुसेवा हि जानी,
 महा ध्यान रुढा भजैं तोहि ज्ञानी ॥ ४१ ॥

— सोरठा —

घोर भयंकर नांम, तू नहि देव भयंकरा।
 कर्मनि कौं अति धाम, दीसै तू ही भयंकरा ॥ ४२ ॥

— अरिल छंद —

घोणा विवर नु नांम नासिका छिद्र कौ,
 धरि नासाग्र जु ध्यान सोच तजि उद्र कौ।
 एक चित्त करि तोहि जपैं योगी महा,
 है निरगंध स्वरूप शुद्ध भक्ती लहा ॥ ४३ ॥

घो कहिये श्रुति मांहि घंट का नाम है,
तू घंटाधर देव धुजाधर राम है।
घौरक तेरी मांनि करम सब नासिया,
घौरक जग की त्यागि दास गुन भासिया ॥ ४४ ॥

घंटा तेरै द्वार सबद अति ही करै,
घंटा कौ सुनि नाद सकल पातिग डरै।
घंटा गङ्ग के कंठ फलै रहि स्थान कौ
घंटा तेरै द्वार छजै नहि आन कौ ॥ ४५ ॥

घः कहिये श्रुति मांहि मेघ का नाम है,
तू है मेघ स्वरूप परम रस धाम है।
जग जीवनि विश्राम तापत्रय भेटई,
तो सौ तू ही मेघ सिखी मुनि भेटई ॥ ४६ ॥

अथ बारा मात्रा एक कवित्त मैं।

— सवैया - ३१ —

घट घट नायक तू घात तैं रहित देव
घिरयो हूँ अनादि कौ सु तू छुडाय मोहि जी।
घोंस्यो मोहि करमनि फेरयो तीन लोक मांहि,
घुण होय लागे वै जु कहों कहा तोहि जी।
घूमता मिटाय मेरी घेरा तैं निकासि देव,
घैं जु चौधैं रावरी, सुद्रिष्टि तेरी होहि जी।
घोष तेरी सुनि कै जु घौरक अधनि कीन
घंटाधर घः स्वरूप देख्यौ इकटोहि जी ॥ ४७ ॥

— दोहा —

तू धस्पर जग को सही, तेरी क्रांति सुलच्छि।
कमला पदमा श्रीरमा, सो दौलति परतच्छि ॥ ४८ ॥

इति घकार संपूर्ण। आगैं ङकार का व्याख्यान करै है।

— श्लोक —

डकाराक्षर कर्त्तारिं भेत्तारं कर्म भूभ्रतां ।
ज्ञातारं विश्व तत्त्वानां, वंदे लोकाधिपं विभुं ॥ १ ॥

— दोहा —

ड कहिये आगम बिषै, भैरव नाम विख्यात ।
भैरवादि यक्षा सबै तेरे दास कहात ॥ २ ॥
तू प्रशंसत कह्योअन्य भैरव भाव न केव ।
भैरव नाम भयंकरा, तू भयहारी सोय ॥ ३ ॥
भय कौं तू हि भयंकरा, काल हु कौं भय रूप ।
मोहादिक कौ रिपु तुही, तातैं भैरव रूप ॥ ४ ॥
ड कहिये सिद्धांत में, नाम व्यसन कौ देव ।
व्यसन जु कहिये कष्ट कौं, कष्ट हैं तुव सेव ॥ ५ ॥
ड कहिये ग्रंथनि विषैं, स्वर कौ नाम अनादि ।
सप्त स्वरादिक भेद जे, परकासक तू आदि ॥ ६ ॥
स्वर धरि तोकौं गांव ही, इंद फनिंद नरेस ।
चंद सूर सुर असुर नर, खेचर आदि असेस ॥ ७ ॥
स्वर धरि तेरौ जस कहैं, नारद सकल प्रवीन ।
रुद्रादिक तोकौं भजैं, भजैं चक्रि लवलीन ॥ ८ ॥
अर्द्ध चक्रि तोकौं रटैं, रटैं काम देवादि ।
हलधर तेरौ जस कहैं, गावैं तोहि अनादि ॥ ९ ॥
मनु गावैं मुनि ध्यांवहीं, गावैं सब अहमिंद ।
लौकांतिक गावैं सदा, तू सब पूज्य मुनिंद ॥ १० ॥
स्वर धरि तोहि जु गांवही, तात मात जगदेव ।
तू सबकौ त्राता प्रभु, दै अपनी निज सेव ॥ ११ ॥

स्वर धरि तोहि न गाइयो, मैं मूरिख मति हीन ।
 तातै रुलियो जगत मैं, अव दै भक्ति प्रवीन ॥ १२ ॥
 ड कहिये फुनि नाथ जी, तसकर नाम प्रसिद्ध ।
 तसकर इंद्री मन मदन, हरै ज्ञान अनिरुद्ध ॥ १३ ॥
 इनतै मोहि वचाय तू, तू है राय सुन्याय ।
 वास देहु निज नग कौ, जहां न एक अन्याय ॥ १४ ॥
 चोर न तोकौं पांव ही, नहि पावैं चमचोर ।
 तू सुमनोहर देव है, हरै रोग अर रोर ॥ १५ ॥

— सवैया ३१ —

भैरव न तू सुदेव, भैरव करैं जु सेव,
 व्यसन कौ नाम नाहि तेरी छत्र छाव मैं ।
 स्वर धरि गावैं तोहि, सुर नर नाग मुनि,
 सबै लोक माय रहे तेरे गुन काय मैं ।
 चोर नाहि पावैं वास, चोरी नाहि वास माहि,
 वासना न तैरे देव, तू न कभी माय मैं ।
 नमो नमो नाथ तोहि, दै जू निज भाव मोहि,
 और कहा जाचौं ईस आवै नाहि दाय मैं ॥ १६ ॥

— दोहा —

डेभ्यांभ्यस डसिभ्यांभ्यसो, अर डसिवोस जु आम ।
 डीवोस जु सुष शब्द ए, तूं भासै सब राम ॥ १७ ॥
 तू अति व्याकरणी प्रभू, शब्दागम प्रतिभास ।
 शब्दातीत अतीत तू, अति अदभुत अविनास ॥ १८ ॥
 भैरवता तेरी महा, करै करम कौ नास ।
 सो चंडी परमेश्वरी, भाषा दौलतिभास ॥ १९ ॥
 इति डकार संपूर्ण । आगै चकार का व्याख्यान करै है ।

— श्लोक —

चतुर्वक्त्र श्र चारित्र्यो, चिच्चिन्मत्कार चिन्मयः।
 अचीवरो निराभरणो, न च्युतो जन्म मृत्युहा ॥ १ ॥
 चूडामणिस्त्रिलोकेशो, चेतनाधिष्ठितो सदा।
 चैतन्यादि गुणाधीशो, चोत्तमोसिद्धिदायकः ॥ २ ॥
 मनश्चौरो जगच्चन्द्रो, चंचत्कांचन वर्णभः।
 सर्वाक्षर मयो धीरो, सर्व मात्रा मयो विभुः ॥ ३ ॥
 चः प्रकाशो चिदाकाशो, सर्व लोकेश्वरो प्रभुः।
 मदीयां चित्त भूमौ सासदा तिष्ठतु निश्चलः ॥ ४ ॥

— दोहा —

चतुरानन चतुरास्य तू, चतुर्वक्त्र तू देव।
 सब कौ अर्थ चतुर्मुखा, तू हि अनंत अभेद ॥ ५ ॥
 चर थिर कौ गुरुदेव तू, चतुः शरण चउ रूप।
 चउ मंगल उत्तम तु ही, तू है चतुर अनूप ॥ ६ ॥
 च कहिये प्रभु चंद्रमा, तू है चंद्र सुनाथ।
 च कहिये सोभा सही, तू सोभित अति साथ ॥ ७ ॥
 च कहिये फुनि चोर कौं, चोर न पावैं तोहि।
 तू हि मनोहर देव है, निज सेवा दै मोहि ॥ ८ ॥
 च कहिये जु पुनह पुनह, वारंवार दयाल।
 तेरौ नाम जु लीजिये, तू अतिनाम विशाल ॥ ९ ॥
 चउगति तैं प्रभु तारि तू, चउदह तैं जु निकाश।
 सूक्ष्म बादर त्रय विकल समन अमन जिय रास ॥ १० ॥
 ए पर्यापत इतर गुन, चउदह जीव समास।
 दंडक चउवीसांनितैं, कादि राखि निज पास ॥ ११ ॥
 चउतीसैं अतिशय प्रभू, तू हि धरै जिननाथ।
 अमित अनंत जु अतिशया, तेरे तू अति साथ ॥ १२ ॥

चउचालीस जु दोष प्रभु, टारि करौ निजदास।
 मद मूढत्व अनायतन, हरौ सकल मल रास॥१३॥
 व्यसन हरौ सब भय हरौ, अतिचार हरि पंच।
 ए चउचालीसा अघा, टारि महा दुःख संच॥१४॥
 चउपन दूनें नाथजी, मनिका फेरै लोक।
 मन का मनिका जो मिलै, तौ जोयै सुख थोक॥१५॥
 चउसठि चमर जु ढारहीं, सुरपति करि करि भक्ति।
 तेरौ पार न पावई, तू दयाल अतिशक्ति॥१६॥
 चउहत्तरि दूना सबै प्रकृति टारि क्रिपाल।
 दै अपनों निज वास जो, अविनश्वर गुनपाल॥१७॥
 चउरासी मैं हूं सल्यौ, विना भक्ति जगदीस।
 अव अपनों निज दास करि, हरि अविवेक मुनीस॥१८॥
 चक्रवा सम भवि जीय हैं, तू दिनकर सम देव।
 भव्य चक्रोर समान हैं, तू ससि सम अतिभेव॥१९॥
 चमत्कार कारण तु ही, ज्ञानानंद शरीर।
 चर्म रोम मल अस्थि मय, देह न तेरौ धीर॥२०॥
 चढि जग सीस जु तुव पुरैं, आवैं तुव मत पाय।
 चटक मटक रहितो तु ही, रहित विभाव सुराय॥२१॥
 चणकादिक द्विदला प्रभु, दही मही भेला न।
 लेबै तेरे दास कछु, वस्तु चर्म मेला न॥२२॥
 चरन कमल तेरे भजैं, चलन चलैं अति शुद्ध।
 तेरे चरित जु उर धरैं, ते दासा प्रतिबुद्ध॥२३॥
 चलविचल जुता त्यागि कै, निश्चल है तुव ध्यान।
 करैं तेहि पावैं प्रभु, केवल दरसन ज्ञान॥२४॥
 चर्म रंध नारीनि कौ, तामें राचे मृद।
 चर्मचोर न गावै तुझैं, तू सुशील अतिगूढ़॥२५॥

चक्षु हिये की खोलि कै, लखैं रावरी रूप।
 ते हि सचक्षु सुजांन हैं, और न बुद्धि स्वरूप ॥ २६ ॥
 चमर छत्र सिंहासन तोहि फवैं जगराय।
 चमरादिक सब त्यागि कै, चक्री सेवैं पाय ॥ २७ ॥
 चर तू धिर तुव मूर्ती, तू हि चराचर देव।
 चलैं निरखि मुनिवर महा, ते धारैं तुव सेव ॥ २८ ॥
 चक्र रूप संसार है, खेवट तूहि अपार।
 तुव भजि उतरे पार बहु, हमहि तारि जगतार ॥ २९ ॥
 चरचा तेरी नित्य है, चरचा कौ नहि अंत।
 देहादिक कौ अंत है, आत्म देव अनंत ॥ ३० ॥
 देह जायगौ अबसिइह, काल पाय जिनराय।
 चरचा करत जु करत ही, जाय ध्याय तुव पाय ॥ ३१ ॥
 इह मांगौ और न चहुं, देहु कृपा करि ईस।
 अंत काल विसरीं नहीं, चरन कमल जगदीस ॥ ३२ ॥
 चर्मकार के गेह सम, देह हमारीं निंद्य।
 तुव भजियां सु पुनीत है, तू त्रिभुवन करि बंद्य ॥ ३३ ॥

— सवैया — २३ —

चाहि न और सुचाहि इहै इक, नित्य निरंतर तोहि निहारैं।
 चार तुही अति सुंदर रूप जु नाहि कछू पर तुल्य तिहारैं।
 चारु चरित्र धरा जु मुनीसर, शुद्ध अहार जु शुद्ध विहारैं।
 तोहि भजैं सु तजैं जग जाल, रटैं जगजीवन राति दिहारैं ॥ ३४ ॥
 चारण ऋद्धि धरा जु जतीसुर, अंबरचारण चारु चरित्रा।
 तोहि जपैं सुतपैं तपभेद, तु ही जगदीसर देव पवित्रा।
 चातक भाव धरैं भवि जीव, तु ही प्रभु अंबुद रूप सुमित्रा।
 चाकर देव अदेव सुखेचर, भूचर ठाकर तू हि विचित्रा ॥ ३५ ॥

— भुजंगी प्रयात छंद —

नहीं नाथ चामीकरा तुल्य तैरें,
 नहीं कोड़ काई तिहारें जु नैरें।
 तु ही चारु चारित्र धारी अनूपा,
 तु ही चारचारी निषेदै निकूपा ॥ ३६ ॥
 तु ही चाहि वीता अतीता अजीता,
 सबै चाहि पूरी करै तू प्रतीता।
 सबै संयमाचार तू ही बतावै,
 स्वरूपा चरित्रा विधी तू जतावै ॥ ३७ ॥
 करै चाकरी एक तेरी हि देवा,
 धरै कौन की नाथ तो टारि सेवा।
 तु आनंद चाखा रहै नित्य चाखा,
 धरै ज्ञान थापा किंथा बाण राखा ॥ ३८ ॥
 नहीं चार तैरै सबै तू हि जानैं,
 सदाचार तू ही अनाचार भानैं।
 निषेधै तु ही सर्व चामादि बस्तू,
 दया चाल तेरी तु ही है प्रशस्तू ॥ ३९ ॥
 नहीं चाल तेरी चलै हंस हस्ती,
 तु ही शुद्ध चाला अकाला सुवस्ती।
 नहीं चाव दूजा करै ज्ञानवांनां,
 इकै चाव तेरे दरस्का सुजांनां ॥ ४० ॥
 नहीं चांद चूटा जहां तू वसै है,
 नहीं चांदनी घांम तू ही लसै है।
 चिदानंद देवा सुचिद्रूप तू ही,
 चिदाकास चिन्मुद्रधारी प्रभू ही ॥ ४१ ॥
 विभू चिच्छिभत्कार चिंता वितीता,
 जु चिंतामणी चिंत्यदाता अतीता।
 तु ही चिद्विलासा सु चिन्मात्र तू ही,
 तु ही चित्रकासा चिदीशा विभू ही ॥ ४२ ॥

महाचिन्मयी सु रोकें जितेद्री,
 तुझै ध्यायवे कौं तु ही है अतिद्री।
 विना चित्त जीतें नहीं होय भक्ती,
 नहीं चित्तवाक्काय तैरे असक्ती ॥ ४३ ॥

— दोहा —

चिदधन चिनमय देव तू, चिनमूरति चिर रूप।
 चिरजीव जगपीव तू, शुद्ध चिदात्म भूप ॥ ४४ ॥
 चिदाकार चित्तदूर तू, चिदाधार अतिचित्र।
 अति विचित्र परतक्ष तू, जगजीवन जगमित्र ॥ ४५ ॥
 देव चिदंकित नित्य तू, टारि सकल भ्रम जार।
 हों जु सत्यौ चिरकाल तैं, अब उधारि भवतार ॥ ४६ ॥
 चिग रूपा विभ्रान्ति जो, ताकी वोढ अधीस।
 तू न लख्यो प्रभु पास ही, परमेश्वर अवनीस ॥ ४७ ॥

— सोरठा —

चीन्हों मैं नहि तोहि, चीन्हें विषय जु जगत के।
 अब तू दै शिव मोहि, न्यारौ करि भव भ्रान्ति तैं ॥ ४८ ॥
 चीर रहित तू देव, निराभर्ण भासुर तु ही।
 देहु दिगंबर वेस, तु ही अछेव अभेव है ॥ ४९ ॥
 चीलै तैरे घालि, लहैं तत्त्व जोगीसुरा।
 चीलै तैरे घालि, मैं मारग भूलौ फिरु ॥ ५० ॥
 चीर पटंबर त्यागि, त्यागै सर्व जु कामना।
 तैरे मारग लागि, मुनि निवृत्त हैं पद भजैं ॥ ५१ ॥
 चीतादिक अति दुष्ट, हिंसा कारण जीव हैं।
 तिन हि न पालैं शिष्ट, तेरी आज्ञा जिन सुनी ॥ ५२ ॥
 चुणक व्रत्ति करि तोहि, लहैं ऋषीश्वर ब्रत धरा।
 निज सेवा दै मोहि, और न चाहिये नाथ जी ॥ ५३ ॥

चुणक ब्रति दै मोहि, जाकरि तोहि मुणौ प्रभू।
 देखौ सब मैं तोहि, वहै त्रिष्टि दौ सांझियाँ ॥५४॥
 चुगली है अति पाप, तैं निंदी सब ग्रंथ मैं।
 चुगल लहेंगे ताप, तोहि न पावैं ते सठा ॥५५॥
 व्युत व्रत लहैं न तोहि, तू अच्युत जगदीस है।
 तेरी टहल जु मोहि, दै और न कछु चाहिये ॥५६॥
 चुर चुराट की टेव तैं नांही नाथ जी।
 तू है शांत सुदेव, सेव देहु किरपा करे ॥५७॥

— सबैया २३ —

चूरामनि लोक कौ, अलोक परकासी तू हि,
 चूक मेरी माफ करि, तोहि नहि ध्याये की।
 चूप नांहि तैं सब चूप तैं रहित ईश,
 चूप एक तैं, सब जीव सुख दाये की।
 चूल सब जगत कौ समूल मोख मारग कौ,
 तेरी सेव करै साध ज्ञान सुख भाये की।
 चूर गिर करम कौ करिवे कौ ब्रज तू हि,
 गहौ दीनानाथ लाज सरन जु आये की ॥५८॥
 चूहे सम हीं जु जीव कायर अनंत देव,
 रहौ तन विल मांहि, मूरिख अनादि कौ।
 मेरी धात लागि रहे पाप पुन्य वायस जु,
 काल मारजार मोकौं तकत है आदि कौ।
 मिथ्याभाव स्वान मोहि मारिवे कौ संग लागे,
 इन्तैं छुडाय राय, करे भव दाहि कौ।
 नू तौ दयानाथ, तैं साथ सब शुद्ध भाव,
 तो छतां हुं पीडित रहौं जु महा वादि कौ ॥५९॥

चूत वृक्ष आंख कौ है नांम, जग मांहि ख्यात
 तू है प्रभू आंख तैं अधिक सुरसाल जी।
 सूकै नांहि कवहु सजल घन जो सदीव,
 सम्यकदरस मूल अति हि विसाल जी।
 ज्ञान पेड़ ब्रत डाल संजम ही साखा अति
 शुद्ध भाव दल अति विमल प्रवाल जी।
 गुन ही सुफूल अर गंध निज परनति,
 केवल प्रभाव फल रूप जगपाल जी॥६०॥

— सारठा —

चूरण दै सुविवेक, कर्म रोग लागे महा।
 तैं प्रभू जीव अनेक, चूरण दै निरज्वर कर॥६१॥
 चूर कियो अति कूटि, लूटि लियो मोहादिकां।
 गयो नाथ अति टूटि, अब तौ प्रभु किरपा करै॥६२॥
 चूंट चांट हरि देव, सेव देहु निहकांम जो।
 चेतन अतुल अछेव, तु ही चेतना निधि प्रभू॥६३॥
 चेतनता दै ईश, चेतनता कौ पुंज तू।
 चेतन रूप अधीश, तू निधान भगवान है॥६४॥
 हूँ सचेत मुनिराय, पाय रावरे उर धरें।
 ज्ञान चेतना काय, तु ही अकाय अमाय है॥६५॥
 कर्म चेतना ईस, वहुरि कर्मफल चेतना।
 रूपभये जु अधीस, दै अब ज्ञान सुचेतना॥६६॥
 घेरा करि जगराय, पाय सेव दै ईसरा।
 चेला करि सुखदाय, भ्रम घेरा तैं काढिजी॥६७॥
 चेला नहि तू नाथ, चेला सब तेरे प्रभू।
 तू अचेल गुण साथ, चेल न देह न दिगपटा॥६८॥
 चेटक नाटक नांहि, अदभूत योगी नाथ तू।
 सब चेटक तो मांहि, चिमतकार कारण गुरू॥६९॥

— सवैया - ३१ —

चेरी सब तेरी नाथ इंद धरनिंद भूति,
 चेरी तेरी देव अहमिंद्रनि की भूति है।
 चक्रि भूति चेरी अर चेरी असुरिंद भूति
 चेरिनि की चेरी खग चक्रि परसूति है।
 राज ऋद्धि चेरी अर चेरी भोग भूमि सबै,
 चेरी चंद सूर भूति जहां लौं विभूति है।
 अखिल हैं चेरी तेरी मैं हूं जव भयो चेरा,
 चेरौ चेरी व्याहै यामैं कौन करतूति है ॥७०॥

जो तू चेरा जानि ज्ञान चेतना बिकाहै नाथ,
 दोऊ पक्ष शुद्ध वहै वेटी सु वडेनिकी।
 सम्यक है वाप जाकौ दया है सुमात ताकी,
 भाव है अनंत भाई लाडिली घनेनिकी।
 जती मत पीहर ननेरा गुरसंग जाकौ,
 जामैं नाहि बिसन जु आगरी गुनेनिकी।
 औसी प्यारी परनों तौ गिनौं उपगार तेरौ,
 और भांति अरज गुदारीं नाहि लेन की ॥७१॥

— सौरठा —

प्रश्न करै हथां कोय, चेरौ उत्तम कुल सुता।
 कैसें परनैं सोय, इह बिनती नहि जोग्य है ॥७२॥

ताकौ उत्तर एह, इह चेरा नहि कुल वुरा।
 प्रभु की न्याति गनेह, और न चेरा न्याति है ॥७३॥

फुनि उत्तर है एक, जौ चेरा तौ राख कौ।
 इह धारौ जु विवेक, औरनि को सिरताज है ॥७४॥

वड धर कौ चेरा जु, सो व्याहै हू कुल सुता।
 तातैं इह हेरा जु, ज्ञान चेतना दुलही ॥७५॥

अथ जीव संवोधन ।

— सर्वैया - ३१ —

चेति रे अचेत चेत चेतन कौ ध्यान करि
 मूरिख हँ राख्यो कहा विषयनि के ठाट मैं ।
 बिपै तौ अनंत काल सेये तै अनादि ही के,
 नीच ऊंच दसा तेरी भई भव वाट मैं ।
 लेय लेय डारे तैं ही तेरे हँ उलाक सम,
 जगत के भोग भया पग्यो कहा काट मैं ।
 लाज नाहि आवै तोकों छाद कौ अहार करै
 वूड्यो कहा बाबरे तनक आव घाट मैं ॥ ७६ ॥

अथ जीव भगवानं स्तुति ।

— भुजंगी प्रयात छंद —

तु ही चैत्य चैत्यालयो द्वार मूला,
 तु ही शुद्ध चैतन्य रूपी सशूला ।
 तु ही नाथ चैतन्यता पुंज पूरा,
 नही भाव तेरे जु चैतन्य दूरा ॥ ७७ ॥
 तु ही चैत्यभासी अचैतन्य नासी,
 सदानंद तू ही महानंद रासी ।
 तु ही चैत्य मांही तु ही सर्व मांही,
 करै चैन तू ही जु संदेह नांही ॥ ७८ ॥

— छंद त्रिभंगी —

मन इंद्री चोरा हँ अति जोरा करहि जु भोरा ज्ञान हरै ।
 क्रोधादिक चोरा हँ अति घोरा, भवजल घोरा भ्रांति करै ।
 ए विषय जु चोरा करहि जु जोरा अति सुख तोरा कष्ट धरै ।
 मिथ्यात सजोरा, है अति चोरा, अघत चोरा, भोर करै ॥ ७९ ॥

हैं चोर विमोहा, चोर जु द्रोहा, चोर जु छोहा, सर्वहरा।
हैं परमत चोरा, करइ जु होरा, चोर न थोरा, गर्व धरा।
लागे प्रभु संगी, सर्व इकंगा, मोह प्रसंगा, शुद्धि हरा।
टारै सब चोरा, तू अति जोरा, हरइ जु रोरा ऋद्धि करा ॥८०॥

— सोरठा —

चोखी तेरी टेव, चोख गहौ जगनाथ जी।
लूटयो मोहि अछेव, तेरे राजस मांहि प्रभु ॥८१॥
मेरी द्याय सुमाल, ज्ञानानंद स्वरूप जो।
घोर पकरि जग भाल, लाल राव तू जगत कौ ॥८२॥
चोट लगाई नाथ खोट कियो मुझ सौं इनां।
करि कै मेरी साथ, पारयो तोसौं आतिरौ ॥८३॥
लज्या चोल उतारि कियो निलज्ज मंहा मुझीं।
कुं कौ तेरे द्वारि, ऊपर करि अब ईसरा ॥८४॥

— छंद भुजंगी —

कियो चौर चौपट्ट चौरा जु दुष्टा मिली चौकरी पाप रूपा सपष्टा।
तु ही चौर दंडा महासाधु तारी, सबै भ्रांतिहारी तु ही है विहारी ॥८५॥
अचौकी कचारी तु ही लोकतारी, तु ही लोक चंद्रो मुनिंद्रो अपारी।
कहा चंदनो जू कहा है सुचंद्रो, सुजैसौ तु ही सीतलो है मुनिंद्रो ॥८६॥
कहा चंद्र ज्योती यथा किति तेरी, तु ही ज्योति रूपो धर ज्योति नेरी।
सु चंचत्प्रकाशा चमत्कार तू ही, सुचंड प्रचंडा तु ही है समूही ॥८७॥
सुचंडी न औरै रमा सोइ चंडी, जु ज्योती तिहारी, सुलक्ष्मी प्रचंडी।
नही और चंडी सबै और मुंडी, सुचिच्छक्ति चंडी दयाला अखंडी ॥८८॥
नही चंचलाई नही कोतलाई, तु ही निश्चलो निर्मलो लोकराई।
तुझै कोय चंपै नही तू अचंपा, प्रभू नित्य चंगा अनंगा निकंपा ॥८९॥
नहीं चिंतयो देव तोकों कदे ही, सु तातैं रुख्यौ नंत धारी जु देही।
अवै चंद्रनाथा सुधापांन देहो, अमृत्यू करी देव तू है विदेहो ॥९०॥

जु चंपा कही औ कहा कंचनाजी, सुरूपा तु ही नां धरै अंजनाजी ।
 नहीं चंक्रमैं, तोही कोई हि देवा, तु ही हैं अनंत पवीर्यो अछेवा ॥ ९१ ॥

— दोहा —

चंद्रायण तप आदि बहु, तप भासै तू देव ।
 चः प्रकास जगभास तू, दै स्वांमी निज सेव ॥ ९२ ॥
 चः कहिये प्रभु चंद्रमा, तू चंद्रप्रभु देव ।
 सर्व देव सेवा करै, दै नाथा निज सेव ॥ ९३ ॥

अथ बारा मात्रा एक सवैया मैं —

— सवैया - ३१ —

चरन सरोज तेरे चारन मुनी द्विरेफ सेवैं,
 चिनमूरति तू परम प्रकास है ।
 चीर विनु सुंदर जू च्युत व्रत लहैं नाहि,
 अच्युत तू चूरामनि लोक कौ विकास है ।
 चेतना निधान तू ही चैतनिता भाव तेरौ
 तोमई भये सुदास तू हि जिन पास है ।
 तेरे वास मांहि नाथ नाहि चोरी चौर साथ
 चंदपति देव तू ही चः स्वरूप भास हैं ॥ ९४ ॥

— दोहा —

तव चंद्र जु की चंद्रिका, सोई कमला लच्छि ।
 शक्ति भवानी चंडिका, सो दौलति परतच्छि ॥ ९५ ॥

इति चकार संपूर्ण । आगैं छकार का व्याख्यान करै है ।

— श्लोक —

छल छद्म विनिर्मुक्तं, सच्छास्त्रस्य निरूपकं ।
 सच्छिवास्पद धातारं, सच्छीलनायकं विभुं ॥ १ ॥
 सच्छुक्ल ध्यान दातारं, अचिच्छून्यं चिदीस्वरं ।
 प्रज्ञाछेत्री विधातारं, स्वच्छैर्वोध युतैर्नुतं ॥ २ ॥
 न तच्छोकान्वितै भावै, युक्तं शक्ति धरं परं ।
 स्वच्छं दुग्बोधकौ भावौ, लभ्येते यदनुग्रहात् ॥ ३ ॥
 वंदे तं परमं देवं, छंदबंधादि दूरगं ।
 छः प्रकाशं चिदाकाशं सर्वाधारं सदोदयं ॥ ४ ॥

— दोहा —

छद्मस्थ न तू देव है, पावैं नहि छद्मस्थ ।
 तू कैवल्य सुरूप है, प्रभु स्वच्छंद मध्यस्थ ॥ ५ ॥

— मालिनी छंद —

छलवल नहि कोई, छद्म तैरे न होई,
 अति छतिपति जोई, शुद्ध चैतन्य सोई ।
 अति दलवल रूपा, रागा दोषादि नांही,
 छकि जु रहिउ देवा, ज्ञान आनंद मांही ॥ ६ ॥
 छह जु प्रवल उमी, नांही तैरे जु कोई,
 छविधर छविकारी, तू छवीली जु होई ।
 छवि जु निरखि तेरी, मात हैं सर्व देवा,
 छविमय शुभ मूर्ती, नाथ दै मोहि सेवा ॥ ७ ॥

— सवैया ३१ —

छत्रधारी छत्रधनी छत्रपती पति तू ही,
 परम प्रवीन स्वामी धिर चर पति है ।
 छत्र छाव तेरी तलि वसैं सब लोक नाथ
 भव जल तारक तू नायक सुजति है ।

छक नाहि तैर कोऊ, छक्यो तू स्वछति मांहि
 केवल ही मांहि तेरी महिमा वसति है।
 छल तैं वचाय देव दै जू भवतार सेव,
 अगनित गुन तू ही अगनित छति है॥८॥
 छति तेरी सत्ता निज अतुल अनंत रूप
 छति कौ निवास तू अछति कौ निवारका।
 छती छिटकाय तू जु है रह्यौ दिगंबर है,
 अंबर को अंबर तू जीव कौ सुधारका।
 छत्र नाहि काहू काल उघड़्यो जगतपाल
 छजै तोकौ लोकभार भविनि कौ तारका।
 छह भेद कारक तू धारक परमतत
 दास कौ उधारक तू मोह कौ प्रहारका॥९॥
 छह द्रव्य भासक तू, छह काय पीहर है,
 छह दस कारण कौ कारण अनादि का।
 छहवीस मोह भेद नाहि तोमें तू अमोह,
 छहतीस गुन धार सूरि भजैं आदि का।
 छह चालीसा जु दोष टारि मुनि भोजन लें,
 तेरे ही उदेस रीति गहैं स्यादवादिका।
 छह चालीसा जु गुन आदि हैं अनंत तोमें
 मुनिनि कौ तारक तू देनहार दादिका॥१०॥
 छहपन देवि जे कुमारिका कहावैं नाथ,
 भजैं तोहि भावकरि देव सिर नांवही।
 छह परि शून्य एक साठि जे कहावैं ठीक,
 साठि ही हजार सुत सगर के ध्यांवहीं।
 छहसठि आध सिंधु धिति सुर नारक की
 भासै उतकिष्ट तूहि मुनि गुन गांवही।
 छह सत्तरी जु लाख देवल तिहारे नाथ,
 छह भेद भवन निवासिनि में पांवही॥११॥

— दोहा —

छह अस्सी जु छियासिया, ताके आधे खंध।
 हौंहि तियालीसा प्रभू चौथे ठाणी अवंध॥१२॥
 छह निवै जु हजार ही, चक्रवर्ति तजि नारि।
 तोहि भजै छहखंड कौ, राज त्यागि ब्रत धारि॥१३॥
 छह निवै लक्षा प्रभू, तेरे देवल पौन।
 कुमारदेव धारै सदा, मुनी भजै गहि मौन॥१४॥

— मालिनी छंद —

छाया माया, नांहि तेरे जु काया, छायाकारी, सर्व कौ तूहि राया।
 छानौ नाही, देव विख्यात तू ही, छानौ नाथा, नांहि पावैं समूही॥१५॥
 छात्रा नाही, छाक नाही जु तेरे, ज्ञाता तू ही, भ्रंति आवै न नैरे।
 छागा बोका, जे हतैं घोर पापी, नर्का जावैं, कष्ट पावैं सत्तापी॥१६॥
 छाया तेरी, नां लहैं हिंसका जे, पावैं दुख्या, जीव विध्वंसका जे।
 तू है रक्षा, कारणो सर्व जीवा, पापा चारी नांहि पावैं कुजीवा॥१७॥

— चौपड़ी —

छागलि कौ जल है अति निंद्य, गावै तेरौ श्रुति जगबंध।
 छाज चालनी चर्म अलीन, बिना चर्म धारैं जु प्रवीन॥१८॥
 छाछि दही ए विदल जु जुक्ता, तेरे दास गिनैं हि अजुक्ता।
 छाछि दही वसु पहर बितीत, तू हि निषेदै देव अजीत॥१९॥
 छाछि दही पांती इत्यादि, कुल किरिया विनु लेवौ वादि।
 छाछि समान सकल संसार, घृत रूपी तू जग में सार॥२०॥
 छाज समान गुनग्रह होय, तब पावैं तोकाँ प्रभु कोय।
 छांदि छांदि सब जग परपंच, एक तोहि ध्यावैं सुख संघ॥२१॥
 छालि मूल कूपल फलपात, बीजांकुर रक्षक तू तात।
 छांदि विषय इंद्रिनि के साथ, तोहि भजैं तू देव अबाध॥२२॥

छाणें जल अर अन्न जु वीण, तेरे दास गृहस्थ प्रवीण ।
 छात जगत कौ तू भवतार, तेरी छाप गहें गणधार ॥ २३ ॥
 छाद समान जगत के भोग, अभिलाषें अज्ञानी लोग ।
 छाके रहें मोहमद पीय, जन्म विगारें मूढ स्वकीय ॥ २४ ॥
 तो विनु मूढ भमें भव मांहि, भगति माल गूँथें सठ नांहि ।
 छाव भगति माला की दास, तो ढिग मे लैं धरि तुव आस ॥ २५ ॥

— सवैया - ३१ —

छिपानाथ नाथ तू ही, छिपासम माया दूर
 भ्रांति को हरन हार जगत को भान है ।
 छिन छिन ध्यान तेरौ करैं ध्यानी आत्मज्ञ,
 तू ही ज्ञाननाथ लोकालोक कौ सुजान है ।
 छिक छक तेरे श्रुति मांहि नांहि देखिये जू
 आदि अंत एक शुद्ध सत्ता कौ बखान है ।
 छिनक प्रवादी कौ उथापक है तू ही प्रभु
 स्यादवाद आगम कौ धारक प्रवान है ॥ २६ ॥
 छिद्र तैं रहित ईस, छिपै न छिपायौ धीस,
 छिद्र त्यागि तेरौ जस अहनिसि गायए ।
 छिमा कौ पहार तू ही, छिप्र शिव दाता देव,
 कोटिक छिपाकरा जु नख में वतायए ।
 तेरे ध्यान विन छिन जाय जोई वादि गनि,
 छिन छिन ध्यान नाथ, तेरौ उर लाइए ।
 छीनमोह छीनदोष, छीनराग छीनरोग,
 छीजै नांहि काहू काल गुरनि तैं पायए ॥ २७ ॥
 छींक न जंभाई नाथ, छीति नांहि भीति कोऊ,
 छीतल न पावैं भेद सीतल तू नाथ है ।

छींट अर पांढर अंबर सकल त्यागि
 होय कै दिगंबर सुदास करै साथ है।
 तू ही छीनकाम सब छीनता हरन राम,
 भक्तदुख पावक दुझायवे कौ पाथ है।
 छीनता हरनदेव अतुल अनंत भेव,
 तारि भव सागर तैं तू हि बडहाथ है ॥ २८ ॥

छीला के जु पात सम तैरे ढिग चंद सूर,
 छुट्यो तू न बंधै कभी अमल अवंध है।
 छुरिका न पासि अर पासि सब काटै तूहि
 छुटै तोहि ध्यायें छुट काल मांहि बंध है।
 मेरी देह पूतिगंध छुऊं कैसें तोहि ईस,
 तू तौ अति सुंदर सुमूरति सुगंध है।
 छूटि मेरी करौ देव छूटि करि करौ सेव
 तोहि नाहि सेवै सोई हिरदै कौ अंध है ॥ २९ ॥

छूछि सम जग भोग, कणरूप भक्ति तेरी,
 छूवैं नाहि तोकों कभी रागादिक रोगिया।
 छेद भेद खेद नाहि, छेव नाहि तेरौ कभी
 छेदक तू पासि कौ मुनिंद है अरोगिया।
 छेक नाहि तेरी सेवरूप नाव कै जु भूप,
 खेवट अगाध तू हि, जनम कौ जोगिया।
 छेलादिक जीवनि कौ रक्षक दयाल तू हि,
 छेह नाहि पावैं मुनि निज रस भोगिया ॥ ३० ॥

छेदन औं भेदन सुबंधन सुबध और
 अतिभारोपण जु अन्नपान रोकनां।
 दया के बिनासक ए भक्ति कौ न आवन दें,
 करैं ऐसे काम सठ नाथ तेरे लोक नां।

छैल तोसौ दूसरौ न दीसै जग मांहि और
 आनंद स्वरूप महा जाहि कछू सोक नां।
 रमा कौ रमन हार आपद हरन हार,
 सकति अपार एक तू ही है विलोकनां ॥ ३१ ॥

छोटे मोटे जीवनि को रक्षक है तू ही नाथ,
 छोटे मोटे दोषनि कौ तू ही हर देखिए।
 तेरी सेवा विनु छोछि करनी न आवैं कामि,
 करनी कौ मूल तेरी भक्ति जु बिसेखिये।
 छोहर है तेरे सब सुर नर नाग मुनि
 तू है तात सबकौ, प्रसिद्ध इह लेखिये।
 तातैं सब त्याग जोग तू ही एक लैन जोग
 सबै जग त्यागि एक तोहि कौं जु पेखिये ॥ ३२ ॥

— सोरठा —

छोति हरै मल रूप विमल रूप तू देव है।
 छोप नांहि जग भूप तू अछोप परमेशुरा ॥ ३३ ॥

छोभ न छोह न देव, तो सम सोभ न जगत मैं।
 छोडे दोष अछेव गुन निवास तू राजई ॥ ३४ ॥

तू नहि आवैं हाथ, छोच्छ पोल वातांनि तैं।
 तू मुनि गन कौ नाथ, योग धारि योगी भजैं ॥ ३५ ॥

छौना नहि तू नाथ, तात मात सब जगत कौ।
 सुरनर मुनिवर साथ, तोहि भजैं पुरखा तुही ॥ ३६ ॥

छौटिक अर सब छंद तू हि प्रकासै शब्द सह।
 तू आनंद सुकंद, छौगा पाघ न अवरा ॥ ३७ ॥

छं कहिये श्रुति मांहि, निरमलता कौ नाम है।
 तो विनु निर्मल नांहि, समल सबै ही जगत के ॥ ३८ ॥

छं भाषे मुनिराय, नाम तटस्थ हु वस्तु कौ।
 तू तटस्थ सुखदाय, और सबै वृद्धि जु रहे ॥३९॥
 छंद न बंध न फंद, छंद सबै परगट करै।
 तू है त्रिभुवन चंद, तिमरहरन अमृत झरन ॥४०॥
 छेदन कौ है नाम, छः कहिये आगम विषै।
 तू छेदै प्रभु काम, क्रोध आदि दोषा घनें ॥४१॥
 छः संवर कौ नाम, भाषे संवरधर मुनि।
 तू जिनवर विश्राम, संवर रूप अनूप तू ॥४२॥

अथ एक कवित मैं बारा मात्रा।

— संवैया - ३९ —

छल रूप लोक इहै, छार समभूति इहै,
 असौ जानि छिन हूं न भूलैं तोहि जोगिया।
 छीजैं नाहि खीजैं कभी छुटै जग जालतैं जु
 कुटैं नाहि काल पैसु छूटैं भव रोगिया।
 छेदन और भेदन कौ नाम है न रावर जु
 छैल तोसौ दूसरौ न आनंद कौ भोगिया।
 छोडे तैं विभाव भाव छोटिक न छंद राव
 छः प्रकास है अभास परम असोगिया ॥४३॥

— दोहा —

छटा तुल्य जगभूति है, तुव विभूति है नित्य।
 छति तेरी सत्ता रमा, संपति दौलति सत्य ॥४४॥

इति छकार संपूर्ण। आगैं जकार का व्याख्यान करै है।

— श्लोक —

जगन्नाथं जनाधीशं, जातरूपाभमीश्वरं ।
जिनं जीवाधिपं धीरं, जुटितं च न मायया ॥ १ ॥
जटाजूटात्मकं देवं, जेतारं जैन भासकं ।
रजोहरं महावीरं, मिलितं न हि कर्मणा ॥ २ ॥
ज्योति रूपं सदा शांतं, यत्कमाब्जौ सुराधिपैः ।
पूजितं तं नमस्यामि, ग्रंथितं जः प्रकाशकं ॥ ३ ॥

— छाप्य —

जगज्जीवन जगभानं, नाथ तू जगत प्रकासी,
जगनायक जगदेव, शुद्ध तू तत्त्व विकासी ।
जगत सिरोमणि धीर, तू हि जगमानं अमाना,
जगत उधारक ईस, तू हि जगदीस सुजांना ।
जग त्यागी जग भाल साईं, जगतजीत अघजीत तू ।
जडता रहित सुग्यान रूपी, अजड अरूप अतीत तू ॥ ४ ॥

जलजित निर्मलभाव, जलजजित तेरे पावा,
जलजवासिनी नाथ, जलधि जित तेरे भावा ।
जलद नांहि अति ऊच, ऊच तू अमृतवर्षा,
जनक सकल कौ तू हि, जनक तारक अति हर्षा ।
जक न परै जाँ लग्न दरसन, होय नहि प्रभु रावरी ।
दरस देहु परसन्न होई, किये दोष सह छावरी ॥ ५ ॥

जड चेतन सब भास, तू हि चैतन्य सुरूपा,
जस तेरौ नर नाग, देव गाँवें जु अनूपा ।
जनम जरा अर मरन मेदि हमरे अविनासी,
जघनि मध्य उत्तकिष्ट, भेदभासक सुखरासी ।
तू न जघन्य न मध्य देवा, उत्तकिष्टा उत्तकिष्ट तू ।
जलथल उपन्न सब कष्ट हर, जठरागनि हर इष्ट तू ॥ ६ ॥

जनपति जय जय देव, दास पावैं जय तोतैं,
जहैं मूढताभाव, राखसैं अनुग्रह होतैं।
बिनु अनुग्रह तप करैं, तौहु पावैं नहि पारा,
मासमास उपवास, धरैं जलबिनु तप भारा।
एक वृंद जल पारनों करि, बहुत काल अैसे तपा।
करहि तदपि तो बिनु गुसांई, कर्मभर्म कबहु न खपा॥७॥

जब कहिये प्रभु तेज, बहुरि इह सीध जु नांमा,
सीध तारि करि पार, तू हि अति तेज सुनांमा।
जब मात्र हि अथ खाध, पूंद एकहि जल पीवैं,
तौ पनि तो बिनु पार जगत जलकौ नहि छीवैं।
शंकर जु जटाधर चरन रज, सेवैं नाथ सुरावरी।
जटाजूट अतिभाव, स्वामी हरी भ्रांति अति बावरी॥८॥

— दोहा —

जगत जेष्ट जग पाल तू, जगन्नाथ जग बंधु।
जगत ज्योति, जग योनि तू, जगत गर्भ निरबंध॥९॥
जगत हितैषी जग प्रभू, जगदग्रज जगमित्र।
ज्वलत ज्वलन प्रभ जगत गुर, जगतभिषक अतिचित्र॥१०॥
जग सुंदर जग राय तू, जगत धात जग पीव।
जगत तात जग छात तू, जनपालक जगदीव॥११॥

— मंदाक्रांता छंद —

जानैं सारी, तन मन तनी, जातरूप स्वरूपा,
जातब्रतो अति गुण तु ही, जाग्रतो तू अनूपा।
प्रीत्यप्रीती, कबहु न धरैं, जातजात्यादि वीता,
जाला काटै कलिमल हरै, जाल जंजाल जीता॥१२॥
जाच्यो देवा, भवभय हरी, तू हि है जान राया,
जाचैं काको, तुवतजि प्रभू, तू अवाची अकाया।
जाया माया, कछु न धरैं, जाय आवैं न स्वांमी,
जगकौ जोगी, जगतजि रटैं, सो तु ही है विरांमी॥१३॥

— दोहा —

जाति जरा मरणादि जे, जाग्रत सुपन सुषुप्ति।
 तैरे एक न जातुचित, तू अजात धर गुप्ति॥१४॥
 जाके द्वाहुं काल ही, आलजाल नहि कोय।
 नागर तू हि सुजागरू, परम उजागर सोय॥१५॥
 जाडौ लोक अनंत तैं, जामैं सर्व समाय।
 परमाणू तैं पातरौ, मुनि हु नु देखैं राय॥१६॥
 जार चोर जाहि न लहैं, लहैं सुशील सदीव।
 जाल रूप भव जाल तैं, जा भजि निकसैं जीव॥१७॥
 जावा की जेती वसत, ते सब मद्य समांन।
 जाही नैं निंदी सबैं, त्यागैं दास अखांन॥१८॥
 जाप जपैं तेरे मुनी, जपैं देव नर नाग।
 जास्मि तू मोहादि हर, भक्ति धरैं बडभाग॥१९॥
 जिननायक जिननाथ तू, जिनपति तू जिनराय।
 जिन मारग भासी तू ही, तू जिनदेव अमाय॥२०॥
 जिती जितेंद्री जित गुरू, जित मनजित बुधि धीर।
 जित विमोह जित काम तू, जिताजीत अतिवीर॥२१॥
 जित जित देखैं नाशजो, जिहां जिहां तू ईश।
 जिम जिम तोकाँ ध्याइए, तिम तिम शुद्धि अधीस॥२२॥
 जिय की भ्रांति सबै मिटैं, हिय की सत्य पलाय।
 जव तू आवैं घट विषै, जितजीतक अधिकाय॥२३॥
 तू जितजेय जितीसरो, है जिनिंद्र प्रभु जिशु।
 परम जिताक्ष जितीश तू, तू ही जितांतक विशु॥२४॥
 जिंगजिगाट तेरी छवी, जितविभाव जग जीत।
 जिक्कहिये जेता प्रभू, तू जेता अघजीत॥२५॥
 जिक्कहिये जय नाम है, तू जयरूप अनूप।
 जितकर्मा अतिधर्म तू, जित मनमथ व्रत रूप॥२६॥

— सर्वैया तेईसा २३ —

जीव अजीव तनें सबभेद कहै जगपीव, तु ही अतिभासा ।
 जीव दया प्रतिपालक तूहि सुजीवनि कौ पति जीव प्रकासा ।
 जीरण नाहि न जोवनखान सुबाल न लाल अजीरण नासा ।
 जीति स्वरूप अजीत अपार सुजीवनि कौ रछि पाल अनासा ॥ २७ ॥

जीभ अपार करे पति नाग जपैं बडभाग सुपार न पावैं ।
 जिथु अनेक जु नैननि तैं निरखै तुव रूप सुत्रिति न आवैं ।
 जे अहमिंद्र अनुत्तरवासिसु नित्य निरंतर कीरति गावैं ।
 काल असंखित तेहु न पार लहैं गणधार न तोहि जु भावैं ॥ २८ ॥

जीभ जु एक न शक्ति सुवाच्य महामतिहीन न आगम धारी ।
 नाहि अध्यात्म कौ कछु लेस न धर्म गृहस्थ न साधु अचारी ।
 व्रत न जोग नही प्रभु ज्ञान सु कैसहि गांवहि कीरति भारी ।
 डेडर या भव कूप जु के हम तू गुनसिंधु अवंध अपारी ॥ २९ ॥

दोहा —

जीव जगत के हम प्रभू, गुन वरनन नहि होय ।
 भक्ति भाव भासै गुणा, और न कारन कोय ॥ ३० ॥

जुदौ मोहमद द्रोह तैं, जुदौ जगत तैं राव ।
 माया काया तैं जुदौ, तोतैं जुदे विभाव ॥ ३१ ॥

जुदौ नही गुन ग्यान तैं, न हि सत्ता तैं भिन्न ।
 जुदौ नहीं आनंद तैं, आत्म देव अभिन्न ॥ ३२ ॥

जुगपत तेरौ ज्ञान है, व्यापि रह्यौ सब मांहि ।
 जु को दिवस तो विनु गमैं, धृक् सो दिन सक नांहि ॥ ३३ ॥

जुरैं न तो सौं कर्म ए, भिरैं न तो सौं भर्म ।
 परैं परैं फिरते फिरैं, तू अतिबल अतिधर्म ॥ ३४ ॥

जुर्यो न तोसौं जीव इह, तातैं कल्यो अपार ।
 जुरैं चित्त करि तोहि सौं, ते पावैं भवपार ॥ ३५ ॥

जुटें न तोसों जड सबै, टूटें तोहि सों कर्म।
कटें न मोतें पासि ए, काटि भर्म दें धर्म॥ ३६॥

— सर्वैया ३१ —

जूवो सब दोषनितें गुननि कौ नाथ महा
जूवा मांस मदिरा कौ निंदक महाप्रभू।
गनिका कौ निंदक औ निंदक अहेरा हू कौ
चोरी चारी जारी तजि संतनि गहा विभू।
परदारा संगम निषेद्यो जानें पाप महा हु
विसन सेय कैं न काहू नैं लहा स्वभू।
वहै प्राणिनाथ प्राणि प्राणनि कौ रछिपाल,
उपज्यो न काहू काल सूत्र में कहा अभू॥ ३७॥

— सोरठा —

जूनीं तू अतिनाथ, काल अनंतानंत कौ।
नित्य नवल गुन साथ, जूनीं तू नहि देखिये॥ ३८॥
विषै भोग जग जूठि, सो दासा चाहैं नहीं।
दैकैं जग सों पूठि, निहकामा है गुन रटैं॥ ३९॥
जेता जग कौ तू हि, जेठा सब में तू सही।
तू असौ जु प्रभूहि, जे जन हीं तारै तुरत॥ ४०॥
जेते जीव अजीव, तेते सब तुव ज्ञान में।
तू त्रिभुवन कौ पीव, अंतरजांमी सबनि कौ॥ ४१॥
लहैं जेहली नाहि, तू जेहलता दूर कर।
परे जेलि कैं माहि, जीव तुही काहै प्रभू॥ ४२॥
तोतैं सब हैं जेर, जेरज अंडज उदभव।
तू मरजादा मेर, सब कौ रक्षक ईसरा॥ ४३॥
जेठमास गिरसीस, तापतपै तौंपनि प्रभू।
तुव भजिया विनु ईस, कटै कर्म की पासि नां॥ ४४॥

जैत्र शस्त्र को धार, कर्म निपातक तू प्रभू।
 जीव दया प्रतिपार, जैनी जैन प्रकास तू॥४५॥
 जैत लहैं जगजीव, तुव भजियां परमेसुरा।
 ज्योति रूप तू पीव, ज्योती सुर जोगीसुरा॥४६॥
 ज्योति लहैं तुव ध्याय, जगत ज्योति तू जोगिया।
 जोलजाल नहि राय, पार उतारै वेगि ही॥४७॥
 जोरावर अति मोह, पारै तौतैं आतिरौ।
 मेटै तू निरमोह, मोहतनीं जोरावरी॥४८॥
 जोम धरैं जगनाथ, हम लोगनि सौं कर्म ए।
 जोम चलै नहि नाथ, तो आगैं सर्व कर्म की॥४९॥
 जो है वेग जु नांम, एकाक्षर माला विषै।
 वेगि उतारौ रांम, भवसागर गंभीरतैं॥५०॥
 जो तेजस्वी नांम, तू तेजस्वी प्राक्रमी।
 जो जो कहिये रांम, सो सो तोहि फवै विरद॥५१॥
 जौ है जन कौ नांम, जन तेरे तू जनपती।
 तेरी कीरति रांम, जौन्ह सोइ औरै न कौ॥५२॥
 जंतुनि कौ रछिपाल, जंगम थावर नाथ तू।
 दया धर्म प्रतिपाल, जंतु तिरैं तुव भजन तैं॥५३॥
 जंघाचरण साध, जे अक्कास गमन जु करें।
 तोहि भजैं जु अब्बाध, तू अगाध परमात्मा॥५४॥
 जंबू आदिक दीप, लवणोदधि प्रमुखा जलधि।
 तू भासै अवनीप, सर्व दीप कौ नाथ तू॥५५॥
 जंबू फल नहि भक्ष, साधारण वर्जित सबै।
 थारहि तेरी पक्ष, ते न अभक्षा आदरैं॥५६॥

— दोहा —

जः कहिये सिद्धांत मैं, है जन कौ ही नांम।
 जन उधरैं भव जलधि तैं, तू तारक गुण धाम॥५७॥

अथ बारा मात्रा एक सवैया में ।

— सवैया — ३१ —

जगत कौ तारक तू जाग्रत सुरूप देव
जिननाथ जीति रूप वीतराग है सही ।
जुरे नाहि तो सौं कोऊ जूनीं तू न नीतन है,
जेलि तैं निकासै तू हि लोकनाथ है तू ही ।
जैन कौ प्रकासक तू ज्योति कौ निवास सदा
जौन्ह तेरी कीरति सी चंद मांहि है नहीं ।
जंगम सुधावर कौ एक रछिपाल तू ही,
जः प्रकास सर्वभास चिद्विलास है वही ॥ ५८ ॥

— दोहा —

तेरी जाग्रत चेतना, ज्ञान चेतना लच्छि ।
रमा भगौती शंकरी, दीलति है परतच्छि ॥ ५९ ॥
इति जकार संपूर्ण । आरौं झकार का व्याख्यान करै है ।

— श्लोक —

झषध्वज रिपुं धीरं, सर्व प्राणि हितं परं ।
सर्व मात्रामयं धीरं, वंदे देवेन्द्र वंदितं ॥ १ ॥

— दोहा —

झ कहिये भैरव प्रभू, तू भैरव कौ नाथ ।
शांत देव परतक्ष तू, कर्मदलन बडहाथ ॥ २ ॥
झ कहिये फुनि बंध कौं, तेरे बंध न कोय ।
झ कहिये घर्घर स्वरा, तू सुस्वर प्रभु होय ॥ ३ ॥
झलक झलक तेरी छवी, झलझलाट तू देव ।
झमझमाट करि सुरनरा, करहि नृत्य धरि सेव ॥ ४ ॥
झलमलाट बहिरंग ए, तोहि लहैं नहि नाथ ।
तू चैतन्य प्रकास है, अति विलास गुन साथ ॥ ५ ॥

झकझोल जु तैरै नहीं, तू अविवाद स्वरूप।
झरहर से तुष ग्राहका, लहै न तेरौ रूप॥६॥

— इन्द्र बज्रा छंद —

झषध्वजो नाम सुकाम पापी, करै जु पीरा अति ही सतापी।
तु ही जु देवा झषकेतु नासा, सुशील रूपी परम प्रकासा॥७॥
झषा कहाँवै प्रभु मीन जीवा, वसैं जु स्वांमी जल में सदीवा।
तु ही सर्वो की करुणा जु धारै, तु ही मुन्यों को भवसिंधु तारै॥८॥
झरै अमो नाथ तु ही सुमेधा, तो सौ तु ही देव कहा जु मेधा।
लावै झरा तू हि अखंड धारा, त्रिश्रा झला तू हि करै प्रहारा॥९॥
नहीं झलकै प्रभू तू कभू ही, भरा जु पूरा गुन का समूही।
झल स्वरूपा भ्रम भस्मकारी, निर्धूम देवा न लघू न भारी॥१०॥
करै हि मूढा झगरा जु झांटा, हिये जु मैला जिय में जु आंटा।
नहीं जु पावैं निज भक्ति तेरी, लहैं सु ते लोहि न भ्रांति नेरी॥११॥

— गाथा छंद —

झगरा तैरै नांही, तू द्वयवादी अनेकवादी है।
अति गुण तैरै मांही, सतिवादी स्यादवादी है॥१२॥
झालरि को झुणकारा, तैरै वाजैं अनेक वाजिवा।
झांझि मजौरा सारा, तू राया लोक को मित्रा॥१३॥
झांण सुगम्मा तू ही, तू ही झायार झांण रूपा।
झांणी णांण समूही, असरीरा तू अरूपा है॥१४॥
झाल जु त्रिश्रा रूपा, तो विनु सांता न होइ काहू तैं।
कर्म जुझार सुरूपा, दूरिदि नासैं जु साहू तैं॥१५॥
झिगति झिटति ए नामा, शीघ्र तेनें पंडिता जु भासैं ही।
वेगि उधारि सुरांमा, तुव भजियां पाप नासै ही॥१६॥
हम हि झिकाय मुनिंदा, पाय जु तेरी सु अमृतावांणी।
तो तै देव जिनिंदा, झीणी चरचा लखैं प्रांणी॥१७॥

झीणां तू अति पुष्टा, झीलि नहीं रावरी धरा मांही।
 तू अति उच्च सपष्टा, कर्दम करिमा कभि नांही ॥ १८ ॥
 झुणकारा अति ह्येवें, वाजें वाजा अनेक भांतिनि का।
 तुव भजि कलिमल खोवें, कर्म प्रहारी झुझारनि का ॥ १९ ॥
 झुकै जीव जो कोई, तेरी द्यां तीन लोक के नाथा।
 सकल कल्याण जु होई, सौई पावै जु तुव साथा ॥ २० ॥
 झुकै न तू अघ मांही, तो मांही धर्म देखिये अतुला।
 तू अधरम में नांही, नांही भाव धरै समला ॥ २१ ॥

— सवैया - ३१ —

झूठौ है इकंतवाद जामैं नांहि स्यादवाद,
 क्षणिक प्रवाद जाकौं बोध मत कहिये।
 झूठौ विपरीत महा जामैं जीव घात कहा,
 झूठौ संसैथाप जाकौं भूलि हू न गहिये।
 झूठौ नास्तीकवाक जाकौं कहैं चारवाक,
 झूठे कौल कापालिक करुणा न लहिये।
 झूठौ विनै मिथ्या जामैं पूजिये जु सवै देव,
 झूठौ है अग्यांन जातैं भ्रांति मांहि वहिये ॥ २२ ॥

— सोरठा —

झूठ समान न पाप, तैरै झूठी बात नां।
 झूठे पावैं ताप, भक्ति लहैं साचे नरा ॥ २३ ॥
 साच हु झूठ विसेस, जामैं जीव दया नहीं।
 करुणामई असेस, सत्यादिक भासैं तु ही ॥ २४ ॥
 झूठे सब ही देव, काल जीतिवे सक नही।
 तेरी करहि जु सेव, ते ही काल जीतैं प्रभू ॥ २५ ॥
 झूठे मिथ्या पंथ, तिन में तेरी भक्ति नहि।
 झूठे मिथ्या ग्रंथ, जिन में तुव चरचा नही ॥ २६ ॥

झूप त्यागि नर नाथ, वन उपवन गिरि सिर चसैं।
 करें राखरी साथ, हाथ करें निरन्तरे ते ॥ २७ ॥
 झूलै निज रस मांहि, स्वरस विहारी देव तू।
 सब छति है तुव पांहि, भव झेरा तैं काढि प्रभु ॥ २८ ॥
 सुरझेरा करि देव, उरझेरा हरि जग प्रभू।
 दै स्वांमी निज सेव, झेलि हमारी वीनती ॥ २९ ॥
 झेरा मैं रस नांहि, नीरस झेरा जग इहै।
 सब रस तैरे मांहि, निज गुन वेढि निकासि तू ॥ ३० ॥
 उरझै तो विनुजी, सुरझै तो करि जीव इह।
 वूझै तोकों पीव, तव आपौ जानै सही ॥ ३१ ॥
 झै मात्रा मैं तू हि, झोल झाल तैरे नहीं।
 झोक न गुन जु समूहि, जाग्रत रूप सदा तु ही ॥ ३२ ॥

— छंद मोती दाम —

नहीं कछु झोर न ही झकझोर, तु ही अति जोर है सब रोर।
 कहै प्रभु झोर पल्लम जु नाम, नहीं जु पल्लम तु ही अभिराम ॥ ३३ ॥
 नही कछु झौर तु ही अति दौर, है झकझौर तु ही जगमौर।
 तुझै तजि मूढि विषै सुख मांहि, रमैं नरकांपुर तात हि जांहि ॥ ३४ ॥
 करै सठ झंपहपात जु देव, तुझै तजि धारहि आन जु सेव।
 नहीं प्रभु झंझह पौन जहां जु, नहीं कछु सीत न घाम तहा जु ॥ ३५ ॥
 नहीं जलदान जहां तुव थान, नही वन ग्राम नही ससि भान।
 नहीं दिन रैन जहां अति चैन, न नीच न ऊच नही जहँ मैं ॥ ३६ ॥
 सबै तुव झिंडह मांहि दयाल, जु लोक अलोक अनंत विसाल।
 तु ही जु रसाल सबै जगभाल, करै जु निहाल तु ही इक लाल ॥ ३७ ॥

— दोहा —

झः कहिये सिद्धांत मैं, नष्ट वस्तु कौ नाम।
 नष्ट जेहि तोहि न भजैं, तू सपष्ट अभिराम ॥ ३८ ॥

अथ द्वादश मात्रा एक कवित्त में ।

— सर्वैया - ३१ —

झर लावै अमृत कौ जगत की जीवनि तू,
झाल माल नांहि लाल काल हर देव तू।
झिगति तू पार करै झीणी चरचा जु धरै,
झुकै नांहि झूठ मांहि अतुल अभेय तू।
झेरा तैं निकासै ईस झै विभास तू अधीस
झोलझाल नांहि तेरै, अचल अछेव तू।
झौरझार नांहि कोऊ झिंडा मांहि सर्व होऊ
झः करै जु राग दोष, देहु निज सेव तू॥ ३९॥

— दोहा —

नष्ट वस्तु कौ झः कहै, नष्ट करै रागादि।
ऐसी तेरी सेव दै, सरव गुननि की आदि॥ ४०॥
झगर समा झगरामई, भूति समा भवभूति।
तेरी दीलति सासती, सत्ता अतुल विभूति॥ ४१॥

इति झकार संपूर्ण। आरौ अकार का व्याख्यान करै हैं।

— श्लोक —

अकाराक्षर कर्त्तारं, सर्वज्ञं सर्वकामदं।
शिवं सनातनं शुद्धं, बुद्धं वंदे जगत्प्रियं॥ १॥

— छंद मोती दाम —

अकार सुअक्षर मूढ जु नांम, नहीं हम से सठ और जु रांम।
तुझै जु विसारि रचे भव मांहि, कछू सुधि आतम की प्रभु नांहि॥ २॥
अकार जु नांम विषै परसिद्ध, सुदंनि के रस मांहि जु गिद्ध।
लहै नहि भक्ति जु ते मतिहीन, विषै सम पाप न और जु लीन॥ ३॥

अकार जु नाम कहैं श्रुति मांहि, जु गावहि ता कउ संसय नांहि ।
 तु ही सब गावइ धर्म जु रीति, तु ही जु निवारइ पाप अनीति ॥ ४ ॥
 प्रभु सुर सप्त जु भासइ तूहि, तुझै प्रभु गांवहि देव समूहि ।
 नहीं कछु राग तु ही जु विराग, महा बडभाग, सदा अविभाग ॥ ५ ॥
 अकार जु नाम जु जर्जर वैन, तु ही मधु वैन सुकेवल नैन ।
 जपैं सुर जर्जर, वृद्ध महान, तथा सुर जर्जर क्रोध जुवान ॥ ६ ॥
 न क्रोध सुरूप न ही प्रभु वृद्ध, तु ही जु नवल्ल अचल्ल अगृद्ध ।
 महारस रूप सु अमृत वैन, सुनाय हमें प्रभु देहु सुवैन ॥ ७ ॥

— सवैया इकतीसा —

मूढता न तेरै, मांहि मूढ़ तोहि पावैं नहि,
 इन्द्रिनि के विषया न तोकीं कहूं पांवही ।
 विषई लहैं न तोहि, निर्विषै करे जु मोहि,
 ज्ञायक तू तत्व कौ सुनायक बतावहीं ।
 गावै तू सबै जु भेद जर्जरी न बोल तेरौ,
 मिष्ट इष्ट भासै तू जु मुनि जन ध्यांवही ।
 सर्वाक्षर मूरति तू क्यों अकार मैं न होय,
 सुर नर नाग खग एक तोहि गांवही ॥ ८ ॥

— दोहा —

निर्विषया शक्ती जिको, शिवाभवा शिवभूति ।
 मा पद्या जु रमा महा, सो दौलति विभूति ॥ ९ ॥

इति अकार संपूर्ण । इति श्री भक्तधक्षर मालिका अध्यात्म बार खड़ी
 नामध्येय उपासना तंत्रे सहस्र नाम एकाक्षरी नाममालाद्यनेक
 ग्रंथानुसारेण भगवद्धजनानंदाधिकारे आनंदोद्भव दौलति रामेन
 अल्पबुद्धिना उपायनी कृते ककारादि अकारांत दशाक्षर प्ररूपको
 नाम द्वितीय परिच्छेदः ॥ २ ॥ आगे टकार का व्याख्यान करै है ।

— श्लोक —

टकाराक्षर कर्त्तारि, चिच्चिमत्कार लक्षण।
वंदे देवाधिपं देवं, सर्वभूत हितं परं॥१॥

— दोहा —

टस्थो नहीं टरि है नहीं, टरै न कबहु देव।
अटल अचल अति विमल तू, दै स्वांमी निज सेव॥२॥
एक टकोरी धर्म कौ, तेरै वाजै नाथ।
तू धरमी धरमात्मा, धर्मनाथ गुण साथ॥३॥

— सर्वैया - ३१ —

टक बंधी वात जाकै, टकसाल शुद्ध जाकी,
टकटकी तोहि मांहि, सोई निज दास है।
टगी नांहि टची कोऊ, त्यागे राग दोष दोऊ,
टकेनि कौ त्यागी, बड़भागी सुखरास है।
टरै नां भगति तैं जु, डरै नां जगत तैं जु,
करै नांहि कामना जु तेरीई विलास है।
टगटगापुरी अर राम कौ कहावै राज,
तहां जायवे कौ चित्त जगत्तैं उदास है॥४॥
टल्ला नांहि लागै जाकौं, काल को कदापि नाथ,
पायो तुव साथ, जानैं परम प्रकास है।
जाके एक टल्लां ही सौं भागे मोह आदि सब,
पायो शुद्ध बुद्ध ज्ञान आत्म विकास है।
टटुमार लायकैं विभाव सब काढे जानैं
बाढे भवभाव निज भाव कौ विभास है।
तेरौ ले सरन औ मरन कौ स्वभाव डारि
राग दोष मोह टारि भायौ जू विलास है॥५॥

टण टण वाजें तेरे वाजे अति कोटि भेव
 जीति की जु टेव तेरी अतुल अछेव है।
 तेरे पुर मांहि नांहि सीत घांम कोई धांम
 टपका न परैं जहां रति कौ न भेव है।
 टपकै अमी अपार तेरे वैन सुनें सार
 त्रिश्ना कौ न नाम रहै स्व रस स्व बेव है।
 अनुभौ की कला तोतैं पाइए त्रिलोकनाथ,
 अनुभव कौ दावक तू देव एक एव हैं ॥ ६ ॥

टहल तिहारी मोहि देहु जू महल केरी
 टहल्यो अनादि कौ सु मूलि मोमें ताब नां।
 तिहारी टहल पाय हौंहगौ जु निरखेद
 रावरी टहल विनु मोमें कछु आब नां।
 टारयो नांहि टरुं स्वांमी अब तौ उधारि मोहि
 टारटूरी, करी जि न राख्यो पासि आब नां।
 नांहि कछु चाहि मेरै, तोकनां न मांगू और,
 एक निजभाव दै विभावनि कौं दाब नां ॥ ७ ॥

टांडौ लादैं ऊरध कौं भरि जु अनंत भाव,
 तेई पुरि तेरे राव आंचैं अति चैन तैं।
 टांगरौ सबै जु त्यागि अनुभौ कै पंथ लागि,
 तो सौं अनुरागि मुनि देखैं दिव्य नैन तैं।
 टाक हैं सिधंत मांहि भूमि कौ जु नाम ईस,
 ज्ञान की धरा अधीस पेखैं तुव वैन तैं।
 टावर औ रावर सबै जु त्यागि वडभाग
 तेरे ई प्रसाद साध जीतैं मन मेंन तैं ॥ ८ ॥

— छंद वेसरी —

टामटूम सब त्यागि मुनीशा, रहैं तो मई ऋषि अवनीसा।
 टापू सम ए लोक अलोका, तेरे ज्ञान सिंधु में थोका ॥ ९ ॥

निज मूर्ति विनु टांकी टांची, ज्ञानानंद स्वरूप जु सांची।
 पुरषाकार निराकारा जो, अधटित घाट निराधारा जो ॥ १० ॥
 ताके पायवे हि भवि जीवा, मूर्ति टांची घडित सदीवा।
 पूजे तेरी सूत्र प्रधाने, कर्तृम और अकर्तृम मानें ॥ ११ ॥
 टांच टींच देवल की दासा, सौ संवे करि भगति प्रकासा।
 पूजा दांन गृहस्थ जु धरमा, मुनि के दरसन मात्र हि परमा ॥ १२ ॥
 त्यागि टापरा पाप जु भारा, हस्ती स्यंदन पाय कटारा।
 टांक मात्र परिग्रह नहिं राखें, मुनि तोकों लखि अमृत चाखें ॥ १३ ॥
 टाटी मोह जु माया रूपा, दरसन कौं आडी जु विरूपा।
 तोरै एकहि टल्ला सेती, त्यागें जड परणति हैं जेती ॥ १४ ॥
 टिकैं निजातम भावनि मांही, तेरे दास जु संसय नांही।
 बिना टिकानी सकट न चालें, भगति विनां व्रत ज्ञान न पालें ॥ १५ ॥
 टिक्यो न हूं कवहु तन मांही, ए तन यों ही उपजैं जांही।
 टिकौं अनंतानंत जु काला, कवहु टरौं नहि होइ अकाला ॥ १६ ॥
 टिक्यो रहूं अनुभव रस मांही, इहै भगति फल संसैं नांही।
 टिकैं न तोपैं कर्म अनंता, हमसौं टिरे टारि भगवंता ॥ १७ ॥
 टीपटाप जग की सहु झूठी, इनतैं मुनि की वृत्ति अपूठी।
 टीपटाप विनु तू अति सोहै, देव दिगंबर जन मन मोहै ॥ १८ ॥
 टीकौं त्रिभुवन कौं जु ललाटा, तैर सोहै तू अति ठाटा।
 टीकायत सब मांहैं तू ही, नई नई टीपै न समूही ॥ १९ ॥
 टीपै द्वय नय एक स्वरूपा, श्रुति अनादि रूपी हि निरूपा।
 नहीं टिपिवौ नौतन तैर, नित्यानित्य कथन तू प्रेरै ॥ २० ॥
 टीप करावैं टींच सुधारैं, तुव मंदिर की तेजस धारैं।
 जीरण मंदिर मरमति जेई, करवावैं ते अतिसुख लेई ॥ २१ ॥
 नौतम मंदिर रचैं तिहारा, प्रतिमा पधरावैं गुनभारा।
 उपकरणा मंदिर में स्वांमी, जेहि चढावैं हाँहि सुधामी ॥ २२ ॥

टीसि न तैरे रीसि न कोई, टींढि करम की टारै सोई।
 रूखा टूकरा पाय मनिंदा, करै रावरौ ध्यान जिनंदा ॥ २३ ॥
 है टुटेक जीवन जयराया, टुक सी लोकनि की इह माया।
 तामैं राचि विसार्यौ तोकाँ, तातैं धृक्क धृक्क है मोकाँ ॥ २४ ॥
 टूटपूज्यो इह जीव गुसाई, पूंजी दावी करमनि साई।
 तू हि बतावै पूंजी देवा, हरै रोर अति घोर अछेवा ॥ २५ ॥
 टूटि गये भ्रम भाव सबै ही, दासनि तैं मद मोह दवै ही।
 दास कसौ और न कछु जाचैं, त्यागि कल्पना तोसौं राचैं ॥ २६ ॥

— छंद त्रिभंगी —

टूका ले रूखा, किस हि न दूखा, प्यास जु भूखा जीति प्रभू।
 करि टूक जु टूका मोह धुरूका, सबद गुरू का धारि विभू ॥
 तजि टूम जु टामा, क्रोध जु कामा गृह धन धामा, तोहि भजैं।
 तेई शिव पावैं, कर्म नसावैं, आतम भावैं, भ्रमण तजैं ॥ २७ ॥
 नहि टेक जु देवा, तू अति देवा, करहि जु सेवा, भव्यजना।
 तेरी इह देवा, सब सुख देवा, एक जु एवा गुन जु घना ॥
 बातैं नहि टेढी, तू गुन सेढी, पदमा वेढी, इक तोसौं।
 टेढे मद मोहा, राग जु दोहा, करहि जु प्रोहा, प्रभू मोसौं ॥ २८ ॥

— सोरठा —

माख्यो टेरि जु टेरि, टांग्यो इनि अति दुख दियौ।
 कूँकाँ टेरि जु टेरि, राव हमारौ न्याव करि ॥ २९ ॥
 एक टेव की तू हि, और टेव की नाहि को।
 रागादिक जु समूहि, टेढे तैं सूधे किये ॥ ३० ॥
 टैंगी तैरे नाहि, टैणि उतारै मोह की।
 स्वांमी तैरे मांहि, गुन अनंत अति शक्ति है ॥ ३१ ॥
 दो कहिये श्रुति मांहि, नांव महेश्वर देव की।
 और सु दूजौ नाहि, एक महेश्वर तू सही ॥ ३२ ॥

टोटौ पर्यौ अनंत, मोटौ करि टोटौ हरे।
 खोटौ मोह इकंत, पूंजी दावी कुमति दे॥ ३३ ॥
 तू चिद पूंजी देय, टोटौ हरि जु अनादि कौ।
 तोकों भवि जन सेय, अविनासी धनपति भया॥ ३४ ॥
 टोक टाक नहि कोइ, तू स्वांमी सब लोक कौ।
 तोतैं सब सुख होय, दुखहर भयहर भ्रांतिहर॥ ३५ ॥
 प्रभू टौंकरै वैठि, गिर कै मुनि तोकों भजैं।
 रहैं जु तोमें पैठि, तिन कौ काल ग्रसै नही॥ ३६ ॥
 जगत टौंकरै तू हि, वैठौ दीनदयाल जी।
 तोमें गुन जु समूहि, तू जगजीवन जगपती॥ ३७ ॥
 टं किरौठ कौ नाम, तूहि मुकट सब लोक कौ।
 टंकी घड्यो न राम, अघटित घाट अनूप तू॥ ३८ ॥

— इंद्रबज्रा छंद —

टंकोतकीरणैक सुजायको तू, टंटा न पावैं जगनायको तू।
 टंकार होवैं अतिशब्द तैरे, वादित्र वाजैं अतिभूति नैरें॥ ३९ ॥
 पंथा कुपंथा प्रभु टंट वंटा, तामैं परैं नाथ लगैं जु कंटा।
 तोकों न पावैं कुपंथें चलंता, तोकों न भावैं पर कौं छलंता॥ ४० ॥

— दोहा —

टः कहिये सिद्धांत मैं, शून्य तनों है नाम।
 तू रागादिक शून्य है, गुन पूरण अति धाम॥ ४१ ॥

अथ बारा मात्रा एक सवैया मैं ।

— सवैया ३१ —

टैं नांहि टारे कभी, तोही मैं टिके जु साध,
 टीकायत लोक कौ, तुही अबाध रूप है।
 टुक सी विभूति पाय, महामद धरैं राय,
 तैं नांहि मान तू त्रिलोक मैं अनूप है।

टूकटूक करि डारैं, सकल विभाव दास,
 टेक तजि टैंगी तजि तिरेँ भव कूप है।
 टोली नां अभावनि की, वैठो लोक टोंकरै जु,
 टंकवतकीरण तू, टः प्रकास भूप है ॥ ४२ ॥

— दोहा —

टग नहि तेरे और को, ज्ञान रूप टग सोय।
 सोई कमला लच्छमी, संपति दौलति होय ॥ ४३ ॥

इति टकार संपूर्ण। आगेँ ठकार का व्याख्यान करै है।

— श्लोक —

ठकाराक्षर कर्तारं, दातारं धर्म शुक्लयोः।
 नेतारं मोक्षमार्गस्य, वंदे तत्पद लब्धये ॥ १ ॥

— दोहा —

ठयो न काहु काल जो, नित्य निरंजन देव।
 ठटै ठाट निज भाव कौ, सो अनंत अति भेव ॥ २ ॥

ठई प्रतीति मुनीनि कौं, मुनि ध्यावैं सक नांहि।
 ठई न काहु की करी, तुव महिमा जगमांहि ॥ ३ ॥

ठग मोहादि अनंत है, तिन हि ठगैं मुनिराय।
 ते तेरे पुर चैन सौं, आवैं भ्रांति गुमाय ॥ ४ ॥

तुव भक्ती विनु ए ठगा, ठगे जांहि नहि नाथ।
 तू ठगहर, दुखहर प्रभू, दीनानाथ अनाथ ॥ ५ ॥

ठग विद्या सब त्यागि कै, निह प्रपंच हैं कोय।
 सोई तोकाँ पावई, दास अवंचक होय ॥ ६ ॥

मोहि ठग्यो मोहादिकनि, डारि ठगोरी सीस।
 इहे ठगोरी भ्रांति है, टारौ जगत अधीस ॥ ७ ॥

ठट्टनि कौ नायक तुही, अति ठट तैरै पासि।
 ठाकुर मोहि उधारि तू, आपौ आप प्रकासि॥८॥
 ठाकुर तू इक और नां, तुव ठकुराई साच।
 चिंतामणि जगमणि तु ही, और जु जैसे काच॥९॥
 कहवति के ठाकुर घनें, ते झूठे अवनीस।
 काल जीतिवे सक नही, कायर कुमति अधीस॥१०॥
 ठाकुर तू जगजीत है, काल जीति अति सूर।
 चाकर तेरे सुरनरा, तू ठाकुर भरपूर॥११॥
 ठालिष तैरै नाहि हैं, ठाट अनंत जु नाथ।
 गुण पर्याय विहार तू, धरें अनंत जु साध॥१२॥
 तू ठालौ जुं ठसाक है, राज न काज न कोय।
 साथ दूसरी नाहि को, एकल भड़ तू होय॥१३॥
 ठाढ़े आसन धारि कै, परम समाधि स्वरूप।
 ते मुनि तोहि जु ध्यांवही, तू मुनि तारक भूप॥१४॥

— सर्वैया-२३ —

ठाहरि जेहि रहैं तुव मांहि, नहीं जिनकै भवभाव मुनीसा।
 ध्यान करैं न कछु पर आन सुजांन महामति के अवनीसा।
 तेरहि ध्यान विनां नहि ज्ञान, नही निरवानं तुही सुगुनीसा।
 तू जगजीवन है जगनाथ जिनिंद मुनिंद सु ईस अनीसा॥१५॥
 नाहि ठिगा न ठिगी तुव मांहि, ठिगै न किसै प्रभु तू हि अवंचा।
 तू अविनासि ठिकाणु सदा निज दासनि कौ प्रभु देहि अरंचा।
 नहि ठिलै प्रभु ठेलिउ तू हि, मिलै नहि तो महि नाथ प्रपंचा।
 तो विनु ए ठिणकै जगजीव, परे वसि कर्मनिकै धरि पंचा॥१६॥
 ठीक जु बात कहैं गुरदेव सुमुख ते नर तोहि न गावै।
 पंडित तोहि भजैं गुनवानं लहैं निज ज्ञान सु जे तुहि ध्यावै।
 ठींगड ले तुव भक्ति तनों अति कूकर कर्मनिकों जु नसावै।
 ते ठुकराय सबै जडभाव अनंत प्रभाव महापुर पावै॥१७॥

— चौपड़ी —

ठुकराई तेरी अति जोर, जामैं एक न दीसैं चोर।
 तुव ठुकराई देख्यां देव, सब चाकर दीखैं अति भेव ॥ १८ ॥
 ठूठ समान वहिरमुख जीव, तोहि भजैं नहि राचि अजीव।
 ठूठ समाना मुनि भी कहे ध्यानारूढ स्वभावैं लहे ॥ १९ ॥
 इहै ठूठता करि हरि देव, वहै ठूठता हरि जु अच्छेव।
 करण हरण कौ विरद जु एह, अब हरि अपनी भक्ति हि देह ॥ २० ॥
 ठूणौ देय मोह नैं मोहि, लूटयो अति भाषौ कह तोहि।
 इह ठूणों दीयौ जगराय, क्यों धारी तैं माया काय ॥ २१ ॥
 ठेठि गुणाढ्य महाप्रभु तूहि, दाय राय गुन माल समूहि।
 तो सम ठेठर और न कोय, प्रभू ठेठि कौ ठाकुर होय ॥ २२ ॥
 ठेल्यो ठिलै न तू वरबीर, टेघी जग की तू अतिधीर।
 ठेक लगै नहि कबहु नाथ, भगति नाव में मुनिजन साथ ॥ २३ ॥
 तो सम खेवट और न कोय, भव जल पार करै भवि सोय।
 ठै ठै वाजे वाजै देव, तैरै कोटि असंखि अछेव ॥ २४ ॥
 ठोकर एकहि सौं भ्रम कोट, छाहे तैं राखी नहि वोट।
 ठोक ठाक करि काढे कर्म, तैं दासा तारे विनु भर्म ॥ २५ ॥
 ठोठी वहिरातम जे जीव, तोहि लहैं नहि तू जगपीव।
 विना ब्रह्म बिद्या नहि कोइ, पावै तोहि जु निश्चै होय ॥ २६ ॥
 ठौर धैर तू ही जु स्वभाव, ठौर देय तू ही जगराव।
 ठौर पछारे तैं हि विभाव, तेरी ठौर न कालठ पाव ॥ २७ ॥
 ठौहर देहु हमैं भगवान, मति भरमावैं परम सुजान।
 ठंढि न उश्न न वरखा रती, काल न जाल देहु सो गती ॥ २८ ॥
 ठंठ जीव परिणाम कठोर, ते नहि पावैं तोहि अरोर।
 ठः कहिये अति धन कौ नाम, तू अति धनदायक गुन धाम ॥ २९ ॥

ठः कहिये ससि मंडल नां, त्रिभुवन चंद तु ही निज धां ।
धिरचर मांहि तिहारी तुल्य, और न दूजौ आप अतुल्य ॥ ३० ॥

अथ बारा मात्रा एक कवित्त मैं ।

— सर्वैया ३१ —

ठट्ट कौ धनी अनादि, ठाकुर तु ही जु आदि,
ठिलै नांहि ठेल्यौ तात, ठीक वात भासई ।
ठुकराई भरयो सदा, ठूंणीं नांहि देत कदा,
ठेठि कौ दयाल देव दया कौं प्रकासई ।
ठै ठै वाजे वाजै नाथ, ठोकि काढे कर्म साध,
ठौर दी सुसाधनि कौं पापनि कौ नासई ।
ठंढि नांहि उश्र कोऊ ठः प्रकास आप होऊ,
परम पुनीत देव दूरि नांहि पासई ॥ ३१ ॥

— दोहा —

ठकुराई तेरी महा, सत्ता परणति सोय ।
देवि भवानी लच्छिमी, सोई दौलति होय ॥ ३२ ॥

इति ठकार संपूर्ण । आगैं डकार का व्याख्यान करै है ।

— श्लोक —

डकाराक्षर कर्त्तरि, सर्व प्राणि हितं करं ।
वंदे लोकाधिपं देवं, सर्व मात्रा प्रकाशकं ॥ १ ॥

— दोहा —

डकारांक आगम विषै, शंकर कौ है नाम ।
और न शंकर दूसरौ, तू शंकर गुन धाम ॥ २ ॥
डकारांक फुनि लोक मैं, ध्वनि कौ नाम प्रसिद्ध ।
और न ध्वनि दूजी प्रभू, ध्वनि तेरी गुणवृद्ध ॥ ३ ॥

डक्का हू कौ नाम है, डकारांक जग मांहि।
 डक्का तेरी जगत मैं, और जु डक्का नांहि॥४॥
 तैं डकार परगट कियो, तैरैं नांहि डकार।
 डरहर निडर अनादि तू, तोमैं नांहि विकार॥५॥
 डग हू चलै नहि स्वस्थ तूं, सर्व विहारी देव।
 डक नहि तू जु अडंकिता, दै दयाल निज सेव॥६॥
 डरैं न काल कराल तैं, तेरे दास नचिंत।
 कौन कमी जिन कै प्रभू, पायो तो सभ मित॥७॥

— वसंत तिलका छंद —

माया गिनी अघ सनी भवि नैं जु कैसी,
 मांटी डला जुतमला अति निंद्य तैसी।
 डारैं सबै हि परपंच सुभक्ति धारैं,
 तारैं प्रभू अपनपौ भव भोग डारै॥८॥
 कालोहि कालभुजंगो न डसै जु ताकौं,
 पीवैं पियूष प्रभू नाम स्वरूप जाकौं।
 डाक्का परैं न जम किंकर कौ तिनौ कौं,
 चालै न मंत्र रति डाकनि कौं जिनो कौ॥९॥
 नांही डरैं जु डरतैं न हि दास डहकैं,
 तोकौं जु ध्याय मुनिराय कभी न वहकैं।
 जीवा परे जु जमा डाढ़ महैं प्रभू जी,
 तेई बचैं जु नहि तोहि तजैं कभू जी॥१०॥
 नाथा जु चित्त इह डाकत ही फिरै जी,
 मोपैं कभी जु इह चित्त नहीं धरै जी।
 तैरे विहार नहि सब लखै जु देवा,
 रोकैं मनां मुनि तिके हि धरैं जु सेवा॥११॥

डांवां जु डल इह चित न तोहि ध्यावै,
 तोकाँ विसारि भव में भ्रम काँ उपावै।
 जे हौंहि डाभ सम तीक्ष्ण बुद्धि धारा,
 ते याहि रोकि तुव भक्ति धरै अपारा॥१२॥

डाकैत चित सम और न कोइ होई,
 तेई जु दास मन रोकही धीर होई।
 तु ही जु सिंधु प्रभु डावर और देवा,
 सोसै न तोहि रवि काल तु ही अछेवा॥१३॥

डाबा समांन इह लोक तु ही जु रत्ना,
 तूई करै जु जगजीवन जीव यत्ना।
 डारे विभाव जडभाव अशुद्ध रूपा,
 तेई भजै सुमन लाय गुण स्वरूपा॥१४॥

— सोरठा —

देह सनेह न कोई, तजे डावरा डावरी।
 तन मन तोमय होय, तेई दास महा सुधी॥१५॥
 डिढता धरि मन मांहि, डिगाडिगी सब त्यागि कै।
 तोहि भजै सक नांहि, ते निज दास प्रसिद्ध हैं॥१६॥
 डिगरें नांहि कदापि, तेरी सेवा सौ प्रभू।
 तन मन तो महि थापि, भजन करै भौ जल तिरैं॥१७॥
 डिम डिम वाजैं नाथ, तेरै बहु वाजा प्रभू।
 लागे मुनिजन साथ, तिरैं तेहि भव सिंधुतैं॥१८॥
 डिगरि गये जु विभाव, दासनि सौ लरिवे न सक।
 तेरौ अतुल प्रभाव, तू डीलां अति पुष्ट है॥१९॥
 डीठि न लागै तोहि, अति सुंदर अवनीष तू।
 सब मूठी में होहि, तेरी डीठि सबौं परैं॥२०॥

डील अनंत स्वभाव, गुन पर्याय जु रावै।
 तू अलंतबल रान, भव विभाव धरै नहीं ॥ २१ ॥
 भई डुकरिया नाहि, काल अनंत जु वीतिया।
 नित्य नई घट मांहि, वैठी त्रिशा हरि प्रभू ॥ २२ ॥
 डुलि डुलि चहुं गति मांहि, दुखी भयो अति जीव इह।
 तू तारै सक नाहि, भव तारक जगदीस तू ॥ २३ ॥
 डूव्यो जीव अनादि, तेरो भगति विना प्रभू।
 धरे जनम बहु वादि, अव उधारि किरपा करे ॥ २४ ॥
 डूंगरपति गिर मेर, सो तो सम निश्चल नहीं।
 तू मरजादा मेर, पूरण परमानंद तू ॥ २५ ॥
 डूडूगर अति मोह, जातैं हारे सुरनरा।
 करै प्रभू अति द्रोह, इह द्रोही संसार कौ ॥ २६ ॥
 तुझ दासनि पै नाथ, डूडू मैं हास्यो इहै।
 तू अनंतगुण साथ, वीतराग निरमोह तू ॥ २७ ॥
 डूम ह्वै रहे देव, तेरे सुर नर मुनिवरा।
 कहै विरद अतिभेव, तू अछेव गुनसिंधु है ॥ २८ ॥
 डेडर सम हौं ईस, कहा कहि सकौं तुव गुना।
 तू गुनसिंधु अधीस, जगदीस्वर अवनीस तू ॥ २९ ॥
 डेढ दिवस कौ आय, तुच्छ मात्र माया इहै।
 तामहि भूले राय, जीव न ध्यावैं तोहि जी ॥ ३० ॥
 डेरा इह तन होय, काचौ जीवनि कौ प्रभू।
 तामैं राचे लोय, महाभाग ध्यावैं तुझैं ॥ ३१ ॥

— अरिल छंद —

डैरु वाजैं नाहि भयंकर शब्द नां,
 वाजे वाजैं अतुल, तुल्यता अब्द नां।

नित्य नवल जगदीस, तू ही जग डोकरा,
सब मैं जूनों तू हि सबै तुव छोकरा ॥ ३२ ॥

डोड काग सम जीव जे न तोकों भजैं,
महाभाग ते नाथ तोहि भजि जग तजैं।
डोल्हा मूरिख जीव जगत में राचिया,
तोहि न ध्यावैं नाथ विषे में माचिया ॥ ३३ ॥

डोबा सब पाखंड एक तारक तुही,
डोरि तिहारी मांहि सम्यकी हैं सही।
डोल चरम कौ निंद्य निंद्य डोहा कह्यो,
दास भखैं न अभक्ष वचन तुव सरदह्यो ॥ ३४ ॥

डोरि तिहारैं नांहि, तुम जु बंधन विना,
डोरि मांहि सब लोक, डोरि विनु तू जिना।
डोरि तजैं भवि जीव, तेहि पावैं तुझैं,
डंड हरण तू देव, तारि भय तैं मुझैं ॥ ३५ ॥

डंडे जीव अपार मोह नैं कुमति दे,
तू द्यावैं निज माल, जीव कौं सुमति दे।
तू नहि डिंभ अदंभ डिंभ बालक प्रभू,
तेरे बालक सर्व तू हि पुरिखा प्रभू ॥ ३६ ॥

हैं डंडौत जु जोग्य तू ही जगदीस है,
कै तुव वांनि प्रवांनि मुनीस अधीस है।
और न जग मैं कोय, डंडवत जोग्य है,
डंक न तैरे कोय तू ही जु असोग्य है ॥ ३७ ॥

डंस मंस इत्यादि, जीव रच्छिपाल तू,
डंकित कवहु न होय अडंक दयाल तू।
डंड तीन हीं डारि तो मई है रहै,
वह जन तोकों लहै और को नां लहै ॥ ३८ ॥

— दोहा —

डः कहिये मात्रांतिकी, तू सब मात्रा मांहि ।
तेरी सी मात्रा प्रभू, तीन लोक में नांहि ॥ ३९ ॥

अथ द्वादश मात्रा एक कवित्त में ।

— सवैया ३९ —

डर नांहि तैरे कोऊ डारे रागदोष दोऊ,
डिगै न कभी नाथ डीलां अति पुष्ट है ।
डुल्यो नांहि डुलै नांहि, डूंगर तै अति ऊंच
डैरे ज्ञान मांहि तेरी देखूँ तू हि इष्ट है ॥
डैरु नांहि वाजै तैरे वाजे वाजै जू असंखि,
डोरि मांहि लोक सब तो सौ तू हि सिष्ट है ।
डौरि नांहि तैरे कोऊ डौरि हरे डौरिनि की
डंडवत जोग्य तू ही डः प्रकास तुष्ट है ॥ ४० ॥

— दोहा —

डलाजु माटी कौ जिसौ, तेसी भव की भूति ।
तेरी लक्ष्मी सास्वती, सो दौलति विभूति ॥ ४१ ॥

इति डकार संपूर्ण । आगे ढकार का व्याख्यान करै है ।

— श्लोक —

ढकाराक्षर कर्तारं, ज्ञान रूपं जगद्गुरुं ।
लोकालोक प्रज्ञातारं, देवं देवाधिपं विभुं ॥ १ ॥

— अग्ल छंद —

ढ कहिये श्रुति मांहि मूढ़ का नाम है,
ते नर मूढ़ अयांन भजै नहि राम है ।
ढ कहिये ध्वनि नाम ध्वनि जु तेरी सही,
तेरी धुनि सुनि पाप नास हैं सकल ही ॥ २ ॥

ढैर भव्य की वोर अभव्यनि परि नही,
 ढव तेरी ही साच और ढव झूठ ही।
 ढलक्यो नहि इह चित्त रावरी भर्गति में,
 तारैं रूलियौ देव अनंती अगति में ॥३॥

ढकै दोष जो कोय पराये धर्मधी,
 सो पावै तुव भक्ति, त्यागि सहु भर्मधी।
 ढाल जगत की तू हि दया कौ पूज है,
 परम पुनीत क्रिपाल गुनैनि कौ कुंज है ॥४॥

ढाक पत्र सम चंद सूर तो देखतां,
 रंक सबै नर देव नाथ तो पेखतां।
 ढादिस बांधि मुनिंद, पंथ तेरो गहैं,
 ढादिसीक विनु देव दासभाव न लहैं ॥५॥

ढाण चूक ए जीव भक्ति ढाण न लहैं,
 तू हि बतावै ढाण तोहि मुनि जन चहैं।
 ढाहे तैं प्रभु कोट अविद्या के सबै,
 भाजि गये सब कर्म भर्म भै करि तवै ॥६॥

ढाहैगौ प्रभु तूहि हमारे बंधनां,
 तैर सपरस नाहि नही रस गंध नां।
 ढाहा तोड कहै जु नदी आसातणीं,
 तु ही उतारै पार और कोई न धणीं ॥७॥

ढाह्यो ढहै न मोह तो विना नाथजी,
 ढांप्यो ढपै न तू हि महा गुणसाथ जी।
 ढारयो ढैर जु नाहि, आप ही तू ढैर,
 भव थिति आवै नीड आपनों जब करै ॥८॥

ढिग ही रहै जु नाथ मूढ जानैं नही,
 ढीले आतम काज करन कौं सठ सही।

दींचादींच मचाय भूलि भौ मैं परे,
तोहि न ध्यावैं नाथ पाप कर्मनि भरे ॥ ९ ॥

— सवैया - ३१ —

दीम सम गनैं लच्छि दीव की न करै पच्छि,
नारी कौं अलीन सम जानि त्यागै जब ही।
दुकै मुनि मारग मैं दुकै महावत्तनि मैं,
दुकिवौ स्वभावनि मैं लहै मोख तब ही।
दुकनि न होय जाकी विषै के प्रचार मांहि,
दुकि दुकि चारित मैं छंडै पाप सब ही।
दुलि दुलि साधुनि मैं, दुखिगौ मिथ्या मांहि,
तवै जगफंद छुटै और नाहि दब ही ॥ १० ॥

अथ जीव संबोधन —

दूकडौ जु आवै काल सवै तजि जगजाल
प्रणव पुनीत मांहि द्रिष्टि धरि बावरे।
दूँद कहा माया कौं जु दूँद एक चेतन कौं,
चेतन मैं लीन होऊ त्यागि सब चाव रे।
दूँद तू विषै जु मांहि यामै कछू सिद्धि नाहि
दूँदयो नाहि, पावै कहूँ आप ही मैं दाव रे।
दूँदयो तू सवै जु लोक पायो नाहि सुख थोक,
अवै जगदीस भजि समझि उपाव रे ॥ ११ ॥
दूँद दूँद विषै कौं जु पाए तैं अनंत खेद,
अब निज लीन होऊँ वहै भति डावरे।
दूँदिवौ उपाय तोकौं सिद्ध लोक जायवे कौं
शुद्ध रूप तू ही सब तजि उरझावरे।
दूकडी लवधिकाल, पाय प्रभू जी कौं ध्याय
समकित रूप होय निज रस लावरे।

ढेठि तजि जीव की सुढेठौ तू अनादि ही कौ,
 ढेठि विनु त्यागें भया पावै नाहि भाव रे ॥ १२ ॥
 ढेढ घर सम देह भयो दुसगंध सौं जु
 हाड मांस चाम रोम कुथिति कौ पुंज है ।
 उदधि के जलसौं पखालें तऊ शुद्ध नाहि,
 असुचि कौ सागर जो पापनि कौ कुंज है ।
 ब्रह्म होय ढेढ सौं मिलाप राखै कौन बात
 छुयें पाप लागै जाकीं दोषनि कौ भुंज है ।
 तू ती सठ ब्रह्म भया ढेढनि सौं हित राखै
 इहै नाहि ब्रह्मता सुमारै कहा गुंज है ॥ १३ ॥

— सोरठा —

है इह अष्टम मात्रा, सब मात्रा मैं देव ।
 जो ताकीं ध्याय सुपात्र, तातैं भव भरमण मिटै ॥ १४ ॥

— सर्वथा - ३१ —

ढोर होय रह्यो कहा नैंक ती विचार करि
 ढोलि मिथ्या मद कौं जु वावरी तड़ै कियो ।
 ज्ञान को वजाय ढोल निज पर बल तोलि
 भगति मति लहि गाढौ करि कै हियाँ ।
 करमनि कौ वंस खोय निज रस अंस जोय,
 बांधि सब गगदिक कष्ट वन ही दियो ।
 ढोकि ढोकि प्रभु जी कौं ढोरी लाव जिन ही सौं
 ढोक दै जु वारंवार बांछै जो प्रभू लियो ॥ १५ ॥
 ढोकि परमेश्वर कौं ढोरी लाव साधुनि सौं,
 ढोरी लाव दांन सील जप तप व्रत सौं ।
 ढोलै जिन दया रस भरि ज्ञान सीसे मांहि
 ढोरता जु छांडि सब रुखौ है अब्रत सौं ।

ढोल खोसि मोह कौ जु पकरि मरोरि
 बांधि निज रस छाकि, भया पूठि दै अकृत सौं ।
 ढोकै मति मिथ्या देव मिथ्या गुरु की न सेव
 धरि जति न भेज चूकै मति छत खै ॥ १६ ॥
 ढोटा नाहि काहू कौ जू तू जु है अनादि सिद्ध,
 साईं ही की जाति तू जु और नाहि भाव है ।
 साईं कौ जु भूल्या डोर बांधे नाहि इंद्रि चोर,
 हूवा तेरा भोर भया चूका तूहि दाव है ।
 अवै साईं यदि करि साईं ही का ध्यान धरि
 साईं ही बतावै तोहि छूटि का उपाव है ।
 ढोटा नाहि काहू कौ हू ढोटा सब वाही के जु
 वाकौं छाडि बावरे, करैगौ कहा चाव है ॥ १७ ॥
 ढोहे तैं अनंत ढंग ढंग तेरौ बंध्यो नाहि
 अब सब त्यागि भया लेहु जिन सरनौं ।
 दौरी मांहि आय जाहु दौरी तजि लोकनि की,
 तखै ढोल पावै तू जु और नाहि करनौं ।
 दौरी लै जु साधुनि की, ढीठि सब परी मेलि
 झूठी ढेठि करै कहा आखरी तौ मरनौं ।
 ढंग तौ विगारि गयो ढंढ सौं जु होय रह्यो
 जगत में राचि भया करै कहा भरनौं ॥ १८ ॥
 ढंपै मति औगुन कौं गुरु कै निकट जाय
 सबै निज दोष भासि आलोचन करि रे ।
 ढंपि पर दोषनि कौं पर दोष जिन भासै
 गुन ग्राही होहु भया कथनी तू हरि रे ।
 कथनी करै तौ एक हरि ही की करि सदा
 हरि ही कौं जपि अर हरि ही सौं अरि रे ।
 एक जिन नाम विनु आन जिन भासै भया
 मानी होय अंदर में जिन हीं कौं धरि रे ॥ १९ ॥

ढंग तू पकरि भया ढंढ मति होय रहै
 ढींचा ढीची तजि कै विमोह ही सों लरि रे।
 सवै तू उपाधि तजि, एक प्रभु ही कौं भजि,
 मुनि मतमांहि रजि प्रभु पाय परि रे।
 ढंढता विनसि जाय ढंग तेरौ बंधि जाय,
 पावै मोख द्वार भवसागर कौं तिरि रे।
 देह तौ तजी अनंत दोय कौ न कीयौ अंत
 अब औसी करि पंच देहनि सों मरि रे॥२०॥

— दोहा —

ढः कहिये मात्रांतिकी, तू सब मात्रा मांहि।
 तेरी सी मात्रा प्रभु, तीन लोक में नांहि॥२१॥

अक्ष जरा मात्रा एक सवैया में ।

— सवैया ३१ —

ढरै नांहि ढारयो कभी ढिग ही रहै सदीव
 ढील नांहि जाकै कभी पारकर देव हैं।
 ढुकै मुनि मारग में तवै नाथ आवै हाथ
 ढूढयो नांहि पाइए जु तारकै अछेव है।
 ढेठि नांहि जाकै कोऊ ढेठि हरै ढेठिनि की
 ढै प्रकास ढोक ताहि नाथ अति भेव है।
 ढौरी लावै साधुनि कौं ढंढ नांहि पावै जाहि,
 ढः प्रभास शुद्ध भास गुण तैं अभेव है॥२२॥

— दोहा —

हरै ढंढता नादि की, पूरण तेरी ज्योति।
 सो विभूति धन संपदा, संपति दौलति होति॥२३॥

इति श्री ढकार संपूर्ण । आगै णकार का व्याख्यान करै है ।

— श्लोक —

णकाराक्षर धातारं, ज्ञानिनं परमोदयं।
सानंदं परमानंदं, वंदे सर्वेश्वरं गुरुं ॥ १ ॥

— सोरठा —

ण कहिये श्रुति मांहि, ज्ञान नांव परगट प्रभू।
तो विनु ज्ञान सु नांहि, ज्ञान मांहि तू ही गुरु ॥ २ ॥
श्रुति कौ नाम प्रसिद्ध, कहैं णकार सुपंडिता।
श्रुति तेरी गुण वृद्ध, करैं देव नरपति मुनी ॥ ३ ॥

— गाथा छंद —

णमो णमो प्रभु तोकों, णय परमाण णिखेप हु ण पावैं।
रगादिक रिपु मोकों, दुख दे तो ध्याइ यां जावैं ॥ ४ ॥
रटैं णमोकारा जे णावैं, तोकों स्व सीस मतिवांना।
अति गुण गण भारा जे निरविद्य ना हौंहि भगवांना ॥ ५ ॥
णाण सरूवा तू ही, णाणी णादा सुणागरा राया।
णाणा गुण जु समूही, णाणा रूवा जु सुखदाया ॥ ६ ॥
णनिंदा जु सुरिदा, चंदा सूर जपैं हि सब तोकों।
ध्यावैं तोहि मुनिंदा, भवसागर तारि प्रभु मोकों ॥ ७ ॥
णाव तिहारौ नामा, खेवट तू ही अनंत तैं तारे।
हम हूं तारि सुरामा, रागद्वेषादिकां टारै ॥ ८ ॥

— दोहा —

णिय भावैं जो रमि रहइ, अन्य विभाव मुएइ।
सो पावइ णिय धम्मद्विइ, सयल विभाव चाएइ ॥ ९ ॥
णिच्चाणिच्च सरूव मुणि, सुद्ध बुद्ध अविरुद्ध।
णियमादि सु उधारि जिय, जपि जग गुर अणिरुद्ध ॥ १० ॥
णियडड आवइ मरण जिय, णियणाहें लवलाव।
छंडिवि सयल विचार तुह, उधरि भवदधि णाव ॥ ११ ॥

णीय जु धारि अणीइ मुय, णीच संग सह हेय।
 णीबें वोयें अंव फल मूढ यई किम लेय॥ १२॥
 णुति करि णति करि नाथ कौ, णूतण सो न पुराण।
 णेय सयल जा णांण मैं, णेयणाह सो जाण॥ १३॥
 णेमिणाह णमिणाह जो, णेदा मोखुह मग्ग।
 णेय रूव अति रूव जो, मुणिवर जा महि लग्ग॥ १४॥
 णेयण जम्हि ण णेय मैं, सो सह भासक तौहु।
 ताहि भजहु परपंज तजि, चाहहु शिवपुर जौहु॥ १५॥
 णौक रूव सो देव मुणि, णौक रूव मुणि णेय।
 णिय णिय भाव ण छंदई, णिय सरूव हुइ ध्येय॥ १६॥
 णोजीवस्स सहाव जिव, दव्व विभाव विकम्म।
 णोकम्म जु परभाव मुणि, अप्पा चेयण धम्म॥ १७॥
 णोईदिय णोमण हवइ, णोवण वि णोगंध।
 णोरस फरस वि सह जिय, अप्पा मुणि जु अबंध॥ १८॥
 णोव मणि रूव व मणा ण तण, अप्पा सुद्ध विवुद्ध।
 णौका भवदधि की सही, चेयण स्वच्छ प्रबुद्ध॥ १९॥
 णंदउ विरधउ गुर वयण, णंदउ जगगुर देव।
 णंदउ सयलवि संघचउ, णंदउ भत्ति अछेव॥ २०॥
 णः द्वादसमी मात्रिका, तू सव मात्रा मांहि।
 सव अक्षर मय देव तू, सर्वात्म सक नांहि॥ २१॥

अथ द्वादश मात्रा एक कवित्त मैं।

णमो णमो देव तोहि, णाण रूव करे मोहि,
 णिय मणि रूवक तू णीय कौ णिवास है।
 णुति णति तेरी जेहि, करैं धन्य धन्य तेहि,
 णूतण पुरातण तू णेय कौ विभास है।

णैक रूख एक रूख णोकमा ण कोइ होइ,
 आनंद कौ सागर उजागर विलास है।
 णौका सभ तारक तू णंदौ जगदीस धीस,
 णः पयास सब्ब अंक भासक सुपास है ॥ २२ ॥

— दोहा —

णमियामर णियरा धुरु, गुरु तिहारि भूति।
 सत्ता शक्ति रमा शिवा, सो दौलति विभूति ॥ २३ ॥
 इति णकार समाप्तं । आगैं तकार का व्याख्यान करै है ।

— श्लोक —

तत्त्वं तथ्य प्रणेतारं, तारकं ताप हारकं।
 त्रिगुणं तीरदं तुष्टं, तूष हर्म्यावली युतं ॥ १ ॥
 तेजोरासिं महाशांतं त्रैगुण्यगुणितं विभुं।
 तोष रोषादि निर्मुक्तं, संतोषामृत सागरं ॥ २ ॥
 तीर्य त्रिकान्वितं धीरं, तत्र मंत्रादि दूरगं।
 तः प्रकासं चिदाकासं, वंदे देवं महोदयं ॥ ३ ॥

— सौरडा —

त कहिये सिद्धांत, मांहि चित्त का नाम है।
 तू परमेश्वर शांत, चित्त वाक तनु रहित तू ॥ ४ ॥
 त भाष्यो श्रुति मांहि, नांम क्रोध कौ ठीक है।
 तैरे क्रोध सुनांहि, मान न माया लोभ है ॥ ५ ॥
 नांव पूछ कौ ख्यात, त कहिये आगम बिषै।
 सींग पूछ विनु तात, भगति रहित नर दोर हैं ॥ ६ ॥
 तमहर तपहर देव, तपधर गुणधर धीर तू।
 तपसी धारैं सेव, है अछेव अतिभेव तू ॥ ७ ॥
 इहै तमासी नाथ, जड़ नैं जीव जु वांधिया।
 जव छूटैं वडहाथ, तू हि छुडावै करि कृपा ॥ ८ ॥

— त्रोटक छंद —

तन तैं मन तैं अति दूर तुही, तमनासक तूहि प्रकास कही।
 तपनीय समान अमान सदा, तुव तुल्य न तप्त सुवर्ण कदा ॥ ९ ॥

प्रभु तत्त्व सुखद अरूप महा, तप भेद सबै प्रभु तैं हि कदा।
 प्रभु तथ्य निरूपक हैं परमा, तपधारि भजैं धरि कैं धरमा ॥ १० ॥

तरणो जु तुही अर तारण तू, तप सागर आगर कारण तू।
 प्रभु तूहि तटस्थ जु स्वस्थ सदा, तुझको नहि छांडहि दास कदा ॥ ११ ॥

तलफौं अति नाथ विना तुझ हूं, दरसन जु देहु न और चहुं।
 इह सुख तडाग समान भवो, गुन सिंधु तुही जगदीस सिवो ॥ १२ ॥

तटिनी तट सीत जु काल महीं, तप काल महीं गिर सीस रहैं।
 तरु के तलि चातुरमास महीं, जु रहैं मुनिराय सु तोहि चहैं ॥ १३ ॥

तब ही उधरै भव सागर तैं, इह जीव महा दुख आगर तैं।
 जब तू हि कृपा करि हाथ गहैं, प्रभु आधि न व्याधि उपाधि रहैं ॥ १४ ॥

तकि तू हि रह्यौं सब कौ प्रभु जी, नहि कोइ तकै तुझ कौं विभुजी।
 तकिवौ प्रभु तेरहु होय जबै, तजि भ्रांति मनां सुध होय तवैं ॥ १५ ॥

तजियो नहि जाय सुवल्लभ तू, भजियो नहि जाय सुदुल्लभ तू।
 तजिया सब तैंहि विभाव प्रभू, गहिया गुण रासि सबै हि विभू ॥ १६ ॥

तनु पंचक तैं निरवर्त तुही, अविनश्वर ईश्वर धीर सही।
 हुय तद्धव मुक्त तुझैं हि भजै, भरमैं भव मैं प्रभु तोहि तजैं ॥ १७ ॥

तरु सौ फल छांय जु दाय तुही, तरु ज्ञान विना तुव ज्ञान सही।
 तलि तेरहि लोक सबै जु वसैं, भव भक्तिहि ले तुव मांहि धसैं ॥ १८ ॥

इहु तस्कर मोह जु ज्ञान हरै, तुव दासनि तैं इह चोर डरै।
 प्रभु मोह हरै तुहि ज्ञान सु दे, नहि ज्ञान धकी भव भ्रांति कदे ॥ १९ ॥

तुव दास क्रिया अर ज्ञान मई, अति ही सुदयाल सुबुद्धि भई।
 तरकारि हरी नहि दास भखैं, सब त्यागि सबाद जु धर्म रखैं ॥ २० ॥

— दोहा —

तलवर ज्ञान विराग से, दंडै तस्कर मोह।
तू राजा अति न्याय धर, काहू सौं नहि द्रोह ॥ २१ ॥
त्रय गुण धारक देव तू, भेद त्रयोदस रूप।
चारित भासै धीर तू, मुनितारक मुनिभूप ॥ २२ ॥
त्रयवीसा विषया सबै, भव सागर के मूल।
सेया त्रयतीसा उदधि नरक भोग दुख थूल ॥ २३ ॥
तू हि प्रकासै नाथ जी, तेरे दास दयाल।
समदिष्टी त्रय चालिसा, प्रकृति न बांधै लाल ॥ २४ ॥
त्रय पंचास जु भाव है, क्रिया तरेपन होय।
तू सब भासै लाल जी, शुद्ध स्वभाव जु कोय ॥ २५ ॥
पुरुष तरेसठि उत्तमा, तू भासै जगदीस।
तीर्थकर चक्री हली, हरि प्रतिहरि अवनीस ॥ २६ ॥
कला बहत्तरि जगत की, इनतैं पैँ जु कोय।
सुकला अनुभव की प्रभू, त्रय सत्तरमी होय ॥ २७ ॥
त्रय अस्सी लख पूरवा, रिषभ रहे घर मांहि।
पाछैं मुनि व्रत धारि कै, सिद्ध भये सक नांहि ॥ २८ ॥
त्रय निवै प्रकृती सबै, नाम कर्म की होय।
तैरे प्रकृति एक नां, प्रकृति रहित तू सोय ॥ २९ ॥
त्रय सत वरणी होय कै, नेमि भये मुनिराय।
त्रय दस गुन वरषा गर्यें, पास वीर जतिगय ॥ ३० ॥
त्रय सत छतीसा प्रभू, मतिज्ञान के भेद।
त्रय सत त्रेसठि मूढ धी, पाखंडी अति खेद ॥ ३१ ॥
त्रय सत तीयालीस है, राजू लोक अनादि।
घणाकार भासै तू ही, तो बिनु सरब जु वादि ॥ ३२ ॥

त्रय दिन स्थिति अगनी सही, त्रय सहस्र हैं अब्द।
 पवनकाय उत्किष्ट स्थिति, तू भासै पतिशब्द ॥ ३३ ॥
 त्राता तारक तात तू, त्यागी भोगी देव।
 ताप हरन तारन तुही, दै क्रिपाल निज सेव ॥ ३४ ॥
 तारनतां तिन ताननहि, गावैं अदभुत राग।
 आतम रूप अनूप कौ, तू गायक बडभाग ॥ ३५ ॥
 ताब तिहारी मोह जड, सहि न सक्यो बलवान।
 लुक्यो भाजि भव वन बिषै, महा दुष्ट छलवान ॥ ३६ ॥
 तामस राजस सात्विका, तैरे एक न कोय।
 तू आनंद स्वरूप है, ज्ञान गुणगण होय ॥ ३७ ॥
 ताडन मारन कोइ कौं, तेरे मत में नाहि।
 तैं ताडे रागादिका, दोष नाहि तो पाहि ॥ ३८ ॥
 ताल मजीरा झांझि अर, झालरि आदि अनेक।
 बाजे बाजैं रावरै, तू है रावर एक ॥ ३९ ॥
 ताणैं सिवपुर कौं मुनी, ते तेरी पथ लेय।
 पंथ दिखावा एक तू, तो विनु सर्व जु हेय ॥ ४० ॥
 ताव आदि रोगा सबै, हरै तिहारौ नाम।
 रागादिक रोगा हरै, तू सुखद गुण धाम ॥ ४१ ॥
 त्रास न मानैं काल की, निरभय तेरे दास।
 कालहरन दूखहरन तू, जगजीवन जगभास ॥ ४२ ॥
 तात तिहारै ढील नहि, सीघ्र उतारै पार।
 परमेश्वर परवीन तू, प्रभु है त्रिभुवन सार ॥ ४३ ॥
 ताल तमाल न उपवना, सर वापी नहि कूप।
 सरिता सिंधु न ग्राम गिर, तुव पुर अदभुत रूप ॥ ४४ ॥

— छंद बेसरी —

त्रिदसाधिपपति, तू त्रिपुरारी, त्रिज्ञ त्रिज्ञान त्रिनेत्र विहारी।
 त्रिगमकरो जु कहावै भांना, तेरौ भजन करै भगवांना ॥ ४५ ॥
 त्रिविध हौ त्रिविधातम तू ही, तू त्रिकाल दस्सी जु प्रभू ही।
 त्रिपथ विहारी सर्व विहारी, त्रिधा बुद्ध सनसारग धारी ॥ ४६ ॥
 त्रिगुण रूप त्रिभुवन कौ स्वांमी, दस्सन ज्ञान चरन अभिरांमी।
 त्रिभुवन बल्लभ त्रिजग गुरु तू, त्रिदसाधिक्ष दुपक्ष धुरु तू ॥ ४७ ॥
 त्र्यक्ष त्रिलोक सिखामणि देवा, त्रिप्त त्रिदोष रहित विनु छेवा।
 नाथ त्रिभंगी भासक तू ही, नाम त्रिभंगी लाल प्रभू ही ॥ ४८ ॥
 त्रिश्राहरण त्रिसल्य वितीता, त्रियारहित जगजीत अतीता।
 त्रिण तुल्या भवभोग विभावा, दास न चाहैं कण मन लावा ॥ ४९ ॥
 कण रूपा तुव भक्ति गुसाई, तू त्रितापहारी है साई।
 तिष्ठै तू हि सदा सब पासा, विरला जानहि तत्त्व विलासा ॥ ५० ॥
 मो हति मंगल भव जल मांही, तो विनु पार हौंहि जन नांही।
 तीरथ तूहि जु भव जल तीरा, तीरथकर जगदीसुर धीरा ॥ ५१ ॥
 तीन लोक कौ नायक तू ही, तीरथ तेरी वांनि समूही।
 दासा तीरथ जगत उधरैं, भगति भाव हिरदां में धारैं ॥ ५२ ॥
 तीर ज्ञानमय तीखा लागैं, मोहादिक सब कर्म जु भारैं।
 तुच्छ बुद्धि जीवनि की स्वामी, परे मोह के वसि अविरांमी ॥ ५३ ॥
 तुगरा पधरी वागा पटका, पटकि मुनी प्रभु तोमें अटका।
 तुमकों सेय हेय सह त्यागा, तुम्हरी भक्ति मांहि भवि लागा ॥ ५४ ॥
 तुरहि आदि असंखि जु वाजा, तेरै वाजै तू जगराजा।
 तुच्छ मती में तू नहि सेया, तुच्छ गती धारी बहुभेया ॥ ५५ ॥
 तुलना तेरी और न कोई, तू अतुल्य अविनासी सोई।
 ज्ञान तुला में सर्व जु तोले, तो विनु जन भव भव में डोलै ॥ ५६ ॥

तुज कहिये प्रभु सुत कौ नामा, पुत्र कलत्र संग धन धामा।
 इनमें राखे भाँदू भाई, तेरी भक्ति न उर में लाई ॥५७॥
 तुरत उधारै तू भव सिंधू, हमहि उधारि जगत के बंधु।
 तुस सम देह जु कण सम जीवा, तू हि बतावैं त्रिभुवन पीवा ॥५८॥
 तुल सम तुनका सम जगवासी, उडे फिरैं अति ही दुखरासी।
 भ्रांति वायु में परे विमूढा, ऊँच नीच धारी गति रूढ़ा ॥५९॥

— छंद मोती दाम —

तुषार समान जु है जड भाव, जु भान समान तु ही जग राव।
 तुचा करि वेदि उहै इह देह, जु अस्थिनि कौ प्रभु पंजर एह ॥६०॥
 पर्यौ तन मांहि इहै सठ जीव, तु ही जगतारइ तू जगपीव।
 तुणंतुण तार वज्रैं जगराज, महा जु विराग बडे महाराज ॥६१॥
 तुही जु तुही जु तुही जु तुही जु, वही जु वही जु वही जु वही जु।
 कही जु कही गुर नैं हि सही जु, सुदासनिनैं उर मांहि गही जु ॥६२॥
 वज्रैं अति तूर सु तू अतिपूर, सु हौं लघु तूल समान जु कूर।
 उड्यो जु फिरौं भ्रम वाय मझार, तु ही थिर दे पद तारन हार ॥६३॥
 भजें प्रभु तोहि सु तूटहि फंद, न तूठइ रूठइ तू सिखकंद।
 कहैं प्रभु तू हि समूह जु नाम, सबै जु समूह धरैं तु हि राम ॥६४॥

— सोरठा —

तूडा सम जगभूति, कण रहिता पसु ही चहैं।
 भक्ति समान विभूति, भई न है हूँहैं कवै ॥६५॥
 तूश्री मौन जु नाम, मौन धारि मुनिवर भजैं।
 तेरौ पंथ जु राम, पावैं तेई ज्ञानमय ॥६६॥
 तेरे मत विनु लाल, वारावाट जु जग भयो।
 तेजोरासि विसाल, तेजपुंज गुनकुंज तू ॥६७॥

तेरी सौ नहि तेज, सूर चंद हुतभुग धरैं।
 तो बिगि सुर सग रेज, रतन रतन धर तेज विन॥६८॥
 तेडयो आवैं नाहि, रहै सदा सख पास ही।
 जामैं सर्व समाहि, तेगादिक जाकै नही॥६९॥
 तेजरादि सख रोग, नाम लियें दरिहि नसैं।
 तैं त्यागे जग भोग, जोग रूप जोगी तु ही॥७०॥
 जैसैं तिल में तेल, तैसैं घट में जीव इह।
 पर परणति कौ मेल, याकै तो विनु नां मिटै॥७१॥
 तेह रहयो नहि नाथ, मो में कछु बाकी नहीं।
 देहु आपनौं साथ, जाकरि ह्वै अति पुष्टता॥७२॥
 तैं राग न रोष मोहादिक तैं नहीं।
 तैं बंध न मोख, शुद्ध बुद्ध चैतन्य तू॥७३॥
 तैलादिक सख लेप, त्यागी अबधूता मुनी।
 तू है देव अलेप, तोहि भजैं मुनिवर महा॥७४॥

छंद भुजंगी प्रयात

तु त्रैकालि दसीं सु त्रैलोकि ईशा, तु त्रैगुण्य रूपा अनूपा मुनीसा।
 तु त्रैलोकि लोकी बिलोकै, सख ही समैसार तू ही सबै तो फवै ही॥७५॥
 तु त्रैलोकिनाथा चिदानंद तू ही, महादेव देवा गुरु है प्रभु ही।
 नही तैजसा कारमाणा न तैं, तु उपाधी न व्याधी न आधी न नैं॥७६॥
 नहीं तोल जाका नहीं मोल जाका, भजै तोहि जोई नहीं नास ताका।
 नही तोष रोषा तु ही वीतरागा, सुसंतोष रूपा मुनि पाय लगा॥७७॥
 नही तोड जोडा नही कोई तोरा, नही तो परैं एक तू ही सजोरा।
 तु तोटा हरै देव दे भूति मोटी, सुमोटी तु ही रीति नाहि जु छोटी॥७८॥
 नही तौर तेरा लहैं कोइ दूजा, त्रिकातीर्य होवै करै देव पूजा।
 सुगीतं सुनृत्यं सुवादित्र वाजा, जु तीर्य त्रिका ए कहांवैं सुसाजा॥७९॥

गलै तौख राल्यौ महामोह नैं जी, जु मिथ्यात रूपो सुदृष्टि हनैं जी ।
 तुही जो छुडावै महा खंदि सेती, कही जाय नांही लही व्याधि जेती ॥ ८० ॥

सुतंत्रो तुही तंत्र कृत्तंत्र धारी, जु तंत्राधिपो तू हि तंत्री अपारी ।
 सुतंगा उतंगा तु ही है असंगा, नही तंत्र मंत्रा नही कोइ रंगा ॥ ८१ ॥

करैं तांडवा वासवा धारि सेवा, तुही देवदेवा प्रभू है अछेवा ।
 तु ही है स्वतः सिद्ध स्वांमी सर्वों का, सुरीं का नरीं का सही है मुन्यों का ॥ ८२ ॥

— दोहा —

तः प्रकास अतिभास तू, सब मात्रा में नाथ ।
 सर्वाक्षरमय धीर तू, गुण अनंत तुव साथ ॥ ८३ ॥

अथ द्वादश मात्रा एक कवित्त में ।

तप कौ प्रकासक तू, तप कौ हरनहार,
 ताप सहु मेढै तात, त्रिश्रा कौ न नाम है ।
 तीर भव सागर की, वैठौ अति उज्जल तू,
 तुष कौ न लेस तैरे, कांम कौ न कांम है ।
 तूर वाजैं जू अनंत, तेज कौ निवास कंत,
 तैजस औ कारमाण नाहि तैरे धाम है ।
 तो सौ तू न दूसरौ जू, तौर तेरौ तोहि मांहि,
 तंत मंत आप ही स्वतःप्रकास राम है ॥ ८४ ॥

तेरी नाथ जु अस्थिता, तत्व तरंग स्वरूप ।
 सो गौरी धन संपत्ती, दौलति ऋद्धि निरूप ॥ ८५ ॥

इति तकार संपूर्ण । आगैं थकार का व्याख्यान करै है ।

— श्लोक —

थकाराक्षर धातारं, सर्व मात्रा मयं विभुं।
वंदे देवेंद्र वृंदाचर्यं, लोकालोक प्रकासकं ॥ १ ॥

— दोहा —

थ कहिये सिद्धांत में, भय रक्षण कौ नाम।
तू रक्षक है भय थकी, निरभे आतमरांम ॥ २ ॥
थकारांक आगम बिषै, उच्चसिलोचय नाम।
सिद्ध सिला सम और नहि, अदभुत अतिगति धाम ॥ ३ ॥
थकित है रहैं सुरपती, थल तेरौ अवलोकि।
थल दै जलतैं काढि कै, राख्यो कर्मनि रोकि ॥ ४ ॥
थकैं कर्म तो ढिग प्रभू, तुकैं जु भव वन मांहि।
थलचर जलचर नभचरा, तू पालै सक नांहि ॥ ५ ॥
थक्यो बहुत हूं नाथजी, भटकि भटकि भव मांहि।
थकैं चित्त तो मैं प्रभू, सो करि लै निज पांहि ॥ ६ ॥
थरकि रहैं मुनि तो विषै, थल रूपी तू देव।
थल बांधै प्रभु धर्म कौ, थलदायक तुव सेव ॥ ७ ॥
थल मैं जल मैं नभ महैं, तु ही सहाय न और।
ऋद्धि करन संकट हरन, तू विभुवन कौ मोर ॥ ८ ॥
थट्ट तिहारै पासि है, गुन अनंत परजाय।
सदा अकेले तुम प्रभू, एक रूप समुदाय ॥ ९ ॥
चित्त वृत्ति अति थरहरी, जीव घात तैं नाथ।
जिनकी तेई पावही, देव तिहारौ साथ ॥ १० ॥
थण बहुती मातांनि के, चूषे बहुती वार।
अव भव सागर तारि तू, तरण जु तारण हार ॥ ११ ॥
थाघ न आवै भव तनी, पारावार अपार।
थाह लहैं तेईन प्रभू, दास हौंहि अविकार ॥ १२ ॥

थाह न तेरी पांवड़ी, सुर नर खेचर नाग।
 मुनि गणधर हू नां लहैं, जे अनंत बडभाग ॥ १३ ॥
 थाह न केवल विनु कहूँ, तू केवल स्वस्थ ॥ १४ ॥
 दै केवल निजभाव प्रभु, शुद्ध बुद्ध चिद्रूप ॥ १४ ॥
 धान मान धन धान प्रभु, तैरे एक न होय।
 सब दाता सब रूप तू, निज स्वरूप निज सोय ॥ १५ ॥
 सब धाननि में तू सही, रहै जु एकै धान।
 सर्वग व्यापक स्वस्थ तू, निश्चल श्री भगवान ॥ १६ ॥
 थाती तैरे पासि है, और दरिद्री सर्व।
 तू ही रमापति जगपती, हरै जगत कौ गर्व ॥ १७ ॥
 थार कटोग त्यागि सहु, लें करपात्र अहार।
 ते मुनि तेरी ध्यान करि, पावै भवजल पार ॥ १८ ॥
 थाध तिहारी विनु प्रभु, थाध जगत कौ नाहि।
 दास करौ जगदीस जी, राखऊ अपुनै पाहि ॥ १९ ॥

— सर्वैया - ३१ —

थाप औ उथाप एक तेरी ही जु लोक माहि,
 तेरी थापी रीति कौ, उथापक न कोई है।
 थाट कौ धणी जु नाथ पाट धार है अनाथ,
 थाह न लहत कोऊ तू जु एक दोष है।
 थाक्यो अति हों जु देव, थाक टारि दै स्व सेव,
 थालि घालि देहु धान तो विनां न होय है।
 थाणे मोह कर्म के उठावै तूहि और कौन,
 ध्यावै मुनि धारि मौन तारक तू सोई है ॥ २० ॥
 थिर रूप थिर देव, थिरचर नायक तू,
 थिरचर जीवनि कौ पालक गुरु तू ही।

धिर धान धिर धाम, धिर ज्योति धिर नाम,
 तू ही धिर रांम अभिरांम एक है वही।
 धिर धिरता कौ मूल, धिरता अपार देव,
 धिरीभूत भाव एक तू ही जो धैर सही।
 धिति सब कर्मनि की तैं ही जो प्रकासी देव,
 सबै धिति हरी, तैं ही भव धिति तैं दही ॥ २१ ॥

--- सोरठा ---

थीजै छीजै नाहि, पधरै तू न कदापि ही।
 अति गुन तैर मांहि, थुति जु करैं सुरनर मुनी ॥ २२ ॥
 बुद्धि करिवे लख जाहि, हंइ दुनिहः पणिहः हू।
 बुद्धि न मौर पांहि, कैसैं मो से थुति करैं ॥ २३ ॥
 तोकों नाथ विसारि, पर धन पर दारा गहैं।
 ते इह जनम मझारि, थुक थुक हैं नरकां परै ॥ २४ ॥
 थूल महा तू देव, थूणी लोकालोक की।
 करहि महा मुनि सेव, तू अछेव अतिभेव हैं ॥ २५ ॥
 औसौ थूल जु तूहि, जामैं सर्व समांवहीं।
 गुनी गुनाढ्य समूहि, दूहि न तैर कोइ सौं ॥ २६ ॥
 सूक्ष्म औसौ नाथ, अणु देखैं तेहु न लखैं।
 मुनि जन हू कै हाथ, नहि आवै सो है तु ही ॥ २७ ॥
 जीवनि के जु असंखि, जनम लखैं मन की लखैं।
 ध्यांनी मुनि निहकंखि, औसे हू तोहि न लखैं ॥ २८ ॥
 थूणी पर की नाहि, दावैं जो तुव सूत्र सुनि।
 ते दासनि कै मांहि, आय महाभव जल तिरैं ॥ २९ ॥
 थूणी पर की जेहि, दावैं पापी दुष्ट धी।
 जावैं नरकि जु तेहि, भगति लहैं नहि रावरी ॥ ३० ॥

— सर्वेवा ३१ —

थेई थेई तत्त करि नाचैं इंद चंद तेरे,
 ताल लय नाद करि तोही कौं जु गांवही।
 नारद हू कंधै धरि वीन अति सुंदर जो,
 अति ही उछाह करि तो ही कौं जु ध्यांवही।
 शची आदि देवी सहु तोही कौं अलापैं नाथ,
 अहमिंद औ जतिंद तो ही कौं जु भांवहीं।
 चक्री अधचक्री हलि मनु मुनि संकर जु,
 सुर नर नाग खग तोकों सिर नांवहीं ॥ ३१ ॥

थेथी बात करें ते न पावैं तोकों काहू काल,
 तेरे कोऊ थेथी बात हेरे हू न पाइए।
 तोहि लहैं, पंडित विवेकी परवीन नर,
 थोथी बुद्धि त्यागि एक तोही कौं जु नाइए।
 थै सुमात्र अष्टमी प्रकासै तूहि और कौन
 थोक धार तू ही एक तोहि सिर नाइए।
 थोक हैं अनंत गुन भाव परजाय तेरे,
 थोकनि कौ नायक तू हि उर लाइए ॥ ३२ ॥

थोथी भूति त्यागि औ उपाधि सब त्यागि नाथ,
 त्यागि सहु साथ मुनि ध्यावैं तोहि देव जी।
 थोक तोमैं माय रहे जीव ओ अजीव सब
 भव्यनि कौ तारक तू देहु निज सेव जी।
 थोथी बात कियें तू न आवै कभी हाथ नाथ,
 धारि तुव धार नाहि पावैं तुव भेव जी।
 थोरी औ बहुत तेरी साधु ही पिछाँनैं बात
 और नाहि जानैं तात, तेरी है न छेव जी ॥ ३३ ॥

— सोरठा —

थोरी बहुत कछून, मैं मूढ़ै भगति जु करी।
 थोरी सम अति नून, सो तन पोख्यो अघमई ॥ ३४ ॥

थोरीकु लहु तोहि, भजैं कदापि निपाप हैं।
 सब मैं तोहि जु टोहि, करुणा धरि सुभगति वरैं॥ ३५ ॥
 थौ तू ही जिननाथ, अमित काल पहली प्रभू।
 है रहसी जगनाथ, नित्य निरंतर देव तू॥ ३६ ॥

— सर्वैया - ३१ —

थंभ एक लोक तीन कौ तू ही अनंतनाथ,
 थंभे तैं अनंत भाव थंभे तू उपाधि तैं।
 तैं ही थंभे दुष्ट धिष्ट कर्म मोह आदि देव,
 तू ही एक टारै ईस सबै आधि व्याधि तैं।
 तू ही एक थांघ और थांघ नाहि दीसै कोऊ,
 तू ही थिर थापै तात तारै जु असाधि तैं।
 जल धल मांहि एक तेरौई अधार धीर,
 और कोइ थंभे नांहि भव असमाधि तैं॥ ३७ ॥

— सोरठा —

थथा पासि तु सुन्य, वारम मात्रा बुध कहैं।
 तू देवा अति पून्य, अतिमात्रो सब मात्र मैं॥ ३८ ॥

अथ द्वादश मात्रा कवित्त एक मैं ।

— सर्वैया - ३२ —

थल रूप देव तू हि, थाघ तेरी लहै तू हि,
 थिरता अपार नाथ, थीजै न पघर ही।
 थुति तेरी करैं देव, थूणी लोक की सु सेव,
 थेई थेई तत्त करि नांछैं सुर नर ही।
 थे प्रकास है अनास, थोक कौ धनी सुपास,
 थोथी वात नांहि कोऊ, गुन थोक धर ही।
 थौ तुही रहै तुही हि, है तुही हि थंभ लोक,
 थः प्रभास ज्ञान रास पाप नास कर ही॥ ३९ ॥

— दोहा —

थोथी जग की भूति इह, सो न विभूति कदापि ।
तेरी सत्ता शक्ति जो, सो दौलति उदापि ॥ ४० ॥

इति थकार संपूर्ण । आगैं दकार का व्याख्यान करै है ।

— श्लोक —

दयामय सुदातार, दिनाधीशेश्वरं विभु ।
दीनबंधुं जगद्धंधुं, दुष्ट कर्म निवारकं ॥ १ ॥
दूषकं पाप भावानां, देह गेहादि वर्जितं ।
द्वैताद्वैत विनिर्मुक्तं, दोष मोहादि दूरगं ॥ २ ॥
दौर्जन्य रहितं शुद्धं, बुद्धं दंड निवारकं ।
दः प्रकाशं चिदाकासं, वंदे देवं सदोदयं ॥ ३ ॥

— बोरठा —

दह्यौ न मोपैं कांम, दले न मैं कोपादि जे ।
तूहि उधारि रांम, सम्यक्भाव लखाय कैं ॥ ४ ॥
दर्भ समान कठोर, तीखे रागादिक महा ।
अति दलबल छल जोर, मोहि भर्माया जगत मैं ॥ ५ ॥
दल मेरे ज्ञानादि, दले डारि तनु जंत्र मैं ।
दुख दीयो प्रभु वादि, इनकों मैं न विगारियो ॥ ६ ॥
दड़यो लोभ की लाय, शांत भाव पायो नहीं ।
धरी अनंती काय, राय अबै निज बोध दै ॥ ७ ॥
द्रव्य प्रकाशक देव, सब द्रव्यनि मैं तू सिरै ।
दै दयाल निज सेव, दया करौ प्रभु दीन परि ॥ ८ ॥
द्रव्य स्व गुण परजाय, भेद अभेद विभासई ।
तू त्रिभुवन कौ राय, पाय परैं तैरे मुनि ॥ ९ ॥

द्रव्य क्षेत्र अर काल भाव, भावभवा सब भासई।
तू अतिभाव क्रिपाल, लाल ललांम जु लोक कौ॥१०॥

— छंद त्रिभंगी —

दमधर जु मुनीशा, शमधर ईशा, यम नियमीसा, तोहि भजैं।
दरसन गुन धारा, ज्ञान प्रचारा, चरन अचारा, मोह तजैं।
तू है सुदयाकर, अति हि दयापर, शुद्ध सुधातर, लोकपती।
दम इंद्रियरोधा, कहइ प्रबोधा, तू अनिरोधा, शुद्ध जती॥११॥
है दत्त दयाभर, दक्ष क्रिपाकर, दूढकर दूढतर, ज्ञानमई।
है दरसन जोग्या, अमर अरोग्या, हरइ अजोग्या, शुद्ध दई।
तू ही जु दया निधि, धारइ अतिरिधि, करइ महासिद्धि, ज्ञानदसा।
दशलक्षण धारा, मुनि मतवारा भजहि अपारा, चरनवसा॥१२॥

— सौरठा —

दवीयान अतिदूर, दूढीयान अति निकट तू।
घट घट में भरपूर, दरसन दरमिक दृश्य तू॥१३॥
दसा भली है नाथ, साथ तवै तेरी गहै।
तू पकरै जव हाथ, तव कैसी चिंता रहै॥१४॥
दसा जाति में हीन, सोऊ तुव भजि उच्च है।
जे तोसों नहि लीन, ते कुलीन हूं नष्टकुल॥१५॥
दक्षन उत्तर और, पूर्व पश्चिम चउ दिसा।
चउ विदिसा कौ मौर, अध ऊरध कौ मूरधा॥१६॥
दधिणा देय अनंत, ददा सर्वों का एक तू।
अतुल दरव कौ कंत, दगादार पावैं नही॥१७॥
दगडा लूटैं जेहि, दगा दगी हिरदै धरैं।
परै नरक में तेहि, तोहि न पावैं पाप धी॥१८॥
दत्तव तेरी सौ न, तीन लोक में और कै।
सठपन मेरी सौ न, तोहि ध्याय रोर न हरयो॥१९॥

दब नहि काहु की हि, दब मेंटै त्रिश्रामई।
 गम्य न साधू की हि, हम से कैसें बरनवैं॥ २० ॥
 दख्यौ करमतें जीव, उरलौ तू हि करै प्रभू।
 तीन लोक कौ पीव, दै न काहु तौं कवै॥ २१ ॥
 दडक दडका नाहि, तेरे दासनि कौं विभू।
 जीते नाही जाहि, अनुचर तेरे मोह पै॥ २२ ॥
 दल फल फूल जु कंद, तेरे दास न आदरैं।
 तू त्रिभुवन कौ चंद, दयापाल परवीन तू॥ २३ ॥
 दहे करम भव रूप, गहे अनंता गुन प्रभू।
 दखे तोहि तैं भूष, दोष अनंता दुख मई॥ २४ ॥
 दही मही वसु जांम, आगै लेवीं विधि नहीं।
 नही दास कै कांम, दही मही भेला छिदल॥ २५ ॥

— सादूल विक्रीडित छंद —

दाता दान जु धर्म भेद सबही, भासै तु ही भासको।
 दासा तोहि भजैं सुचित्त करि कै, तू दायको वास को।
 दारिद्रा न रहैं कदापि निकटा, जाकै जु तोकीं भजै।
 देवा दानव मानवा मुनिगना, भव्या न तोकीं तजै॥ २६ ॥
 पीरें नाहि सुदानवा अतिबला, दांसानिकों वखापिही।
 तैरे द्वादसभाव को इक वही, नाही तु ही आप ही।
 दासी दास उदास होय तजि जे, तोकीं भजैं नाथ जी।
 दांता शांत करे कृतांत न तजैं, तेरो प्रभू साध जी॥ २७ ॥
 दातारा नहि कोइ, दात्रि इक तू, देवै महा संपदा।
 दांता अन्न जु आदि पाप दलना, टारैं सब आपदा।
 दातृ पात्र सुदान भेद सुविधी, भासै तुही ओर को।
 दाता भुक्ति विमुक्ति देय इक तू, हारी महारोर को॥ २८ ॥

— चौपड़ —

दाग लग्यो मोकों प्रभू एह, भलिन महा धारी इह देह।
 दाह ऊपनौ अति परचंद, त्रिश्रा कौ हूवो न विहंड ॥ २९ ॥
 दाह निवारै करइ प्रशांत, तू ही एक परम अतिकांत।
 द्वारौ तैं सौ नहि और, द्वारै तैं दीसै दौर ॥ ३० ॥
 द्वारै तैं संपति खरी, द्वारै तैं नौ निधि परी।
 द्वारौ सेवैं सुरनरपती, फणपति खगपति अर जतिपती ॥ ३१ ॥
 दाव्यो करमनि दाड्यो अती, करौं पुकार सुनौं जगपती।
 दाझ्यो हौं मायानल मांहि, दावानल माया सम नांहि ॥ ३२ ॥
 दाता दै संतोष जु धनां, जा करि तोसौं लगौं मनां।
 दांनी ज्ञानी तू भगवंत, दारा पुत्र न तैं संत ॥ ३३ ॥
 दाढ काल की तैं मुहि काढि, द्राक हमारी भ्रांति जु वाढि।
 द्राक सीघ्र कौ कहिये नाम, द्राक उधारि देहु निज धाम ॥ ३४ ॥
 दिगवासा जु दिगंबरदेव, द्विगाधीस द्विगपाल अछेव।
 दिसादसौं कौ एक हि नाथ, दिन दिन अधिक तेज अति साथ ॥ ३५ ॥
 दिन दूलह कमला पति जती, लोकपती जीत्यो रतिपती।
 द्विजपति कहिये मुनिवरधीर मुनिवंदि स्वामी वरवीर ॥ ३६ ॥
 द्विज पंखी द्विज है मुनिशय, द्विज विप्रादि त्रिकुल अधिकाय।
 द्विज तारक तू द्विप हु सुधार, द्विविधा हरन भवोदधि पार ॥ ३७ ॥
 द्विरुक्त तन हि तु नवल मुजान, छिन छिन तेरो ध्यान प्रवान।
 द्विणुकादिक मिलि हैं जड़ खंध, जड़ खंधनि तैं तू हि अबंध ॥ ३८ ॥
 दिव्य रूप दिव्य ध्वनि खिरै, तेरे मुखतैं अमृत झरै।
 तोहि दिनेस महेस सुरेस, सेस मुनेस जपैहि असेस ॥ ३९ ॥
 द्विपपति कौ पति तेरी दास, द्विप हस्ती कौ नाम प्रकास।
 द्विरद कहैं द्विपहू बुद्ध कहैं, तेरी चाल न हस्ती लहैं ॥ ४० ॥

कहै चंद कौं बुध द्विजराज, तू द्विजराजनि कौं पतिराज।
 रुलत रुलत हूं दिक अतिभयौ, महाभाग तैं तोकों नयो ॥ ४१ ॥
 अव सब दिकता मेदि दयाल, देहु आपुनीं दरसन लाल।
 तू द्विष्टा द्विष्टांत सबै हि, तोहि फवै सब पाप दवै हि ॥ ४२ ॥
 दीरघ दरसी दीरघ दमी, दीपतिवंत तू ही अतिक्षमी।
 दीप्ततपा ध्यावैं मुनिराय, दीरघ सोच न तेरै राय ॥ ४३ ॥

— मालिनो छंद —

दीना जगथा, दीन बंधू तू तू ही दीहा दीना, दीय है तू प्रभू ही।
 दीपा संख्या, बीत हैं नाथ तेरे, दीना तोकों, पाय दैवत्व प्रै ॥ ४४ ॥
 दीनारादी, त्यागि सेवैं मुनीसा, तू निर्ग्रन्थी, देव है लोकसीसा।
 दीनैं तैं ही, ज्ञान आदी अनंता, भीने तोमैं, त्यागि भूती जु संता ॥ ४५ ॥
 दीजे दांता, लीजिये रांम नांसा, तू ही रांमो, सर्व व्यापी सुधामा।
 दीसैं तू ही, योग निद्रा मझारे, ध्यावैं तोकों, साधवा जोगधारे ॥ ४६ ॥
 दुष्टा कर्मा, दुख्य दाईं सबों का, टारै तू ही, नाथ है तू मुन्यों का।
 तोकों ध्यावैं, दुर्गति नांहि पावैं, तोकों गांयें, दुर्मति नांहि भावैं ॥ ४७ ॥
 दुख्या सुख्या, नांहि तेरे जु कोई, आनंदी तू, ज्ञान रूपी जु होई।
 सौजन्यो तू, दुर्जना नांहि पावैं, योगारूढा, तोहि योगी हि ध्यावैं ॥ ४८ ॥

— दोहा —

दुष्पण वज्र कौं नांम है, वज्री तेरे दास।
 दुराधर्ष अति कठिन तू, दुष्ट न पावैं पास ॥ ४९ ॥
 द्युति धारी दुति रूप तू, द्युतिकर दुर्ग अछेव।
 दुर्गति हरन दुरगति हरन, दै दयाल निज सेव ॥ ५० ॥
 दुर्यो नहीं दुरि हैं नहीं, दुरै न कवहु देव।
 बुद्धि दुष्टता की हरै, सिष्ट प्रतिष्ठित एव ॥ ५१ ॥

द्युम्नि नाम है सुर्ण कौ, तू सुवर्ण अति शुद्ध।
 कनक कामिनी त्यागि कै, सेव करें प्रतिबुद्ध ॥ ५२ ॥
 दुग्ध कहा उज्जल प्रभु, तू उज्जल जगदीस।
 नीरस भोजन लेय कै, भजैं तोहि जोगीस ॥ ५३ ॥
 दुराराध्य नहि तू प्रभु, आराधैं मुनिराय।
 दूठ करम तैं दंडिया, तोसी दूठ न राय ॥ ५४ ॥
 दूरि नही अति दूर तू, अदभुत गति अवनीस।
 दूनों दूनों तेज अति, तेज पूज जगदीस ॥ ५५ ॥
 द्यूत मांस भदिरा प्रभु, वेस्या अस आखेट।
 चोरी नारी पार कौ, ए तैरे मत मेट ॥ ५६ ॥
 दूषक पापनि कौ तु ही, पापी लहैं न भेद।
 दूजि नही दासांनि सौं, एकी भाव अभेद ॥ ५७ ॥
 दूजौ जग परपंच तैं, दूहौ भवि तैं नाहि।
 दूजौ देव न तो विनां, तू देवा सब मांहि ॥ ५८ ॥
 देवल तेरी ही सही, प्रतिमा तेरी पूजि।
 जे देवल ढोकैं नहीं, जिनकै तोतैं दूजि ॥ ५९ ॥
 देस कोस धन धाम सहु, त्यागि भजैं भवि तोहि।
 तू देसाधिपती प्रभु, देस असंखित होहि ॥ ६० ॥
 देनहार तोसौं नहीं, देहु देहु निजवास।
 देव देव नरदेव तू, देह न गेह न वास ॥ ६१ ॥
 देह देहुरी देव है, चेतन अतुल प्रभाव।
 ताहि लखै तुव भक्ति तैं, ज्ञानी ज्ञान स्वभाव ॥ ६२ ॥
 नाथ तिहारी देसना, जे धारैं उर मांहि।
 देस ज्ञानमय ते लहैं, यांमैं संसै नाहि ॥ ६३ ॥
 देहो दरसन करि कृपा, और न चाहैं तात।
 देखैं तेरी रूप अति, या सम और न बात ॥ ६४ ॥

— सवैया — ३१ —

देस त्यागि कोस त्यागि, रोस त्यागि दोस त्यागि,
 तोहि में रहों जु लागि, तेरौई जु होय जी।
 छांडों माया मोह सब, छांडों कांछ लोभ सब,
 शुद्ध रूप देखूं तेरी ध्यान मांहि जोय जी।
 देह तैं जु नेह छांडि, कुटम सनेह छांडि,
 तोही तैं सनेह करि छांडौ दोष दोय जी।
 शुभऔ अशुभ नाथ त्यागि तेरौ गहाँ साथ,
 तोही कौ आराधौ देव तू है एक कोय जी॥६५॥

— सोरठा —

द्वैताद्वैत न कोय, तू अवाच्य द्वै रूप है।
 दैव अतुल गति होय, दैन्य देव सब ही भजें॥६६॥
 नहीं दैन्यता नाथ, पीरें जाकों कवहु भी।
 जाकौ पकरै हाथ, तू बडहाथ अनाथ जी॥६७॥
 द्वै नहि तोमें दोष, द्वै अधिका दस तप कहै।
 देहि मुन्यों को मोख, कहै परीसह बीस द्वै॥६८॥
 द्वै अधिका प्रभु तीस, लक्षण धर बड भाग नर।
 तोहि भजें जगदीस, तू ईसुर धीसुर प्रभू॥६९॥
 द्वै अधिका चालीस, नाम कर्म की प्रकति हैं।
 तो में एक न ईस, प्रकति परें परवीन तू॥७०॥
 द्वै अधिका पच्चास, देवल तेरे नाथजी।
 नंदीसुर जु विभास, दीप आठमों धारई॥७१॥
 द्वै अधिका प्रभु साठि, मारगणा भासै तु ही।
 तू है आगम पाठि, अपठ पाठ अवनीस तू॥७२॥

— दोहा

द्वै अधिका सत्तरि प्रभु, कला जगत की होय।
 तेरे पावे कौ जतन, ज्ञान कला है सोय ॥ ७३ ॥
 दोष हरन दुख हरन तू, दोषा हर जगदीस।
 दोषा नाम जु रात्रि कौ, भ्रांतिमई निसि ईस ॥ ७४ ॥
 दोषाकर है चंद कौ, नाम संसकृत मांहि।
 चंद सूर अर सूरि सह, तोहि भजैं सक नाहि ॥ ७५ ॥
 द्योति अनंत धरै तु ही, अति सोभा कौ पुंज।
 द्योदि करै तोसैं कवन, तू है आनंद कुंज ॥ ७६ ॥
 द्योद दिवस की साहिबी, जगवासिनि की नाथ।
 तेरी अचल जु साहिबी, तू समरथ वड हाथ ॥ ७७ ॥
 कियो दोहरौ अति प्रभु, कर्म मिले अति जोर।
 दिये जु दोटा भव विषै, तू दुख हरि हर रोर ॥ ७८ ॥
 दोव समांन गन्यो मुझैं, खोद्यो खुरपा होय।
 कर्मनि अव किरपा करौ, हरै कष्ट प्रभु सोय ॥ ७९ ॥
 दौर्जन्यादिक अवगुणा, धरै पापी मोह।
 तुम सज्जन ऐसी करौ, करै नही इह द्रोह ॥ ८० ॥
 दौर्गत्यादिक टारि तू, निहचल गति दै नाथ।
 दौर अनंत धरै तु ही, दौलति तेरे साथ ॥ ८१ ॥
 दंभ रहित अति सरल तू, दंभी लहै न तोहि।
 द्वंद रहित निरद्वंद तू, निरवांनी गुर होहि ॥ ८२ ॥
 दुंदभि वाजा राखै, वाजैं दीनदयाल।
 मोह डरै पातिग डरै, हरखैं भव्य रसाल ॥ ८३ ॥
 दंपति नाम जु दोय कौ, तू एको द्वय रूप।
 दंगलवासी मुनिवरा, ध्यावैं तोहि अनूप ॥ ८४ ॥

दंग नगर कौ नांम है, तू नागर रसरूप ।
 नगर तिहारी सर्व कै, माथै है जगभूष ॥ ८५ ॥
 दंती हस्ती कौ कहैं, हस्तीपति कौ नाथ ।
 तोहि भजै जगनाथ जी, तू अनंत अति साथ ॥ ८६ ॥
 दं कहिये जु कलत्र कौ, तैं नारी नाहि ।
 तू निज परणति सौं रमैं, रमा तिहारै मांहि ॥ ८७ ॥
 दं कहिये प्रभु छेद कौ, छेदन भेदन नाहि ।
 तैं भाव दयालु है, हिंसा नाम तू प्रांहि ॥ ८८ ॥
 दं कहिये फुनि दान कौ, तू दानी जगदीस ।
 भुक्ति मुक्ति की मान जो, भक्ति देहु अपनीस ॥ ८९ ॥
 दहा पासि दु शून्य है, अंतिम मात्रा जोय ।
 तू सब मात्रा मांहि है, चिनमात्रो प्रभु सोय ॥ ९० ॥

अथ वारा मात्रा एक कवित्त मैं ।

— सवैया - ३१

दया कौ निधान है सुदानपति दाता एक,
 दिन दिन तेरो जस देखिये नवो नवो ।
 दीनानाथ दीनबंधु दुष्टनिहैं दूर देव,
 देस छत महाब्रत भासै तू हरै भवो ।
 दैव एक तू ही सब दोष कौ हरन हार,
 दौर अति तेरी, दौरजन्य विनु तु शिवो ।
 दंभतैं रहित और रहित मोह तैं विशुद्ध,
 दः प्रकास है अनास देहु अपनी लवो ॥ ९१ ॥

— दोहा —

दया रूप गुन शक्ति जो, भवा भवानी भूति ।
 सो संपति लछमी रमा, है दौलति विभूति ॥ ९२ ॥

इति दकार संपूर्ण । आगैं धकार का व्याख्यान करें हैं ।

— श्लोक —

धर्माधीशं धराधीशं, धातारं धिषणाधिपं ।
शुद्धं बुद्धं सदा शान्तं, धीरं वीरं धुरंधरं ॥ १ ॥
विधुतारि ध्वजाधीशं, धूम्रमार्गादि दूरगं ।
ध्येयं मुनिगणैर्धीरं, धैवंतादि प्रकासकं ॥ २ ॥
सर्वाक्षरमयं देवं, धोमात्राविभासकं ।
धौतरागं विनिर्मोहं, ध्वंसकं पुण्य पापयो ॥ ३ ॥

धः प्रकाशं चिदाकाशं, शुद्धाकाशं प्रभाधरं ।
वन्दे नाशं रमाधीशं, कर्म मर्म निर्वहणं ॥ ४ ॥

— मालिनी छंद —

धरम करम भासै धर्म कौ मूल तू ही,
धरम अतुल तोमैं, आत्म भावा समूही ।
धरम करण रूपा, धर्म है जीव रक्षा,
असति बचन त्यागा, नाथ तेरी जु पक्षा ॥ ५ ॥
धन प्रभु पर कौ जी, चोरियां नर्कि जावैं,
अर परवनिताजी सेययां कष्ट पावैं ।
भल नहि धन लोभा, तू हि संतोष गावैं,
ज्ञान विनु नहि धर्मा, धर्म दासा जु भावैं ॥ ६ ॥
धनपति पति तोकाँ, कंठ शुद्धो जु गावैं,
धनपति नहि तो सौ, तू धनी धर्म भावैं ।
धन निज अनुभूती, और नांही विभूति,
अविचल धन तोपैं, नांही धारैं प्रसूती ॥ ७ ॥
धरणिधर अनादी, तैं धरे शुद्ध भावा,
धनि धनि प्रभु तू ही, है धरनाथ रावा ।
अति गति धनपाला, तू हि है धर्म चक्री,
धनद विसद तू ही, तोहि सेवैं जु चक्री ॥ ८ ॥

- दोहा -

धर्मनाथ धन त्याग को, धनदाता धरमज्ञ।
 अति धनाढ्य तू धवल है, धरमाधिक्ष सुविज्ञ ॥ ९ ॥
 धनुष ज्ञानमय राखै, ब्रह्मबाँन अधहार।
 धनुरद्धर बरवीर तू, कर्म हरन अविकार ॥ १० ॥
 धक् धक् अग्नि स्वरूप तू, कर्मिधन क्षयकार।
 तू हि धनुंजय नाथ है, पवन जीत बलधार ॥ ११ ॥

— चौपड़ी —

धन्वंतरि है वैद्य जु नाम, कर्म रोग हर तू अभिराम।
 अति रोगी हौं दुरबल महा, धज नाहि जु बिभावनि गहा ॥ १२ ॥
 धस्यो मोह घट घर मैं चोर, धस्यो न पापी करत जु भोर।
 लीनों सरवसु पिंड न तजैं, या पकस्यो जिय तोहि न भजैं ॥ १३ ॥
 धजा धार तू त्रिभुवन राव, तैरे द्वार निपख्यो न्याव।
 मोह हरौ द्यावो गुन माल, मोह जीत तुम लोक विसाल ॥ १४ ॥
 धडक काल की कछु हु न रहै, जब जिय चरन सरन तुव गहै।
 धाता ध्याता ध्यानी तू हि, ध्यान गम्य है तू हि प्रभूहि ॥ १५ ॥
 धारण रूप धेय तू देव, ध्यावैं सुरनर मुनि अतिभेव।
 धातु न गात न कर्म न कोय, तू चैतन्य धातु है सोय ॥ १६ ॥
 धाम न गाँम न ठाँम ना जोय, धारावाही सर्वग होय।
 धा कहिये लक्ष्मी कौ नाम, श्रीधर श्रीवर तू अभिराम ॥ १७ ॥
 धारक गुन पुंजनि कौ तू हि, षटकारक मय अमित समूहि।
 धारासम इह भवजल धार, याते वेगि उतारी पार ॥ १८ ॥
 धावत धावत भव वन मांहि, खेद खिन्न हूवो सक नांहि।
 निज पुर कौ दरसावो पंथ, धारहु वात देव निरग्रंथ ॥ १९ ॥

तो विनु धावैं अति गति मांहि, तोहि ध्याय तेरे पुर जांहि ।
 धिषणाधर तू अति बुधिवान, धिषणा कहिये बुद्धि प्रवान ॥ २० ॥
 सब भासै धिषणा दे सही, धिष्ट कर्म टारै प्रभु तु ही ।
 तोहि विसारि करें जड साथ, धिग धिग तिनको जीतव नाथ ॥ २१ ॥
 धीर तोहि ध्यावैं वरवीर, तो सौ धीर न हरइ जु पीर ।
 धरि पपीलिका मारग जीव, धीरां धीरां पावैं पीव ॥ २२ ॥
 मुनिवर पंथ विहंगम धारि, तुरत हि पावैं तत्त्व निहारि ।
 धीत अधीत तुही जगजीत, धीजैं तोहि जु शुद्ध अतीत ॥ २३ ॥
 धीमां धीमां गमन करंत, भूमि निरखि जे पाय धरंत ।
 ते मुनि सीघ्र सिद्ध पुर गहै, तेरे मत करि तो मैं रहैं ॥ २४ ॥
 धीठ करम दंडे तैं देव, धीधन धीर धरैं तुष सेव ।
 धीज पतीज मोह की करें, ते सठ परकति कै वसि परै ॥ २५ ॥
 धी कहिये जु बुद्धि को नांम, बुद्धि हु तोहि न पावैं रांम ।
 बुद्धि परैं तू जप्ति स्वरूप, है चिद्रूप सदा सद्रूप ॥ २६ ॥
 जे हि धीर धी धारैं सेव, पावैं चेतन रूप अभेव ।
 धीरजवंत तु ही भगवंत, धीरज धारि भजैं प्रभु संत ॥ २७ ॥
 धीस अधीस जु धीसुर तू हि, धुर धर्मनि की एक प्रभू हि ।
 तू हि धुरंधर है धुजबंध, धुतकर्मा तू धरइ न बंध ॥ २८ ॥
 धूव तू ही अधूव संसार, तो विनु कौन उतारै पार ।
 धुव उतपाद व्ययात्रय भेद, त्रिक रूपो तू एक अभेद ॥ २९ ॥
 धू कहिये श्रुति मांहि विख्यात, अंग कंप को नांम जु तात ।
 तू अकंप प्रभु हे जु अपंक, धूजैं तोतैं कर्म जु बंक ॥ ३० ॥
 फुनि धू भाख्यौ धौत जु नांम, उज्जल तू हि सुनिश्चल रांम ।
 धू कहिये जु चित्त को नांम, रिधू तू हि मन तै पर रांम ॥ ३१ ॥
 धू एकाक्षर माला विधै, नांव भार को परगट लिखै ।
 तू हलकौ नहि भारौ नाथ, अगुरलधू अति गुणगण साथ ॥ ३२ ॥

धूरि समांन जगत की भूति, चिद्रूपा तेरी हि विभूति।
 धूरि धूसरे मुनिवर धीर, ध्यावैं तोहि हरैं भव पीर॥ ३३॥
 धूत न पावैं भूत जु नाथ, महाभूत ध्यावैं गुन साथ।
 तेरी भक्ति गहै, तजि भर्म, सिर धूर्णैं तव सर्व जु कर्म॥ ३४॥
 धूप न छांह न सीत न धाम, वरखा नहि तैर पुरि राम।
 अमृत वरसै मृत्यु जु हरै, तू ही मेघ महा सुख करै॥ ३५॥
 धूमकेतु सम कर्म प्रजार, धूम न तोमैं तू अतिसार।
 ध्येय रूप तू धेठि वितीत, धेठि हरै धेठिनि की जीत॥ ३६॥
 धेनु काम अर कलप जु वृक्ष, चिंतामणि तुव नाम प्रतक्ष।
 धेनुपुत्र सम मूरिख लोक, तोहि न ध्यावैं तू गुन धोक॥ ३७॥
 धैवंतादिक सप्त जु सुरा, तू हि विकासै नायक धुरा।
 धोटा काहू कौ तू नही, धोक धोक तोकों प्रभु सही॥ ३८॥
 धोरी तू इक और न कोय, धोरी लावैं मुनिवर होय।
 धोवैं तुव भजि पाप जु मैल, तेरे दास लगे तुव गैल॥ ३९॥
 धोखा नहि यामैं कछु देव, हरै भ्रमण तेरी निज सेव।
 धोती नेती आदि जु क्रिया, तू अक्रिय तैर नहि त्रिया॥ ४०॥
 धौत वस्त्र धोती जे धारि, पूजैं तोहि ग्रहस्थ अचारि।
 ते पावैं अनुभव कौ पंथ, तू अनुभव दायक निरग्रंथ॥ ४१॥
 धौ कहिये बंधन को नाम, तैर बंध न तू गुन धाम।
 धौत मला मुनि ध्यावैं तोहि, करुणा करि तारी प्रभु मोहि॥ ४२॥
 धौल लगाय मोह नैं जोर, खोसि लिये गुन इहु अति चोर।
 मेरे गुन द्यावो जगदीस, मोह निवारौ लोक अधीस॥ ४३॥
 ध्वांत हरै अज्ञान जु हरौ, ध्वंस सकल पापनि कौ करौ।
 जीव ध्वंसकर पापी जीव, तोहि भजैं नहि दुष्ट अतीव॥ ४४॥
 धंधा त्यागि भजैं मुनिराय, धंधा मैं हिंसा अधिकाय।
 धः कहिये बंधन कौ नाम, तोमैं बंध नहीं विश्राम॥ ४५॥

धः कहिये धन धान जु नाम, तू सब दायक गुण गण धाम ।
 धान यांन मिष्टान जु आदि, हिंसा कारन वनिज अनादि ॥ ४६ ॥
 दास तजै करुणा उर भजै, करुणा विनु सठ पाप न तजै ।
 पाप तजै विनु भक्ति न होइ, भक्ति बिना प्रभु मिलै न सोय ॥ ४७ ॥

अथ द्वादश मात्रा एक कवित्त में ।

— सर्वैया — ३१ —

धरम कौ नायक है दायक है ध्यान कौ जु,
 धाता धिषणाधिप तू, धीर वीर धुर कौ ।
 धूत नांहि पावै जांहि ध्येय रूप है महा हि,
 धेठि हरै धेठिनि की, गुरु है सुगुरु कौ ।
 सेवै जू सबै जु सुर धैवंत प्रमुख सुर,
 करि कै अलाप चार, गावै पति सुर कौ ।
 धोरी तू हि धौत मल धंध भाव नांहि छल,
 धः प्रकास है अनास, नासक भौज्वर कौ ॥ ४८ ॥

— दोहा —

धर्म स्वभाव जु वस्तु कौ, धर्मी तू निजरूप ।
 तेरी जो धरमज्ञता, चेतन भाव स्वरूप ॥ ४९ ॥
 सो लछिमी गौरी रमा, धा राधा निज भूति ।
 स्यामा गोपी संकरी, सो दौलति विभूति ॥ ५० ॥

इति धक्कार संपूर्ण । आगै नकार का व्याख्यान करै है ।

— श्लोक —

नत्वा नाभिभवं धीरं, ऋषभं ऋषि पूजितं ।
 नित्यं निरंजनं शांतं, नीति मार्ग प्रकाशकं ॥ १ ॥
 नुतं शक्रादिभिर्देवै, नूनं निर्वाण नायकं ।
 नेतारं मोक्षमार्गस्य, नैक रूपं महामुनिं ॥ २ ॥

नोकर्म रहितं शुद्धं, नौका तुल्यं भवांवुधौ ।
नंदितं नः प्रियं देवं, वंदे देविंद्र वंदितं ॥ ३ ॥

— दोहा —

नमो नमो वा देव कौं, चिदधन आनंद रूप ।
पाप परित्यक्त परमानन्द, धर्मेश्वर जग प्रभु ॥ ४ ॥
नकारांक है ज्ञान कौं, नाम जु ग्रंथनि मांहि ।
ज्ञान रूप ज्ञानी तुही, तो सम और जु नांहि ॥ ५ ॥
कहैं नकार निषेद कौं, पाप निषेदै तू हि ।
विधि निषेद दोऊ कथन, भासै जगत प्रभू हि ॥ ६ ॥
नय उपनय भासै तु ही, अनय निवारक देव ।
नवधा भक्ति प्रकाशिकौं, हरैं अन्धकार तुल्य सेव ॥ ७ ॥
नव तत्त्वनि कौं कथक तू, नव दस जीव समास ।
भासै तू हि जु बीस नव, रतन त्रय प्रकास ॥ ८ ॥
नव अधिका प्रभु तीस हैं, ऊरध लोक निवास ।
दास न चाहैं नाथजी, चाहैं तेरो पास ॥ ९ ॥
नव अधिका प्रभु चालीस, नरक पाथड़ा होय ।
परैं नरक मैं दुष्ट धी, भगति न धारैं सोय ॥ १० ॥
नव अधिका पच्चास नर, पदवी त्रेसठि होय ।
हुंडा तैं चउ नर घटे, पद घटियो नहि कोय ॥ ११ ॥
नव अधिका सठि सौ परैं, षडे पुरुष परवीन ।
त्रेसठि इनमें आयया, जिन मारग लवलीन ॥ १२ ॥
नव अधिका सत्तरि प्रभू, ताके दूनें नाथ ।
हैं इक सौ अद्भुतना, प्रकृति न तैरे साथ ॥ १३ ॥
नव अधिका अस्सी प्रभू, कहैं निवासी लोक ।
तू हि निवासी मोक्ष कौ, तो मैं सर्व जु थोक ॥ १४ ॥

नवाँ नौ नवै सही, नवै सागर कोडे ।
 बीते सुमति पछै सही, प्रगटे पदम बहोरि ॥ १५ ॥
 नव नवती सौ लाख प्रभु, कोटि कुलां कौ पाल ।
 जीव दयामय देव तू, हिंसादिक अघटाल ॥ १६ ॥
 नव सै विंजन नाथजी, लक्षण सौ परि आठ ।
 तीर्थकर धारैं सदा, जारै करम जु काट ॥ १७ ॥
 नमोकार जपि तोहि जी, जे ध्यावैं मन लाय ।
 ते नर तेरौ पंथ गहि, आवैं तुव पुरि राय ॥ १८ ॥

— चौपड़ी —

नवल रूप तू अतुलित वृद्ध, नगन दिगंबर धर्म प्रवृद्ध ।
 नग तो सम नहि जग मैं और, नग दायक त्रिभुवन कौ मौर ॥ १९ ॥
 नग परवत तू निश्चल देव, नग तरवर तू सुरतरु एव
 फल छाया मंडित जगदीस, नग रतन जु तू रतन अधीस ॥ २० ॥
 नट सम जीव नच्यो बहु रूप, तेरी भगति बिना जग भूप ।
 वह्यो नदी आसा मैं नाथ, भव नद मैं डूब्यो जु अनाथ ॥ २१ ॥
 नभ सम शून्य हिदै मठ जीव, तोहि न ध्यावैं तू जग पीव ।
 नभ प्रमाण तू अति विसतार, चेतनता कौ पुंज अपार ॥ २२ ॥
 नत कहिये जो नम्रीभूत, तोहि नवैं मुनिवर अवधूत ।
 तू न नवीन पुरातन नाथ, नमसकार तोकौ जगनाथ ॥ २३ ॥
 नय नय अपुनैं पुर मैं विभू, नहि नहि मेरे और जु प्रभू ।
 नलिन समान अलिप्त जु तूहि, नरकांतक है तूहि प्रभूहि ॥ २४ ॥
 नगर अनश्वर दायक देव, नश्वर तू नहि दै निज सेव ।
 नग नायक नागर तू नाथ, नास हरन अति गुन गन साथ ॥ २५ ॥
 नागपती गांवैं गुन ग्राम, नाकपती नावैं सिर राम ।
 नाना दुखहर आनंदरास, नाटक भासक शुद्ध विलास ॥ २६ ॥

नारायण, नारद कौ नाथ, नाव तु ही तारै भव पाथ।
 नांव तिहारै जे नर जपैं, तिनके पाप करम सहु खपैं॥ २७॥
 नाग काल दासैं नहि डसैं, कर्म नाग दासैं लखि नसैं।
 नाग करम कौ नाहर तुही, नाग काल कौ गरड जु सही॥ २८॥
 न्याय शास्त्र कृत स्वांमी तू हि, धर्मशास्त्र भासै जु समूहि।
 नाक लोक दायक तू ईस, शिवदायक तू है जगदीस॥ २९॥
 नागकुमारादिक सब देव, तेरी सर्व हि धारैं सेव।
 नाना रूप एक भगवान, नाटक चेटक एक न आन॥ ३०॥
 नाटसाल जाकै नहि कोय, जाके सिर परि तू प्रभु होय।
 न्याति पाति नाता तजि मुनी, तांता जोरैं तोसों गुनी॥ ३१॥
 नाद वेद कौ भासक तु ही, नाद विंद कौ भेद जु कही।
 नासाग्र जु धरि दृष्टि मुनीस, तोहि भजैं तू है अवनीस॥ ३२॥
 नास्तिक जाहि न पावैं मूढ, तू है अस्ति नास्ति अति गुढ।
 नाल लगै तैरे जो कोय, ताहि उधारै तू प्रभु सोय॥ ३३॥
 नाहर हू तोकों भजि देव, भये दयाल ज्ञान रस खेव।
 निरमांजी निरवांजी नाथ, निरद्वंदी निरमोही साथ॥ ३४॥
 निरावाध निकलंक दयाल, निहकल निरमल अति गुन पाल।
 निरुक्तति निरुपम निर्गुण तुही, गुणी गुणातम गुणपति सही॥ ३५॥
 निरुपद्रव तू है निरमुक्त, नित्य निरंतर देव विरक्त।
 नित्यानित्य कहै सब तूहि, द्वयवादी है तूहि प्रभूहि॥ ३६॥
 निर्निमेष निरनिमित्त अपार, निद्रारहित निजाश्रित तार।
 तत्त्व निलीन निखिल दुखहार, कइ जु निरनय तत्त्व विचार॥ ३७॥
 निमित्त उपादाना सब कहै, तोकों ध्याय निराकुल रहै।
 निराहार निःक्रिय निरग्रंथ, निराभरण देवै निज पंथ॥ ३८॥
 हौं निकृष्ट दुष्ट जु पापिष्ट, तोहि विसारि गहे जु अनिष्ट।
 तू ही तारै दे निज बोध, तो विनु कौन करै प्रतिबोध॥ ३९॥

निरलोभी निरबन्धी गुरु, निरःकण्टक निरआयुध धुरु।
 निरमद निरुतर निरधन धनी, निरजरपति पूजें तजि मनी ॥ ४० ॥
 निराधार निःकिंचन देव, निरधारा आधार अछेव।
 निरागार निजरूप अभेव, निराकार निरलेप सुदेव ॥ ४१ ॥
 तू निष्ठत कनक सम काय, तू निरविघन निराभय राय।
 निगम प्रकासक निगम स्वरूप, निरदोषी अति धर्म निरूप ॥ ४२ ॥
 निःशेषामल शील निधान, निधि अनंत धारै भगवान।
 निरविकार निरवैर निराग, निसप्रेही निश्चय बड़भाग ॥ ४३ ॥
 निरविकल्प निरहिसक निस्व, निस्तुष निरभय नायक विश्व।
 निरारंभ निरसल्य निरकंप, तू हि निरंजन भजहि निलिंप ॥ ४४ ॥
 कहैं निलिंप देव कौ नाम, तू देवनि कौ देव सुरांग।
 निसि दिनि ध्यावैं तोहि मुनिंद, निरखैं वदन तिहारौ इंद ॥ ४५ ॥
 निश्चय अर व्यवहार प्रकास, निरनायक निरमायक भास।
 निरमायल निंदैं श्रुति मांहि, निखल तणों भीड़ी सक नांहि ॥ ४६ ॥
 निखिल उपाधि रहित निज रूप, निरपरमाद निरासय भूप।
 शुद्ध बुद्ध चिद्रूप अरूप, नभनिभ निरमल सर्वग भूप ॥ ४७ ॥
 निभ कहिये जु तुल्य कौ नाम, तेरी तुल्य न कोई रांग।
 माया निसिहर तू दिनकरो, जपैं निसाकर तू तमहरो ॥ ४८ ॥
 काल निसाचर पौरै नांहि, तुव दासनि तैं सब दुख जांहि।
 नर्क निगोद कष्ट नहि लहैं, तेरे दास सुवासहि गहैं ॥ ४९ ॥
 नित्य निवास तु ही अनिवास, श्रीनिवास स्वांमी अतिभास।
 तेरी प्रतिनिधि दूजौ नहीं, निधि निधान अनिधन तू सही ॥ ५० ॥

— मंदाक्रांता छंद —

नीरा दूरा, अतिगति तू ही, तोहि मूढ़ा न लेवैं,
 पावां तेरे, भंवर जु मुनी, नीरजां मानि सेवैं।

नीरा नाही, तुव सम प्रभू, दाह मेंटे जु तू ही,
नीचा तेरी, भगति न लहैं, साधु सेवैं समूही ॥५१॥

नीको तू ही, निज गुण मई, नीतिवानो प्रभू ही,
नीरागो तू, जगपति जती, नीठि पैए जु तू ही।
नीली भाजी, बरजित कहै, नीलि निंदे जु तू ही,
नीसाना जे, अति गुन मई, तू हि धरै समूही ॥५२॥

नीवा बोर्यें, कर नहि चढै, नाथ आमा फलाजी,
नीचा देवा, भजिहि न मिटै, काम क्रोध छलाजी।
औसी जाने, भवि जन भजैं, तोहि कीं ह्वै अनन्या,
नीरा देखैं, निजमहि सदा, तोहि कीं ते हि धन्या ॥५३॥

— दोहा —

नीलांबर कहिये हली, हलधर पूजै तोहि।
नीड नाम घर कौ सही, तैर घर नहि होहि ॥५४॥
ईहां कोय प्रश्न जु करै, हलधर अंबर नील।
क्यों धरैं ते अति चतुर, इहै रंग अवहील ॥५५॥
ताकौ उत्तर है इहै, नीलि रंगे नहि होय।
रतन मई पावन महा, धरै हलधर सोय ॥५६॥
नींद भूख तैर नही, दूषन भूषन नाहि।
नीलांबर तारक तु ही, गुन अनंत तो पाहि ॥५७॥
उच्च जाति हू तोहि तजि, नीच हौंहि दुख रूप।
नीच जाति हू तोहि भजि, उच्च हौंहि सुख रूप ॥५८॥
नुति नति इंद्रादि करै, श्रुतिजु करें मुनिराय।
नुद नुद उर अंतर तिमर, ज्योति रूप अधिकाय ॥५९॥
नुद कहिये दूरि जु करौ, भ्रांति हमारी देव।
अनुपम निरुपम भक्ति दै, करें निरंतर सेव ॥६०॥

मुनि सुरपति अहिपति भज्यां तू ऊंचौ नहि नाथ।
 ते ऊंचा हैं तो जप्यां, तू अनंत गुन साथ ॥ ६१ ॥
 नूतन नाहि पुरान तू, नून भाव तोमैन।
 नून निश्चय रूप तू, द्वय वादी दोमैन ॥ ६२ ॥
 विरहति परहति विधि कहै सरा दोष इस नाहि।
 हरे नूनता जीव की, गुन अनंत तो माहि ॥ ६३ ॥
 नूपर सम वाचालता, जौ लगि तो न लहत।
 तोहि लह्यां अनुभव दसा, मौन रूप एकत ॥ ६४ ॥

— गाथा छंद —

नेता नाम नियंता, कहै नियंता जु प्रेरको जो है।
 तू प्रेरक भगवंता, प्रेरै निजभाव निज माहै ॥ ६५ ॥
 नेदीयान जु नीरै, तू नीरै दूरि नाहि कवहु भी।
 तू काहु हि न पीरै, दूरा तू जीव घातिनि सौं ॥ ६६ ॥
 नेज तिहारी बांनी, काहै संसार कूथी।
 जीवा नेम धारि जे प्रांनी, तोहि जपै तेहि जम जीतै ॥ ६७ ॥
 नेमि नाम है धुर कौ, धुर धर्मनि की तु ही हि जग धोरी।
 तू ही गुरु सुरनर कौ, नेमि प्रभू नेम कौ मूला ॥ ६८ ॥
 नेत्र त्रिलोकी कौ तू, नैको एको तु ही अनेकांतो।
 नाथ अलोकी कौ तू, नैन गिनै तोहि मुनिराया ॥ ६९ ॥
 नैन तिहारै ज्ञाना, निरखै लोका अलोक निशेषा।
 नैक स्वभाव प्रधाना, नानाभावा लखै तू ही ॥ ७० ॥
 नोइंद्री नोचिता, नोकर्मा नाहि भाव करमा हू।
 नोधामा नोविता, अति विता तू हि अति धामा ॥ ७१ ॥
 नौ कहिये पूरण कौं, पूरण तू ही तू ही प्रभु नौका।
 भव सागर तारण कौं, तो विनु कोई नही दूजा ॥ ७२ ॥

नौपाधिक है तेरा, रूप महा ज्ञान पिंड है तू ही।
 मलमय पुदगल मेरा, कैसे तोकाँ छुवै स्वामी ॥ ७३ ॥
 नंदन तू नहि काकाँ, नंदन वन कौ धनी तू ही स्वामी।
 नंदन नाँम जु ताकाँ, जाहि लखें होय आनंदा ॥ ७४ ॥
 नंदौ विरधौ स्वामी, निंदा थुति दोय तुल्य दास गिनै।
 परनिंदा नहि कांमी, जपहि विरांमी प्रभू तोकाँ ॥ ७५ ॥

— छंदः —

नः असमाकं देव, देहू तू निज पदभक्ती,
 नः असमाकं नाथ, नाहि चाहिये भव भुक्ति।
 असमाकं कौ अर्थ, हम हि तू तारि जिनेसा,
 भ्रमण मेटि जगदीस, तिमर हर तू हि दिनेसा।
 भय भव जु भ्रांति हरि जोगिया, हरिजू अंधता नादि की,
 दै दिव्य चक्षु जोगीसुर, पर परणाति हरि वादि की ॥ ७६ ॥

अथ द्वादश मात्रा एक कवित्त में ।

— सर्वैया - ३१ —

नमो नमो देव तोहि, नाथ सेव देहु मोहि,
 निपट निरंजन तू, नीरजो, अनंतरा।
 नुति नुति करै साध नूनता हरै अगाध,
 नेह त्यागि देह तैं, रटैं मुनि निरंतरा।
 नैक रूप एक रूप, नोविभावभाव तोमैं,
 नौपाधिक नौका प्रभू और नां पटंतरा।
 भव जल तारक तू, नंदन तिहारे सब,
 नः प्ररूप एक रूप बाहिज अभंतरा ॥ ७७ ॥

— दोहा —

तेरी नित्य विभूति जो, मा पदमा अनुभूति।
 सत्ता शक्ति शिवा रमा, दौलति संपति भूति ॥ ७८ ॥

इति नकार संपूर्ण ।

इति श्री भक्त्याक्षर मालिका वाचनी स्तवन अध्यात्म बारहखड़ी नाम ध्येय उपासना तंत्रे सहस्रनाम एकाक्षरी नाममालाद्यनेक ग्रन्थानुसारेण भगवद्भजानंदाधिकारे आनंदोद्भव दौलतिरामेन अल्प बुद्धिना उपायनी कृते टकरादि नकारांत प्ररूपको नाम त्रितीयः परिच्छेद ॥ ३ ॥ आगैं पकार का व्याख्यान करै है ।

— श्लोक —

परमानंद संयुक्तं, पापापेतं महेश्वरं ।
प्रियं पिनाकि संसेव्यं, प्रीत्यप्रीति विवर्जितं ॥ १ ॥
पुण्यं पुण्यगुणोपेतं, पूतदेहं प्रभास्वरं ।
प्रेक्षणं सर्व लोकस्य, पैशून्यादि निषेधकं ॥ २ ॥
पोत तुल्यं भवांभोधौ, पौरषान्वितमीश्वरं ।
पंडितं पंडितैर्वद्यं, पः प्रकासं नमाम्यहं ॥ ३ ॥

— दोहा —

पकारांक आगम बिषै, पवन तनीं है नाम ।
पवनजीति मनजीति मुनि, तोहि भजैं गुन धाम ॥ ४ ॥
पवनागम मैं भेद सहु, मंडल मुद्रा मंत्र ।
सुर नाडी तत्वादि के, बीज सहित शिव तंत्र ॥ ५ ॥
रेचक पूरक कुंभका, त्रिविध जु भेद बिचार ।
प्राणायाम करैं बुद्धा, मन जीतन को सार ॥ ६ ॥
नव द्वारि को रोक सुर, काढहि दसम दुवार ।
मन बांधैं सुर रोकिकै, योगी योग प्रचार ॥ ७ ॥
मन बसि करि ध्यावैं तुझैं, आत्म रूप बिचार ।
लहहीं परम समाधि को, योगी स्वरस बिहार ॥ ८ ॥
बहुरि प्रगट रण रंग जो, ताको नाम प्रकार ।
तू रण ऋण तैं रहित हैं, त्रिभुवन बल्लभ सार ॥ ९ ॥

प्रभव प्रजापति तू प्रभू, परमेसुर परवीन।
 प्रणव प्रणेता परम गुर, परम जोति रस लीन ॥ १० ॥
 परम तत्व परमात्मा, परम ज्ञान परमज्ञ।
 परमेष्ठी परतर प्रगट, परम धाम अति विज्ञ ॥ ११ ॥
 परम रूप परमार्थी, परम पुरिष भगवान।
 परम विद्य परतक्ष तू, परम हंस अनिज्ञान ॥ १२ ॥
 प्रज्ञानिधि प्रबुधात्मा, प्रथित प्रथीपति नाथ।
 परम परापर तू प्रद्युर, परमानंद अनाथ ॥ १३ ॥
 परमदेव परसिद्ध तू, प्रजापाल दुखटाल।
 परम पवित्रातम तू ही, परम प्रताप विशाल ॥ १४ ॥
 परिग्रह त्यागि मुनी भजैं, परमब्रह्म की रूप।
 सो परब्रह्म विसुद्ध तू, आप हि आप स्वरूप ॥ १५ ॥
 परम प्रीति दासा करें, परम प्रतीति जु धारि।
 पर देवो निज देव तू, परिणामी अविकारि ॥ १६ ॥
 परणति परणामनि थकी, कबहू नाहि विभिन्न।
 पक्षपात रहितो प्रभू, पक्षांतर प्रतिपन्न ॥ १७ ॥
 प्रथम प्रथम परिमित तुही, प्रणमें सुरनर पाय।
 परम स्वच्छंद प्रतिष्ठितो, प्रथीयान अतिकाय ॥ १८ ॥
 प्रत्यग्र जु कहिये नवल, नित्य नवल तू नाथ।
 परम परापति भक्ति तुव, तू तारै भवपाथ ॥ १९ ॥
 परमोदय परवान तू, हूँ प्रक्षीण जु बंध।
 तोहि भज्यां निज पुर लहैं, तू ही सिद्धि प्रबंध ॥ २० ॥
 प्रकृति परै निज प्रकृति तू, परम प्रशस्त दयाल।
 नय प्रमाण निक्षेपतैं, परै तू हि जगभाल ॥ २१ ॥
 परम प्रकास्य प्रकासको, अतुल प्रकास विकास।
 पद अंबुज सेवैं मुनी, मधुकर भाव विभास ॥ २२ ॥

पगि पगि निधि दासांनि कौ, दास निरीह निकांम।
 तेरी पख विनु और पख, राखें नाहि विरांम॥ २३॥
 पगे नही विषयनि विषै, पगे तोहि मैं धीर।
 पणधारी तू पार कर, अपठपाठ अतिवीर॥ २४॥
 पख पख मास उपास धरि, तप करि मुनिवर धीर।
 मन इंद्री अवरोध करि, तोहि भजें वरवीर॥ २५॥
 भजन विना अति तप करै, तौउ न कर्म हनेय।
 भजन सहित तप आदरै, भव जल कौ जल देय॥ २६॥
 परचा प्रगट जु रावरै, तारै अमित अपार।
 पतिराखन दासांनि की, तू जगपति अविकार॥ २७॥
 पदवीधर सेवैं तुझैं, लहैं उच्चता सेय।
 तू हि पदारथ परम हैं, तुव भक्ति तोहिं लहेय॥ २८॥
 पवि कहिये प्रभु बज्र कौ, बज्री तेरे दास।
 परतखि देव परोक्ष तू, भज्यां कटै जम पास॥ २९॥
 प्रतिमा तेरी पूजि है, देवल तेरौ पूजि।
 प्रतिमा तैं विपरीत जे, तिनकै तोतैं दूजि॥ ३०॥
 परम पयोनिधि गुननि कौ, प्रमित रहित जगदीस।
 पल पल मैं मुनि ध्यांवही, मुनि तारक तू ईस॥ ३१॥
 पल भक्षण सम पाप नहि, याते करुणा नास।
 करुणा विनु कुगति लहैं, करुणा भगती प्रकाश॥ ३२॥
 पष्ट किये सब कर्म तैं, पुष्ट किये सब धर्म।
 परम प्रफुल्लित वदन तू, अति प्रसन्न विनु भर्म॥ ३३॥
 प्रतिविंवित तोमैं सबै, तुव प्रतिविंव जु पूजि।
 दिढ जु प्रतज्ञा धारि कैं, पूजहि दास अदूजि॥ ३४॥
 प्रवचनसार जु तूही, समयसार अविकार।
 तेरी प्रवचन सुनि प्रभू, पांवहि भक्ति बिचार॥ ३५॥

पट घट रहित जु सुघट तू, घट पटादि परकास ।
 दिगपट सेवहि तोहि कौं, तू ही निपट विलास ॥ ३६ ॥
 पाः कहिये सिद्धांत मैं, पान वस्तु कौं नाम ।
 अनुभव अमृत पान है, सो तू पावै राम ॥ ३७ ॥
 पाः कहिये फुनि नाथ जी, पावा वालो जोहि ।
 सो तू ही औरैन को, पावै अमृत सोहि ॥ ३८ ॥
 पाता त्राता पालक जु, पाप निवारक देव ।
 पारस तू कंचन करै, पातिग हरइ अछेव ॥ ३९ ॥
 पास अपासि सुपास तू, पात्र जु पात्र वितीत ।
 पावन पारेतम तु ही, पासि हरन जगजीत ॥ ४० ॥
 पात्र दातृ दान जु विधी, सकल विभासै तू हि ।
 करः दासः सावैः सुखैः तू भव नाज प्रभू हि ॥ ४१ ॥
 पारख तो सम और नां, परखै सरव जु भाव ।
 पारंकर पाठिक तु ही, प्राण नाथ भव नाव ॥ ४२ ॥

— छंद बाल —

प्राणनि कौं रक्षक तूहि, ध्यावैं सब तोहि समूही ।
 जो पारणाभिका भावा, सो निश्चै शुद्ध स्वभावा ॥ ४३ ॥
 तो ही तैं जानहि भव्या, पावैं नहि जाहि अभव्या ।
 तू प्राज्ञः प्रज्ञाधारी, पारखंड निखारै भारी ॥ ४४ ॥
 पारखंडी तोहि न पावैं, तेरे मत तोमैं आवैं ।
 सुख सत्ता अर चैतन्या, अवबोधादिक जे धन्या ॥ ४५ ॥
 निश्चै प्राणा तू धारै, इंद्रि सुख दुख्य निवारै ।
 प्राणिनि कै प्राणा कहिये, इंद्र्यादिक सो नहि लहिये ॥ ४६ ॥
 तेरे हैं शुद्ध स्वभावा, लहिये नहि एक विभावा ।
 तू प्राग्रः प्राग्रो है, ताकौं इह अर्थ धरो है ॥ ४७ ॥

तू दुःपरवेंस रहस्या, पावैं निजदास अवस्या।
 प्रभु पाशुपता पशुपति कौं, सेवहि पारवती पति कौं ॥ ४८ ॥
 पारवती अर पशुपति भी, तोकौं ध्यावैं गणपति भी।
 पशुपति धारहि तुव सेवा, पशुघन पावैं नहि भेदा ॥ ४९ ॥
 पशुघन दुरगति कौं पावैं, पशुकरमी तोहि न गावैं।
 पशुकरमी मैथुन कारा, पशुकरम जु मैथुन भारा ॥ ५० ॥
 पशु हू तुव भजि सदगति कौं, पावहि प्रभु त्यागि कुमति कौं।
 पागो मुनि तो महि धीरा, लागे तुव गुन में वीरा ॥ ५१ ॥
 पावैं नहि कर्म विपाका, तू धारक शुद्ध रमा का।
 पाघ न छौंगा कछु वस्त्रा, भूषन एको नहि शस्त्रा ॥ ५२ ॥
 अदभूत राजा तू जोगी, नहि जोग एका अति भोगी।
 भोगा नहि इंद्रो विषया, आनंद भोग श्रुति लिखिया ॥ ५३ ॥
 पाछौं नहि कवहू होइ, तू अग्र अग्रणी सोई।
 तू पाटधार जगराजा, अदभुत जोगी भव पाजा ॥ ५४ ॥
 पारे न परैं कर्मनि के, तुव दासा विनु भर्मनि के।
 नहि पाठ पठंतर कोई, तू अदभुत पाठिक होई ॥ ५५ ॥
 नहि पात न कंद न फूला, फल हू न भखैं व्रतमूला।
 सब में लिखि आतमरामा, निरवैर रहैं गुन धामा ॥ ५६ ॥
 पाथोधि गुननि कौ तू ही, सुर पादप तू हि प्रभू ही।
 पादप है वृक्ष जु नामा, पाथोधि समुद्र सुधामा ॥ ५७ ॥
 पार्थिव सेवैं तुव पावा, पार्थिव कहिये नर रावा।
 है पाक सासनो इंद्रो, तेरो दासा जु महेंद्रो ॥ ५८ ॥
 मुनि पाद मूल तुव सेवैं, तोकौं भजि शिवपुर लेवैं।
 में महापातकी मूढ़ा, सेये पापी अति रूढ़ा ॥ ५९ ॥
 पावन हैं तोकौं सेये, हैं पार भक्ति तुव लेये।
 पाभर पावैं नहि भेदा, अध्यात्म तू हि अभेदा ॥ ६० ॥

प्रायश्चनादिक गावैं, तपभेदभाव अति भावैं।
 तेरौ सौ पाप न कोई, धारै दूजौ नर होई ॥ ६१ ॥
 पायो तेरौ जव मरमा, तव भागे सर्व जु भरमा।
 पाल्यो जव सर्व जु धर्मा, टाल्यो जव सर्व अधर्मा ॥ ६२ ॥

— छंद वेंगरी —

प्रियः प्रियकर पिक जित बैनां, तू पिनाकि पूजित जगनैनां।
 नावं पिनाकी शंभू कैये, पिक कोईल कां नाम जु लैये ॥ ६३ ॥
 पित्त वाय कफ सर्व हि रोगा, नाम लियें नासैं दुख भोगा।
 पिडच न चाप न तैरे गोपा, अदभुत धनुरन्तर विन कोपा ॥ ६४ ॥
 पिठर समान देह मैं जीवा, कर्म अग्नि करि तपिउ सदीवा।
 तेरी भगति हि तपति निवारै, परम शान्तता भाव जु धारै ॥ ६५ ॥
 तु पिधानतैं रहित जु देवा, निरावर्ण प्रगट जु अतिभेवा।
 पिता पितामह तू हि सबों का, सुगनर विद्याधर जु मुन्यों का ॥ ६६ ॥
 प्रिया पुत्र परिवार न तैरें, कमलापति निज परणति नैरें।
 पिवहि जिके तेरी निजवांनी, जित पियूष अमरण पद दानों ॥ ६७ ॥
 छकहि स्वरस मैं विकल्प दूरा, थकहि आपमें आनंद पूरा।
 पिसैं ज्ञान जंत्रै सब कर्मा, लसैं अनंता आत्म धर्मा ॥ ६८ ॥
 पिव पिव भव्या निज रस शुद्धा, जाकरि जीव होय अतिबुद्धा।
 अैसे वैन तिहारे स्वांमी, जे पीवैं ते धन्य सुधांमी ॥ ६९ ॥
 प्रीति जु अप्रीती नहि दोऊ, वीतराग तू अदभुत होऊ।
 प्रीति करैं तोसों जे जीवा, तिन हि न पीरें कर्म अतीवा ॥ ७० ॥
 पीक समान जगत की भूती, पीप भर्यो इह देह प्रसूती।
 इनतैं प्रीति त्यागि जे जीवा, तोहि भजैं ते हैं जग पीवा ॥ ७१ ॥
 पीठि देय सब जग सौं नाथा, तोहि जु ध्याऊं तजि सहु साथा।
 कबहु पीठि देंहु नहि तोही, मोहि सुधारि देव निरमोही ॥ ७२ ॥

पीठ नाम सिंहासन होई, चमर छत्र सिंहासन सोई।
 तोहि फवै तू त्रिभुवन राजा, प्रीणय भव्य लोक भव पाजा ॥ ७३ ॥
 पीतांबर तू अतुल अभिषेक, लीयो अंजन शून्य अंगेवा।
 परम समाधि ध्यानमय तू ही, पीतांबर पूजित जु प्रभु ही ॥ ७४ ॥
 पीहर जीव मात्र कौ स्वामी, सब कायनि कौ रक्षक नामी।
 ज्ञान यंत्र में कर्म जु पीसैं, तिनकीं तेरे निज गुन दीसैं ॥ ७५ ॥
 पीत न सेत न रक्त न स्यामा, हरित नही तू अवरण नामा।
 पीतामृत तू अजर अमृत्यु, तोहि ध्याय जीतैं मुनि मृत्यु ॥ ७६ ॥

— छंद मोती दांम —

पुराण पुनीत पुराण जु सार, तु ही पुरसोतम है अविकार।
 महा पुरुषत्व पुराधिपराज, नही प्रभु पुण्य अपुन्य समाज ॥ ७७ ॥
 तु ही पुरदेव सबै पुरनाथ, तु पुष्कल रूप अनंत जु साथ।
 तु ही सु पुरातन पुष्टिद पुष्ट, भजैं पुरहुत महारस तुष्ट ॥ ७८ ॥
 तु ही जु पुरंदर नाथ अनादि, भजैं मुनि तोहि पुलाक जु आदि।
 कहैं पुरहुत पुरंदर इंद, सु तोहि भज्यां सब लेहि अनंद ॥ ७९ ॥
 दवै जु हियो सरवै प्रभु नैन, पुलकित होय सरीर सु चैन।
 सुतोहि लख्यां सब भ्रान्ति पुलाय, सुपुण्य जु रासि तु ही सुखदाय ॥ ८० ॥
 कहैं प्रभु पुण्य पवित्र जु नाम, तु ही सुपुनीत महामति राम।
 तु ही पुरुषारथ भासइ च्यारि, तु ही पुरिखा सबकौ मुझ तारि ॥ ८१ ॥
 करौं जु पुकार तिहारहि द्वार, रुल्यो बहुतौ अव दै ततसार।
 तु ही प्रभु पुण्य भजैं सब लोक, नहीं जु पुरां नव तू गुन थोक ॥ ८२ ॥
 पुलिन्नि महीं निवसैं मुनिराय, वसैं गिर गह्वर में जतिराय।
 वसे वन मांहि करैं तुव ध्यान, न तो सम आन तु ही अतिज्ञान ॥ ८३ ॥

न पुत्र न पौत्र न धाम न गांम, सुपुस्तक मांहि तु ही अभिराम ।
 जु पुच्छ विना तिरजंच जिकेहि, भजैं नहि तोहि जु मूढ तिकेहि ॥ ८४ ॥
 वृथा करि फूलि धरैं जु गुमान, सु चूटिहि जाय जु पुष्प समान ।
 नही तुव दास करैं प्रभु मान, चहैं न विमान गहैं तुव ज्ञान ॥ ८५ ॥
 नही पुनरुक्त जु तू हि कदापि, भजैं हि पुनर्पुन धीर अलापि ।
 तु पुष्करसौ निरलेप मुनीस, अकास तनीं इह नाम भनीस ॥ ८६ ॥
 कहैं फुनि पुष्कर नाम तडाग, तु ही सर सौ तपहा रसभाग ।
 तु ही इक पूजि नही पर पूजि, महा अतिपूरव तु ही जगदूजि ॥ ८७ ॥
 न पूत न नाति हि तू निजरूप, अपूरव पूरव तु जगभूष ।
 तु ही परिपूरण पूरण ज्ञान, सुपूठि न देह सुनीं भगवान ॥ ८८ ॥
 करौ प्रभु हौं अतिपूत जु कार, हरे हमरे गुन मोह अपार ।
 सु रंचक दै करि इंद्रिय भोग, ठग्यो मुझकीं लखि मूरख लोग ॥ ८९ ॥
 अवैं करि न्याव गुना धन द्याव, तु ही जगदाव सुन्यौ अतिभाव ।
 जु पूछि तिहार हि द्वार महंत, तु ही जगपूजित नाथ अनंत ॥ ९० ॥
 हमारी ही देह महाहि मलीन, महा अति पूति जु गंध अलीन ।
 भजैं तुव नाथ पुनीत जु होइ, करौ अति पूत प्रभू तुम सोय ॥ ९१ ॥
 तु ही इक प्रेष्ट जु और न कोइ, महा अति इष्ट सुअर्थ जु होय ।
 महा इक प्रेषण तू हि दयाल, करैं अति प्रेम मुनीस विसाल ॥ ९२ ॥
 तु ही प्रभु प्रेम अपेम वितीत, तु भक्त जु वच्छल देव अतीत ।
 कहैं प्रभु रुद्र हि प्रेत जु नाथ, जपैं तु हि रुद्र सुगौरि हि साथ ॥ ९३ ॥
 तु पेखहि देखहि लोक अलोक, तु ही इक पेड धरैं बहु थोक ।
 लगै जग लोक सुपेठ इलाज, भजैं नहि मूढ तुझै महाराज ॥ ९४ ॥
 सुपैठि रहे परपंचनि मांहि, जु पैसिहि माचक मैं सक नांहि ।
 करै अति पैसुन्यता जगजीव, तुझै नहि पांवहि तू जग पीव ॥ ९५ ॥
 जुपै रहि भक्ति रसाधिक मांहि, तिके भव पार लहैं सक नांहि ।
 लहैं नहि भक्ति सुपैमुनि धारि, सुदुष्ट स्त्रभाव महादुखकारि ॥ ९६ ॥

निभी इह पैज तिहारि सदाहि, जु ले सरनीं तुम द्यो शिव ताहि।
 सुपोथिनि मांहि तुम्हारि ही कित्ति, तु ही गुन पोषक है अति सत्ति॥ ९७॥
 कहै तु हि प्रोषध युक्त उपास, धरे प्रभु पोसहि ध्यांवहि दास।
 जिके नर पोषहि इंद्रिय स्वाद, तिके नहि पांवहि भक्ति प्रसाद॥ ९८॥
 मुनीसर पोस जु मावनि मास, रहैं तटिनी तट भोग उदास।
 सुग्रीषम मांहि रहैं गिरसीस, सुचातुरमासहि वृक्ष तलीस॥ ९९॥
 करे तप तोहि जपे अघनासि, लहैं पद केवल ज्ञान विलासि।
 विना तुव भक्ति तपा फल नून, महातप तेज तु ही हि अनून॥ १००॥
 तु ही अति पोरिस पोषन हार, सुनीं इक बात भवोदधितार।
 जु फोट महा दुरगंध तनीहि, धरी हमरै सिरि औसि वनीहि॥ १०१॥
 महा सठ मोह न छांडहि पिंड, भमावहि लोक महैं जु अखंड।
 तु ही हमरौ करि ऊपर नाथ, करे निरबन्धन दै निज साथ॥ १०२॥
 तु ही इक पौरिष रूप अथाह, तु ही प्रभु पौरव नागर नाह।
 भजैं तुव पौरि सुरासुर सर्व, भजैं नरनाथ तजे सहु गर्व॥ १०३॥
 नहीं प्रभु पौरि न खाइ हि कोट, न साथ न संग न आन दपोट।
 सबै धर तूहि सबै हि वितीत, अजीत सजीत अभीत अतीत॥ १०४॥

सोरठा —

पौलोमी कौ नाथ, अर पौलोमी तुव रटैं।
 तू ही अति गुन साथ, पौत्र न पुत्र न नारि नां॥ १०५॥
 इंद्राणी कौ नाम, पौलोमी पंडित कहै।
 जयैं निरंतर धाम, तेरौ पौलोमी सदा॥ १०६॥
 खीण भयो अति नाथ, रोगी नादि जु काल कौ।
 तू अनंत बड हाथ, पौष्टिक भाव सु दे मुझैं॥ १०७॥

दीपा —

पंजर नाम शरीर कौ, तेरै पंजर नाहि।
 पंच शरीरनि तैं रहित, चिदघन गुन तन मांहि॥ १०८॥

पंगा अघत धारका, चरन रहित अविवेक।
 ते तेरे परसाद तैं, पांवहि चरन विवेक॥१०९॥
 तु ही पुंडरीकाक्ष है, प्रभु पंचत्व वितीत।
 ज्ञानानंद सु पिंडं तू, पंक रहित जगजीत॥११०॥
 पंकज चरन जु मुनि भमर, सेवैं तन मन लाय।
 पंथ प्रकासक एक तू, पंथी भक्त निकाय॥१११॥
 पंच महाव्रत धारका, इंद्रिय पंच निरोध।
 पंद्रह त्यागि प्रमाद जे, ध्यांवहि चित्त विसोधि॥११२॥
 पंच अधिक प्रभु चालीसा, लख जोजन परमान।
 सिद्ध सिला है सासती, सोहि तिहारौ थान॥११३॥
 पंचास जु लक्षा कहे, कोडि उदधि परवान।
 ऋषभ पछैं इतनें दिननि, प्रगटे अजित सुजान॥११४॥
 सुर्ग सोलमें आय है, देविनि की उतकिष्ट।
 पंच अधिक पंचास पलि, तू भासै जग इष्ट॥११५॥
 पंच साठि प्रकती प्रभु, चौदह के हैं भेद।
 मिलि अठबीस तिराणवै, नाम प्रकति अति खेद॥११६॥
 तेरे एक न पाइए, प्रकति परैं तू होय।
 अविनासी आनंद मय, केवल रूप जु कोय॥११७॥
 पंच अधिक सत्तरि सहस, ताके आधे जोय।
 सर्व प्रमाद न तो बिधै, निह प्रमाद तू होय॥११८॥
 पंच अधिक असी प्रकति, जरी जेवरी तुल्य।
 ते हू खपाय सुकेवली, सिद्ध जु हौंहि अतुल्य॥११९॥
 पप्पा पासि दु सुन्य है, अंतिम मात्रा जोहि।
 तू सब मात्रा मांहि है, चिनमात्रो प्रभु होहि॥१२०॥

अथ आरा मात्रा एक सबैया में।

परम प्रसिद्ध देव, पावन जु दै स्व सेव,
अतिहि प्रियकर तू प्रीतम प्रसिद्ध है।
पुलिन में बैठे साथ तेरी ही करें अराध,
पूतातम पूजि एक तू ही अनिरुद्ध है।
प्रेम तोसों कीजे नाथ और तैं जु कौन साथ,
पैसुन्य न भाव तोमैं एक न विरुद्ध है।
पोषक न तोमौ और पौरिष अपार तोमैं,
पंथ देहु आपुनीं तु पः प्रकास शुद्ध है ॥ १२१ ॥

— दोहा —

तेरी पदमा शुद्ध जो, निज सत्ता निज शक्ति।
सोई कमला लक्ष्मी, दौलति संपति व्यक्ति ॥ १२२ ॥

इति पकार संपूर्ण। आगैं फकार का व्याख्यान करें है।

— श्लोक —

फकाराक्षर कर्त्तार, फलदाता रमीश्वर।
सर्वमात्रामयं धीरं, वंदे देवं सदोदयं ॥ १ ॥

— दोहा —

फकारांक सिद्धांत मैं, झंझा पौन सु नाम।
पौन न झंझा पाइए, नाथ तिहारै ठाम ॥ २ ॥
बहुरि फकार कहैं बुधा, भय रक्षण की नाम।
तू भयहर भवहर प्रभू, चिदधन आतमरांम ॥ ३ ॥
इति भीति सब दूरि हैं, लेत तिहारौ नाम।
डरै दास के दास साँ, भय भाजै तजि ठाम ॥ ४ ॥
स्तुति हू कौश्रुति मैं कहैं, नाम फकार प्रवांन।
स्तुति तेरी गनधर करें, सुरनर करें सुजांन ॥ ५ ॥

कंद नाराय —

कहैं प का टकार हू फकार कौं हि अर्थ ही,
 सुसोर होय जोर सो प का टकार है सही ।
 नहीं जु सोर जोर हैं जहां तु ही विसजड़ी,
 तुझै जपैं सुईसरा उपाधि सर्व भाजई ॥ ६ ॥

फवै हि सर्व तोहि कौं, दवैहि मोह तोहि सौं,
 किये अनंत पार तैं, टरै मतीहि मोहि सौं ।
 प्रभू फटिक्खसारि साकरे सुभाव निर्मला,
 भजैं जु तोहि साधवा सवै हि पाप दर्मला ॥ ७ ॥

फला लहैं जु तोहि तैं अनश्वरा अनंत जी,
 विभुक्ति मुक्ति दायको तु ही त्रिलोक कंतजी ।
 वृथा तनीं हि फल्यु नांम, तू न फल्यु भासई,
 कहै सुतत्त्ववारता तु ही सवै प्रकासई ॥ ८ ॥

फलैं न कर्म पादपा जवै अग्यान दुष्फला,
 करैं हि दास दग्ध बीज रूप ताहि निष्फला ।
 फणाधिपा सुराधिपा नराधिपा तुझै भजैं,
 अनादि काल के जु कर्म दासतैं परे भजैं ॥ ९ ॥

फटै न फूटई कभी स्वभाव भाव जीव को,
 तु ही कहै इहै स्वरूप नाथ है सदीव कौं ।
 फला दला न फूल कंद रावरे जनाभखैं,
 तजैं हि जीभ स्वाद कौं दयाल भाव ते रखैं ॥ १० ॥

फंदकतौ फिरै हि चित्त ले विषै सवाद कौं,
 भजैं न तोहि मूढ धी लग्यो महाविवाद कौं ।
 तु ही सुधारि आप में लगावई महा प्रभू,
 फल्यो जु फूलियो सदा तु ही तरु महाविभू ॥ ११ ॥

फणी जु काल रूप है इसै न नाथ दास कौ,
 फसैं न मोह में मुनीस छाँडि नाथ पास कौ।
 फस्यो अनादि काल कौ सु आत्म फसाव में,
 निकास होइ तोहि तैं जु आवई स्वभाव में॥१२॥

— छंद त्रिभंगी —

फरहरहि पताका, नाथ रमा का, करम विपाका, तू हि हरै,
 है अति फलदाता, फलित विख्याता, त्रिभुवन त्राता, बोध करै।
 कित हू नहि फसियो, अति गुण लसियो, निजगुनबसियो, तू हि प्रभू,
 फणपति अति गावैं, गुन मन लावैं, सुर सिर नावैं, जगत विभू॥१३॥

— सवैया-३१ —

मोह कौ फरफराट मेटै तू जगतराट,
 पाटधारी तू विराट नायक अनूप है।
 दायक स्वभाव कौ सुजायक अनंतभाव,
 लायक अनंत नाथ, आनंद सुरूप है।
 फासि काटि कंठ की अज्ञानता सुरूप जोहि,
 डारी मोह चोर नैं हमारै दुखरूप है।
 जीव कौ दयाल तू क्रिपाल है विसाल लाल
 राखि छत्र छाये में तु ही अनुप भूप है॥१४॥

चुभी जु फांस हीयमें मिथ्यात भाव रूप देख
 माया औ निदान बंध रूप जो विरूप है।
 सम्यक स्वभाव चिमुटा तैं काढि फांस नाथ
 चैन देहु दास कौ तु ही दयाल रूप है।
 फारातोरी नाहि तेरे, फारितोरि डारै अघ,
 फारिक विभाव तैं तु ही प्रियूष कूप है।
 फाल चूकौ नादि कौ फस्यौ जु फासि माहि मैं ही
 तू ही काढि फासि तैं क्रिपाल तू अनूप है॥१५॥

फाकी तेरे सूत्र की हरै अनादि रोगनिकाँ,
 फकै मायामोह काँ सुचूरण स्वरूप जो।
 जीव के असाध्य रोग, जन्म जरा मृत्यु सोग,
 सब ही नसावै देव ऐसी है निकूप जो।
 याकाँ करें सेवन जु साधु सब बाधा जीत,
 याकाँ जस गावैं सुरनाग नर भूप जो।
 दोष सब कटै यातैं, तेरीई प्रसाद इहै,
 औषध काँ दायक तू वैद है निरूप जो ॥ १६ ॥

फाकी लेय औषध की पथ्य जे रहैं सदीव
 अभष अहार त्यागि तजैं जू कषाय काँ।
 जीभ बसि राखैं अर नारी सौं न नेह राखैं
 अल्प अहार लेय राखैं दिढ काय काँ।
 तवै रोग कटैं नाथ कबहू न करें साथ,
 कल्प काय हौंहि जीति पित्त कफ वाय काँ।
 बहुतनिकाँ रोग हत्यो इहैं जाची औषध जु
 फाकी देहु याकी देव हरै जू अपाय काँ ॥ १७ ॥

फाफ मारते जु काम क्रोध लोभ मोहादिक
 जीव लोक जीति कै सु सूरवीरपन की।
 तेरे दास देखत ही भाजि गये छांडि खेत,
 सनमुख भये नाहि बुद्धि त्यागि रन की।
 दासनि नैं लोक हू उधारे तुव दास करि
 काल तैं वचाये रीति पाली जु सरन की।
 इहै रीति देखि कै जु कायर लखे विभाव,
 भ्रांति सब नासि गई भव्यनि के मन की ॥ १८ ॥

फाटि टूटि जाय सो तौ पुगल काँ रूप सब
 फाटिवी न टूटिवी न जीव मांझ देखिये।
 ऐसी भेद तोही तैं लह्यौ जु भव्य जीवनि नैं
 तू ही है सफार परिपूरण विसेषिये।

स्फार कौ अरध विसतीरण कहें मुनीस
तू ही विसतीरण अनंत रूप पेखिये।
गुन है अनंत औ अनंत परजाय तैरे,
सकति अनंत महिमा अनंत लेखिये ॥ १९ ॥

जाइयता अनादि की सुसीतकाल गीति सम
भव्यनि कै दूरि होय तेरेई प्रसाद तैं।
फागुन सौ सम्यक जु प्रगटै तवै हि नाथ
ज्ञानरवि तेज लहै, तेरे स्यादवाद तैं।
ध्यानानल ताप गहै, विमल स्वभाव लहै,
फूलैं गुन फूल आते छूटैं जू विषाद तैं।
जीव भंखरी जु सोई सुख मकरंद लेय,
स्यामता नसावै नाथ छूटै जु विवाद तैं ॥ २० ॥

चारित जो चैत्र सम प्रगटै तवै जु वेगि
त्यागि लोक कानि जब स्वेच्छता विहार ही।
ऋतुराज सम मुनिराजता प्रगट होय
दिन दिन तप कौ प्रभाव अति धार ही।
परमत भाव मास वैसाख जु मिटि करि
जेठपन होय अति सुचिभाव सार ही।
सांवन समान मनभावन पुनीत भाव,
झर लावैं अमृत कौ अतुल अपार ही ॥ २१ ॥

भादव समान भद्रभाव सुकलो जु होय
सरद समान तव केवल उपाव ही।
सीत चौकरी न फेरि उपजै कदापि काल,
कालतैं वितीत होय जाल मै न आव ही।
सिद्धि ऋद्धि वृद्धि औ समृद्धि कौ भरयो अनंत
आप रूप होय करि आप रूप पाव ही।
भ्रमण न भ्रम सु कदापि शुद्ध कौ न होय
अध्यातम जोग इहै तू ही एक गाव ही ॥ २२ ॥

— दोहा —

फागुन कातिग अर प्रभू, मास अषाढ हु मांहि ।
 शुक्ल पक्ष त्रय मास मैं, वसु दिन वृत्त करांहि ॥ २३ ॥
 अष्टमि तैं पून्यों सुधी, इहै अठाई होय ।
 तू हि प्रकासै नाथ जी, सिद्ध गुननि परि सोय ॥ २४ ॥
 फिरयौ अनंती जौनि मैं, तो बिनु दीनदयाल ।
 अब फिरिवाँ सब मेदि तू, दै निज ज्ञान विसाल ॥ २५ ॥
 फिरि फिरि विनऊँ नाथजी, भ्रमण न फिरि फिरि होय ।
 सो निजवास दयाल जी, देहु क्रिया करि सोय ॥ २६ ॥
 फिल्ल पारयो तैं ही मोह, पावै फिसकाय भोवि,
 तो सौँ लरि सकै नाहि, चोरनिकौ रावही ।
 फिट्ट फिट्ट कीचे तैं हि राग दोष भाव सब,
 दासनि पै भागि जांहि सकल विभाव ही ।
 फीटी वात तेरे दरवार मैं न दीखै कोऊ,
 फीटी वात कीचें नाथ तू न हाथ आव ही ।
 फुनि फुनि कहाँ मेरी भ्रांति हरि दास करि,
 तेरा दास होय सो तुझै तुरंत पाव ही ॥ २७ ॥

— दोहा —

फुटकर गुन तेरे नही, गुन अनंत इक रूप ।
 फूटि फाटि नहि गुननि मैं, शक्ति अनंत स्वरूप ॥ २८ ॥
 फूलि धरैं भव भाव मैं, मूरिख लोग अयांन ।
 फूलि धरैं तुव भक्ति लहि, ज्ञानवंत गुनवांन ॥ २९ ॥
 फूल पांन नहि जोग्य है, ब्रह्म व्रतिनि कौ देव ।
 ब्रह्मचर्य के शत्रु ए, त्यागहि दास अभेव ॥ ३० ॥
 फूँकि फूँकि पग मुनि धरैं, धारैं दया अछेव ।
 तेरे दास उदासते, भव भोगनि तैं देव ॥ ३१ ॥

फूस तुल्य भव भोग ए, कण रहिता जड भाव ।
चाहैं पसु सम नर तिन्हें, दासनि कै नहि चाव ॥ ३२ ॥
चाव एक तुव भक्ति कौ, दास धरैं अतिभाव ।
फेन तुल्य भवभूति, जिनकै नाहि उपाव ॥ ३३ ॥

— सर्वैया इकतीसा —

फेन सम माया और काया है तडित सम,
बादर की छाया सम जाया जग जाल है ।
इंद्र चाप तुल्य भोग्य भावना विनश्वर जो,
बुद बुद जल के समान धनमाल है ।
यामैं नाहि सार कोऊ सार एक तू हि होऊ,
तारि भव सागर तैं तू हि दुख टाल है ।
फेरी जग मांहि देत वीत्यो जु अनंत काल,
फेरि फेरि कहूं कहा जगत प्रपाल है ॥ ३४ ॥

— सोरठा —

फैलि रह्यो सब मांहि, फैल न एक धरै तु ही ।
जिनकै फैकट नाहि, तेई तोहि लहैं प्रभू ॥ ३५ ॥
फेन न एको कोय, जैन प्रकासक तू सही ।
वैन सुधा से होय, फोरे तैं हि अनंत अध ॥ ३६ ॥
फोरा सर्व मिटैहि, फौरे ही से भजनतैं ।
कर्म कलंक कटै हि, तोतैं सर्व कल्याण है ॥ ३७ ॥

— दोहा —

फौरि जु मोहादिकन कौ, मेटैं तेरे दास ।
फौज त्यागि हैं एकले, काटैं कर्म जु पास ॥ ३८ ॥
फंद न तैरे एक हू, फंद रहित निरुद्ध ।
छंद अलंकारादि सब, तू भासै जग चंद ॥ ३९ ॥
पखो फंद मैं मैं महा, तू छुडाय प्रभु मोहि ।
फंद जु काटि स्वछंद करि, कहाँ कहा अति तोहि ॥ ४० ॥

फरसी सम्यक् बोध की, नाथ राखै हाथ।
 क्यों न फंद काटौ प्रभू, क्यों न देहु निज साथ ॥ ४१ ॥
 फः कहिये ग्रंथनिविषै, फूतकार कौ नाम।
 फूतकार सरप जु करै, विष भरियो अघ धाम ॥ ४२ ॥
 नाम मंत्र तुम्हरी रटें, सर्प माल सम होय।
 फः कहिये फुनि नाथ जी, निःफल भाषा सोय ॥ ४३ ॥
 निःफल तेरी भजन नां, फलदायक तू देव।
 दासनि कै कछु काम नहि, निहकामा रस खेव ॥ ४४ ॥
 फः प्रवेस कौ नाम है, तोतैं ज्ञान प्रवेस।
 फः कहिये फुनि कलह कौं, कलह रहित मुनि भेस ॥ ४५ ॥
 कलह तजै विनु ज्ञान नहि, ज्ञान विना न अनंद।
 ज्ञानानंद स्वरूप तू, अदभुत परमानंद ॥ ४६ ॥

अथ बारा मात्रा एक कवित्त मैं।

फल कौ जु दायक तू नायक फणंद कौ जु
 फासि तैं निकारि अर फिरिबौ मिटाय तू।
 फीटी बात मूढ करि फुनि फुनि धरैं देह
 दास तैरैं हैं विदेह कर्म तैं छुडाय तू।
 फूस तुल्य भोग भाव फेन तुल्य भूति राव
 फैकट भर्यौ जु लोक शुद्ध रूप राय तू।
 फौरै तू विभाव भाव, फौरि हरै फौरिनिकी,
 फंद विनु फः प्रकास नाथ सुखदाय तू ॥ ४७ ॥

— दोहा —

तेरी नाथ सफारता, अति विसतीरण शक्ति।
 सोई पदमा मा रमा, संपति दौलति व्यक्ति ॥ ४८ ॥

इति फकार संपूर्ण। आगैं बकार का व्याख्यान करै है।

— श्लोक —

बुद्धिमानं महाबाहुं, विश्व विद्या कुलगृहं ।
वीतरागं विनिर्मोहं, बुद्धं शुद्धं प्रभाधरं ॥ १ ॥
बू मात्रा भासकं धीरं, खेद सिद्धांत रूपिणं ।
धैर्यतेय निभं वीरं, कर्म नाग निवर्हणे ॥ २ ॥
बोध रूपं चिदानंदं, बौद्धादि मत दूरगं ।
बंदे धीरं सदा शांत, निर्ग्रंथं बः प्रकासकं ॥ ३ ॥

— दोहा —

ब्रह्मनिष्ठ ब्रह्मन् तू, है ब्रह्मज्ञ दयाल ।
परब्रह्म परमात्मा, ब्रह्म निदेसक लाल ॥ ४ ॥
ब्रह्म शब्द के अर्थ बहु, भगवत मोक्ष सुज्ञान ।
शील जीव श्रुति द्विजकुला, एते ब्रह्म बखान ॥ ५ ॥
बहुश्रुत विश्रुत बस्तु तू, तैरे नाहि अबस्तु ।
बहु जीवनि कौ पारकर, तू बहुत परशस्त ॥ ६ ॥
ब्रह्म योनि निरयोनि तू, बध बंधन तैं दूर ।
ब्रह्म वचन प्रतिपाल तू, आनंदी भरपूर ॥ ७ ॥

तुंद त्रिभंगी --

बक सम कपटी जे, धन झपटी जे, अध लपटी जे, तुव न लहैं ।
मुनि हंस समाना, कपट न जाना, उज्जल ज्ञाना, तुव जु गहैं ।
निरमल जो भावा, अति निरदावा, अतुल प्रभावा, प्रभु इक तू ।
सरवर अमृत भर, तपहर तपधर, दुखहर सुखकर इक त्रिक तू ॥ ८ ॥
मुनि हैं बनबासा, तजिधर बासा, बिबिध बिलासा, तोहि जपैं ।
लखि सब मैं तोहि, है निरमोही, तोहि जु दोही, साध तपैं ।
फुनि बन जल नामा, जलजित रामा, अति अभिरामा चिदधन तू ।
जित बनज सुखरणा, आनंदकरणा, हरइ जु मरणा सुखतन तू ॥ ९ ॥

बहु बलभद तारे, अतिबल धारे, ब्रणिक हु तारे, भव जल तैं ।
 तू बिप्र उधारा, क्षत्रिय तारा, जगत उधारा, निजबल तैं ।
 अति बनियां ठनियां, श्रीगुर भनियां, जगगुर गनियां, जग राजा ।
 बलि जांहु तिहारी, गुनबपु भारी, तू भवतारी, भव पाजा ॥ १० ॥

थिरचर कौ बर्मा, अतुलित धर्मा, रहित जु कर्मा, अति मर्मी ।
 बजांग जु स्वांमि, भयहर नांमी, मृदुतर धांमी, अतिधर्मी ।
 कर्मनि कौ तोरै, अघमद मोरै, अपुनैं जोरै, अति राजै ।
 बल्लल गुन धारै, भगत उधारै, पाप प्रहारै, अति छाजै ॥ ११ ॥

ब्रतधर अति ध्यावैं, गुन गन गावैं, मुनि लव लावैं, धरि समता ।
 अतिब्रत परायन, तू मन भायन, निज सुखदायन, प्रभु रमता ।
 बहु बस्तु जानैं, भ्रांति जु भानैं, भव्य जु मानैं, इक तोकाँ ।
 करम जु बटपारा, हरि भवतारा, करि भव पारा, प्रभु मोकाँ ॥ १२ ॥

— दोहा —

बाद बिबाद न तो बिषै, बाह्याभ्यंतर एक ।
 बहिरातम पावैं नहीं, तू एको जु अनेक ॥ १३ ॥
 सब बाहिर सब मांहि तू, बाल न पावै तोहि ।
 बाला रहित अतीत तू, श्रीधर दै शिव मोहि ॥ १४ ॥
 ते ब्राह्मण जे तुवं भजैं, तोहि तजैं ते निंछ ।
 निराबाध जगदीस तू, श्री भगवंत सुबंछ ॥ १५ ॥
 बाग सबन तुव गुनि कैं, ता सम और न कुंज ।
 कुंज बिहारी देव तू, रमैं अतुल गुन पुंज ॥ १६ ॥
 बापी सरवर नहि तटिनि, तेरे पुर में नाथ ।
 सुख सरवर नखर तू ही, गुन समुद्र अति साथ ॥ १७ ॥
 व्याह बिना नारी सकल, तू बरजै जगनाथ ।
 व्याहत नारी हू तजै, तब पावै तुव साथ ॥ १८ ॥
 बासी भोजन जे भखैं, ते न लहैं तुव भक्ति ।
 भक्त न श्रुति वर्जित गहैं, बिषयनि में नहि रक्त ॥ १९ ॥

द्वै महूर्त दिन जब रहै, ब्यालू तब ही जोगि ।
 रात्रि न भोजन उचित है, तू बरजै हि अजोगि ॥ २० ॥
 ब्याल नांव है दुष्ट गज, ब्याल नांव है नाग ।
 अहि न डसै गज हु नसै, तुव दासा बडभाग ॥ २१ ॥
 ब्याघ्रादिक लखि दास कौं, दास हौं हि तजि गर्व ।
 सुरनर असुर जु खेचरा दासहि सेवहि सर्व ॥ २२ ॥
 काल करम रागादिका, पीरि सकैं नहि एहि ।
 तो औसौ दूजौ कवन दासनि कौं दुख देहि ॥ २३ ॥
 बास रहित तू बसि रह्यो, निश्चि आपुन माहि ।
 व्यवहारैं सब ज्ञेय मैं, तू हि बसै सक नाहि ॥ २४ ॥
 बासुदेव पूजित तूही, बासुपूज्य जग पूज्य ।
 व्याकरणादिक भास तू, अव्याकृत जग दूज्य ॥ २५ ॥
 बादीगर कौ बानरा, मोहि जु कीयो मोह ।
 ज्यों हि नचावैं त्यों नचौं, इहै मोह अति द्रोह ॥ २६ ॥
 बाट बहंता नाथ जी, उपनौ अति गति खेद ।
 अब निज पुर कौ पंथ दै मोहि करौ निरखेद ॥ २७ ॥
 बांनो तेरी सुनत ही, बहुतनि खोयो खेद ।
 तेरी बानि पियूष है, परम स्वरस अतिबेद ॥ २८ ॥
 वारी तेरी फलि रही, जाकैं बारि न कोय ।
 फल पावैं प्रभु तोहि करि, तू फलदायक होय ॥ २९ ॥
 बिगरी बात सुधारि तू, तो विगारि न कहूं चैन ।
 बिक्यौ अचेतन हाथ हूं, अब दै सम्यक नैन ॥ ३० ॥
 बिरही नादि जु काल कौ, लही नहीं निज शक्ति ।
 बिर्यौ बिर्यौ करि नर भयो, दै नरहरि निज भक्ति ॥ ३१ ॥
 बिरला तोकौं पावही, भव बिष हरि जगनाथ ।
 विजय जीव की तोहि तैं, विलै होत अघसाथ ॥ ३२ ॥

विविध अवलोकनभाव तू, विनाद विद्वत् जगदेव ।
 निरविकार निरलेप तू, दै स्वांमी निज सेव ॥ ३३ ॥
 तू बिहाय सम निरमलो, तिष्ठै सर्व विहाय ।
 तैरे योहि बिहावई, स्वरस छक्यो अधिकाय ॥ ३४ ॥
 तू बितर्क तैं बेग लौ, युक्ति जु सर्व प्रकास ।
 तोहि बिसारि जु हौं भय्यौं, अव दै भक्ति बिलास ॥ ३५ ॥
 तू हि बिदारै सर्व अघ, तू हि विडारै भर्म ।
 तू बिस्तार सुरूप है, निस्तारक निज धर्म ॥ ३६ ॥
 तू बिचार जोगीनिकौ, निज बिहार विसफार ।
 सकल विभाव वितीत तू, हरइ बिभीति अपार ॥ ३७ ॥
 बिनजारी निरबांन कौ, मोटी सारथबाह ।
 बिनज निजातम वस्तु कौ, तैरे अतुल अथाह ॥ ३८ ॥
 मेरी बिकरै तव परै, तू पकरै जब हाथ ।
 बीबा तैरे पासि है, तू हि बतावै नाथ ॥ ३९ ॥
 बीहैं नाहि कदापि हू, तेरे दास अभीत ।
 तू बीचार वितीत है, बीजभूत जगजीत ॥ ४० ॥
 तोहि वीसरथां भव भमें, तुव भजियां भव मुक्ति ।
 भुक्ति मुक्ति की मात जो, दै देवा निज भक्ति ॥ ४१ ॥
 जिह्वा भूषन भजन है, बीरा भूषन नाहि ।
 बीरा नाम तँबोल कौं, लौकिक भाषा मांहि ॥ ४२ ॥
 बीरा सील ब्रतीनि कौं, उचित न होय कदापि ।
 भोग मूल हैं पुष्पदल, तू वरजै श्रुति थापि ॥ ४३ ॥
 बीर धीर बरवीर तू, बीजाक्षर परकास ।
 योगी योग विलास तू, ध्यानारूढ विभास ॥ ४४ ॥
 काया माया बीजली, सम क्षणभंगुर होय ।
 तोहि भय्यां अविनश्वरा, लहिये लक्ष्मी सोय ॥ ४५ ॥

बींट तूटियां फल गलै, मोह गल्यां सब कर्म।
 मोह बीज है जगत कौ, जाकरि उपजै भर्म ॥ ४६ ॥
 बीधौ सीधौ भक्ष नां, अणगाल्यो जल निंद्य।
 धर्म रीति सब तू कहै, अति प्रबुद्ध जग बंद्य ॥ ४७ ॥
 बुध तोकों पांवहि प्रभू, अबुध न पावैं नाथ।
 बिबुध बंद्य जगबंद्य तू, अति अनंत गुन साथ ॥ ४८ ॥
 बुरी भली सब ही तजी, जग करनी जग मूल।
 भजी भक्ति जब रावरी, तब भागी सहु भूल ॥ ४९ ॥
 नहीं बुलायो आव ही, नहीं पठायो जाय।
 स्वयं तू ही है सर्वगत, प्रभू जगत कौ राय ॥ ५० ॥
 बूझै सारी बात तू, सूझै तोकों सर्व।
 छूटै अमृत धार तू, हरै जगत कौ गर्व ॥ ५१ ॥
 बूढ़ें भवजल में सठा, बिना तिहारी नाव।
 जिन बूझ्यो तोकों प्रभू, तिन खोये भ्रम भाव ॥ ५२ ॥
 गह्यो बेठि सारू मुझै, कर्म मिले बहु जोर।
 पोट धरी दुरगंध की, मेरे सिरि अति धोर ॥ ५३ ॥
 गन्यो वेसरी सौ मुझे, लाद्यो वोझ अनंत।
 निरदय टोली अति मिली, तू छुडाय भगवंत ॥ ५४ ॥
 बेता सर्वजु भाव कौ, कहूं कहा जु बनाय।
 बेहा बीता तो बिना, अब सब भर्म मिटाय ॥ ५५ ॥
 न्याति तिहारी में सही, तुम राजा बलवान।
 नाथ छुडावो बेठि तैं, सुनि विनती भगवान ॥ ५६ ॥
 जड जु बेठि सारू गहे, राज तिहारे मांहि।
 चेतन कौं विपरीति इह, नाथ रीति इह नांहि ॥ ५७ ॥
 वेद नांव सिद्धांत कौ, तू है वेद प्रकास।
 है निरवेद अभेद तू, बैठौ सब कै पासि ॥ ५८ ॥

बैवस्वत हर विश्वधर, कर्म रोग हर देव ।
 वैदक रीति प्रकास तू, वैद तु ही जु अछेव ॥ ५९ ॥
 बै निश्चय कौ नाम है, निश्चै रूप जु तू हि ।
 बोध निधान सुज्ञान तू, बोध प्रमान प्रभू हि ॥ ६० ॥
 बोहथ भव की तू सही, प्रतिबोधक भवि जीव ।
 तारै तू हि जु और नां, सुखदायक जग पीव ॥ ६१ ॥

— छंद मालिनी —

तुझ हि नहि पिछानैं, शून्यवादी जु बौधा,
 लहहि न बिपरीता, नूढ़ पाखंड सौधा ।
 करहि पर विघाता, ते न तोकों जु पावैं,
 सकल जन दयाला भक्त तोकों हि गावैं ॥ ६२ ॥
 तव निकट जु ऋद्धि, सिद्धि कौ सिंधु तू ही,
 रहित सकल बंधो, मोक्ष मूलो प्रभू ही ।
 चिदघन चिनमात्रो, शुद्ध भावो अनादी,
 अचलित परभावो, लोक बंधू जु आदी ॥ ६३ ॥

— सादृल विक्रोडित छंद —

बंधा बंधन तू हि काटि शिव दे, तू नासई बंकता ।
 पावैं नाहि जु बंचका प्रभु तुझैं, तैरे नहीं संकता ।
 माता दासनि की हि पुत्रवति है, औरि जु बंध्या समा ।
 तू ही नाथ अनाथ पार करणो, धारै अनंतो रमा ॥ ६४ ॥

— दोहा —

बिंध्याचल पुर सम गनैं, गिनैं गुहा घर तुल्य ।
 है उदास भव वास तैं, दास जपैं जु अतुल्य ॥ ६५ ॥
 विंताकादिक बिजना, तेरे दास भखैंन ।
 और हु वस्तु अभक्ष जे, तिनकों कबहु चखैंन ॥ ६६ ॥

बंदौ तोहि दयालजी, बंदौ तेरे दास।
 बंदौ तेरे सूत्र जी, भक्ति ज्ञान परकास ॥६७॥
 बबा पासि दु सुन्य है, अंतिम मात्रा एह।
 सब मात्रा में एक तू चिनमात्रो जु विदह ॥६८॥

अथ द्वादस मात्रा एक कवित्त में।

ब्रह्म परब्रह्म तू ही, बाल बृद्ध युवा नाहि,
 बिगरी सुधारै नाथ जीव की अनादि की।
 बीर बुद्ध शुद्ध तू ही, छूटै बूढ़ आनंद की,
 बेद सूत्र भासक प्रकासै रीति आदि की।
 बैनतेय सारिखी जु कर्म नाग नासिवे काँ,
 बोध कौ निधान रीति भाषै स्यादवाद की।
 बौद्ध नाहि जानै भेद बंदनीक तू अबेद,
 बः प्रकास है अनास धारै रीति दादि की ॥६९॥

— दाहा —

तेरी नाथ जु बस्तुता, सोई सत्ता शक्ति।
 संपति भूति विभूति जो, दौलति निज छति व्यक्ति ॥७०॥

इतिश्री बकार संपूरण। आगे भकार का व्याख्यान करै है।

श्लोक —

भव्यांभोरुह मार्जंड, भानु कोटि जित प्रभं।
 भिन्नं रागादिभिर्भीति, नाशनं भुक्ति मुक्तिदं ॥१॥
 भूतनाथं जगन्नाथं, भेदाभेद प्रकाशकं।
 भैरवादि पतिं धीरं, सर्व भैरव तापहं ॥२॥
 भोगातीतं महाभोगं, सार्वभौमं महेश्वरं।
 भंगुरैर्भव संभूतै, भविष्यैर्वर्जितमीश्वरं ॥३॥

भः प्रकाशं चिदाकाशं, सर्वाधारं सदोदयं।
वंदे देवेन्द्र वृंदाचर्य, योगिनं भोगिनं विभुं॥४॥

— दोहा —

भव्यनि कौ तारक तु ही, भव सागर की पोत।
भर्ता त्रिभुवन कौ प्रभू, जाकै गत न भोत (गोत)॥५॥
भयहारी भगवंत तू, श्री भगवानं सुजान।
भद्र भद्रकृत भरित तू, ज्ञान भवन गुनवान॥६॥
तु ही भवान्तक भ्रम हरै, करै भलाई नाथ।
भरलौ तुहो भजन जु किधौ, भव तारै बडहाथ॥७॥
भव तेरौ हू नाम है, होय स्वभाव स्वरूप।
तू भदंत गुनवंत है, भगत बछिल शिव रूप॥८॥
भगति तिहारी भवि करै, अभवि न पावै भक्ति।
भुक्ति मुक्ति की मात जो, दै निज भक्ति सुव्यक्ति॥९॥
भर्म नांव कंचन तनों, कनक कामिनी त्यागि।
भगति करै मुनिवर महा, एक तोहि मैं पागि॥१०॥
भद्रिक परिणामी लहैं, कुटिल लहैं नहि तोहि।
गुन भरिता हूँ तो भज्यां, दै सेवा प्रभु मोहि॥११॥

— त्रोटक छंद —

भव भजन तू भवि रंजन है, भरतादिकतार निरंजन है।
भय कौ भयकारिज ईश तु ही, भणियों न भणायउ पंडित ही॥१२॥
भगवानं विनां दुख कौन हरै, भगवंत तु ही भव पार करै।
भक्तभूर करै अवकर्म तु ही, भरपूर तु ही सुख पिंड जु ही॥१३॥
नहि भानु जु और तु ही रवि है, जगभास करो जु महा कवि है।
अतिभाव तु ही मनभावन है, बडभाग तु ही अति पावन है॥१४॥

अति अमृत भाग अखाधि तु ही, तह भासक काध अखाध रही ।
 अविभाग अखंडित शुद्ध तु ही, अतिभार धुरंधर आप सही ॥ १५ ॥
 गुन भाजन भाजिसनू जु तु ही, अतिभास अभास प्रकासक ही ।
 गुन ग्राम सुरासुर नाग नरा, पढ ही जु भये सम भाट धुरा ॥ १६ ॥
 जग कौ प्रभु भाल दयाल तु ही, इह भाहि निवारइ तू हि सही ।
 गुनभाग सुभाग हकार सबै, कहही इक तोहि त (तैं) पाप दखै ॥ १७ ॥
 सब वृद्धि जु हांनि लखै इक तू, अति ही भिषको इक है त्रिक तू ।
 अति रोग हरै अति भिन्न तु ही, अति है जु अभिन्न स्वभाव सही ॥ १८ ॥
 भिरि है न भिर्यो तुव दासन सौं, जडधी जु विमोह अबासन सौं ।
 भिलि है न भिलै भिलियो कवही, तुव भावनि मांहि विभाव नही ॥ १९ ॥
 नहि भींट सकैं तुझैं जन ए, तन है दुरगंध चला मन ए ।
 नहि भीति विभीति सुदासन कौं, अतिभीम तु ही अघ नासन कौं ॥ २० ॥

— दोहा —

भी कहिये भय कौ प्रभू, तू हि अभी भयहार ।
 भीरु नांम कायर तनीं, दास अभीरु अपार ॥ २१ ॥
 भीनें तोमैं जोगिया, भीतरि बाहिर एक ।
 भीख जु मांगीं तोहि पै, शुद्ध स्वरूप विवेक ॥ २२ ॥
 भीर परैं नहि दास कौं, तू हि सहाई नाथ ।
 भील हु तो जपि सदगती, पावैं तू बड हाथ ॥ २३ ॥
 भीच्यो मोहि अपार जी, तनु यंत्र जु मैं डारि ।
 मोह महा निरदय मिल्यो, अव भव संकट टारि ॥ २४ ॥

— अरिल छंद —

भुवनेश्वर जगराय छुडावै मोहि तू,
 है त्रिभुवन कौ तात रह्यो अति सोहि तू ।
 भुक्ति मुक्ति दातार, भक्ति दै रावरी,
 लगी नादि की देव भ्रांति हरि बावरी ॥ २५ ॥

भुगतें विनु छूटें न कर्म शुभ अशुभ जो
जग में, जीवनि कै जु लगि रहे सुलभ जो।
तेरी भक्ति सुबन्दि काठ प्यों क्षय करै,
कर्म कलक सबै जु भाँके तैं अति डरै ॥ २६ ॥

दास जु चाहैं भक्ति भुक्ति तैं काम नां,
भुक्ति कहावै इंद्र पदी सुखबासनां।
भुक्ति फणिंद पदी हु चक्रि पदई प्रभू,
तेरे दास गिनैं हि निकम्मी सहु विभू ॥ २७ ॥

तु भुवनाधिप नाथ, भुजंगाधिप पती,
अतिगति जीभ बनाय सेस ध्यावै अती।
भुवन माँहि तुव कित्ति तु ही है अति गुना,
तोहि जपैं बडभाग मुनीसर तत चुना ॥ २८ ॥

— छंद भुजंगी प्रयात —

भुजंगी प्रयातारि छंदा सबै ही, तु ही जो वखानैं सदा दोय नैं ही।
तु ही भूत भूद्भूत भावो सुरूपा, तु ही भूति रूपो विभूति सुरूपा ॥ २९ ॥
प्रभू तात मातू अभूतो अभूही, महाभूत भूतेश्वरो है प्रभू ही।
सदा भूपती तू हि भूरीश्वरो वा, विभू है सुभूतीश्वरो थीश्वरो वा ॥ ३० ॥
तजे भूलि ध्यावैं मुनीसा, तुझै ही तु ही देव भूतारथो शुद्ध है ही।
जिके नास्तिका भूतवादी अयाना, तुझै नाँहि गावैं तिके नां सयाना ॥ ३१ ॥

— सारठा —

तजि बहिरंगा भूति, चिदघन रूपा तैं धरी।
तो माँहैं सुविभूति, भूत्यंतर तू देव है ॥ ३२ ॥
हैर भूख अर प्यास, जग भूषण तू देव है।
अति भूषित अति भास, भूरि अनंत सुगुन तुही ॥ ३३ ॥
भूष न दंडै जाहि, चोर न वाकैं पैसई।
करै आपुनों ताहि, तू हि प्रभू ताकौं न भै ॥ ३४ ॥

भू प्रथ्वी कौ नांम, भू कहिये उपजै जिको ।
 प्रथ्वीपति तू रांम, उत्तपति मरण न राखरै ॥ ३५ ॥
 भूत सुभंगल नांम, भूत मंगलकरी तू सदा ।
 भूत आतमांम, तू परमात्म जीवपति ॥ ३६ ॥
 कहैं सत्य कौ भूत, भूतारथ निश्चै करा ।
 तू है सत्य प्रभूत, सत्य तिहारौ धर्म है ॥ ३७ ॥
 भूत अतीत जु काल, तू त्रैकाल्य प्रधान है ।
 भूत जु इंद्रि लाल, इंद्रि मन तोहि न गहैं ॥ ३८ ॥
 उपजै जाकौ नांम, भूत कहैं श्रुति धर नरा ।
 तू हि स्वयंभू रांम, उपज्यो उपजायो नही ॥ ३९ ॥
 भूत जु विंतर भेद, भूत जु भागैं नांम तैं ।
 भेष रहित अतिवेद, भेद अभेद अवेद तू ॥ ४० ॥
 भेद जु डेडर नांम, भेक तुल्य मैं मूढ मति ।
 कैसैं पांऊं रांम, थाह सुगुन सागर तनों ॥ ४१ ॥
 भेट चित्त करि तोहि, ध्यावैं मुनि ममता हरा ।
 भेद रहै नहि कोहि, तेरै साधुनि साँ प्रभू ॥ ४२ ॥
 भेजे तैं हि अनंत, शिवपुर कौ जगनाथजी ।
 भेज चढै भगवंत, तेरै द्वारै जगत की ॥ ४३ ॥
 भेरि दमांमां देव तेरै, देवल अति वजैं ।
 सुरनर धारैं सेव, अति अछेख अवनीस तू ॥ ४४ ॥
 भैरव भाव न कोय, भेषज भव की तू सही ।
 तू अति भोगी होय, आनंद रस कौ भोगता ॥ ४५ ॥
 भोला लोक अयांन, तोहि त्यागि औरहि भजैं ।
 गनियें सोइ सयांन, तुव भजि त्यागै जगत कौ ॥ ४६ ॥

भोगी सर्प जु नाम, भोग फणनि कौ नाम है।
 सर्प हु शुभ गति राम, पावैं तेरै नाम तैं ॥ ४७ ॥
 भोग जगत के नाथ, झूठे सर्वहि सार नहि।
 भोग त्यागि तुव साथ, करहि जती अतुलित व्रती ॥ ४८ ॥

— इंद्र वज्रा छंद —

न सुर्ग चाहैं न छहैं विभूती, न नाग लोका नहि चक्रिभूती।
 न ऋद्धि सिद्धी परजोग भूति, न सार्वभौमीभुज की विभूती ॥ ४९ ॥
 नही जु इष्टा न अनिष्टा चाहैं, निहकाम भक्ता शिव हू न चाहैं।
 पगे जु तोमैं प्रभु, ह्वैं अनन्या त्वत्पाद धूली प्रतिपन्न धन्या ॥ ५० ॥

— सौरठा —

भौतिक लहैं न तोहि, जे आरंभी अति सठा।
 दै जगदीसुर मोहि, निहकामा भगती महा ॥ ५१ ॥
 भौंदू तोहि विसारि, विचरैं भवमाया विषैं।
 भंगुर भूति जु डारि, तोहि न सेवैं जडमती ॥ ५२ ॥
 भं नक्षत्र जु नाम, नक्षत्रनि कौ पति ससी।
 ध्यावैं तोहि सुधाम, सब नक्षत्र हु तुव भजै ॥ ५३ ॥
 भंग न तूहि अर्भंग, भंग भाव तेरै नहीं।
 भ्रांति न तू अति रंग, नाहि दुभांति जु तो विषै ॥ ५४ ॥
 भव मद भजै सोय, जो तेरी सगन जु गहै।
 भंस न कवहु होय, जो तोकौं तन मन रटै ॥ ५५ ॥

छप्पय —

भः कहिये श्रुति मांहि, भ्रमर कौ नाम जु होई,
 भ्रमर रूप मुनिगाय, सम्यकी अति व्रत जोई।
 चरन कमल प्रभु के हि ध्याय अनुभौ रस पीवैं,
 करि जु स्यामता दूरि, शुद्ध ह्वैं तोहि जु छीवैं ॥ ५६ ॥

भजि चरन कमल जग जाल तजि,
 आंखहि तुव पुरि भविजना।
 अति अमल अतुल तुव गुन सुभजि,
 अजर अमर हैं सुखतना ॥ ५७ ॥

अथ द्वादस मात्रा एक कवित्त मैं।

— सवैया ३१ —

भरम कौ नासक तू भाव अति उज्जल है,
 भारती तिहारी पार करै भव जल तैं।
 भिन्न पर भावनि तैं भीनीं निज भावनि मैं,
 भुक्ति मुक्ति ईस तारै निज खल तैं।
 भूप सब भूपनि कौ भेदभाव नाहि जाकै,
 भैषज समांन देव न्यारौ भोग मल तैं।
 सारभौम नाथ जाकै भंगुर न साथ कोऊ,
 भः प्रकास है अभास जूवो मोह छल तैं ॥ ५८ ॥

— दोहा —

तेरी नाथ जु भद्रता भवा भवांनी सोय।
 कहैं भद्रकाली जिसें, निज सत्ता है जोय ॥ ५९ ॥
 ऋद्धि सिद्धि गौरी रमा, सा पदमा परतच्छि।
 काली काल हरा महा, संपति स्यामा लच्छि ॥ ६० ॥
 भा आभा द्युति क्रांति जो, चंडी तिपर विनास।
 स्वाभाविक पर्याय जो, प्रभु की अति गुन भास ॥ ६१ ॥
 शिवाशंकरी श्री प्रभा, लक्ष्मी चेतन शक्ति।
 सो जैनी जिनभावना, दौलति अतुलित व्यक्ति ॥ ६२ ॥

इति श्री भक्कार संपूर्ण। आगे मकार का व्याख्यान करै है।

॥ १ ॥ महादेव महावीर मान माया विदूरग ।

मिथ्या मार्ग निहंतारं, मीनध्वज निपातकं ॥ १ ॥

मुक्तिमूलं महाधीरं, मेधापारं सदोदयं ।
मैत्र्यादि भावना रूपं, मोह रागादि वर्जितं ॥ २ ॥

मौनारूढं महाज्ञानं, मंगलं विश्वपारंगं ।
मः प्रकाशं चिदाकाशं, वंदे वीरं शिवाधिपं ॥ ३ ॥

— चौपड़ी —

महाज्ञान मतिवान जु मुनी, जपैं तोहि तू है अतिगुनी ।
महाराज सरणागत पाल, पतित उधारन दीन दयाल ॥ ४ ॥

महा ऋद्धि अति सिद्धि निवास, मन बुद्धि कै जु परैं अतिभास ।
रटहि महेंद्र नरेंद्र खगेंद्र, महित महापति तू हि मुनेंद्र ॥ ५ ॥

सदा मनोहर अति हि सुरूप, मृत्युंजय भयहर भवरूप ।
मद मच्छर (मत्सर) मनमथ मलनास, महाकृती अतिधृति अतिभास ॥ ६ ॥

महामहेश्वर अति मरमज्ञ, महा प्रभू सुविभू अतिविज्ञ ।
मरमी धरमी देव महंत, मही नीति धारी भगवंत ॥ ७ ॥

मनुपति मुनिपति जगपति जती, करहि मनीषी सेवा अती ।
नांव मनीषा बुद्धि जु कहैं, महाकांति तोकाँ मुनि चहैं ॥ ८ ॥

महामहीप मही काँ धनी, महिमा सागर नागर गुनी ।
महामहेश जिनेश नरेश, जपहि सुरेश रसेस असेस ॥ ९ ॥

मन मरकट के रोधक साथ, मदनांतक अति मगन अवाध ।
महामंत्र तेरौ उर धरैं, महापद्म पदमा तुहि वरैं ॥ १० ॥

महसां पति महतां पति गुरू, महाध्वर धरो अतिब्रत धुरू ।
महामहर्षि महाशय प्रभू, महापराक्रमधारी विभू ॥ ११ ॥

— छंद नागच

महातमा महा कलेसनासको महा प्रभू,
महागुणी गुणाकरो युगादि देव है विभू।
महा जु कर्म नासनो महेशता धरो हरो,
महामनोहरांग है . महा गुरू रमावरो ॥ १२ ॥

मलाहरै कलाधरै मनोज दंडको महा,
न मत्सरी लहैं जु जाहि ज्ञानवंतनैं लहा।
मलीमसा मनामलीन नां लहैं अनंत जो,
मनुक्ष देव दानवा भजैं अनादि कंत जो ॥ १३ ॥

मरुस्थली दुनी मझार वारिदो अछेव सो,
सदा सुसर्वमध्य है, महोत्तमो अभेव सो।
महाकृती निराकृती महासुलच्छि दाघको,
मयाकरो व दयाकरै अनामखो अराधको ॥ १४ ॥

— दीहा —

मठमंडप में मुनिवसैं, जपैं तोहि दिन गति।
मगन दसा दासांनि की, अतुलित अचल लखाति ॥ १५ ॥
मगरमछ सम मोह है, भवसागर कै मांहि।
तो विनु पार न पाइए, तू तारक सक नाहि ॥ १६ ॥
मकरध्वज मनमथ मदन, कहैं काम कीं नाम।
काम मनोभव है सही, कामजीत तू राम ॥ १७ ॥
मलिन भाव सब ही हरै, मधवा पूजित तू ही।
मधु मांसादि निषेधकी, मधुसूदन जग दूहि ॥ १८ ॥
मदसूदन अधसूदनो, ममता हर महिपाल।
मधुकर चरन सरोज के, मुनिवर मगन बिसाल ॥ १९ ॥
निज रस अति मकरंद जो, पीवहि स्वरस छकंह।
भिक्षा लेकरि मधुकरी, तोही मांहि पगेह ॥ २० ॥

महिषी इंद्रतनी सदा, जपे तोहि कौं ईश।
 महल न महिला राखै, तू जोगी जगदीस ॥ २१ ॥
 मल्ल मोह हारी तू ही, मल्लनाथ जगनाथ।
 अतिबल अतिदल अचल तू, गुन अनंत तुव साथ ॥ २२ ॥
 मलमूत्रादि भर्यो इहै, देह अपांखन निंद्य।
 तोहि छुवैं कैसैं प्रभू, तू अनिंद्य जगबंद्य ॥ २३ ॥
 मदिरा सम ममता इहै, मोहमयी अधरूप।
 तू हि निखरै जगगुरु, रमता राम अनूप ॥ २४ ॥

— छंद सालिनी —

माया काया, नांहि जाया जु तैरे, मारो कामो, नांहि तैरे जु नैरे।
 मातंगी जे पूजि हिंसा जु धारा, ते तोकौं नां पांव ही धर्म हारा ॥ २५ ॥
 मार्गो तुही, मार्गणा तुहि गावैं, मांजी जीवा, तोहि नांहि जु पावैं।
 मातंगा हू, तोहि ध्याय जु देवा, होवैं तेरो शक्र धारैं हि सेवा ॥ २६ ॥
 मात्रा गात्रा, नांहि छात्रा जु तैरे, माया जालो, नांहि तैरे जु नैरे।
 माता ताता, नांहि भ्राता हु तैरे, मा लक्ष्मी जो, शक्ति तैरे हि नैरे ॥ २७ ॥
 मानो नांही, तो हि पावैं कदापी, मारैं जीवा, ते न पावैं जु पापी।
 मांसाहारा, नांहि भक्ती जु धारैं, तेरे दासा जीव हिंसादि टारैं ॥ २८ ॥
 माहे पोसे, तीर बैठा नदी कै, तोकौं ध्यावैं साधु भ्रांती न जीकौ।
 मापे लोका, लोक तैं ही सबैही, तोकौं स्वांमी, सर्व सोभा फवैं ही ॥ २९ ॥
 माला फेरैं, नांय तेरी जु लेवैं, गार्हस्था जे, दानं चार्यों हि देवैं।
 साधू ध्यानारूढ हैं तोहि ध्यावैं, योगारूढा, अंतरात्मा जु गावैं ॥ ३० ॥

— चौपड़ी —

मास मास उपवास जु धारि, साधु तपोधन तत्व बिचारि।
 भजैं तोहि तजि जग परंपंच, तो विनु सर्व गन्यों जग रंच ॥ ३१ ॥

माहिर सब कौ तू जगाराय, तेरे माहिर हैं मुनिराय ।
जग जन तोहि न जानि सकैं हि, विनु जानें भववन भटकैं हि ॥ ३२ ॥
माधव तूहिउ माधव भजैं, मा लक्ष्मी तोकौं नहि तजैं ।
चिद्रूपा शक्ती अनुभूति, सो लक्ष्मी आनंद विभूति ॥ ३३ ॥
अति माधुर्य वैन तू कहैं, तोहि महामुनिवर अति चहैं ।
माल न तो सौ त्रिभुवन मांहि, अविनासी तू अतिगुन मांहि ॥ ३४ ॥
मित भासी तू अमित अपार, मिष्ट बचन तेरे अति सार ।
मित्र न तो सौ जग में और, तू मिथ्यात हरन जगमौर ॥ ३५ ॥
मिश्रफल तोमें नहि नाश, तू केवल निज रूप अनाथ ।
मिलैं न मिल्यो मिलि है तुव मांहि, परपंच जु तैरे कछु नांहि ॥ ३६ ॥
अमिल मिलापी तू हि दयाल, मिलैं मुनिनि सौं तू हि कृपाल ।
मिलि जु रहयो सब ही सौं तू हि, सकल व्यापकौ लोक प्रभू हि ॥ ३७ ॥

— इन्द्रवज्रा छंद —

तेरौ मिलापा कवहू न छूटै, तू ही मिलापी कवहू न तूटै ।
मिटै मिटायो कवहू न स्वांमी, नाथा अखंडा अति ही सुनांमी ॥ ३८ ॥
तू हि मिलापी मुनिवर्ग कौ है, तिष्टै जु नागौपति सर्ग कौ है ।
सर्ग जु स्त्रिष्टी तु ही स्त्रिष्टीनाथा, शुद्ध स्वरूपो पदमा जु साथा ॥ ३९ ॥
मित्रो जु तू ही प्रमिताक्षरो है, विशुद्ध भावो परमाक्षरो है ।
मिल्यो न तोसौं इह जीव पापी, तातैं रल्यो जु अति ही संतापी ॥ ४० ॥
तो सौं मिले जे मुनि सिद्ध हूये, लिये न जन्मा कवहू न मूये ।
कहैं जु मीनध्वज काम नांमा, निःकाम तू ही अति धाम रांमा ॥ ४१ ॥

— कुंडलिया छंद —

मीनौ जलचर नांम है, जल विनु छांडै प्रांन,
ऐसी प्रीति जु तोहि सौं, करै मुनि मतिवान ।

करैं मुनि मतिवान, तो विना कुछ नहि रहई,

भीग्यो तुव रस मांहि, द्वैत भावो नहि लहई।

लग्यो तोहि सौं रंग, और वस्तु जु नहि लीनो,

करै कलोल जु सोई, नाम है जलचर मीनो ॥ ४२ ॥

पापी तोकों नां लहैं, खगमृगमीन हतैं जु,

जीव दया पालैं प्रभू, ते जन तोहि लहैं जु।

ते जन तोहि लहैं जु, होय तेरे निज दासा,

तुव परसाद जिनिंद, पावई तुव पुरि वासा।

निद्रा भुख सु जीति, साधु ध्यावैं हि प्रतापी,

धरमी तोहि भजैं जु, नां लहैं तोकों पापी ॥ ४३ ॥

आंखिनि मीट जु नां लगैं, अनिमेषा हैं देव,

तू देवनि कौ देव है, दै स्वांमी निज सेव।

दै स्वांमी निज सेव, हम जु तो विनु अति भरमें,

तुझहि विसारि दयाल, मूढ़ है बांधे करमें।

तू है जगत उधार, तारि अपनैं अनुचर गनि,

साधु सुध्यावहि तोहि, नां लगै मीट जु आंखिनि ॥ ४४ ॥

मीत जु तो सम और नां, तेरी प्रीत जु साच,

चिंतामणि जगमणि तु ही, और देव सम काच।

और देव सम काच, मूढ़ जन तिनकों सेवैं,

तेरे भगत अनन्य, तोहि भजि निजरस लेवैं।

कामजीत मनजीत, नाथ तू है जगजीत जु,

कहवै के जगमीत, औ नां तो सम मीत जु ॥ ४५ ॥

मीठौं भजन जु रावरी, और न कोई मिष्ट,

मुक्तो बंधन तैं तुही, भव विमुक्त जग इष्ट।

भव विमुक्त जग इष्ट, मुक्ति कौ मूल जु तू ही,

मुनिवर ध्यावैं तोहि, तू हि है जगत प्रभू ही।

भजहि मुमुक्षु मुनीश, ज्ञानमय तू हि जु दीठौ,
मुकट जगत कौ तू हि, रावरी भजन जु मीठौ ॥ ४६ ॥

मुद्रा शांत जु रावरी, मुसकनि मुलकनि नाहि,
मुख तेरौ अविकार है, जा सम और जु नाहि।
जा सम और जु नाहि, नाथ उनमुद्रित सोई,
मुसै मुननि कौ चित्त, जाय मुसियो नहि जोई।

भजै जाहि वड भाग, जाहि पावै नहि क्षुद्रा,
मुद्रित दृष्टि देखहु न होय, रावरी शांत जु मुद्रा ॥ ४७ ॥

मूरति तेरी मनहरा, ज्ञान मूरती तू ही,
है आनंद जु मूरती, त्रिभुवन कौ जु प्रभूहि।
त्रिभुवन कौ जु प्रभूहि, मूल धरमनि कौ तूही,
देव अमूरति तू हि, मूढमति तोतैं दूही।
मूरति तेरी मूरति

..... ॥ ४८ ॥

मूका तेहि जु नां जपैं, तोहि जु करि गुनगान,
मूरिख तोहि जु नां लहैं, तू ज्ञानी गुनवान।
तू ज्ञानी गुनवान, करहि उनमूलित कर्मा,
मूलोन्मूल करे जु, तोरि डारे सब भर्मा।
मूः बंधन कौ नाम, बंध सब कीनैं भूका,
मूरति तेरी पूजि, नां जपैं तेहि जु मूका ॥ ४९ ॥

तिनकै मूंड मुडाइयां सिद्धि न कोई होय,
तोहि न ध्यावैं मूढ धी, पगे जगत में सोय।
पगे जगत में सोय, बोधकर तू नहि जान्यो,
कंद मूल फल खाय, भाव करुणामय भान्यो।
मेधा कौ नहि लेस, लेस नहि श्रुति कौ तिनकै,
भजन विना किह काम, मूंड मुडायां तिनकै ॥ ५० ॥

— छप्पय —

मेघ श्रवै जल शर, तू हि ज्ञानामृत धारा,
 ताकी रहनि न ठीक, तू हि है नित्य विहारा।
 वह निपजावै धान, तू हि उपजावै ध्याना,
 वह देहगौ कदापि, तू हि निहकपट विग्याना।
 अति चपल दामिनी मेघ कै, तौर कमला निश्चला,
 प्रभु क्षणक चाप है जलद कौ, ज्ञान चाप तुव अतिबला ॥ ५१ ॥

मेर धरम कौ तू हि, मेर बांधै धरमनि कि,
 मेचक भाव मलीन, मलिन परणति करमन कि।
 मेचकता नहि कोइ, शुद्ध तू खुद्ध महाअति,
 जगत देव अतिभेव, परम तत्व जु तू जगपति।
 सकल मेदनी कौ जु नाथा, मैत्री प्रमुख जु भावना,
 सब कहइ विमल अति अचल तू, भाव तिहारै पावना ॥ ५२ ॥

मैथुन है अतिनिंद्य, ताहि त्यागैं तुव दासा,
 मैंन कहावै काम, कामहर परम प्रकासा।
 मोह मल्लन कौ जीति, मोक्ष कौ पंथ जु तू ही,
 मन मोहन तू देव, सर्वगत तू हि प्रभू ही।
 मोद स्वरूप अनादि अनिधन, अति प्रमोद भावो तु ही,
 मोकों जु तारि भव जलधि तैं, नाव तू हि जगदीस ही ॥ ५३ ॥

— सोरठा —

मोहे जीव अपार, मोह करम नैं नाथ जी।
 तू हि उतारै पार, पारंकर परतक्ष तू ॥ ५४ ॥
 मोसे जीव अपार, कैसैं मैं तिरिहीं प्रभू।
 तू हि करै निसतार, मोसे पापनि कौ महा ॥ ५५ ॥
 मौलि मुकट कौ नाम, मुकट जगत कौ तू सही।
 मौड सकल कौ राम, मौज न तेरी सी कहूं ॥ ५६ ॥

मौजी तो सम और, तीन लोक में नाहि को।
 करै करम कौ चौर, मौर्वी चाप न रोपनां ॥ ५७ ॥
 मौनारूढ मुनीश, ध्यावैं मंगल रूप तू।
 मंत्र मूर्ती ईश, मंत्र न तंत्र न यंत्र नां ॥ ५८ ॥
 मंगल कारी तूहि, मंता संता कंत तू।
 मंद न तूहि प्रभूहि, मंदमती तोहि न लखैं ॥ ५९ ॥
 मंदिर गुन कौ ईस, सीस जगत कौ तू ही।
 मंगलीक जगदीस, मंडन त्रिभुवन कौ महा ॥ ६० ॥
 मंडै व्रत अनादि, खंडै अव्रत कौ तू ही।
 गुन मंडित तू आदि, तो विना वादि सबै जगत ॥ ६१ ॥
 मुंचि न मौकौ नाथ, मंक्षु उधारौ भव थकी।
 जग जीवन अतिसाथ, अंजन मंजन रहित तू ॥ ६२ ॥
 मंद कषाई जीव, भक्ति भाव सोई लहै।
 तीव्र कषाय अतीव, धरै सो, तोहि न लहै ॥ ६३ ॥
 मः कहिये श्रुति मांहि, शिव कौ नाम प्रसिद्ध है।
 तो विनु और जु नाहि, शिव शंकर जग गुर तुही ॥ ६४ ॥
 मः कहिये फुनि चंद, त्रिभुवन चंद मुनिंद तू।
 सेवैं इंद नरिंद, तोहि फनिंद मुनिंद हू ॥ ६५ ॥
 मः वेधा कौ नाम, तू ही विधाता विधि करै।
 पूरब बंध जु राम, काटै तू औरैन को ॥ ६६ ॥

अथ बाग मात्रा एक कवित्त मैं।

— सर्वैया - ३१ —

महादेव महाराज, मारग प्रकास तू,
 माया तैं विस्तीत मिथ्या भाव तैं रहित है।
 मीन केतु जीति मुनि ध्यावैं, तोहि मूल तूही
 मेदनी कौ नायक अनंतता सहित है।

मैत्र्यादिक भावना प्रकासे मोह जीतक तू
 मोह तुल्य जीव कौ न दूसरी अहित है।
 मौलि सब लोक कौ जु मंगल स्वरूप नाथ
 मः प्रकास है अनास ईसुर महित है ॥ ६७ ॥

— कुंडलिया छंद —

माता पद्मा शक्ति जो, आतम सत्ता जोड़,
 चिद्रूपा गुण व्यक्ति जो, चिनमुद्रा है सोड़।
 चिनमुद्रा है सोय, वस्तुतैं एक स्वरूपा,
 भेद भाव नहि काय, वस्तुता सोड़ अनूपा।
 प्रभु की परणति शुद्ध, शुद्धता सोय विख्याता,
 शिवा आर्हति सिद्धि, शक्ति जो पदमा माता ॥ ६८ ॥

— दोहा —

सो गौरी स्यामा सही, रमा राधिका सोड़।
 भक्ता जिनेंद्रा ऋद्धि जो, सो दौलति हू होड़ ॥ ६९ ॥

इति मकार संपूर्ण । इति श्री भक्त्यक्षर मालिका धावनी स्तवन
 अध्यात्म बार खड़ी नाम ध्येय उपासना तंत्रे सहस्रनाम एकाक्षरी
 नाम मालाद्यनेक ग्रंथानुसारेण भगवद्भाजनानंदाधिकारे आनंदरांभ
 सुत दौलति रामेन अल्प बुद्धिना उपायनी कृते पकारादि मकारांत
 पंचाक्षर प्ररूपको नाम चतुर्थ परिच्छेद ॥ ४ ॥ आगैं यकार का
 व्याख्यान करै है ।

श्लोक —

यशो रासिं महाबाहुं, याञ्छा सर्वपूरकं।
 यियासा रहितं नित्यं, निश्चलं लोक वत्सलं ॥ १ ॥
 यी मात्रा भासकं वीरं, युक्तं गुणगणैः सदा।
 यूथाधिपति मीशानं, निजबोध धरं सदा ॥ २ ॥

ये रागादि विनिर्मुक्ता, स्ते हि ध्यायन्ति तं परं।
ये ध्याते मुनिभिः शान्ते, स्तैर्प्राप्तं परमं पदं ॥ ३ ॥

योग मार्ग प्रदातारं, यौगिकी ऋद्धि दायकं।
यं भजन्ति सदा सर्वे, तं वन्दे परमेश्वरं ॥ ४ ॥

यः प्रभुः सर्व लोकना, मीश्वरः जगदीश्वरः।
सुरसुरानरः सर्वे, यस्याज्ञाकारिणः सदा ॥ ५ ॥

— दोहा —

यदा कहावै जा समैं, तोहि भजैं मुनिराय।
तदा कहावै ता समैं, भानि न एक रहाय ॥ १ ॥
यत्कहिये जातैं प्रभू, भजैं तोहि जगत्यागि।
जग असार तू सार है, तोमैं रहिये पागि ॥ २ ॥
तत्कहिये तातैं प्रभू, देहु भक्ति निहकाम।
सर्व त्यागि तोकाँ भजैं, अँसी बुद्धि दै राम ॥ ३ ॥
यस्य कहावै जाहि कै, उर निवसै तू देव।
तस्य कहावै ताहि कै, है आनंद अछेव ॥ ४ ॥
यस्मिन्कहिये जा विषै, तेरी भक्ति जु नाहि।
तस्मिन्कहिये ता विषै, गुण गण नाहि रहाहि ॥ ५ ॥

— कुंडलिया छंद —

यति नाथो अतिदेव तू, यति पति यति गण ध्येय,
यति नायक सुयतीश्वरो, यति पालक यति सेय।
यति पालक यति सेय, सेवही जाहि यतिद्रा,
यति गुरुगुरु दयाल, देव यतिभेस मुनिद्रा।
यतिराजो यतिनाव, धारही यतिवर साथो,
यति वर्गनि कौ तात, देव तू यति अतिनाथो ॥ ६ ॥

यति तारै जग देव तू, यज्य यजन यज्ञेस,
 यज्ञासहस्रपूरन लखैं, कहेँ तोहि देवेस ।
 यजैं तोहि देवेस, यज्ञ है तेरी सेवा,
 यज्ञ ध्यान अगनीहि, होमिये कर्म अछेवा ।
 अति दानो सो यज्ञ, शील यज्ञो अघ टारै,
 यज्ञ पुरुष है तू हि, देव जग तू यति तारै ॥ ७ ॥

— दोहा —

याज्ञिक साधु मुनीश्वरा, यज्ञ तिहारौ ध्यान ।
 यश तो सम और न धैर, यशी न तो सम आन ॥ ८ ॥
 नाम जनेऊ कौ कहैं, पंडित यज्ञपवीत ।
 धारि जनेऊ गृहपती, त्यागैं सकल अनीत ॥ ९ ॥
 द्विज क्षत्री वणिक जु कुला, एहि जनेऊ लेंहि ।
 शूद्रनि कौ लेंवौ नहीं, इह आज्ञा गुरु देहि ॥ १० ॥
 तोहि भज्यां त्रिकुला भला, बिना भजन सब निंद्य ।
 निंदि कुला हू ध्याय कै, हौंहि जगत करि बंदि ॥ ११ ॥
 यथाख्यात चारित्र दें, नाथ तिहारी भक्ति ।
 केवल दाता भक्ति है, भक्ति धैर अति शक्ति ॥ १२ ॥

— छंद मोती दांम —

तु ही यम नेम जु आदि सर्वहि, प्रभू वसु जोग विधी हि कहै हि ।
 तु ही यम नासक मोक्ष प्रकास, महायत नागर यन्न विभास ॥ १३ ॥
 लखैं मुनि यत्र जु यत्र जु नाथ, सु तत्र जु तत्र जु तू हि अनाथ ।
 यव प्रमिता प्रतिमा हू तिहारि, कहैं अति पूजित सूत्र मझारि ॥ १४ ॥
 जपैं जु यमी नियमी मुनिराय, भजैं हि शमी जु दमी जतिराय ।
 गै नहि तोहि सु ते हिय अंध, मिथ्यात हि राधि करै अघबंध ॥ १५ ॥

यथा प्रभु अंध अधार सुयष्टि, तथा भवि कै तुव भक्ति हि इष्टि।
न नारक यातन दास लहैं हि, न चाचन सुगुहू की जु पौं हि ॥ १६ ॥
चहैं तुव भक्ति न चाहहि भोग, अयाचक रूप गहैं निज जोग।
न याति न पाति न न्याति निकोय, सबै तजि लोक भजैं मुनि होय ॥ १७ ॥

— दोहा —

या कहिये जु विधात कौ, तू हि विधाता देव।
या तेरी परणति सही, चिद्रूपा अतिभेव ॥ १८ ॥
यावत तोहि न पावहीं, तावत भव भ्रम होय।
यावत कहिये जो लगैं, जीवन उधरै सोय ॥ १९ ॥
याभ्यां कहिये दोषकरि, रुलै जीव संसार।
राग दोष दोऊ अरी, जीतैं मुनि अविकार ॥ २० ॥
कहै धियासा श्रुति विषै, गमनेछा कौ नाम।
गमनागमन बितीत तू, निश्चल निरमल राम ॥ २१ ॥
यी इह चउथी मात्रिका, तू हि प्रकासै देव।
धरै अव्ययी भाव तू, अक्षय रूप अछेव ॥ २२ ॥
युक्ति प्रकासक वस्तु तू, युगाधार युगधार।
युग कहिये द्वै कौ सही, तू द्वय रूप अपार ॥ २३ ॥
निराकार साकार तू, दरसन ज्ञान अभेव।
युगल रूप अतिरूप तू, युगमभाव अतिभेव ॥ २४ ॥
तू सामान्य विशेष है, अस्ति नास्ति परकास।
नित्यानित्य अनेक तू, एक रूप अतिभास ॥ २५ ॥
युग युग तेरी आंसिरी, नाथ युगादि अनंत।
युक्तायुक्त विभेद सहु, तू हि विभासै संत ॥ २६ ॥
युष्माक कौ अर्थ इह, तुम्हरे नाहि विकार।
अस्माक कौ अर्थ इह, हमकों करि भवपार ॥ २७ ॥

युषमत असमत शब्द सहु, तू ही प्रगट करेय।
 शब्दातीत अजीत तू, चेतन भाव धरेय ॥ २८ ॥
 मुक्ति न तेरी सी कहूं, युक्ति न तेरी पास।
 निरवांणी निरदुंद तू, अति आनंद प्रकास ॥ २९ ॥
 युवा बाल वृद्ध जु नहीं, प्रभू युगंधर तू हि।
 युगल रीति भासक तु ही, तू युगबाहु प्रभू हि ॥ ३० ॥
 युग जुडे कौ नांम है, युगसम लंबी बाहु।
 महाबाहु तू देव है, परम स्वरूप अथाह ॥ ३१ ॥
 युग प्रमाण धरती लखैं, लखि लखि भूमि सुसाध।
 द्रिष्टिपूत पाव जु धरैं, धरैं भगति अगाध ॥ ३२ ॥
 यूथ समूह जु नांम है, सर्व समूह प्रकास।
 कर्म यूथ टारै तू ही, यूथ गुननि के पास ॥ ३३ ॥

— बसंत तिलका छंद —

यूनां तु ही जु अतिवीर सुधीर स्वामी,
 तू ही जु धर्ममय यूप धरै सुनामी।
 ये तोहि चित्त करि भव्य जना जु ध्यावैं,
 ते शुद्ध बुद्ध अविरुद्ध स्वरूप पावैं ॥ ३४ ॥
 ये तोहि भूलि विषयारस मांहि राचे,
 ते लोक मांहि बहु रूप धरे जु नाचे।
 ये हैं अनन्य अति धन्य जु तोहि सेवैं,
 ते त्यागि राग अर दोष सुसिद्धि लेवैं ॥ ३५ ॥

— सोंगठा —

येन शब्द कौ अर्थ, जा करि भासैं पंडिता।
 जा करि त्यागि अनर्थ, लहिये शिव सो तू सही ॥ ३६ ॥

येन अर्थ फुनि और, जानैं तू ध्यायो सही।
 सो हूयो जगमौर, भव भरमण तानैं हख्यौ ॥ ३७ ॥
 येन कहैं जा साथ, ज्ञान विराग विवेक है।
 ताकै भक्ति सुनाथ, उपजै तेरी अद्वती ॥ ३८ ॥

— दोहा —

येषां कहिये नाथजी, जिनकै भक्ति जु होय।
 तेषां कहिये तिनहि कै, तत्व बोध है जोय ॥ ३९ ॥
 यैः कहिये जिनकरि तुझैं, पावैं दीन दयाल।
 ते रतन त्रय दे हमैं, सरणागत प्रतिपाल ॥ ४० ॥
 यैः कहिये फुनि जिनि मुनिनि, तोहि जु ध्यायो देव।
 तैः कहिये तिन ही सही, पायो पद जु अछेख ॥ ४१ ॥
 यैः कहिये जिन सहित प्रभुः, तो सौं भेटैं नाथ।
 सो ज्ञानादि प्रबंध दै, बंध हरन जगनाथ ॥ ४२ ॥
 योगी योग प्रकास तु, योगीश्वर अवनीस।
 योज तु ही अति शुद्ध है, योगारूढ मुनीस ॥ ४३ ॥
 योग शास्त्र भासी तु ही, योग तंत्र योगीश।
 जाहि भजैं योगी महा, सो तू ही भोगीस ॥ ४४ ॥
 तजि संयोग संबंध जे, योग धरैं मुनीराय।
 संसलेश संबंध हू, तिनकै नाहि रहाय ॥ ४५ ॥
 समुवायो जु सवंध है, सो प्रगटैं तिनकै हि।
 तेरी भक्ति प्रसाद तैं, कर्म कलंक दवै हि ॥ ४६ ॥
 योद्धा तेरे दास हैं, जीतैं कर्म अनादि।
 युद्ध करन समरथ नही, तिनसौं खल रागादि ॥ ४७ ॥
 योग गम्य तोकों कहैं, योगिनि तैं हू अगम्य।
 योनि लक्ष चौरासि तैं, टारै तू हि जु रम्य ॥ ४८ ॥

ब्रह्मयोनि निरयोनि तू, प्रभू अयोनी शंभु।
 अति योजन दूरा तुही, अति नीरै विनु दंभ ॥४९॥
 यौ कहिये द्वौ दोष हैं, राग द्वेष अनादि।
 तू सब दोष वितीत हैं, निरदोषी प्रभु आदि ॥५०॥

— छंद भुजंगी प्रयात —

नही यौवनारूढ नांही जु वृद्धो, तु ही नित्य रूपो प्रभू है सम्पूज्यो।
 तु ही यौगि की देव देवै, तु दिक्षा, गहैं सर्व, यौग्रीहृद तेरि (ति.) निष्ठा ॥५१॥
 इहै धर्म ध्याना सुयंत्र स्वरूपा, तू हि देव यंत्री नियंत्री अनूपा।
 प्रभू है स्वतंत्रा अमंत्रा अनादी, सब सिद्धि यंत्रा तु ही स्यादवादी ॥५२॥
 नही यंत्र मंत्रा नही कोय तंत्रा, तु ही यंत्र मंत्रा स्वतंत्रा अमंत्रा।
 बिना नाम तेरे नही और मंत्रा, बिना ग्रंथ तेरे नहीं और तंत्रा ॥५३॥

— छंद त्रिभंगी —

प्रभू तू हि अयंत्रा परम सुमंत्रा, प्रगट सुतंत्रा अविकारी।
 सब यंत्र सुमंत्रा, सकल जु तंत्रा, तू हि निमंत्रा अधिकारी।
 इह देह हु यंत्रा, जगत हु यंत्रा, लिखित हु यंत्रा तू भासै।
 फुनि सकट हु यंत्रा, वजड़ सुयंत्रा, तू हि नियंत्रा अधनासै ॥५४॥
 अति तू हि जु यंत्री, अतुल जु मंत्री, यंत्र नियंत्री, विनु यंत्रा।
 है सिद्ध जु यंत्रा, अजपा मंत्रा, योग जु तंत्रा, अति तंत्रा।
 सब भेद क्तावै, विधि जु सुनावै, तत्त्व जतावै जिनराया।
 अथ यंत्र नसावै, यंत्रि कहावै, तंत्र जु भावै, सुखदाया ॥५५॥

— दोहा —

च कहिये जिह नैं तु ही, करै आपुनी दास।
 त कहिये तिह नैं प्रभू, देय आपुनी वास ॥५६॥
 यः कहिये जो जीव भवि, तोहि भजै भगवंत।
 सः कहिये सो सीघ्र ही, पावै ज्ञान अनंत ॥५७॥

यः कहिये यमराडु कौं, तू यमहर भवतार।
 यः कहिये फुनि यान कौं, ज्ञान यान अविकार॥५८॥
 यान पात्र भव सिंधु की, तू हि उतारै पार।
 यः कहिये फुनि यत्न कौं, तू अयत्न गुन धार॥५९॥
 यः कहिये फुनि त्याग कौं, तू त्यागी अति देव।
 अति भागी अविकार तू, दै दयाल निज सेव॥६०॥

अथ द्वादश मात्रा एक कवित्त मैं।

— सवैया —

यतिनि कौं नायक तू यत्न करैया देव,
 यान पात्र लोक कौं तू ही हि भवतार है।
 यियास न तैर कोऊ, यी प्रकास तू हि होऊ,
 युक्ति कौं निवास यथ दायक अपार है।
 तोहि ये भजैं न मूढ़, ते न पावैं तन्व गूढ़,
 यैन सून्यौ नाथ जस ते न पावैं पार है।
 योग कौ प्रकास देव योगि की जु दिक्षा देय,
 यंत्र मंत्र नाहि कोऊ, यः प्रभास सार है॥६१॥

— कुंडलित्या छंद —

या अनुभूती रावरी, हरै यामिनी भ्रांति,
 सो शुद्धा तुव भानु की, किरण जु परम प्रशान्ति।
 किरण जु परम प्रशान्ति, मोह तिमर जु कौं नासै,
 भोग भावना मेटि, बोध दिवसैं जु विभासैं।
 कर्मासुर क्षयकार योग मूला जु विभूती,
 भाषै दौलति ताहि, रावरी या अनुभूती॥६२॥

इति यकार संपूर्ण। आगैं रकार का व्याख्यान करै है।

— श्लोक —

रजोहरं रमानाथं, राज राजेंद्र सेवितं ।
रिक्तता रहितं पूर्णं, धर्म रीति प्रकासकं ॥ १ ॥
रुक्माभं रूप लावण्य, भूषितं लोक भूषणं ।
रेत रसकादि रहितं, रंजनीय रंजनाभरं ॥ २ ॥
रोगादि रहितं शुद्धं, रौरवादि निवारकं ।
रंगरागादि निर्मुक्तं, रः प्रकाशं नमाम्यहं ॥ ३ ॥

— उपेंद्र वज्रा छंद —

भाष्यो रकारो धन कौ जु नांमा, नांही रकारो विनु नांम रामा ।
रकार भाष्यो फुनि वैश्रवो हू, सोऊ रटै जु अर वासवो हू ॥ ४ ॥
रम्यो रमानाथ रमाधवो तू, मृत्यु हरै नाथ रसायनो तू ।
रमा न वाह्या चित शक्ति तेरी, सोई रमा है प्रभु तोहि नेरी ॥ ५ ॥
दोसा रसा नां रस वाक्य तू ही, रत्नादि दाता जग कौ प्रभू ही ।
न रत्न कोई विनु आत्म भावा, रत्नत्रया तू हि धरै स्वभावा ॥ ६ ॥
पृथ्वी रसा है तु हि भूपती है, भूमी समाधी तुहि दे यती है ।
रसातलैं जाहि सु तेहि मूढा, जे तोहि त्यागे कुविधी हि रूढा ॥ ७ ॥
रक्षा वतावै सब जीव की तू, प्रीति छुडावै जु अजीव की तू ।
रती हु मात्रा नहि भ्रांति जाकै, तोमैं रच्यो जू भवि जीव ताकै ॥ ८ ॥
तोको रच्यो नांकि नही कदापी, तू ही अनादी प्रभु है उदापी ।
रचै न तूही भव भ्रांति मांही, तोसौं रचै जे अभव्या सु नांही ॥ ९ ॥

— दोहा —

रत्नपती पूजै चरन, रत्नगर्भ भगवानं ।
रतनेश्वर अति रत्न धर, रत्न न ता सम आनं ॥ १० ॥
रमण रमा कौ जो प्रभू, रति अरति न एकोहि ।
अति सुशील जगदीस जो, अविचल सुविवेकोहि ॥ ११ ॥

रमणीकौ रस मूल तू, रमि जु रह्यो सब मांहि।
 रमैं आप मांहें तु ही, रज रहितो सक नांहि॥ १२॥
 रती न जाकी सी धरै, तीन लोक मैं और।
 रतिपति जीत्यो जाहि नैं, सो त्रिभुवन को मौर॥ १३॥

— सर्वथा ३१ —

रघुवंस आदि केई वंस को तथारक तू,
 रघुनाथ नाथ तू ही तीन लोक नाथ है।
 रणधीर रणवीर रद भांजै के जु ज्ञान
 चाप धारक करै हि तुव साथ है।
 रटैं तोहि इंद चंद रटैं जु मुनिदं सब
 रटैं अहमिदं तू, जिनिंद बड हाथ है।
 तरै भवसागर तें, नागर निरंजन तू,
 भव दुख पावक बुझायवे कौं पाथ है॥ १४॥

— दोहा —

रव कहिये उच्चार कौं, नाम उच्चारैं तेहि।
 रहसि लहैं निज रूपकौं, भव जल कौं जल देहि॥ १५॥
 रा कहिये धन कौं सही, निज धन तू हि जु आदि।
 राग रहित अविकार तू, राम सुनांम अनादि॥ १६॥
 रामा तैरे नांहि को, रमा न रामा होय।
 रमा राखरी शक्ति है, राधा कहिये सोइ॥ १७॥
 राधा दूजि नांहि को, निज सत्ता है जोई।
 शिवा आर्हती शक्ति जो, सो गोपी हू होय॥ १८॥
 राका पूरणमासि है, राका कौ है चंद।
 तैसौ सीतल चित्त करि, तोहि भजैं जु मुनिदं॥ १९॥
 राजा सब कौ तू सही, राव जगत कौ तू हि।
 राय न तो सम दूसरी, रावर एक प्रभू हि॥ २०॥

राचै तो मैं जोगिया, राति भारि सब त्यागि।
रासि गुननि की तू सही, रहिये तोमैं पागि॥ २१ ॥

— कुंडलिया छंद —

राख समाना भूति जो, राखी रहै न सोख,
राग करै यां सौं जिकै, ते मति हीन जु होय।
ते मति हीन जु होय, राति दिव यामैं पागे,
धंध भाव मैं राचि, तोहि ध्यावैं न अभोगे।
चाहैं तोहि सुभव्य, तेहि पावैं निजग्याना,
चाहैं मूरख लोक भूति जो राख समाना॥ २२ ॥

— दोहा —

राजस तामस सात्विका, तू धारै नहि एक।
निज स्वभाव राजिंद तू, धारै अतुल विवेक॥ २३ ॥
राष्टर देस जु नांम है, देस असंखित होय।
तेरै लोक प्रमाण तू, ज्ञान मात्र है सोय॥ २४ ॥

— छप्पय —

त्रिभुवन चंद जिनंद, राहु सम मोह न गहई,
क्षयी भाव कवहू न, तोहि नहि कलमष लहई।
तू निकलंक दयाल, तिमरहर भ्रांति निसाहर,
जपैं निसाकर तोहि, जडत हर तू प्रभाकर।
अस्त भाव कवहू न होई, उदयरूप निति देखिये,
नहि रक्त पीत सित स्याम तू, हरित न अवरण लेखिये॥ २५ ॥
रिद्धें कर्म अति भर्म, नाथ तुव दास जु देखें,
रिपु नहि इनसे और, रीति इनकी हि जु पेंखें।
रस रीसि जु द्वै भाव, इनहि उपजाये मोमें,
नादि काल तै देव, मोहि डारयो इनि दो में।
विषयकथाय लगाय मो कौं, दाबे अति गुन निज मई,
जडमय पंजर मांहि मूंदियि, भटकायो चहुगति दई॥ २६ ॥

— सोरठा —

रूढि अविद्या रूप, तेरे दास न आदरै।
हैं तौं सौं इक रूप ध्यावैं अह्निसि निज बिषै॥ ३१॥
रूढ कूढ इह जीव, भयो अविद्या बाय तैं।
कौं जु शुद्ध अतीव, तू हि मिथ्याबाय हरि॥ ३२॥

— छंद त्रिभंगी —

प्रभू कबहु न रूठै, कबहु न तूठै, अमृत वूठै, उर मांहैं।
अतिकरत निहाला, अति हि विसाला, जगत प्रपाला, जग चाहैं।
सब तेरे दासा, तू हि प्रकासा, परम विलासा, रस रूपा।
अति वैरागी तू, बडभागी तू, अनुरागी तू, करि भूपा॥ ३३॥
नहि रूसि जु जानैं, रीसि न आनैं जड बुधि भाजैं तू गिप्ता।
चीकन नहि रूखा, हैं नहि लूखा, त्रिषित न भूखा तू त्रिप्ता।
रेचक विषयनिकी, जीवनि मुनि की, हित भविजन की, तुव वानी।
सब रीति प्रकासै, कुमति विनासै, तत्व विभासै भय भांती॥ ३४॥

— सोरठा —

रेचक पूरक और, कुंभक तू हि प्रकासई।
सब योगिनि कौ मौर, योगसिद्ध परसिद्ध तू॥ ३५॥
रेत समान बिभूति, जग की तजि योगीश्वरा।
पावैं निज अनुभूति, तेरी भक्ति प्रसाद तैं॥ ३६॥
जैसैं रेसम कीट, बंधैं अपनी लाल तैं।
तैसैं जिय धरि कीट, बंधैं जगवासी जना॥ ३७॥

— सबैया - ३१ —

रेवरा समान इहै जग, भरयो कूरे सौंहि,
तामैं जीव लेटियो सुमोह मदिरा पिये।

रम्य रमणीक तूही, नाहि भव रूप तू ही,
 धरिँ मुनिराय नाम, तेरो आपुनै हियें।
 कूरे तैं निकासै तू ही, मोहमद्य दूर करै,
 ज्ञान की प्रबोधक तू शक्ति आतैं हो लियें।
 रेत करि डारैं कर्म भूधर कौं दास तेई
 भक्ति भाव वज्ररूप, जेहि कर मैं कियें॥३८॥

— सौरठा —

रे रे चित्त अयांन, भजऊ भजऊ जगदीस कौं।
 धारहु क्यों न सयांन, जाकरि भव भरमण मिटै॥३९॥
 रे रे लंपट जीव, विषयनि में लपटयौ कहा।
 क्यों न भजै जग पीव, जाकरि निज रस पाइए॥४०॥
 रोर दरिद्र जु नाम, रो भय कौ नाम जु कहैं।
 तू दरिद्र हर राम, भय कौ तू हि भयंकरा॥४१॥
 रोग महा रागादि, हरै तू हि अति बैद्य तू।
 रोष न चाप अनादि, धनुरद्धर तू अदभुता॥४२॥
 रोकि रहे भव मांहि, मोहादिक सक्षस महा।
 ते ही तुव पुरि जांहि, जे इनकों नासैं मुनी॥४३॥
 रोष न दोष न राग, तैरे तू अविकार है।
 वीतराग वडभाग, तेहि जेहि तोकों भजैं॥४४॥
 रोचिक होय मुनिंद, जपैं तोहि तजि रोस रस।
 तो सौ तू हि जिनिंद, रोम रोम व्यापि जु रह्यौ॥४५॥
 रोहिणी आदि नक्षत्र, संवैं सब तोकों प्रभू।
 नक्षत्री जु पवित्र, तो सौ तू ही और नां॥४६॥
 रोहिणी ब्रत जु आदि, ब्रत अनेक कहै तू ही।
 तू भगवंत अनादि, रौरवादि टारक तू ही॥४७॥
 रौरव नकं जु नाम, तू नरकांतक देव है।
 सर्व कष्ट हर राम, धाम ऋद्धि कौ तू सही॥४८॥

रः भाष्यौ फुनि रूप, रूपी तू न अरूप है।
 रूप अरूप अनूप, तू चिद्रूप अमूरती ॥६२॥
 रः रक्षण कौ नांम, रक्षक धिर चर कौ तूही।
 अति विश्राम सुधाम, गुन अनंत भगवंत तू ॥६३॥

अथ बारा मात्रा एक कवित्त मैं।

— सर्वैया —

रतिपति जीतैं तेरे दास, राग दोष हर,
 रिपु नांहि इनसे कदापि तीन काल मैं।
 रीति सर्व धर्मनि की, तु ही जो प्रकासै,
 देव रुलैं नांहि, तेरे जन राजैं गुन माल मैं।
 रूप कौ निवास तू ही, रंचकादि भासै विधि,
 रैन सम भ्रांति हरै, तू न जग जाल मैं।
 रोर हर रौरवादि टारै तू हि रंग नाथ,
 रः प्रकास तू हि नांहि शुभाशुभ चाल मैं ॥६४॥

— कुडलिया छंद —

स्वामी तेरी रम्यता, रमा जु कहिये सोइ,
 रति अरति जु दोऊ नही, जो चिन्मुद्रा होय।
 जो चिन्मुद्रा होय, वस्तु कैवल्य स्वभावा,
 भेदभाव नहि कोइ, शुद्धता शक्ति प्रभावा।
 भवा भवानी भूति, ऋद्धि सिद्धि जु अतिनामी,
 भाषैं दौलति ताहि, रम्यता तेरी स्वामी ॥६५॥

इति रकार संपूर्ण। आगैं लकार का व्याख्यान करै है।

— श्लोक —

ललितं लालसातीतं, लिखितं गणनायकैः ।
नीलं लीलाधरं धीरं, नहि लुप्तं च कर्मणा ॥ १ ॥
लूनिता शत्रवो येन, कर्म रूपा दुराशया ।
शुक्ल ध्यानासिना सर्वे, सो हि जानाति तं परं ॥ २ ॥
निर्लेपं निर्मलं वीरं, वर्जितं सकलैर्मलैः ।
लोकनाथं महाशान्तं, लौल्यतां रहितं सदा ॥ ३ ॥
लंपटं न क्वचिलभ्यं, लिंग रूपादि वर्जितं ।
लः प्रकाशं चिदाकाशं, वंदे देवं सदोदयं ॥ ४ ॥

— उपेन्द्र वज्रा छंद —

भाष्यो लकारो श्रुति मैं जु इंद्रा, इंद्रा रटैं जु तुझ कौं मुनिंद्रा ।
लकार भाषै लवणो हु जोई, तू ही स्वलावण्य मयो जु होई ॥ १ ॥
भाषैं लकारो फुनि व्याज कौ भी, भासैं लकारो फुनि दांन साँ भी ।
अव्याज तू ही परपंच न्यारा, दांनी महाभुक्ति विमुक्ति द्वारा ॥ २ ॥
आनंद लक्ष्मी पति लोक नाथा, लक्ष्मी स्वरूपो लक्ष्मी हि साथ ।
लक्षो अलक्षो अति लक्षणाढ्यो, लक्ष्मी निवासो अति ही धनाढ्यो ॥ ३ ॥
तत्त्वानुभूती लक्ष्मी हि सोई, बाह्या विभूती न विभूति कोई ।
स्वर्गापवर्गा सब देय तू हि, भक्तान चाहैं जु चहैं प्रभू ही ॥ ४ ॥

— मंदाक्रांता छंद —

लक्ष्मी नाथो, ललित अति ही, है ललामो त्रिलोकी,
चौरासी जे, लख दुखमई, जोनि तैं भिन्न लोकी ।
चौरासीतैं, वह हि जु प्रभु, काढई भव्य जीवैं,
जाकौं नांमा, निज रसमई, साधु लोका जु पीवैं ॥ ५ ॥
लज्या आदी, अति गुन धरैं, दास तेरे सुशीला,
तेरे दासा, लसहि जु अती, भक्ति मैं नाहि ढीला ।

रागा दोषा, तजि लव धरैं, तोहि सौं ह्वैं अनन्या,
तोकों जानैं, निज रस छकैं, साधवा ते हि धन्या ॥ ६ ॥

— दोहा —

लगनि त्यागि परंपंच की, लगनि लगावैं जेहि।
तो तसौं ते निजलस लहैं, धन्य धन्य हैं ते हि ॥ ७ ॥
लहलहाट अति ज्योति तू, झलझलाट तू देव।
लसैं महा दैदीप अति, दै दयाल निज सेव ॥ ८ ॥
चित्त लगाय मुनी भजैं, तू हि लगावैं रंग।
लटकनि तेरी घां करै, ते हि लहैं तुव संग ॥ ९ ॥
लट्यो फट्यो इह जीव अति, लुट्यो जु भववन मोहि।
लूट्यो मोह निसाचरैं, गुन हरिया सक नाहि ॥ १० ॥
आयो तैरै द्वार अव, स्वामी करि जु निहाल।
गुन अनंत सब द्याय तू, सरनागत प्रतिपाल ॥ ११ ॥
लखैं तु हि सब कीं सदा, विरला तोहि लखंत।
जे केवल निज ज्ञान मय, तोहि लहैं ते संत ॥ १२ ॥

— चौपड़ी —

लगे रहैं तैरे दरबार, तेई तत्त्व लहैं अविकार।
लघु दीर्घ को भेद न कोइ, जपै तोहि सो तेरा होइ ॥ १३ ॥
लखिबो भिरिबौ जगसौं त्यागि, क्षमा रूप ह्वैं समरस पागि।
तेरे होय लहैं निज वस्तु, लब्धि भूल तू रोर विधुस्त ॥ १४ ॥
लपिवौ रटिवौ तेरी नांम, केवल लभ्य तु ही अति धाम।
लसित महा सोभा कौ पूज, दीसैं तू हि सधन गुन कुंज ॥ १५ ॥
लता भाव पुष्पनि की तू हि, लहरि विषै की हरइ समूहि।
लहरि स्वभाव तरंग स्वरूप, लहरी तो सभ और न भूप ॥ १६ ॥

लकरी अंधे कै आधार, भक्ति आधार भविनि कै सार।
लखै आप सम सकल जु जीव, सोई भक्ति लहै जगपीव ॥ १७ ॥

— सवैया २३ —

लाभ अनंत अनंत सुभोग, अनंतुपभोग अनंत सुदाना,
वीरज नाथ अनंत धरै तु हि, आनंद रूप अनंत सुज्ञाना।
लालच लोभ तजे तुवदास, लहै तुव पास महामतिवाना,
लांगलि आदि भजै सब तोहि, जपै जतिराय तु ही भगवाना ॥ १८ ॥

लाधवता न लहै तुव सेय लहै अति ही सुगुरुत्व महंता,
तू न लघू न गुरू भगवान, तु ही प्रभु लोक गुरू भगवंत।
लाडिल तू हि जु लाल बिसाल, सुलाज तुझै हमरी गुनवंत,
लाडिलि तेरी हि आगंध इतिह जु और न लाडिलि लास रहता ॥ १९ ॥

लापर लोग लहै नहि तोहि, लहै सुप्रवानिक वानि लपंता,
लाधउ तू हि मुनीनि मनोहर, लाय जु लौ तुझ कौं हि जपंता।
लागि जु लागि सुझंनि सवादनि मूरिख लोग, तुझे न रटंता,
लाग लगाव करे जग सौं सठ जीव फिरै जग मांहि नटंता ॥ २० ॥

लांक जु ऊपरि बांधि ऊषगा, न पाय उमग सुवीरपनां कौ,
लात जु खाइय मोहतनी अति, भाव न भायउ धीरपनां कौ।
मोह हि जीति सकैं सुझ सूर न और धरै पथ सूर पनां कौ,
लिप्त रहै तन भावनि मांहि विरद धरै वड़ क्रूर पनां कौ ॥ २१ ॥

लिन्न भये भव भावनि मांहि, लिख्यौ श्रुति कौं न लख्यौ जग जीवनि,
लीनउ नांहि स्वभाव चिदात्म लीन भये अति मांहि अजीवनि।
लीक गही नहि नाथ तिहारि हि धारिय लीक जिका भवि जीवनि,
राचि अलीकहि लीढ भये परपंचनि मांहि गनी निज जीवनि ॥ २२ ॥

— सारठा —

लीजे तेरौ नाम, दीजे दान अनेक विधि।
जइए तीरथ धाम, गृहवासिनि कौं ए उचित ॥ २३ ॥

लीन होय तुव मांहि, तज नीमाया जाल सहु ।
 साधुनि कौं निज पांहि, लखनीं तू ही अद्विती ॥ २४ ॥
 लीला और न कोई, लीला निज परणति सही ।
 भेदभाव नहि होइ, द्रव्यभाव परणति विषै ॥ २५ ॥
 लीला मात्रैं तू हि, तारै भवसागर थकी ।
 तो सा तूहि प्रभूहि, लीलाधर धरणीधरा ॥ २६ ॥
 लीये मुनि निज मांहि, दीयो वास जु सासतौ ।
 लुप्त कदाचित नांहि, गुप्त सदा परगट तू ही ॥ २७ ॥
 लुब्ध भाव नहि कोइ, लुब्धक तोहि न पांव ही ।
 लुपै न कबहु सोइ, लिपै नही करमनि थकी ॥ २८ ॥

— दोहा —

लुकै भाजि भव वन विषै, तुव दासनि पै मोहि ।
 लरि न सकैं दासांनि तैं, इह पापी अति द्रोहि ॥ २९ ॥
 लुटे न कबहु नां लुटैं, लुटि हैं नांहि कदापि ।
 कर्मनि पै तुव सेवका, अतिबल तू हि उदापि ॥ ३० ॥
 लूटि लियौ भव वन विषै, कर्म मिले अति चोर ।
 अव उपगार करौ प्रभू, तुम नरपति अति जोर ॥ ३१ ॥
 लूखौ जग सौं होयकरि, करि एकाग्र जु चित ।
 तोहि भजैं सोई लहै, चेतन रूप सुवित्त ॥ ३२ ॥
 लू कहिये ताती पवन, लू सम इह भव वाय ।
 तू हि हरै झर लायकैं, अमृत रूप सुराय ॥ ३३ ॥
 लूलौ अंध सुकंध चढ़ि, दवतैं निकसै जेम ।
 ज्ञान चरनकै कंध चढ़ि, भवतैं निकसै तेम ॥ ३४ ॥
 लूला पावैं चरन कौं, अंधा आंखि लहैं हि ।
 तेरेई परसाद तैं, इह गुरु देव कहैंहि ॥ ३५ ॥

लेखनि मैं आवैं नहीं, लिख्यो न कबहू जाय।
 तेरी जस अत्यंत है, लेखक नाहि लिखाय ॥ ३६ ॥
 लेनहार भवि रासि कौ, तू अलेख अति लेख।
 लेस्या रहित अलेस तू, धारै गुन जु असेष ॥ ३७ ॥
 लेज रावरी वांनि है, भव कूपनि तैं काढि।
 जीवनि कौं निखान दे, तू है अतुल गुनाढि ॥ ३८ ॥
 लेप रहित निरलेप तू, लेहु लेहु निज मांहि।
 ले इह आलय नाम है, तेरै आलय नांहि ॥ ३९ ॥
 तेरी आलय ज्ञान है, ताकौं आलय तूहि।
 सर्व ज्ञेय कौ गृह तुही, सब तैं भिन्न प्रभूहि ॥ ४० ॥
 फुनि जु सल्लेषम नाम है, ले इह सूत्र मझार।
 वाय पित्त सल्लेषमा, तेरै नांहि विकार ॥ ४१ ॥
 लेन योगि निजरूप है, तजि देनां परभाव।
 इह तेरी उपदेश है, तू चैतन्य स्वभाव ॥ ४२ ॥
 लेस मात्र रागादिका, तेरै नांहि विभाव।
 लै लै आपुन मांहि तू, दै आनंद स्वभाव ॥ ४३ ॥
 लोक विलोकी नाथ तू, लोक नाथ जगनाथ।
 लोकनि कौ आधार तू, सर्व लोक तुव साथ ॥ ४४ ॥
 लोलपता सब त्यागि कै, हूँ निरलोभ महंत।
 तोहि भजैं तू लोकमणि, लोभी नांहि लहंत ॥ ४५ ॥

— सर्वथा २३ —

लोभ समान न औगुन आन, नहीं चुगली सम पाप जु गाथा,
 सत्य समान न आन महातम शुचि मन तुल्य न तीरथ न्हाथा।
 सज्जनता सम और कहा गुन कीरति तुल्य न भूषन भाथा,
 सद विद्यासम और कहा धन औजस तुल्य न मृत्यु वताथा ॥ ४६ ॥

— दोहा —

लोकालोक सुजायको, लोक शिखर अतिभास ।
 लोक प्रमाण सुजाण सो, दे दासनि कौं वास ॥ ४७ ॥
 लोल नांव चंचल तनों, चंचल लहें न जाहि ।
 नही लोलता दास कै, दासहि पावै ताहि ॥ ४८ ॥
 लोच नही भव भाव में, लोच रूप है नाथ ।
 लोकपाल पूजैं चरन, असरन सरन अनाथ ॥ ४९ ॥
 लोहें निगड सन पाय है, कनकं निगड सन पुण्ड ।
 दोऊ बंधन रूप ए, तू दोऊनि तैं शुन्य ॥ ५० ॥

— चौपई —

लोद फटकरी हरै बिना, जैसै रंग मजीठ न गिना ।
 तेरी रुचि सरधा परतीत, बिनु गलता नमता नहि लीत ॥ ५१ ॥
 लोष्ट समान जगत की भूति, या सम और न पाप प्रसूति ।
 अविनासी आनंद विभूति, सो तेरी संपति अनुभूति ॥ ५२ ॥
 लोप होय नहि जाको कदा, सो संपति दै रहइ जु सदा ।
 नही लौल्यता तेरे मांहि, लौकिक तोहि जु पावैं नाहि ॥ ५३ ॥
 अति अलौकिकी तेरी रीति, लौकांतिक धारैं परतीति ।
 अति ही सलौनी तेरी भक्ति, भक्ति थकी पड़ए निज शक्ति ॥ ५४ ॥
 लंपट तोहि न ध्यावैं प्रभू, लिंग विवर्जित तू ही विभू ।
 लंघै भव सागर कौं तेहि, अहानिसि ध्यावैं तोकों जेहि ॥ ५५ ॥
 लंघ्यो जाय न तू गुन सिंधु, लंछिन सर्व हरै जग वंधु ।
 लंब हाथ तू अति हि समर्थ, द्रव्य लिंग पावैं नहि अर्थ ॥ ५६ ॥
 भाव लिंगि योगीश्वर तोहि, ध्यावैं तोसौं तनमय होहि ।
 दसा अलिंग धरै तू देव, नाहि कुलिंगि धरै तुव सेव ॥ ५७ ॥

-- दोहा --

लं पृथ्वी कौ बीज है, वं जल कौ है बीज।
 रं अग्नी का बीज है, यं मारुत कौ बीज ॥ ५८ ॥
 हं आकाश कौ बीज है, सब बीजनि कौ बीज।
 काज बीज तू देख है, अदभुत सुर अवनीज ॥ ५९ ॥
 लः कहिये प्रभु दान कौ, दान प्रकासै तू हि।
 दाता तो सम और नहि, दीन दयाल प्रभूहि ॥ ६० ॥

अथ वारा मात्रा एक कवित्त मैं।

लक्षण अनंत तोमैं, लायक तू ज्ञायक है,
 लिपै नाहि काहु सौंहि लीन निज रूप मैं।
 लुपै नाहि लुखी नाहि, लुखी भव भोगिनी सैं,
 लेप नाहि जाके कोऊ आनंद स्वरूप मैं।
 लै लै आप माहि मोहि लोभी नाहि लहै तोहि,
 लौल्यता न दासनि कै ते न भव कूप मैं।
 लंपट लहैं न सेव लः प्रकास तू अछेव,
 अकथ स्वरूप नाथ आवैं नां प्ररूप मैं ॥ ६१ ॥

-- कुंडलिया छंद --

लाल तिहारी लक्ष्मी ता सम और न कोय,
 निज स्वरूप लावण्यता सो अनुभूती होय।
 सो अनुभूती होय, शंकरी सोइ विभूती,
 जगत ललमा होइ, लाडिली आनंद भूती।
 प्रभा जिनेंद्रा ऋद्धि, मोह रागादि प्रहारी,
 भाषै दौलति ताहि, लक्ष्मी लाल तिहारी ॥ ६२ ॥

इति लकार संपूर्ण। आगैं वकार का व्याख्यान करै है।

— श्लोक —

वश्येन्द्रियं वृषाधीशं, वाक् वादिनि भासकं ।
विशालाक्षं च विश्वेशं वीतरागं गत क्लमं ॥ १ ॥
खंदे वेदांग वक्तारं, निर्वेद निरदूषणं ।
वैवस्वत हरं धीरं, व्योम तुल्यं च निर्मलं ॥ छ ॥
सर्व मात्रा मयं धीरं वंदे खं शरणं विभुं ॥ २ ॥

— उपेन्द्र वज्रा छंद —

भाष्यो वकारो वरणो जु देवा, धारि दिगाधीश जु तेरि सेवा ।
कह्यो वकारो फुनि वायु व नामा, तोकों जगद्धायु लगै न रामा ॥ १ ॥
तू ही जु वक्ता वदतांवरो है, वश्येन्द्रियो देव दिगंवरो है ।
वृषो वृषांको वृषभोहि तू ही, देवा जु तू ही वृषभध्वजो ही ॥ २ ॥
धर्मो पवित्रो जु वृषो कहावै, धर्मो जु तू ही अति धर्म गावै ।
अवर्णवर्णो वृषभांक स्वामी, वर्णो तुझी कौन सुभाति नामी ॥ ३ ॥
तू ही जु देवा सुवरिष्ट धी है, तू ही बृहद्धाव धरो घती है ।
बृहस्पती की हु न बुद्धि औसी, गावै जु कीर्ती कह्यु है जु जैसी ॥ ४ ॥
वृद्धो प्रवृद्धो वर्दायको तू, शुद्ध स्वभावो जग नायको तू ।
आनंदमूर्ती अति ही विलासा, ध्यावै न तोकों जु अभव्य रासा ॥ ५ ॥

— छंद बेसरी —

व्यक्त वशी जु वरेण्य तू ही है, वर्षीयान जु नाथ सही है ।
वसै जिनों कै घटि तू देवा, हरै तिनीं का पाप अछेवा ॥ ६ ॥
वज्रागनि सम त्रिजा एही, सीत करै तू निजरस देही ।
वही तू ही जाकों ऋषि ध्यावैं, वही तू हि नारद जस गावैं ॥ ७ ॥
वही तूहि वज्री अति सेवैं, वही तू हि जातैं शिव लेवैं ।
वही तू हि चक्री सिर नावैं, वही तू हि फणपति अति गावैं ॥ ८ ॥

वन्यो ठन्यो अति सुंदर रूपा, वनि आवैं तोकों वड भूपा।
 तेरी सौ वानिक तोही पै, वाचस्पति नहि परद्रोही पै ॥ ९ ॥
 वातरसन निर्वात जु तू ही, वागीश्वर धीश्वर जु प्रभूही।
 वायु मूरती है जु असंगा, वारि मूरती शांत अभंगा ॥ १० ॥
 वहि मूर्ती कर्म हि जरै, धरमूर्ती शान्ति जु धरै।
 नभ मूर्ती तु है जु अलिप्ता, सर्वस्वरूप तू हि अति गिप्ता ॥ ११ ॥
 वायुरोध उपदेश करै तू, मन रोधन कै हेतु कहै तू।
 वायु न तैर काय हु नांही, व्यापक ब्रह्म तू हि निज मांहीं ॥ १२ ॥
 वात्सल्यादि प्रकासै तू ही, वाच्य वितीत अवाच्य प्रभू ही।
 वलि जाऊं तेरी जगनाथा, वारिज चरन भजैं मुनि नाथा ॥ १३ ॥
 वाधा रहित विशाल जु तू ही, विद्यानिधि विद्वान प्रभू ही।
 विपुल ज्योति धारक तू देवा, विश्वंभर दे अपुनी सेवा ॥ १४ ॥
 तू हि विविक्त विवेद सुवेदा, जपहि यतीश्वर होय अभेवा।
 सुविधि विधाता अविधि विनासी, विनय मूल अति धर्म प्रकासी ॥ १५ ॥
 सुहृद विनेय जनों का तू ही, अविहीत अवितथ तू हि प्रभूहि।
 तू अविलीन विलीन विभावा, तू हि विकल्मष परम स्वभावा ॥ १६ ॥
 विगतराग अविकार विशाला, विगत विहार अहार दयाला।
 नित्य विहारी अढलं विहारी, रंगविहारी तू हि उधीरी ॥ १७ ॥
 प्रभू विदांवर परम सुरूपा, विश्वेश्वर भूतेश्वर भूपा।
 विभवो भावो तू हि अभावो, विश्रुत विश्वात्म विनु दावो ॥ १८ ॥
 विश्वशीर्ष अविनासी स्वांसी, विद्या विश्व देय अभिरांसी।
 विश्वकरण विश्वेशो ईशा, विष्टरश्रव तू श्री जगदीसा ॥ १९ ॥
 विश्वरूप विस्वास सुरूपा, तू विशिष्ट अतिशिष्ट अनूपा।
 महाविक्रमी विश्वमुखा तू, विश्वासी सवकौ हि सखा तू ॥ २० ॥

नायक विश्वतनों तू एका, विजितांतक विरती सुविवेका।
 तू हि विश्ववित विश्वजिती तू, विभयो विरजो जगतपती तू॥ २१ ॥
 तू हि विरागी है जु विशेषा, विघ्न विनाशक है जु अशेषा।
 देव विनायक नायक तू ही, विशेषज्ञ अति विज्ञ प्रभू ही॥ २२ ॥
 तू विकलंक विमुक्तात्मा है, विश्वभूति अति ज्ञानात्मा है।
 विश्व चक्षु तू विश्वजनेता, तू हि विश्वभूतित्व प्रणेता॥ २३ ॥
 विश्व तू हि अति जिश्रु जिनेशा, सर्वग सर्वज्ञो सुमहेश।
 ब्रह्म सुविद्यादायक तू ही, विश्व विलोचन जगत प्रभू ही॥ २४ ॥
 विश्वयोनि निरयोनि गुसाई, विश्व विलोकी अतुल असाई।
 परम विवेकी ध्यांवहि तोही, देहु विधीश्वर सुविधि जु मोही॥ २५ ॥
 विधि प्रेस्क तू अविधि विडारै, विधि अविधी तोकों न निहारै।
 विद्यदाकार अपार जु तू ही, शुद्ध विहाय समो जु अदूही॥ २६ ॥
 विभू दूसरी और न तो सौ, भौंदू जन दूजी नहि मोसौ।
 तोहि विहाय लग्यौ भ्रम जारा, ध्यायो नाही जगत अधारा॥ २७ ॥
 तो हि विहावै नित्य जु यों हि, भाव विभाव गहै नहि क्यौं ही।
 विश्व कर्म तैं न्यारा तू ही, विश्वमूरती तू हि प्रभू ही॥ २८ ॥
 विश्व जु कर्मा तू हि कहावै, करम करम की रीति बतावै।
 वसै विभा जा मांहि अनंता, तू हि विभाधर विश्व लखंता॥ २९ ॥
 विविध प्रकार कौं सुग पूजा, बिबुध प्रपूजित तू जग दूजा।
 विधुताशेष निबन्धन तू ही, संसारार्णव तार प्रभू ही॥ ३० ॥
 तू वितिरिक्त परम सुख भाया, नित्य विमुक्त विमुक्ति प्रदाया।
 विसतीरण तू विश्व प्रमाणा, पुरुष प्रमाण पुराण सुजाणा॥ ३१ ॥
 वितरण दान तनों है नामा, तू दानी दानेश्वर रामा।
 विरज करे रजरहित विमोही, अरज सुने भय हरि निर्मोही॥ ३२ ॥

विषहर अमृतधर तू देवा, विषधर पति धारें तूव सेवा ।
 विग्रह हरन करन आनंदा, चिदंघन चेतन ज्ञानानंदा ॥ ३३ ॥
 असरीरी जु अविग्रह आपा, सुनि विनती मेटी भवतापा ।
 सर्व वितीत विराग विकासा, महा विपुल मति विमल विलासा ॥ ३४ ॥
 विश्वनाथ अति है जु विरक्ता, परम विराम विकांम अरक्ता ।
 विद्याधर भूधर अविधारा, विषयातीत अतीत अपारा ॥ ३५ ॥
 विरह वितीत वियोग वितीता, सदा सयोगी योग अतीता ।
 सर्व विराटपती महाराजा, सर्व विकासी सर्व समाजा ॥ ३६ ॥
 विदुष विबुध ए पंडित नामा, पंडित तेहि भजैं गुण धामा ।
 तू हि विराजै सर्व जु पासे, ज्ञान स्वरूप अनंद प्रकासे ॥ ३७ ॥

— अनुष्टुप छंद —

विना तेरी कृपा नाथा, नाहि पावैं विशुद्धता ।
 विना शुद्धि न सिद्धि है, सिद्धि स्वात्मोपलब्धिता ॥ ३८ ॥
 विपक्षी नां लहैं सिद्धि, पक्षी तेरे लहैं शिवा ।
 विक्कहिये पक्षी नामा, द्विपक्षी तू सदा शिवा ॥ ३९ ॥
 पक्षी तारे पशु तारे, तारे तैं सुर मानवा ।
 नर तारा तु ही देवा, तारे तैं हि जु दानवा ॥ ४० ॥

— गायक छंद —

तद्धव तारै मनुजा, जन्मांतर देव नारका पसवा ।
 तू हि उधारै दनुजा, भवतारा तू हि बत धारा ॥ ४१ ॥
 नांव विराट जु गरुडा, काल अही नासने तु ही गरुडा ।
 ध्यावैं तो हि जु अजडा, गरड ध्वज पूजनीको तू ॥ ४२ ॥
 वि क्हिये आकासा, तू हि चिदाकास तत्त्व प्रतिभासा ।
 वीतराग सुविलासा, वीत विमोहा सु देवा तू ॥ ४३ ॥
 वीत विकारा वीरा, वीराधिप वीर वीतसंगा तू ।
 वीत प्रचारा धीरा, वीनधरा नारदा ध्यावैं ॥ ४४ ॥

ब्रीडा आदि गुना जे, धारैं दासा सुने हि तुव देसा।
 पांवहि ज्ञान धना जे, ब्रीडा तोकाँ हि दासनि की॥ ४५ ॥
 व्युतपन्ना जे साधु, व्युतपत्ती ज्ञान ध्यान की जिनकै।
 तेरी करहि अराधू, व्यूढा प्रौढा मुनी शुद्धा॥ ४६ ॥
 व्यूहादिक अति भेदा, युद्ध विषै होइ सूरवीरनिकै।
 युद्ध विना विनु खेदा, जीतैं तेरे जना मोहैं॥ ४७ ॥
 वेद विधाता तू ही, वेद तिहारी हि वांनी सिद्धांता।
 वेत्ता सर्व समूही, निरवेदा तू हि अतिवेदा॥ ४८ ॥
 स्वरस स्व संवेदन जो, तू हि प्रकासै जु तत्त्व विज्ञाना।
 वेधा भव भेदन जो, तू ही वेगें जु भय तारै॥ ४९ ॥
 वेपथु कहिये कंषा, तू हि अकंषा अनश्वरा स्वांमी।
 निरमल तू हि अलिंपा, वेस्यादिक विसन निंदैं तू॥ ५० ॥
 वेषहु धारि विमूढा, तोकाँ ध्यावैं न लागिया धंधै।
 ते पद लहैं न गूढा, रूढा भवसागरैं वूडैं॥ ५१ ॥
 वैवस्वत हैं कालो, कालहरा तू हि कर्महारी है।
 वैद्यो तू हि विसाला, वैश्वानर रोग इंधन काँ॥ ५२ ॥
 वैनतेय सौ तू ही, काम भुयंगो नसै जु तुव नामैं।
 धारै भाव समूही, रति काँ वैधव्य दे तू ही॥ ५३ ॥
 वै इति निश्चै नामा, निश्चै तू ही कहै जु व्यवहारा।
 द्वयनय भासक रामा, वैराग्यालंकृता तू ही॥ ५४ ॥
 वैदेही दुखहारा, वैस्य उधारा सुविप्र तारा तू।
 क्षत्रि उधारा भारा, भव्य उधारा जु तू ही है॥ ५५ ॥
 तु ही विदेहो स्वांमी, वैदेही रीति भासई सकला।
 व्योम समान विरामी, व्योम जडो तू हि चिद्रूपा॥ ५६ ॥
 वोट न तैर कोई, तू हि निरावर्ण है जु निरलेपा।
 केवल चिनमय होई, वोट हरै तू हि दे दरसा॥ ५७ ॥

— सवैया २३ —

घोर तिहारिहि इंद निहारहि, नागपती फुनि तेरिहि घोरा,
चक्रि हली मुनिराय निहारहि, तेरिहि घोर तजे भव घोरा।
घोष चढ़ै अति तोहि जु सेयहि, तू अतिज्ञान अनंत सजोरा,
वोस जु बिंदु समान विषै सुख, तोहि विसारि गहै सुइ भोरा ॥ ५८ ॥

— दोहा —

वस्त्र व्योत कौ सोहई, जैसें जन कौ जोर।
तैसें जग की साहबी, तोहि फवै अति जोर ॥ ५९ ॥
व्यौहारी निश्चैनय, पावैं तोहि जु सेय।
तू निश्चै व्यौहार मय, नय भाषै अति भेव ॥ ६० ॥
वंस अनेक उधारिया, तैर वंस न कोय।
वंसनि में मोती यथा, त्यौ तू जग में होय ॥ ६१ ॥
बंचक तोहि न पावहीं, बंचकता अति निदि।
तू हि अवंचक देव है, विंगि रहित अतिविदि ॥ ६२ ॥
विंगि अर्थ अर शब्द सहु, तू हि विभासै देव।
ए तोकों लहि नहि सकैं, तू अनंत अतिभेव ॥ ६३ ॥
वर्ण पंच रस पंच अर गंध दोय वसु फास।
ए विंसति तैर नही, तू चेतन अतिभास ॥ ६४ ॥
विंतादिको अशुद्ध फल, श्रुति वर्जित तजि देहि।
तेरे दास प्रवीन अति, शुद्ध अन्न जल लेहि ॥ ६५ ॥
वः युष्माकं रावरै, राग न दोष न मोह।
वः कहिये फुनि नैत्र कौं, तू जग नेत्र अमोह ॥ ६६ ॥
वः कहिये फुनि गमन कौं, विना गमन सहु गम्य।
तोकों घट घट की सदा, तू अगम्य अतिरम्य ॥ ६७ ॥
वः श्रेष्ठ जु कौ नांव है, तू अति श्रेष्ठ अपार।
वः विकार हू कौ कहैं, तू स्वांमी अविकार ॥ ६८ ॥

अथ द्वादश मात्रा एक कवित्त मैं ।

वरदाय ऋद्धिदाय, वासना रहित गय,
 विश्वंभर वीतराग, वीतमोह है तु ही ।
 व्युत्पन्न व्युत्पत्ति रूप तू अनंत महा व्यूढ,
 अतिगूढ नाथ वेद मूल है सही ।
 वैवस्वत हारी देव, व्योम तुल्य है अछैव,
 व्यौहार सुनिश्चय कौ भासक रहै वही ।
 गुनवंत ज्ञानवंत, वंस अतितारक तू,
 स्वः प्रकास है विभास गगनिक है नही ॥ ६९ ॥

— कुंडलिया छंद —

तेरी नाथ सुपरणती, वीतरागता जोहु,
 सोई विगत विकारता ज्ञान चेतना सोहु ।
 ज्ञान चेतना सोहु ताहि कहिये निज कमला,
 अतिहिविज्ञता भूति, वस्तुता क्रांति जु विमला ।
 वह तेरी अनुभूति संपदा शक्ति घणेरी,
 भाषैं दीलति ताहि, परणती नाथ जु तेरी ॥ ७० ॥

इति वकार संपूर्ण । आरों तालबी शवर्ण का वर्णन करै है ।

— श्लोक —

शक्ति मूलं च शक्तीशं, धर्मशास्त्र प्रकासकं ।
 शिवंभवं सदाशीलं, शुद्धं शुक्लं प्रभाधरं ॥ १ ॥
 शूरं वीराधिपं वीरं, शैमुषी शै प्रपूजितं ।
 शैलराज निभं धीरं, शोक संताप हारकं ॥ २ ॥
 शौचाचार प्रणेतारं, प्राणिरक्षा प्ररूपकं ।
 शंकरं शंभवं वंदे, शः प्रकाशं विभास्वरं ॥ ३ ॥

— इन्द्र बज्रा छंद —

भाष्यो श वर्णो जु परोक्ष नामा, तू ही परोक्षो परतक्ष रामा।
शक्ति स्वरूपो अतिशक्त तू ही, शस्त प्रशस्तो अति है प्रभूही ॥ १ ॥
शमो जु वर्मा जग को शशी है, शक्नु स्वरूपो अति ही वशी है।
सुखो हि शर्मो सुख रूप तू ही, शक्राभजै तो हि तु ही प्रभू ही ॥ २ ॥
तू ही शरण्यो शरण प्रदाई, तू ही शमी है शमभाव दाई।
हितू न तो सौ जग मांहि कोई, शत्रुज तू ही परसिद्ध होई ॥ ३ ॥
शत्रू हि रागादिक और नाही, शत्रुंजयो तू हि सुलोक मांहि।
नही जु शस्त्रा न हि अस्त्र वस्त्रा, वीराधिवीरो तु हि ज्ञानशस्त्रा ॥ ४ ॥
शब्दा न रूपा नहि गंध फासा, तैर रसा कोई न तू विभासा।
रसी महा तूहि प्रभू रसीला, पावैं न तोकों सठ जे कुसीला ॥ ५ ॥

— दोहा —

शमित सकल दुख दोष तू, शमी दमी ध्यावैंहि।
शव जु मृतग तेई प्रभू, जे तुहि नहि गावैंहि ॥ ६ ॥
तेरी वांनी शर्करा, और शर्करा नाहि।
महा मिष्ट भवताप हर, रस अनंत जा मांहि ॥ ७ ॥
गुन शमुद्र गंभीर तू, अति नय नायक नाथ।
शल्य रहित अविभाव तू, शक्ति अनंता शाथ ॥ ८ ॥
शनैः शनैः भवपार हैं, ले पपीलिका पंथ।
तुरत विहंगम पंथ तैं, उधरैं मुनि निरग्रंथ ॥ ९ ॥

— अनुष्टुप छंद —

शांत रूपी विशुद्धात्मा, शास्ताशासन नायक।
शांतिकारी सदा शुद्धो, शांति नाथो सुज्ञायक ॥ १० ॥
शांतो दांतो प्रकाशात्मा, शास्वतो शाम्य भावक।
शा सोभा कहिये स्वांमी, तू हि सोभा प्रभावक ॥ ११ ॥

शास्वती संपदा तेरी, शातकुंभ समान तू।
 शातकुंभो सुवर्णो है, है सुवर्णो अमान तू॥१२॥
 कर्म काई लगे नाही, ज्ञान रूपी विशाल तू।
 शाखा गोत्रा ना गात्रा है, शास्त्रज्ञो शास्त्र पार तू॥१३॥
 शापानुग्रहसामर्थी, तेरेदासा दयाल हैं, तेरेनामैं सवै न सैं।
 शाकिनी भ्रांति भावा जो, दास पिंडें नही धसैं॥१४॥
 शाक पत्रा न पुष्पा जे, कंद मूला तथा फला।
 तेरे दासा तजैं सर्वे, लेंहि अन्ना तथा जला॥१५॥

— चौपड़ी —

शिव निर्वाण तनीं है नाम, तू निर्वाण रूप अभिराम।
 शिव कल्याण नाम हू होय, तो विनु और न शिव पथ कोइ॥१६॥
 शिव तू ही शंकर है तू हि, बुद्ध विशुद्ध प्रबुद्ध प्रभूहि।
 शिव कहिये रुद्रहु कौ नाम, महारुद्र ध्यावैं तुव धाम॥१७॥
 शिवपुर दायक नायक लोक, लोक शिखर राजै गुन थोक।
 शिक्ष न काहु कौ तु हि गुरु, शिव मंदिर जगजीवन धुरु॥१८॥
 शिष्ट विशिष्ट महा वरवीर, शिष्टाचार प्रकाशक धीर।
 शिष्ट पुरुष धारैं तुव सेव, दुष्ट न पावैं तेरो भेव॥१९॥
 शिखा सूत्र रहिता निस्ग्रंथ, ध्यावैं तोहि धारि तुव पंथ।
 शिखरी पति सम निश्चल ध्यान, धारहि तेरे दास सुज्ञान॥२०॥
 घन गर्जित सम तेरी वांनि, सुनि हरषैं भवि अतिगुन खानि।
 भव्यन से न शिखंडी और, तो सम मेघ न तू जगमौर॥२१॥
 शिखी अगनि भव तुल्य न शिखी, तू हि बुझावैं अतिरस ऋषी।
 शिवा रावरी शक्ति जु होय, शक्ति अनंत धैर तू सोय॥२२॥
 शिला सिद्ध परसिद्ध प्रभाव, तहां तू हि राजै जिनराव।
 स्वगत सर्वगत तू सुखदाय, चरन कमल सेवैं मुनिराय॥२३॥

तिनसम औरि शिलीमुख कौन, अनुभव रस पीवैं धरि मौन ।
 शी शयन जु कौ नाम अनादि, तैर शयन न तू प्रभु आदि ॥ २४ ॥
 शी इह निंदा हू कौ कहैं, पर निंदा करि तोहि नु गहैं ।
 शी हिंसा सोई अति पाप, दया भक्ति कौ मूल निपाप ॥ २५ ॥
 हिंसा करि नारक पद लहैं, दया धरि लोकौ भजि गहैं ।
 तू आनंद सिंधु गंभीर, शीकर शक्ति धरि अति धीर ॥ २६ ॥
 शील निरूपक शील स्वरूप, शीत न उज्ज न तू अतिरूप ।
 शीर्ष लोक कै तू ही रहैं, मुनिवर तोहि जु पास हि लहैं ॥ २७ ॥

— छंद मोती दाम —

कहैं बुध शीघ्र उधारक तू हि, तु ही जिन शुद्ध स्वरूप प्रभू हि ।
 तू ही शुचि रूप दयाल अनंत, तू ही अति शुद्ध प्रबुद्ध सुसंत ॥ २८ ॥
 शुभाशुभ रूप नही निज रूप, प्रभू अति शुद्ध स्वरूप प्ररूप ।
 तु ही अति शुक्ल सुध्यान प्रकास, तु ही प्रभु शुद्ध नयोनय भास ॥ २९ ॥
 जिके शुभ लक्षण हैं मतिवान, जिके अशुभा तजि कै शुभवान ।
 हुये तुव भक्ति धक्की पद शुद्ध, लहैं जु अध्यात्म रूप प्रबुद्ध ॥ ३० ॥
 हुवै जु हरित सुशुष्क हु वृक्ष, लखे तुव दासह कौ परतक्ष ।
 हुवै जु तडाग हु शुष्क भरित, लखे तुव दास जु शुद्ध चरित ॥ ३१ ॥
 यथा नर शुक्ति लखे मतिमूढ, गनै जु रजत समान प्ररूढ ।
 तथा सठ देहहि आत्म जानि, पगे जड मांहि ममत्त जु आनि ॥ ३२ ॥
 जबै तुव शब्द सुनै धरि भाव, तवै निज रूप लखै हि स्वभाव ।
 गहैं तुव भक्ति जु सम्यक दिष्टि, लहैं नहि भक्ति समूढ कुदिष्टि ॥ ३३ ॥

— दोहा —

घट सागर उर शुक्ति में, काल लब्धि परवान ।
 तेरे चैन जु वारिदा, वरसै अमृत ज्ञान ॥ ३४ ॥

सम्यक् मुक्ता फल तवै, उपजै अदभूत रूप।
 ताकरि भूषित मुनिगना, वरें स्वसिद्धि अनूप॥३५॥
 शूर वीर तेरे जना, जीतैं मोह विकार।
 त्यागि शून्यता चित्त की, पावैं ज्ञान अपार॥३६॥
 नहि शूरस्व स्वभाव है, मिथ्यादृष्टिनि मांहि।
 डरैं काल तैं मूढ ए, धीर वीरता नांहि॥३७॥
 शूली कहिये रुद्र कौं, धारैं हाथ त्रिशूल।
 रुद्र जपैं तोकाँ प्रभू, तू दयाल शिव मूल॥३८॥
 शूलारोहण आदि दे, नरक वेदनां नाथ।
 पावैं जे तोहि न भजैं, करैं विषय कौ साथ॥३९॥
 शूकर कूकर आदि बहु, निंदि जाँनि सठ जीव।
 पावैं तेरी भक्ति विनु, भव भव कष्ट अतीव॥४०॥
 शून्यवादि आदिक जड़ा, जे तुहि गावैं नांहि।
 जनम मरन अति ही करैं, भवसागर कैं मांहि॥४१॥
 शूची सूत्र विना नसै, तुव सूत्रें विनु जीव।
 भव वन मैं भ्रमण करे, दुख पावै जु अतीव॥४२॥
 शेखर जग कौ तू सही, भजैं शेमुषी धार।
 नाम शेमुषी बुद्धि कौ, तू है बुद्धि हु पार॥४३॥
 शेष अल्प कौ नाम है, नाम अशेष समस्त।
 अल्पकाल मैं भव तिरैं, तेरे दास प्रसस्त॥४४॥
 लहैं अशेष स्वभाव कौं, भक्ति भाव परभाव।
 शेश सुरेश तुझै रटैं, तू त्रिभुवन कौ गव॥४५॥
 शेक सोंचवे कौं कहैं, तू सोंचैं तरु धर्म।
 करुणा रस परकास तू, करुणाकर अतिपर्म॥४६॥

शैल नाम गिर कौ कहैं, गिरपति से थिर भाव ।
 तेरे दास महामती, धारैं नाहि विभाव ॥ ४७ ॥
 शैल सुता शिव की तिया, जपै तोहि चित लाय ।
 सकल ध्येय आदेय तू, जगनीवन जिनराय ॥ ४८ ॥
 शिशु बालक कौ नाम है, जो बालक कौ भाव ।
 सो शैशव कहिये प्रभू, तू नहि बाल स्वभाव ॥ ४९ ॥
 शिव कल्याण स्वरूप तू, तेरे दासा सैव ।
 और न शैवा गुर कहैं, तो विनु और न दैव ॥ ५० ॥
 शोक न तेरे जन धरैं, आनंद रूप सदीव ।
 शोभनीक तू ही प्रभू, है अशोक धर पीव ॥ ५१ ॥
 सोणित लोही कौ कहैं, रेत नाम है धात ।
 रेत रक्त कौ पिण्ड इह, तोहि छुवै किम तात ॥ ५२ ॥
 शूरवीर कौ भाव जो, शौर्य कहावै नाथ ।
 सो तेरे दासनि विषै, कायर जग जन साथ ॥ ५३ ॥
 शौच प्रकासी शुद्ध तू, करुणा विनु नहि शौच ।
 तू ही एक शुचिश्रवा, जगजन सर्व अशोच ॥ ५४ ॥
 अंतर शौच सुग्यान है, व्रत तप बाहिर शौच ।
 लौकिक शौच जु कुश जला, लंपट भाव अशौच ॥ ५५ ॥
 शं कहिये सुख कौ प्रभू, तू शंकर जगदेव ।
 शंभव शंभु अदंभ तू, दै दयाल निज सेव ॥ ५६ ॥
 शंखादिक बहु बाजई, बादित्रा अतिभेद ।
 शंका तेरे नाहि है, तू निशंक विनु खेद ॥ ५७ ॥
 निःशंकित आदिक गुणा, धारैं तेरे दास ।
 तेरी शरणों लेयकैं, पावैं अतुल विलास ॥ ५८ ॥

शः कहिये मात्रांतिकी, तू सब मात्रा मांहि।
चिनमात्रो जगदीस तू, राग दोष भ्रम नांहि॥५९॥

अथ बारा मात्रा एक कबित्त में।

— सवैया ३१ —

शक्तिनि कौ पुंज तूहि, शांत दांत है प्रभूहि,
शिव रूप तू अनूप, शील कौ निवास है।
शुद्ध बुद्ध शूरवीर ध्यावैं, तोहि साधु धीर,
शेमुषी प्रदायक तू आनंद विलास है।
निश्चल स्वभाव शैलनाथ से अडिगा भाव
जपैं मुनि राव तू हि शोक कौ विनाश है।
शौच कौ विकासक तू, शंकर जिनिंद देव
शः प्रकाश ज्ञानभास नायक सुपास है॥६०॥

— कुंडलिया छंद —

तेरी नाथ जु शांतता, सत्ता अतुलित शक्ति,
श्री संपति लक्ष्मी रमा शिवा वस्तुता व्यक्ति।
शिवा वस्तुता व्यक्ति, भिन्न नहि तोतैं नाथा,
एक स्वभाव स्वरूप कवहु छांडै नहि साथा।
भवा भवानी भूति, शुद्धता ऋद्धि घणोरी,
भार्षे दौलति ताहि, शांतता नाथ जु तेरी॥६१॥

आगैं सवर्गी षकार का व्याख्यान करै है।

(प को कहीं 'य' रूप में रखा गया है, जैसे षोडस काण्व में; कहीं 'ख' रूप में, जैसे षोट - खोट।)

— संपादक)

— श्लोक —

षकाराक्षर कर्त्तारं, भेत्तारं कर्मभूभृतां।
सर्वमात्रामयं धीरं, वीरं वंदे सदोदयं॥१॥

— सोरठा —

ष क्हिये श्रुति मांहि, नांम इहै जु परोक्ष कौ।
 यामैं भ्रांति जु नांहि, तू परोक्ष परतक्ष है॥२॥
 तू षटकारक रूप, षट करम जु तैं नही।
 तू षट द्रव्य निरूप, षट कायनि कौ पीहरा॥३॥
 षटदस भांवन भाय, पावैं तेरौ पद मुनी।
 षटदस सुगं कहाय, सो चाहैं नहि मुनिवरा॥४॥
 षट बिंशति प्रकृती हि, मोहतनी मुनिवर हतैं।
 तिनतैं कर्म जु बीहि, भागैं अपनी सौंज ले॥५॥
 षट त्रिंशत गुन धार, आइरिया तोकौं भजैं।
 षट चालीस जु सार, गुन पावैं तुव भजनतैं॥६॥

— दोहा —

षट पंचास कुमारिका, देवी रुचिक निवास।
 चरन कमल ध्यावैं प्रभू, तेरे आनंद रासि॥७॥
 षष्टि सहंसर सुत पिता, चक्री सगर सुग्यान।
 तेरे चरन सरोज भजि, पहुच्यो पुर निरवान॥८॥
 गहै निगोद सरीर कौं, लहि कारण षटतीस।
 पावैं तेरे भजन विनु, जनम मरन अति ईस॥९॥
 षट षष्टी सहसर उपरि, त्रय सत अर षट तीस।
 अंत महुरत एक मैं, भासैं मुनि अवनीस॥१०॥
 मन वच तन की चपलता, वसु मद विषया पंच।
 चउ विकहा, विसना सपत, चउकषाय दुख संच॥११॥
 पंच मिथ्यात समेत ए, कारण हैं षट तीस।
 इन करि जीव निगोद, लहि सुख देखैं कुमतीस॥१२॥

षट् सप्तति लक्षा प्रधक्, तिरं चैत्य निवास ।
 दीप तडित अगनी उदधि, मेघ दिसिनि कै भास ॥ १३ ॥
 षट् असी तिके अर्द्ध ए, तीयालीसा होय ।
 एती प्रकृति न बंधई, चौथौ ठाण जु सोइ ॥ १४ ॥
 षणवती लक्षा प्रभू, तेरे सौध विसाल ।
 पौन कुमारनिकै घरां, स्तनमई अघटाल ॥ १५ ॥
 षणवती सहसा त्रिया, नारी तजि चक्रीस ।
 षट्वा (खटवा) शयन हु त्यागि कै, हँ निरग्रंथ मुनीस ॥ १६ ॥
 वनवासी हँ तुवं जपैं, भवतन भोग विरक्त ।
 अनुभौ रस पीवैं महा, धर्म शुक्ल अनुरक्त ॥ १७ ॥
 षपै (खपै) चित्त भव भोग कौं, भववासिनिकौ नाथ ।
 षपैं (खपैं) न तातैं कर्म अघ, लहैं न तेरौ साथ ॥ १८ ॥
 षवरि (खवरि) नही निज रूप की, पगे प्रपंचनि मांहि ।
 लगे धाम धन मांहि ए, तातैं भ्रमण करांहि ॥ १९ ॥
 षडसम कर्म समूह हँ, अगनि तुल्य तुव ध्यान ।
 भस्म करै क्षण मांहि सह, ध्यान समान न आन ॥ २० ॥

— छंद —

षा कहिये लक्ष्मी कौ नामा, तू लक्ष्मी धर देवा ।
 तो विनु लक्ष्मी नहि औरनिकै, दै लक्ष्मीवर सेवा ॥ २१ ॥
 षान (खान) न पान न गान न ताना, अस्त्र न वस्त्र न तैर ।
 नादि काल तैं कबहु न लाधौ, लागी भ्रांति जु मेरै ॥ २२ ॥
 षाड (खाड) समान जगत में प्रांती, पर्यौ नादि तैं मूढा ।
 तू हि निकासि देय पद ऊरध, अविनश्वर अति गूढा ॥ २३ ॥
 हरि करि निज धन षाली (खाली) हाथा, कियो कर्म दुष्टनि नैं ।
 भस्मायो चहुंगति में अति गति, रागादिक पुष्टनिमें ॥ २४ ॥

खांडौ (खांडौ) ज्ञान भाव कौ जिनकै, तेई कर्म प्रहारैं।
 लेकरि चेतनभाव अतुल धन, तेरौ नग्र निहारैं ॥ २५ ॥
 षाई (खाई) कोट न पौरि न कोई, गृह पंकति हू नांही।
 वापी कृप न सरवर सरिता, तू है जा पुर मांही ॥ २६ ॥
 ता पुर पहुंचैं तेरे दासा, जे निरविषया होवैं।
 विषैं समान न और जु वैरी, ए जीवनि कौं घोवैं ॥ २७ ॥
 खाजि खुजावत हि भल लागैं, फुनि अधिकौ दुख होई।
 विषय सेवता ही भल लागैं, दुष दैं भव भव सोई ॥ २८ ॥
 खांहि अभक्ष अपेय जु पीवैं, ते नहि तेरे दासा।
 खादि अखादि विचार विना पसु, अविवेकी अधरासा ॥ २९ ॥
 कुवनिज करि तुन भक्ति न पावैं, पावैं नर्क निराला ॥ ३० ॥
 खांड लवन धांनदिक वनिजा, करहि न तेरे दासा ॥ ३० ॥
 खाख समान जगत की माया तामैं, राखैं नांही।
 संसय विभ्रम मोह रहित नर मगन रहैं तो मांही ॥ ३१ ॥
 खाय जु रूखा टुका साधू, ध्यावैं तोहि नचिंता।
 तेई भव जल कौं जल देकरि, पावैं तुव पुर संता ॥ ३२ ॥
 खास सास आदिक अति रोगा, दासनि कौं लखि भागैं।
 रागादिक रोगा जब नासैं, तब कछु व्याधि न जागैं ॥ ३३ ॥
 खिसैं न ग्यान क्रिया तैं कबही, तेरे दास निकंपा।
 परे खिसावैं जिन पै कर्मा, पद पावैं जु अलिंपा ॥ ३४ ॥
 खिरक समान इहै भव स्वांमी, पसु सम ए भववासी।
 विषयरूप त्रिण के अभिलाषी, अविवेकी दुष रासी ॥ ३५ ॥
 नर तेई जे तेरे दासा, कण मैं चित लगावैं।
 विषय रूप त्रिण कबहु न चाहैं, ज्ञान स्वरूप हि भावैं ॥ ३६ ॥

खिजहि न कबहु खिजाये धीर, क्षमा रूप अति शांता ।
खिलहि फूल ज्यों चित्त जिनी का, गहहि सुवास प्रशांता ॥ ३७ ॥

— छंद भुजंगी प्रयात —

खिनायो न जावै बुलायो न आवै, तु ही सर्व रूपो सर्वो मैं रहावै ।
न खीजैं न रीझैं मुनि शांत भावा, तुझी कों रैं त्यागि सर्वे विभावा ॥ ३८ ॥
जु खीला समाना त्रिशल्या हमार, चुभी हैं हिये मैं तुही नाथ टारैं ।
खुभी है जिनीं कै तिहारी सुवांनी, तिनीं कै न माया न मिथ्या निदांनी ॥ ३९ ॥
खुसै नाहि दासांनि कौ ज्ञान बित्ता, नही कर्म चौरांनि पै जाहि जित्ता ।
खुसी हि रहैं नित्य तोकौ हि ध्यायें, सबे सोक चिंता नसैं तोहि गावैं ॥ ४० ॥
खुलै भ्रांति ग्रंथी तिहारे प्रभावैं, लहै तत्त्व विज्ञान भ्रांती अभावैं ।
विषै पंक मैं जीव खूंतौ अनादी, निकासे तुही देव दे ज्ञान आदी ॥ ४१ ॥
न खेस्या खिसैं ध्यान तैं धीर चित्ता, जिनीं नैं लख्यौ एक तू शुद्ध चित्ता ।
सही खेह तुल्या इहैं भौ विभूती, इहैं मोहमाया जु भ्रांति प्रसूती ॥ ४२ ॥
करै खेद याकैं लिये मूढ भावा, जपैं नाहि तोकों गहैं ए विभावा ।
मुनी चित्त कौ खींचि ल्यावैं हि तोमैं, भज्यौ नाहि तोकों लगी भ्रांति मोमैं ॥ ४३ ॥

— सारठा —

सर्व जीव पैकार, काल महा परवल सदा ।
पै करि ताकौ पार, पावैं भव की तुव जना ॥ ४४ ॥
षोडश कारण भाय, तुव पद पावैं मुनि जना ।
सब कारण कौ राय, कारण एक तु ही सदा ॥ ४५ ॥
खोट रहै नहि नाथ, मुनिकैं तेरी दिव्य ध्वनि ।
खोटे जीव न साथ, पावैं तेरी कबहु भी ॥ ४६ ॥
खोले धरे अनंत, छेह न आयौ भक्तनीं ।
भक्ति देहु भगवंत, जा करि भव भ्रमण मिटैं ॥ ४७ ॥

खोज न पायी नाथ, तुव मारग कौ मैं कभी।
लडे कर्म जड साथ, उन मारग भरमाईयौं ॥ ४८ ॥

— सवैया —

खोहरै पहार कै निवास करि रटैं साधु
खौरि मैं इकंत बैठि तोही कौ चितारहीं।
खौरि काटि चंदन की वंदन करै गृहस्थ
जति जन न्हवन न खौरि कभी धारही।
साधुनि की खौरक तैं भागैं काम क्रोध छल
तोहि लषि साधवा जु हीं हि भवपार ही।
षण्ड नर तेहि जेहि ध्यावैं नाहि तो कौं कभी,
तैरेई प्रसाद भव्य राग दोष टारहीं ॥ ४९ ॥

— दोहा —

खंजन की मिटि खंजता, पद पावैं अविकार।
अंध आंखि पावैं प्रभु, ज्ञान रूप अतिसार ॥ ५० ॥
खंध न बंध न रावरै, खंध देस नहि कोइ।
खंध प्रदेस न है प्रभु, परमाणव हु न होय ॥ ५१ ॥
तू केवल चिद्रूप है, गुन अनंत तो मांहि।
ज्ञानानंद स्वरूप तू, परपंचनि मैं नाहि ॥ ५२ ॥
षष्ठ्या पासि दु शून्य जो, वाग्म मात्रा सोच।
सब मात्रा मैं एक तू, चिन्मात्रो प्रभु होय ॥ ५३ ॥

अथ द्वादश मात्रा एक कवित मैं।

— सवैया —

तू हि षट्कारक स्वरूप गुन षानि (खांनि) भूप,
षिसैं (खिसैं) नाहि ध्यान तैं कदापि रावरे जना।

घीजि (खीजि) रीझि त्यागिकैं लगे हि भक्ति भावनि में,
 घुसैं (खुसैं) नाहि मोह पै धरयो स्वरूप मैं मना ।
 पूतौ (खुतौ) ना विभावनि मैं षेद (खेद) विनु नायक तू,
 धै (खै) करै जु घोट (खोट) रूप, अंधकार कौ दिना ।
 घोरक (खौरक) न भावैं तेरे दास बजरत कंठिक धरी,
 बंध (खंध) विनु बंध विनु षः प्रकास तू गिना ॥ ५४ ॥

— कुंडलिया छंद —

तेरी देव सुकांतता, हरै सोक संताप,
 ताहि कहैं वुध लक्ष्मी रमा परणती आप ।
 रमा परणती आप, ज्ञान मात्रा जु विभूती,
 ख्याति रावरी सोइ, अतुल आनंद प्रसूती ।
 अनुभूती द्युति कांति, संपदा सिद्धि घणोरी,
 भाषैं दौलति ताहि, कांतता देव सु तेरी ॥ ५५ ॥

इति षकार संपूरणं । आगैं दंती सकार का व्याख्यान करें हैं ।

— श्लोक —

सनातनं सदानंदं, सारासार निरूपकं ।
 सिद्धं शुद्धं बुद्धं, पूजितं सीरपाणिना ॥ १ ॥
 सुश्रुतं सुप्रियं धीरं, सूत्र सिद्धांत दीपकं ।
 मुनिसेनापतिं वीरं, भाव सैन्यान्वितं विभुं ॥ २ ॥
 सोम दृष्टिं धरा धीशं, सौम्यं शांतं सदोदयं ।
 संपदा संचयं ध्याये, ह्यः स याति परंपदं ॥ ३ ॥

— अरिस्त छंद —

स कहिये श्रुति मांहि श्रेष्ठ कां नाम है,
 तो विनु श्रेष्ठ न कोय, श्रेष्ठ तू राम है ।

स्वष्टा धर्म स्वरूप स्त्रिष्टि कौ तू हि है,
सर्वलोक कौ ईस अधीस प्रभूहि है ॥ ४ ॥

सरवारथ सिद्धि दाय सकल लोकातिगो,
सरव लोक कौ सारथी हि करमातिगो।
सदानंद सद्रूप समरसी भाव तू,
समरस धर मुनिराय जपै जगराव तू ॥ ५ ॥

सर्वग सरवज्ञो हि तू हि सरवत्र है,
सर्वरूप सर्वालियो हि जग छत्र है।
सकल देव सब सम्यकी हि तोकों भजै,
मुनि समंत जु भद्र तोहि लखि भव तजै ॥ ६ ॥

प्रभू सहस्र सुमूर्ति सद्य भवतार तू,
तूहि सहश्र जु शीर्ष सर्वदा सार तू।
तू हि सहश्र जु पात तात सब लोक कौ,
सहश्राक्ष जगदीस ईस गुन थोक कौ ॥ ७ ॥

रटै सहश्र फणाधिपोहि तोकों प्रभू,
सहस्र किरणि ध्यावैहि कीर्ति गावै विभू।
सहश्राक्ष जो इंद रूप तुव निरषतौ,
मगन होय करि नृत्य करै अति हरषतौ ॥ ८ ॥

समता धर मुनिराय धीर तोकों सदा,
अहनिंसि ध्यावैं तोहि नाहि विसरैं कदा।
सक नांही जिनकों कदापि कोऊ तनी,
सखा जिनीं कै तोहि सारिखी जगधनी ॥ ९ ॥

सलिल समाना तेहि दाह भव कौं हरै,
निर्मल रूप मुनीश ध्यान तेरो करै।
सलिल निधी इह जगत याहि, तिरि साधवा,
आवै तेरे लोक यतीश अबाधवा ॥ १० ॥

सब जन तोहि विस्सरि रूलैं भाव जार मैं,
तुव मत प्रोहण विगरि सु डूवैं धार मैं।
सत्य स्वरूप निरूप अनूप अधीस तू,
सफल होय नर देह तो भज्यां ईस तू॥ ११॥

सत्ता रूप अरूप शुद्ध चैतन्य तू,
भव सागर तैं पार करै प्रभु धन्य तू।
सपरस रस अर गंध वर्ण शब्दा नहीं,
ज्ञानानंद स्वरूप तू हि निज गुन महीं॥ १२॥

— कुंडलित्या छंद —

सदा सनातन ईस तू, सदा त्रिप्त जोगीस,
सदा जोग जगदीस तू, सदा भोग भोगीस।
सदा भोग भोगीस, धीस तू धीर सदागति,
सदानंद सद्रूप, सकल समयज्ञ प्रजापति।
सर्व व्यापको तू हि, स्वस्थ अति स्वच्छ सदा धन,
सदा स्वभावी भाव, ईस तू सदा सनातन॥ १३॥

सदा समाहित नाथ तू, परम समाधि स्वरूप,
सखाधिक्य सहाय तू, सर्वेश्वर जगभूप।
सर्वेश्वर जगभूप, वीर तू सर्व समूही,
स्पष्टाक्षर प्रतिभास, है स्वयंबुद्ध प्रभु ही।
सत्य स्वयंभू देव, सेव दै धीर अवाधित,
स्वभू अभू सवरूप, नाथ तू सदा समाहित॥ १४॥

सर्व कलेसा तू हरै, सर्वदोष हर ईस,
सर्व वित्त सर्वात्तमा, सर्वजीव अवनीस।
सर्वजीव अवनीस, सर्वदरसी सबभावा,
सत्य परायण नाथ, सत्य सरधान प्रभावा।

गुन समग्र अति उग्र, तू स्थवीयान अलेसा,
सदाचार परवीन, तू हौं सर्व कलेसा ॥ १५ ॥

समय प्रकासक सार तू, स्वसंवेद्य रस लीन,
कृतकृत्यो सतकृत्य तू, तोमें भाव न दीन ।

तोमें भाव न दीन, तू हि है दीन दयाला,
सतवन तेरी देव, करहि सुरनर मुनि पाला ।

स्व समय रूप अनूप, नाथ तू सर्व विभासक,
तू स्वतंत्र जगदीस, सार तू समय प्रकासक ॥ १६ ॥

समभावा तोहि जु भजैं, ते निज समय लभंत,
स्वयं सिद्ध सब पूजि तू, सरल स्वभाव अनंत ।

सरल स्वभाव अनंत, तू हि है ब्रह्म सनातन,
सर्व विभाव वितीत, मीत तू सर्व सदाधन ।

सकल प्रपंच निवार, तोहि ध्यावैं मुनिरावा,
सकल जीव रक्षिपाल, भजैं तोहि जु समभावा ॥ १७ ॥

— छंद —

सप्त नरक नहि पावैं दासा, सुर्गादिक हु न चाहैं ।
सतरा संजम धारि अनासा, तुव पुर कौं हि उमाहैं ॥ १८ ॥

सातवीस विषया तजि मुनिवर, हौंहि उदासी भव तैं ।
ते तेरी अध्यात्म लहि करि, निकसैं या भव दव तैं ॥ १९ ॥

सप्त तीस सहस्र गनि लीजे, बहुरि पंच सैं गनियैं ।
एते भेद प्रमाद सबै ही, तो भजियां सब हनियैं ॥ २० ॥

विकथा पचवीसा अर पचवीसा हि कषाया गुनियैं ।
पच्ची पच्ची गुनियां एई, छस्सैं पच्ची भनियैं ॥ २१ ॥

फिरि एई इंद्री अर मन सौं, गुन्यां थकी भव मूला ।
साढा सैंतीसाहि सैंकरा, हौं हि महा अघ धूला ॥ २२ ॥

ए फुनि पंच नींद सौं गुनियां, सहसर पौन गुनीसा।
 द्विविधि मोह सौं गुनिया आई, सहसर साढ संतीसा ॥ २३ ॥
 सप्त अधिक चालीसा प्रकती, घाति कर्म की कहिये।
 तुव मारग तैं घाति कर्म हरि, केवल बोध जु लहिये ॥ २४ ॥
 सत्तावन आश्रव तू टारै, सतसठि सम्यक भाषै।
 सम्यक दरसन ज्ञान चरन मय, तो करि निज रस चाषै ॥ २५ ॥
 सत्तरि कोडाकोडि पयोधी धिति है दरसन मोहा।
 तेरे दास हनैं प्रभु मोहा, जिनकै राग न द्रोहा ॥ २६ ॥
 सतहत्तरि कौ बंध खतावै, चौथे ठाणि जु स्वांमी।
 सत्यासी तेरौ ही नामा, सत्य स्वरूप सुतांमी ॥ २७ ॥
 सत्याणव सहसर चौरासी, लक्षा तेरे देवल।
 सुरग लोक मैं नादि अकर्तृम, इह भासैं श्रुति केवल ॥ २८ ॥
 चौथी पंचम छट्टी ग्रीवां, सप्ताधिक सौ देवल।
 तेरे अहमिंद्रनिकरि पूजि, इह भासैं धर केवल ॥ २९ ॥
 सप्त दसाधिक अर सौ प्रकृती, बंधे पहलैं ठाणैं।
 पहलौ ठाण उलंघि लहै बुद्धि, तव तुव भक्ति जु जाणैं ॥ ३० ॥
 सहसर नाम तिहारे जपिकरि, भवि पावैं निज वस्तू।
 अमित अनंत नाम हैं तेरे, तू प्रभू परम प्रशस्तू ॥ ३१ ॥

— छंद वेसरी —

साषा (सखा) जीव भात्रनिकौ तू ही, सरख भूत कौ हितू प्रभृही।
 सरसुति तेरी वांनी कैयै, सरसुति करि आत्म गुन लैये ॥ ३२ ॥
 सपदि सद्य ए शीघ्र जु नामां, तुरत देय तू केवल धामा।
 सकटै कर्म सर्व ले ग्राजा, जब तोकाँ ध्यावैं मुनि राजा ॥ ३३ ॥
 सठ मोसौ दूजौ नहि औरा, तोहि विसारि कियो निज चौरा।
 मन्याँ विषै सौं मैं अतिमूढा, तोहि न ध्यायो हूँ आरूढा ॥ ३४ ॥

सङ्घो पड्यो इह देह जु पापा, सो मैं कुबुधी जान्यो आपा ।
 सत्य स्वरूप न जान्यो तू ही, सदा धरे परपंच समूही ॥ ३५ ॥
 परम समाधि देहु जगराया, मेटि भरमना मूल जु माया ।
 सधन तूही आतम धन धारै, निधन हरै जम तैं जु उवारै ॥ ३६ ॥
 निरधन सब ही निधन निवासा, लक्ष्मीधर तू अतुल प्रकासा ।
 सहित अनंत गुननि तैं तू हीं, रहित विभाव सुशक्ति समूही ॥ ३७ ॥
 सहजानंद सहजगति तूही, सहज विभास प्रकास समूही ।
 सहनशील मुनिराय जु ध्यावैं, सदा सरवदा तोहि जु गावैं ॥ ३८ ॥
 सरवर आतम भाव निमग्ना, रटैं तोहि मुनिवर संविग्ना ।
 कहा सारदी चंदर क्रांती, तुव वांनी सादर अतिक्रांती ॥ ३९ ॥

— मंदाक्रांता छंद —

मुनिज्यो तू निकटहि रहै, सर्व साक्षात् देवा,
 सामीप्यो तू मुनिजननि कै, सार सरवस्व वेवा ।
 साधू पूजैं, अतिशय धरा, सातिशै तू मुनिंदा,
 साध्यो तू ही, जितपति अती, स्वामि है मोक्ष कंदा ॥ ४० ॥
 स्वाधीनात्मा, अति गुण युतो, साधना सर्व गावै,
 स्वात्मारामो, परम पुरुषो, सार्वभौमा जु ध्यावै ।
 साचौ देवा, समरथ सदा, साधका होय पावै,
 तोकों साई, मुनिजन लहैं, वाधका नाहि भावै ॥ ४१ ॥
 साक्षी भूतो, सब घट लखैं, स्वास्थि रूपो तुहि जो,
 सार्वः सर्वो, सकलपति अती, साहिवो है सही जो ।
 साखा गोत्रा, प्रवरन प्रभू, तू असाधारणो है,
 सारी भ्रांती, हरइ मनकी, सारभूतो जिनो है ॥ ४२ ॥

— छंद नागच —

नहीं कदापी स्वापतेय तो समान लोक में,
 तू ही अनंत स्वापतेय है स्वभाव थोक में ।

कहैं जु स्वापतेय द्रव्य, द्रव्य तू चिदात्मा,
सुतत्त्व सार है अपार इस तू गुणात्मा ॥ ४३ ॥

तजेहि स्वाद सर्व ही सु पंच इंद्रियोद्धवा,
करे सुधीर चित्त जे विनासई मनोद्धवा।
जपैं हि सानुकूल होय तोहि सौं जतिंद्रिया,
भजैहि तोहि सात्विका तिके हि हैं अतिंद्रिया ॥ ४४ ॥

नही कदापि सात्विका न राजसा न तामसा,
तु ही अनादि शुद्ध रूप देव है महारसा।
मुनिंद सांहसीक हैं अरण्य के निवासिया,
अहोनिषा रटैं जु तोहि भक्ति भाव भासिया ॥ ४५ ॥

तु ही जु सारथी प्रभू चलावई स्वयंत्र कौं,
स्वभाव रूप यंत्र है, तु ही धरै स्वतंत्र कौं।
न रावरे सुदास कौं कदापि साप काटई,
न रावरे जनांनि कौं भूपाल क्वापि दाटई ॥ ४६ ॥

न रावरे सुदास कै कदापि चौर पैसई,
न रावरे जनांनिकै सुचित्त भ्रांति बैसई।
न रावरे जनांनि कौं कदापि कोई पीडई,
तु ही अनादि औ अनंत एक रूप है दई ॥ ४७ ॥

तजे हि साम दांम दंड भेद च्यारि भूपती,
सुग्यांन रूप साथ हैं रटैं तुझै महा धृती।
इहै हि सारदा सदा सुबांनि रावरी महा,
प्रभाव याहि के मुनीश शुद्ध तत्व कौं लहा ॥ ४८ ॥

— दोहा —

सार समुच्चै तू कहै, तत्व सार तू देव।
साधु समाधि प्रदायका, दै दयाल निज सेव ॥ ४९ ॥

सायं प्रात भजैं तुझैं, भजैं दुपहरि मांहि।
 अर्द्ध रात्रि हू भवि भजैं, यामैं संसै नांहि॥५०॥
 नित्य भजैं अहनिसि भजैं, लग्यो तोहि सों चित्त।
 तो सौ और न देखिये, तीन लोक मैं वित्त॥५१॥
 साधर्मो तेई महा, जे तोसों लवलीन।
 तो सों जे विमुखा नरा, ते हि विधर्मो हीन॥५२॥
 तू साकार स्वरूप है, निराकार हू तू हि।
 नराकार सब रूप तू, लोक प्रमाण प्रभू हि॥५३॥
 साकृति और निराकृती, स्वामी तू शुनिस्स।
 साची चरचा रावरी, तो विनु सर्व असार॥५४॥
 सानंदी सद्रूप तू, सालोको अतिलोक।
 सामीप्यो अति निकट तू, गुन अनंत कौ थोक॥५५॥
 सारूपो निजरूप तू, ज्ञानरूप अतिरूप।
 तू सायोज्य सुमिलित है, गुन अभिन्न चिद्रूप॥५६॥
 सारिष्टो अति ब्रह्म तू, स्व रस रसीली देव।
 अति साम्राज्य धुरंधरो, है साम्राट अछेव॥५७॥
 सात नरक अति दुख मई, तो भजियां नहि पाय।
 नरकांतक तू देव है, सकल त्रिलोकी राय॥५८॥
 नरकनि के दुख अकथ हैं, कहत न आवैं थाह।
 देह जनित मन जनित औ, क्षेत्रोत्पन्न अथाह॥५९॥
 असुरोदीरित अति दुखा, बहुरि परसपर कष्ट।
 इनहि आदि अगणित दुखा, नारक मांहि सपष्ट॥६०॥
 भूख अतुल तिरषा अतुल, मिलै न कण इक अन्न।
 वृंद मात्र वारि न मिलै, है नारक अति खिन्न॥६१॥

छेदन भेदन मार अति, रोग अनंत अपार।
 अति चिंता बहु वेदना, कहत न आवै पार॥६२॥
 असुर जनित तीजा लगै, आगै वढतौ दुख्य।
 नारकभूमि कूभूमि में, दीखै नाहि सुख्य॥६३॥
 हिंसा मृषा अदत्त धन, अर परदारा संग।
 अति त्रिश्रा, आरंभ अति, सपत विसन परसंग॥६४॥
 द्युत मांस मदिरा बहुरि, वेस्या अर आखेट।
 चोरी नारी पार की, इन करि दुरगति भेट॥६५॥

— छंद बेसरी —

अभरख अहारी, पर धनहारी, करहि अगम्या गम्य चिकारी।
 स्वामि द्रोही मित्र द्रोही, बहुरि कृतघ्नी धर्मद्रोही॥६६॥
 जे विस्वास घातका दुष्टा, नरक परै पापिष्ट सपष्टा।
 विषदाता द्रवदाता पापी, पित्र निहंता परम सतापी॥६७॥
 बालघातका वृद्ध निपाती, अध परिणामी निरदय छाती।
 सप्तम नरक लगै ए जावैं, अगणित काल अतुल दुख पावैं॥६८॥
 पशुघाती दुरवत्त नरघाती, नरक परै सठ धर्म निपाती।
 निहकारण बैरी दुखदाई, पिशुन कुजन नरकांपुर जाई॥६९॥
 नरक न पावैं तेरे दासा, सुर्ग हु चाहैं नाहि उदासा।
 चाहैं केवल तेरी भक्ती, सुर्ग मुक्ति की मात प्रव्यक्ती॥७०॥

— छप्पय —

सिद्धार्थ तू सिद्ध, सिद्ध सासन तू देवा,
 तू सिद्धांत निबन्ध, देहु स्वामी निज सेवा।
 सिद्धि ब्रह्मि दातार, सिद्ध ही जानैं तोकों,
 अतिसित भक्ति प्रभाव, देहु तू जिनवर मोकों।

सिद्धकल्प तू जगतनाथा, तू हि सिद्धि संकल्प है,
तू प्रसिद्ध अविमल सिद्धा, सिद्धिमूल अविकल्प है ॥ ७१ ॥

सिद्धि सिला कौ नाथ, नाथ तू है त्रिभुवन कौ,
देहु देहु निज सेव, अंत दै प्रभु भव वन कौ।
सिक्ता सम भवभूति, सो न चाहैं निज दासा,
चाहैं केवल भक्ति, रावरी अचल प्रकासा।
सित तैं सित अति अमल भावा, स्त्रिष्टि सकल तुव ज्ञान में,
स्त्रिष्टि नाथ तू, स्त्रिष्टि भासक, प्रतिभासै निज ध्यान में ॥ ७२ ॥

स्त्रिष्टि अनंत स्वभाव, शुद्ध पर्याय अनंता,
स्त्रिष्टि अनंत सुज्ञान, आदि गुन अतुल धरंता।
स्त्रिष्टि न इनसी और, एक रूपा अविनासी,
स्त्रष्टा तू जगदीस, ईस तू सर्वविभासी।
स्वपर स्त्रिष्टि कौ तू अधीसा, भिन्न अभिन्न सुव्यापको,
सिखी भव्य अति हरष पावैं, तू सुमेघ धुनि लाप कौ ॥ ७३ ॥

गयो सिटाय जु मोह, धाक सुनि तेरी देवा,
दासनि सौं लरतैं हि, सिट पटावत अति भेवा।
तैं हि सिखाये दास, ज्ञान किरियामय निपुना,
अति हि सिहांवैं धीर, तोहि तैं लखि तत अपुना।
नाहि सिहांवैं जगत छति लखि, गनैं लोक माया असति,
तो ही कौं सिर ऊपरैं धरि, निश्चिंता मुनिवर लसति ॥ ७४ ॥

— दोहा —

सिर परि सबकै तू रहै, विरला तोहि लखंत।
तेहि सिधारैं सिव पुरैं, ज्ञानामृत चखंत ॥ ७५ ॥

— कुंडीलिया छंद —

तैं स्वीकारे मुनि गना, लोक रीति तैं भिन्न,
तू स्वीकार्यो मुनिगननि, तत्व स्वरूप अभिन्न।

तत्त्व स्वरूप अभिन्न, सीरपांणिनि कौ तारक,
 इहै नाम बलिभद्र, तू हि बलिभद्र उधारक।
 चक्रि उधारै तू हि, तैहि स्वीकृत अति तारे,
 सींचै करुणा वृक्ष, मुनिगना तैं स्वीकारे ॥७६॥

सीधौ वीधौ निंद्य है, मांस समान सदोष।
 मांस समान सदोष तेल जल चरम निपतिता,
 हींग महा हि अभक्ष, तू हि वरजै अधरतता।
 हाट मिठाई निंद्य, तजहि तुव मत द्रिढ कीधौ,
 भवैं कदापि न दास निंद्य है सीधौ वीधौ ॥७७॥

सीता नाम जु भूमि कौ, तू हि भूमि कौ नाथ,
 धरणीधर वरवीर तू, धीर महागुण साथ।
 धीर महागुण साथ, तू ही दुखहर सीता कौ,
 सीता परम सतीहि, सील है सरवस जाकौ।
 नारी तैरै नाहि, तू हि एकाकी मीता,
 भूमी भुज तू सत्य, भूमि कौ नाम जु सीता ॥७८॥

— सोरठा —

सीमंधर तू देव, सीम धरम की तू सही।
 दै दयाल निज सेव, जाकरि भव भरमण मिटै ॥७९॥
 सीझैं तेरे होइ, सीझे तोमैं आंवही।
 सत्य स्वयंभू सोय, ज्ञानानंद स्वरूप तू ॥८०॥
 सीचै जल सौं कोय, तव तरवर फल कौं फलै।
 व्रत तरवर सम होय, तुव रस सींच्यो शिव फलै ॥८१॥
 सीष गहै जो कोय, तेरी त्रिभुवन सांइयां।
 सो स्वतत्त्वमय होय, भवभरमण कौं वारि दे ॥८२॥

सीस नाथ सुरराय, तोहि जु बंदै नरवरा ।
 मुनिवर पूजै पाय, तेरे सब करि पूजि तू ॥ ८३ ॥
 सीह नृसीह अनादि, कर्म द्विरद मदहर तु ही ।
 तू सब मांहि आदि, आदि पुरिष परवीन तू ॥ ८४ ॥
 सीलों वास्यो अन्न, खांहि ते हि बोध न लहैं ।
 जे तोसों प्रतिपन्न, ते अजोग्य सब ही तजैं ॥ ८५ ॥
 सीसो वनिज न जोगि, सीसा तैं हिंसा अती ।
 तू वरजै हि अजोगि, दया धर्म कौ मूल तू ॥ ८६ ॥
 सुश्रुति भासै तू हि सुगुणी सुगुण विभास तू ।
 सुष्टहि लहैं प्रभूहि, दुष्ट न दरसन कौ लहैं ॥ ८७ ॥

— मालिनी छंद —

सुगत सुगति दाता, सुश्रुतो विश्रुतो तू,
 सुभग सुमुख देवा, सुष्ट है सुव्रतो तू ।
 सुमति सुहितकारी, है सुरूपो सुगुप्तो,
 सुखमय सुलभो तू, पुल्लभो तू अलुप्तो ॥ ८८ ॥
 सुहृद सुख सुरूपा, साधवा तोहि ध्यावैं,
 सुनहि सुश्रुति तेरी, हैं सुघोषा सुगावैं ।
 सुमुख सुभग जीवा, तोहि सों लौं लगावैं,
 सुविधि धरि सुधी ही, सुस्थिता होय भावैं ॥ ८९ ॥
 सुरग मुक्तिदाता, तूहि हैं सृष्टवाचा,
 अनुलित सुखिया तू, देव है नाथ साचा ।
 सुरपति अति पूजै, तोहि पूज्यां सुश्रेया,
 लहहि सुमति नाथा, तोहि तैं तू हि ध्येया ॥ ९० ॥

— छंद चालि —

सुत्रामा सुरपति नामा, सुरपति कौ पति तू रामा ।
 सुर असुर नरा मुनि पूजै, तिनतैं अघ कर्म न पूजै ॥ ९१ ॥

सुरगुर को गुर तू देवा, है सुतनु सुमुख अतिभेवा।
 सुमनां है मुनिवर ध्यावैं, सुजना तो सौं मन लावैं ॥ ९२ ॥
 तो सौं जे सुरति लगावैं, करि सुरचि महागुन गावैं।
 तेई पावैं शिव सुगती, जे भव्य सुदर्शन सुमती ॥ ९३ ॥
 तू सुनय द्विनय परकासै, तू सुगी सुष्टगी भासै।
 गी है वांनी कौ नांमा, तेरी वांनी सुखधामा ॥ ९४ ॥
 जे सुबुधी तोहि निहारैं, तेई सुजीव शिव धारैं।
 सुत परिजन त्यागि मुनीसा, ध्यावैं एकाग्र जतीसा ॥ ९५ ॥
 सुकृत कौ मूल जु तूही, सुकृती ध्यावैं हि प्रभू ही।
 सुकृत हू लखि न सकै ही, अकृत कैसैं जु धुकै ही ॥ ९६ ॥
 है सुप्रसन्न जे ध्यावैं, तेई निज आत्म पावैं।
 सुभ अशुभ त्यागि वरवीरा, तुवपुर पहुंचैं जगधीरा ॥ ९७ ॥
 सुपथी जे सुपथ प्रकासा, तोही तैं लहहि विलासा।
 सुमरन तेरी जे धारैं, कुमरन कौं तेहि बिडारै ॥ ९८ ॥

दोहा —

जे सुशील जन ध्यावही, तोहि सुचित्त लगाय।
 ते सुख पिंड अखंड है, आवैं तुव पुरि राय ॥ ९९ ॥

— वसंत तिलक। छंद —

तेरी प्रभू सुधि लहैं मुनि वीतरागा,
 होवै मुक्तार्थ नर देह महा सभाग।
 तेरे ही वैन सुनता सहु भ्रांति नासै,
 तेरी सुचाल लग्नतां निज तत्व भासै ॥ १०० ॥

तेरी सु स्वच्छ गतिता गति तैं अतीता,
 तो सौ सुजांन जग मैं नहि और लीता।
 मेरी सुधार नहि तोहि बिना जु होई,
 तू ही करै हि सुरझार उधार सोई ॥ १०१ ॥

तू ही सुठाकुर प्रभू जगदीश राया,
 लोकेश लोक परिपूरण रूप भाया।
 और कुठाकुर सबै नर देव सबै,
 झूठी विभूति लिखि मूढ वृथा जु गवै ॥ १०२ ॥

तू ही सुढार सुभ रूप कुढार औरा,
 तो कौं सबै मृधि प्रभू जग कौं हि मौरा।
 तू ही सुदारण महादुखहार देवा,
 तू ही सुधारण हमैं प्रभू दै स्व सेवा ॥ १०३ ॥

तू ही सुतारक भवोदधि पोत स्वामी,
 तू ही सुमारग निरूपण रूप नामी।
 तू ही सुदर्शन विभासक दृश्य रूपा,
 तू ही सुग्यान घन शुद्ध स्वरूप भूषा ॥ १०४ ॥

— छंद भुजंगी प्रयात —

सुनासीर भाष्यो जु इंद्रो सुरेंद्रो, तुझी कौं रटैं देव तू है मुनिंद्रो।
 चाहैं नाहि दासा सुनासीर लोका, विरक्ता जगद्भोग थी ग्यान धोका ॥ १०५ ॥
 सुपर्णा समाना तिहारे सुदासा, जिनीं कौं लखैं काल नागा जु नासा।
 ग्रसैं काल लोकैं न दासैं प्रभूजी, सही काल जीता सुदासा विभूजी ॥ १०६ ॥
 सुवर्णा नही है सुवर्णा गुसाई, तू ही है सुवर्णा सुरूपा असाई।
 सुतो नाहि काहू हि कौं तू अनादि, सुता सर्व तेरे तू ही तात आदी ॥ १०७ ॥
 तू ही सूर चंदा हतै अंधकारा, प्रकासी सदा तत्व रूपी अपारा।
 जपैं सूर चंदा भजैं जू फनिंदा, तू ही कोटि सूर्याधितेजो मुनिंदा ॥ १०८ ॥
 तू ही सूक्ष्मो जाहि कोऊ न जानैं, तू ही थूल थूलो अनंतत्व मानैं।
 नही सूक्ष्मो तू हि थूलो हु नाही, अमूर्त स्वरूपो तुही सर्व मांही ॥ १०९ ॥
 तू ही सूनृतो सत्य रूपो अरूपो, प्रभू तूही सूरेश्वरो है अनूपो।
 जपैं सूर तोकों उपाध्याय धोकैं, रटैं साध तोकों हि जे चित्त रोकैं ॥ ११० ॥

तू ही सर्व सूचै सदानंद साई, प्रभू तू हि चिद्रूप रूपो गुसाई।
 हरै पंच सूना दयापाल तू ही, तू ही शुद्ध अध्यात्म रूपो प्रभू ही ॥ १११ ॥
 महासूत्र भासी महातंत्र स्वांमी, तू ही सूतबंधो असूत्रो अनांमी।
 तू ही देव सृष्टौ तुझै सर्व सूझै, सदा सृष्टि धरै तू ही सर्व ठूझै (बूझै) ॥ ११२ ॥
 इहै जीव सूतौ महानीद मांही, जगावै तू ही देव संदेह नांही।
 स्वतत्त्व प्रसूती तिहारी सुभाषा, महा ज्ञान वैराग्य रूपी सुसाषा ॥ ११३ ॥

— सोरठा —

मधु मांसादि भखैं हि, ते सठ सूतिग रूप निति।
 करुणाभाव लखैं हि, भक्ति पंथ तेई लहै ॥ ११४ ॥

— छंद त्रिभंगी —

प्रभू तू हि यथेष्टो, विभु अति प्रेष्टो है जु स्थेष्टो, धिर देवा।
 गुन सेना कौ पति, अति हि महाछति, एकाकी अति, चर देवा।
 कवहु नहि स्वेदा, तू हि अखेदा, परम अभेदा, अति सेना।
 मुनि धारहि सेवा, हौं हि अछेवा, तू जगदेवा, अति देना ॥ ११५ ॥
 नहि स्वेत जु कृष्णा, तू अति विश्वा, जिनवर जिश्वा, अति नामा।
 इक सेवित तू ही, सर्व समूही, अतुल प्रभू ही, अतिरामा।
 तू ही भव सेता, ज्ञान जनेता, तत्व प्रणेता, जगाराया।
 तू विप्र सुधारै, क्षत्रिय तारै, सेठ उधारै, शिव दाया ॥ ११६ ॥

— दाहा —

तुझै सेय भवि जन तिरैं, जगतात्क तू देव।
 सेस सुरेस नरेस सहु, धरहि तिहारी सेव ॥ ११७ ॥
 मेरी भव वन में इहै, अध्यात्म सैली हि।
 इह सैली पायें प्रभू, रहै न बुद्धि मैली हि ॥ ११८ ॥
 या सैली करि शिव लहैं, भव वन कौ जल देय।
 सैण तिकेहि जु इह धरैं, लखिकैं सब जग हेय ॥ ११९ ॥

तजि सैथल्य स्वभाव जे, द्रिढ चित्ता हूँ धीर।

ते ईह सैली लहैं, स्वरस रसीले वीर॥१२०॥

— छंद मोती दांग —

तु ही जिन सोम सुद्रिष्टि प्रशांत, महा अति सोभित है अतिकान्त।

सु सोलहवान कहा जु सुवर्ण, तु ही अतिवान अनंत अवर्ण॥१२१॥

नही कछु सोच न सोक न रोक, तु ही सुप्रसन्न महागुन थोक।

तु ही इक सोधउ साधनि सत्य, लख्यौ परपंच सबै हि अनित्य॥१२२॥

— दोहा —

सोहं सोहं धुनि सुनैं, जग धंधा छिटकाय।

तेई तेरौ पंथ लोहैं, पावैं चेतनराय॥१२३॥

सौरा शैवा सौगता, तो विन शिव न लभंत।

सौख्य मई गुन निधि तु ही, तो कौं साध चहंत॥१२४॥

सौम्य तु ही अति सौम्यता, तेरी दीन दयाल।

अति सौंदर्य अपार तू, अति सौजन्य रसाल॥१२५॥

तेरे सौज अपार है, अति सौहार्द सुरूप।

अति सौरभ्य अलभ्य तू, ज्ञान लभ्य चिद्रूप॥१२६॥

सौध तिहारौ लोक सिरि, निज स्वभाव है सौध।

सौध तिहारे जेय सब, सब कौ सौध असौध॥१२७॥

अति सौभाग्यमई तु ही, कहिये कौ लग नाथ।

सौदामिनी सि जगत छति, तजि मुनि लें तुव साथ॥१२८॥

सौदामिनी विजुरी हि सो, भवमाया भकभूर।

तेरी भूति अनश्वरा, अति अनंत भरपूर॥१२९॥

— सबैवा तेइसा ॥२३॥ —

संवर रूप अरूप अनूपम संघम धारक तू अति भारी।

संवर निर्जर मोख तु ही इक आश्रय बंध न तू अविकारी।

जीव अजीव सबै प्रतिभासई तू हि जु और न कोइ अपारी ।
 सुंदर रूप सुसुंदरता धर, तू जगसुंदर संत उधारी ॥ १३० ॥
 संग तजे सहु संचय त्यागि, तजे धन संपत्ति संत महंता ।
 संसय मोह तजे सहु विभ्रम, तोहि रटैं मुनि तत्त्व लहंता ।
 संगति लोकनिकी तजि साध भजैं हि अबाध महा बिलसंता ।
 संक न चित्त मझार धरैं मुनि ध्यान सुधारस रूप चखंता ॥ १३१ ॥

— कुंडलिया छंद —

चउविधि संघा जाहि कौं, भजैं सुचित्त लगाय,
 संचय-लिङ्ग गुननि-कौं-लक्षण त्रिलोकी-राय ।
 सकल त्रिलोकी राय, संधि बंध न कछु जाकै,
 संधि विभक्ति समास कारका नाहि जु ताकै ।
 सर्व विभास अनास, भासई लिंग जु त्रय विधि,
 ध्यावैं तत्त्व स्वरूप जाहि कौं संघा चउ विधि ॥ १३२ ॥
 क्रियमाणा अर संचिता, प्रारब्धा विनसंत,
 संसय छांडि तुझैं भजैं, आनंदा विकसंत ।
 आनंदा विकसंत, संत ही पावैं भेदा,
 संघ उधारक तू हि, नाथ है अति निरखेदा ।
 तू संवित्ति स्वरूप, संपदा रूप सुजाणा,
 तुम नामैं विनसंत, संचिता अर क्रियमाणा ॥ १३३ ॥

— दोहा —

सं कहिये सम्यक सदा, तू सम्यक निज रूप ।
 तैं संबंध जु नही, परंपरनि कौं भूप ॥ १३४ ॥
 संग्या संख्या लक्षणा वहुरि प्रयोजन नाथ ।
 सर्व विभासै शुद्ध तू, भेदाभेद सुसाथ ॥ १३५ ॥

संकट हरन सुपास तू, दूरि नही जग सार।
 तू संदेह वितीत है, संसारार्णव तार॥१३६॥
 संसारी तैं सिद्ध हैं, तैरैई परसाद।
 संभव तू ही असंभवो, धरइ जु नाहि बिषाद॥१३७॥
 जे संसार सरीर तैं, अर भोगनि तैं नाथ।
 विरक्त हैं सुमुनीश्वरा, ते हि लहैं तुव साथ॥१३८॥
 संप्रदाय तेरी सही, जा करि शिव सुख होय।
 भव संतान अनंत तैं, तारक तू प्रभू मोय॥१३९॥
 संपा विजुरी कौं कहैं, तदवत चंचल देह।
 संपादक निज ज्ञान कौं, चेतन तत्व विदेह॥१४०॥
 संप्रदान अधिकर्ण अर, अपादान अर कर्ण।
 करता करम जु षट विधि, कारक रूप अवर्ण॥१४१॥
 संध्या अभ्र समान है, भव तन भोग विभूति।
 इनसौं जे ममता धरैं, भव में धरैं प्रसूति॥१४२॥
 संध्या तीन मझार जे, तोहि भजैं चित लाय।
 अहनिंसि ध्यान समाधि की, सिद्धि लहैं ते राय॥१४३॥
 संवेगादिक गुणधरा, ध्यावैं तोहि मुनिंद।
 तू असंग सरवंग है, केवल रूप जिनिंद॥१४४॥
 सत संगति तैं पाईए, तेरी भक्ति दयाल।
 शिव संगम कौं मूल है, तेरी सेव कृपाल॥१४५॥

— संरटा —

सः कहिये सो जीव, धन्य धन्य है जगत में।
 तोहि रटैं जु अतीव, तेरी हैं निज रस लहैं॥१४६॥
 सः शूली कौं नाम, शूली रुद्र त्रिशूल धर।
 सो ध्यावैं तुव धाम, तू सब करि पूजित प्रभू॥१४७॥

अथ द्वादश मात्रा एक कवित्त मैं ।

समरस पूरित तू, सागर गुननि कौ हि,
 सिद्धि ऋद्धि वृद्धि कौ सुआगर अनंत है ।
 सीमंधर सीमंकर सुष्टता प्रकाशक तू,
 सुनासीर ध्यावैं जाहि देव भगवंत है ।
 सूत्र कौ विभासक जो, सेत भव सिंधु की हि,
 सैली कौ महंत महा, सोमद्रिष्टि संत है ।
 सौध नाहि देह नाहि व्यापि रह्यो लोक मांहि,
 संतनि कौ नाथक जो सः प्रकास तंत है ॥ १४८ ॥

— छंद कुंडलिया —

तेरी नाथ सुसंपदा, महासुसंपति जोय,
 संकट हरनी सिद्धि जो, लक्ष्मी कहिये सोय ।
 लक्ष्मी कहिये सोय, होय जो अतुल अनंता,
 अनुभूती सुधिभूती, स्वच्छता तेरी संता ।
 साकृति नाकृति रूप, तो समा क्रांति घणेरी,
 भाषैं दौलति ताहि, संपदा नाथ सु तेरी ॥ १४९ ॥

इति सकार संपूर्ण । आगैं हकार का व्याख्यान करै है ।

— श्लोक —

हरि हर महावीर, हार निहार सन्निभ ।
 हितं हिरण्य गर्भं च, हीन दीनादि पालकं ॥ १ ॥
 हुताष्टकर्म संघातं, दीप्तं हुतभुजोपमं ।
 पुरहूत पतिं देवं, हूं मंत्राक्षर भासकं ॥ २ ॥
 हेम रूपं महाशुद्धं, हैमाद्या भरणातिगं ।
 कर्म होमकरं धीरं, देवं ध्यानाग्नि दीपकं ॥ ३ ॥

हौत्रिकं पाप हंतारं, हंस वर्गे निषेवितं ।

हः मंत्राक्षर रूपं च, वंदे देवं सदोदयं ॥४॥

सोहा —

हर्ष रूप आनंद घन, हर्ष विषाद विनीत ।

हर हरि जिनवर देव तू, हरि हर पुजि अजीत ॥५॥

- द्वायय -

हर स्वामी हर नाथ, तोहि हल धर अति सेवैं.

हृदय कमल में तोहि, साध धरि शिव सख लेवैं।

हृत् विरोध तू देव, तू हि हृत्तराग विमोहा

हृषीकेश जगतेस, नांहि तैर परद्रोहा ।

हरित न पीत न सेत रक्त, स्याम न तु धनस्याम है,

हरित काय न हि भक्ष भाषे, त हृदयस्थ स राम है ॥ ६ ॥

हवि सूरूप सह कर्म, तू हि होता ज अनादी.

ध्यानानल परगास, देव त सब महि आदी ।

हृद वेदह तु देव, हृद बांधै सह त ही.

रहै हृद के अंत, जान घन तहि समही ।

नहि हसइ न तसइ रूसई, नित्य प्रसन्न अनंत त.

हम कौं ह देह निज भक्ति प्रभ, हृष्ट तष्ट भगवंत त ॥ ७ ॥

हठ योगी हठ योग, तू हि हठकरि अघ खंडे.

हणै कर्म सब भर्म, काम क्रोधादि विहंडै ।

हच्छपकरि वडहच्छ. तारि त हमहि गमाई.

हति पातिग हरि देव, लोभ मोहादि असाई ।

हृदयि चित्त जे तोहि ध्यावैं, अदकि रहैं नहि जगत में

हटैं राग मोहादि तिनहीं, ते गनियें तब भगति में ॥४॥

हड षोडे कौ नांम, एहि हड सम भवकपा.

यातें काढि दयाल, देह निरवांन अनपा ।

हस्ति न घोटक भृत्य, नाहि स्यंदन शिवकादी,
 चाहैं केवल भक्ति, रावरी सब महि आदी।
 तू चैतन्य अमूरतातम, ज्ञान स्वरूप अनूप है,
 लोकेस लोक परमाण तू, पुरषाकार स्वरूप है॥ ९॥

हस्त माहि सहु वस्तु, अस्त विनु उदय स्वरूपा,
 हसत वदन जगनाथ, धीर तू वीर अरूपा।
 हसिवौ खिजिवौ नाहि, तू हि विनु राग द्वेषा,
 अलख अमूरति देव, सेव दै शुद्ध अलेषा।
 करि स्व हजूरी मोहि नाथा, दे समीपता आपंती,
 हरि भ्रांति देहु सम्यक्त तू, टारि मूरछा पापंती॥ १०॥

हारद तू हि दयाल, और नहि हारद कोऊ,
 तेरी हाव-सुहोछि, मोह मिरहव-सम होऊ।
 हानि न वृद्धि न कोय, तू हि है नित्य अखंडित,
 हानि वृद्धि परकास, तू सदा अतिगुन मंडित।
 हास्यादिक तैं रहित देवा, निरमोही निरवान तू,
 हाव न भाव विलास विश्रम, योग युगति परवान तू॥ ११॥

हांतौ पाखौ नाथ, कर्म नैं मेरौ तोतैं,
 छांडैं नाही संग नादि तैं ए जड मोतैं।
 हाथ पकरि अव देव, खैंचि लैं अपनैं पुर में,
 हार समान जु होय, तू हि वसि हरि मुझ उर में।
 हाटक तैं अति विमल तू ही, है विराट कौ नाथ तू,
 हारद योगीश्वरनि कौ है, रहै निरंतर साथ तू॥ १२॥

हार न मुकट न कटक, नाहि को अंगद तैं,
 तू निरग्रंथ दयाल, मोह माया नहि नैं।
 तू ही हिरण्य सुनाभि, नाभि कौ पुत्र कहावै,
 प्रभू हिरण्य सु गर्भ, अर्भ को तू न लखावै।

अर्भक वालक नाम कहिये, तू वालक नहि कोय कौ,
अजर अजोनी शंभु स्वामी, तू हि तात सब लोय कौ ॥ १३ ॥

तु ही हिरण्य सुवर्ण, तो समो नाहि सुवर्णा,
हितमित वैन दयाल, तू हि है हितु अवर्णा।
हिमकर पति जग जोति, तू हि हिमगिरि सौ देवा,
हिमता हर हर देव, देहु चरननिकी सेवा।
वसहु हिये मैं ज्ञान रूपा, हिरदै की चक्षु खोलि तू,
हि कहिये निश्चै स्वरूपा, हरि हरि हमरी भोलि तू ॥ १४ ॥

हिवडै तिष्ठि सुदेव, तारि लै जगत प्रपाला,
हिम ऋतु सम जड भाव, टारि मोतैं सुकृपाला।
ह्रींकार मय रूप, तू हि है ऊंकारा,
तू श्रीं वीज स्वरूप, सर्व वीजाक्षर पारा।
ह्रींदायक तू ह्रीं प्रपूजित, श्रीं ह्रीं धृति कीरति सबै,
बुद्धि जु कमला तोहि सेवैं, राग दोष तोतैं दवैं ॥ १५ ॥

हीरा मांनिका लाल, अवर पुखराज जु पन्नां,
मूंगा मोती वदुरि फुनि सुलीलम गनि लिन्नां।
रतन लसनियां होय, नव जु ए रतन सुप्रगटा,
तीन रतन विनु सर्व, रतन दीसैं अति विघटा।
सम्यग दरसन ज्ञान चरनां, रतनत्रय एई सही,
परमराग पुखराग प्रमुखा संध्याराग जु समल ही ॥ १६ ॥

हींसैं अति सुतुरंग, वार वारन बहुगज्जहि,
सेवहि अति सुनरिद, द्वार वादित्र सुवज्जहि।
सज्जहि अति भट शूर, जिनहु कौं सेवहि सब जन,
ऐसे चक्रीनाथ, तोहि सौं लावैं निजमन।
तुव कारणि सब जगत तजि कै, भजहि नरोत्तम दास हूँ,
तव पावैं तुव पंथ देव, राग दोष द्वय नास हूँ ॥ १७ ॥

छहिये- शुद्ध, सुखद, सुखगिरी, त्रिपुण्ड्र, मांहें,

लहैं हीन परजाय, पापिया संसैं नाहैं।

अतिहि हीनता रूप, भूप इह भव की माया,

याते पार उतारि, देहु अविनश्वर काया।

तेरे दास उदास भव तैं, ज्ञान क्रिया मैं निपुण हैं,

व्रत प्रव्रतक भक्ति रूपा, तिन सम और जु कवण हैं॥ १८॥

हींग जु होय अभक्ष, हाट कौ सीधौ निंद्य,

चरम चालनी छाज, चर्म घृत तेल हु निंद्य।

चंदोवा है जोग्य गृही कौ भोजन पाने,

पूजा दान सुज्ञान तूहि भासेइ प्रमाने।

हुतकर्मा हुतभर्म तू ही, तू होता भव भाव कौ,

हुलसै हि चित तो देखतां, तू खेवट गुन नांव कौ॥ १९॥

हु छहिये प्राकृत मांहि है परगट नामा,

तू हि प्रगट जगदीस, ईश है अतुलित धामा।

हू अति सलिउ अनंत, काल भव वन महि तो विन,

अव निसतारि दयाल, तू हि प्रभु तमहर कर दिन।

हेत अहेत जु त्यागि जग सौं, हेत करैं तो सौं मुनी,

हेम रूप तू रहित काई, तो विनु हेय सबै दुनी॥ २०॥

हेय कहावै त्याग, जोग जे वस्तु पराई,

परद्रव्य जु नहि लीन, एक निजरस सुखदाई।

आत्म विनुसय हेय, एक आदेय स्वरूपा,

हेयाहेय सबै हि, तू हि भासइ जग भूपा।

तौ हेय न एक दीसैं, तू हि उपादे वस्तु है,

हे नाथ तारि भव सिंधु तैं, तू तारक परसस्त है॥ २१॥

हेकड मल्ल अवीह, हेतु शिव कौ इक तू ही,

हेत अहेत न लेत, एक निज भाव समूहि।

हेला मात्रैं तू हि, जीख कौ करइ उधारा,
 हेठलि तैरे सर्व, गर्व हर तू हि अपारा।
 हेला शीघ्र जु नाम कहिये, तू हि शीघ्र भवतार है,
 हेला लीला नाम कहिये, लीला धर तू सार है ॥ २२ ॥

लीला ज्ञान विभूति, और को लीला नांही,
 हेरयो तोहि मुनीनि, राचिया तो ही मांही।
 हेम सुकामिनि त्यागि, त्यागि सहु रागर दोषा,
 तेरे होय सुदास, मानमद करहि जु सोषा।
 माया काया सौं न नेहा, एक नेह करि तोहि सौं,
 भव्य अनंता पार पहुंता, रहित हुवा जे मोह सौं ॥ २३ ॥

— दोहा —

पार न पहुंचै ज्ञान विनु, ज्ञान भगति विनु नांहि।
 भगति दया विनु नांहि कहं, दया मोम चित्त मांहि ॥ २४ ॥
 जे अभक्ष भोजन करें, पीवैं जेहि अपेय।
 करहि अगम्यागम्य जे, ते करणा नहि लेय ॥ २५ ॥
 चित राखैं कोमल सदा, बोलहि हित मित वैन।
 तन मन करि दुख देहि नहि, तेदयाल बुधि नैन ॥ २६ ॥

— छप्पय —

हेडा कहिये मांस, मांस सहु होय अभक्षं।
 वे ते चउ पंचिंदि जीव जंगम नहि भक्षं।
 धावर होय सुभक्ष, मांस रक्तादि न जामैं।
 अन्न वीण जल छाण, भेद भासइ तू तामैं।
 अन्न वारि लघु अशन करिकैं, त्यागि अभक्षा सब जिके।
 तोहि भजैं मन शुद्ध होई पार होई भवतैं तिके ॥ २७ ॥

भरत हैमवत हरि जु, क्षेत्र फुनि महा विदेहा।
 रम्यक अर हैरण्य, वत सु औरावत जेहा।
 सप्त क्षेत्र ए नाथ, दीप जंबू मैं भासैं।
 सर्व दीप कौ देव, एक तू अतुल प्रकासैं।
 है तू ही जु उधार ईसा, और न तोसौ दूसरी।
 तू हि ज्ञान आनंद रूपा, तो विनु सब जम धूसरी॥ २८ ॥

हैं तोतैं सब सिद्धि, ऋद्धि कौ सागर तू ही।
 होता पापनि कौ हि, होमई कर्म समूही।
 होड तिहारी और, करइ कौ सुरनर नागा।
 तू धिर चर कौ नाथ, भासइ ज्ञान विरागा।
 होत सबै सुख तोहि सेयें, तू सुख दुखतैं रहित है।
 तू आनंद सुकंद स्वामी, गुन अनंत तैं सहित है॥ २९ ॥

होनहार अर भूत, वर्तमान जु सब जानैं।
 तोतैं कछु न परोखि, तू हि रागादिक भानैं।
 होय सकल कल्याण, तोहि तैं अंतर जामी।
 होहु होहु भवतार, नाथ तू हमरी स्वामी।
 हो हो जिनवर देव देवा, सुनि विनती जगनाथ जी।
 साथ देहु अपनीं निरंतर, भवदुख पावक पाथ जी॥ ३० ॥

होवै ध्यान मझार लीन धित जु मुनि जन कौ।
 तोतैं भेद रहै न, भव्य जीवनि के मन कौ।
 अभवि न पावैं तोहि, ज्ञानधन अमृतधन तू।
 चिदधन अतन अमान, देव जगजीवन जिन तू।
 होठ न हालैं कर न फिरई, वयण उचारो नां हुवै।
 सोहं सोहं अतुल मंत्रा, जपि अजपा तोहि जु छुवै॥ ३१ ॥

हौ तू ही जगनाथ, होयगौ तू हि निरंतर।
 है तू ही परतक्ष, लक्ष अत्यक्ष अनंतर।

हौं सठ जगत मझार, हौंस करि विषयनि केरी।
 रुलिउ अनंतउ काल, भक्ति भाई नहि तेरी।
 हिंसादिक अपराध करि कै, नर्क निगोदादिक लही।
 विनु भजन राखै कुमति लहि, कुगति अनंती मैं गही॥ ३२॥

— सोरठा —

अव दै भगति दयाल, भव संकट हरि नाथ जी।
 भगत बछिल तू लाल, भगत करै भगवंत जी॥ ३३॥

हंस नाव है भानु, भानु ससि तेरे दासा।
 हंस पति तू देव, मोह मद तिमर विनासा।
 परम हंस मुनिराज, तू हि हंसनि कौ सरवर।
 हंस पखेरू जाति, तिन समा उज्जल मुनिवर।
 क्षीर नीर ज्यों जीव जड कौ, भेद करै यतिवर प्रभू।
 हंस जीव सबही कहावैं, तू जीवनि कौ गुर विभू॥ ३४॥

हं मंत्राक्षर तू हि, मंत्रमय मूरति तेरी।
 परम समाधि सु तंत्र, भूति सहु तेरी चेरी।
 हां हौं हूं हौं ह्रः जु, परम तू मंत्र स्वरूपा।
 हिंसा ध्वांत उछेदा करण तू भानु अनूपा।
 कहा हंस की चाल अैसी, जैसी चाल सुरावरी।
 हंस अनंत उद्योत धर प्रभु हरहु जु भांति विभावरी॥ ३५॥

हंत कहावैं खेद, खेद नहि तैर कोई।
 तू निस्खेद अभेद, देव निस्खेद सु होई।
 दुखहर तू हि मुनिंद, दोषहर तू हि अनंदा।
 तू हि काल हर देव, कंट हर तू हि जिनिंदा।
 सकल कुविद्या हरणहारा, है दारिद्र हरो तुही।
 हः मंत्राक्षर रूप भूपा, सर्वाक्षर तू ही सही॥ ३६॥

अथ द्वादश मात्रा एक कवित्त मैं।

हरिकै तु ही जु हारि हारल की लाकरी है,
 हित मित वायक तू, नायक सु ज्ञायका।
 हीरा मनि मानक जे हीन सहु कंकर ए,
 हुलसैं न इन्हें पाय, तेरे निज पायका।
 हूं तौ सठ भूलौ तोहि, हे प्रभु सुधारि मोहि,
 है त्रिलोकनाथ देव ऋद्धि सिद्धि दायका।
 होता सब कर्मनि कौ, हौस नाहि तैं कोऊ,
 हंस देव हः स्वरूप, सर्व वात लायका ॥ ३७ ॥

— कुंडलिया छंद —

तेरी नाथ स्व हर्षता, धरै न हर्ष विषाद,
 गुन अनंत रूपा महा, सो लछिमी अविवाद।
 सो लाछिमी अविवाद, ऋद्धि सिद्धि परसिद्धि,
 नही हीनता होइ, स्वानुभूति परिवृद्धि।
 सत्ता ज्ञान विभूति, संपदा संपति देरी,
 भाषैं दीलति ताहि, हर्षता नाथ सु तेरी ॥ ३८ ॥

इति हकार संपूर्ण। आरौ क्षकार का व्याख्यान करै है।

— श्लोक —

क्षमाधारं रमानाथं, क्षांति रूपं महाबलं।
 क्षिप्त रागादि संतानं, क्षीण मोहं जगद्गुरुं ॥ १ ॥
 क्षुद्रैरलभ्यमीशानं, क्षूं मंत्राक्षर भासकं।
 क्षेत्राधिपं त्रिलोकेशं, क्षैमं धर्म प्रकाशकं ॥ २ ॥
 क्षोणीधरं महाधीरं, क्षौमालंकारवर्जितं।
 क्षंताधिपं सदाशांतं, क्षः प्रकाशं नमाम्यहं ॥ ३ ॥

— गाथा —

क्ष कहिये क्षम नामा, क्षम समरत्था तुही प्रभू सवला ।
 अबला लखहि न धामा, तैरे अबला न पुत्राद्या ॥ १ ॥
 क्षत्कहिये क्षय नामा, क्षय हर तू ही सु अक्षयो स्वामी ।
 क्षत्क्षांती फुनि रामा, तू हि क्षमा मूल क्षम देवा ॥ २ ॥
 तू क्षय कौ क्षयकारा, क्षति तल मध्ये सुपूजनीको तू ।
 तू हि क्षमा धन धारा, रोग क्षयी नासका तू ही ॥ ३ ॥
 क्षमी क्षमाधन धामा, समरथ तो सौ न दूसरौ कोई ।
 भ्रांति क्षपाहर रामा, क्षपा निसा नाम युध भावै ॥ ४ ॥
 तोहि क्षपाकर सेवैं, दिनकर सेवैं सुरिद अति सेवैं ।
 तुख भजि मुनि शिव लेवैं, क्षमा धरा तू हि धरणीशा ॥ ५ ॥
 तू क्षरिवे तैं रहिता, अक्षर तू ही अक्षरातीता (तू) ।
 अति क्षपणक गण सहिता, क्षपक श्रेणी हि दाता तू ॥ ६ ॥
 क्षत पीरा कौ नामा, क्षत हर तू ही जु क्षत्रियाधीशा ।
 क्षति नहि तैरे रामा, क्षति नाथा तू हि जगनाथा ॥ ७ ॥
 क्षणिकमती नहि पावैं, गावैं तोकों मुनी क्षमावंता ।
 भव्य जना अति भावैं, वीरा तू क्षत्रवटि पूरा ॥ ८ ॥
 क्षपित कलंका तू ही, क्षण क्षण ध्यावैं यतीश्वरा संता ।
 सुद्ध सुवुद्ध प्रभू ही, क्षपाकरा कोटि नख माहैं ॥ ९ ॥
 ज्ञान छतैं ह्वैं मौना, शक्ति छतां ह्वैं क्षमा महा जिन कै ।
 ते दासा नहि गौना, दांन करैं कित्ति नहि चाहैं ॥ १० ॥
 क्षति सम क्षमा जिनों कै, जल सम शांती सुवह्नि सी क्रांती ।
 पवन समांन तिनों कै निसंगतता हि ते भक्ता ॥ ११ ॥
 निर्मल नभ सा दासा, ध्यावैं तोकों प्रसन्न चित्ता जे ।
 ते केवल परकासा, पावै तेरे हि परभावैं ॥ १२ ॥

सर्वैया —

क्षांत प्रशांत सुदांत तुही प्रभु, कांत अपार सुक्षायक दाता ।
क्षांति प्रकाशक भासक ज्ञान सुक्षायक सम्यक् रूप उदाता ।
क्षाम नही तु हि क्षाम कहैं कृश, तू अति पुष्ट प्रवीन प्रमाता ।
क्षार समुद्र सुआदि अनेक, पयोनिधि भासइ तूहि विख्याता ॥ १३ ॥

क्षालन हार सर्व अघकौ तु हि, तोहि प्रक्षालन हार न कोई ।
क्षार पयोधि समांन इहै भव, तू गुन सागर अमृत सोई ।
क्षिष्ट परे सहु कर्म कलंक तिहारहि दासनि पै बल खोई ।
क्षिप्त किये परभाव विभाव सुदासनि कै परपंच न होई ॥ १४ ॥

— छप्पय —

क्षिषु हिंसायां नाथ, भासई पंडित लोका ।
हिंसासम नहि पाप, ए हि सब अघ कौ थोका ।
हिंसक लहइ न भक्ति, जीव रक्षक तुव दासा ।
दया समान न धर्म, भाषई केवलि भासा ।
क्षीण कलंक प्रक्षीण बंधा, क्षीर समुद्र प्रसिद्ध कर ।
क्षीर श्राविणी ऋद्धि धारा, ध्यावैं तोहि मुनिंद वर ॥ १५ ॥

क्षीयमाण नहि तू हि, वीर तू बद्ध जु माना ।
क्षीण शरीर न होय, पुष्ट तू सुख तन ज्ञाना ।
क्षीरादिक रस त्याग, तपधरा तपसी ध्यावैं ।
क्षीरोपम तू विमल, विमल हैं मुनि जन पावैं ।
क्षीर नीर ज्यौं जीव जड कौं भेद भाव लखि योगिया ।
लहि ब्रह्म ज्ञान तोकौं लखैं, अनुभव रस के भोगिया ॥ १६ ॥

— दोहा —

ज्ञान क्रिया करुणानिकौ, तेरी भक्ति निदान ।
तेरे भक्त न आदरैं, वस्तु अखान अपान ॥ १७ ॥

— छप्पय —

क्षुद्र पात्र कौ क्षीर, नीर हू तिन के घर कौ।
 कवहु न लेवौ जोग्य, कांम नहि उत्तम नर कौ।
 काचौ दूध अजोगि, कवहु अचवैं नहि भक्ता।
 द्वै घटिका पहलीहि, उशन करनौ हि प्रयुक्ता।
 भेड उष्टरी कौ न क्षीर, श्रुति वर्जित दास न ग्रहैं।
 तजि क्षुद्र भाव शुभ भाव धारैं, दास दरस तैसै अहैं॥ १८ ॥

— कुंडलिया छंद —

तो मैं नाहि विभिन्नता, क्षुद्र न पावैं तोहि,
 क्षुद्र कर्म क्षुण जु किये, दै अनुभव रस मोहि।
 दै अनुभव रस मोहि, तू हि है देव अवस्त्रा,
 क्षुरिकादिक नहि कोइ, रावैर शस्त्र जु अस्त्रा।
 तोहि भज्यो नहि नाथ, ज्ञान वैराग्य न मोमें,
 अब दै केवल भक्ति, भिन्नता नाहि वि तोमें॥ १९ ॥

— छंद —

क्षुधा त्रिषाधिक दोषा नाही, क्षुल्लक भाव न तैरै।
 क्षुत्रिट हँर मुनिनि की तू ही, समता भाव जु प्रेरै॥ २० ॥
 क्षुल्लक एलि उभै विधि भासै, एकादस पडिमा मैं।
 तू नहि क्षुल्लक एलि न मुनिवर, केवल सिद्ध दसा मैं॥ २१ ॥
 क्षुत न जंभाई खास न सासा, देवनि कै बुध भाषैं।
 तू देवनि कौ देव जगत गुर, मुनि हिरदा मैं राखैं॥ २२ ॥
 क्षुं मंत्राक्षर भासक तू ही, मंत्र पूरती देवा।
 क्षेत्रपती क्षेत्राधिप साई, क्षेत्री क्षेत्र अछेवा॥ २३ ॥
 क्षेत्रपाल क्षेत्रज्ञ गुसाई, सब क्षेत्रनि की जानैं।
 क्षेमंकर क्षेमंधर स्वांमी, तत्त्वातत्त्व बखानैं॥ २४ ॥
 क्ष्वेड कहावे विष कौ नांमा, विषधर तोहि जु ध्यावैं।
 विषधर शंभू अर पारवती, तेरौ ही गुन गावैं॥ २५ ॥

विषधर नाग नागपति तैरी, गुन गाँवें अति रसना ।
 क्ष्वेड सुधा है तुव परसाँ, तू अति अमृत विसना ॥ २६ ॥
 तू हि अभिन्न व्यापकौ स्वामी, निजगुन पर्यय माँही ।
 भिन्न व्यापको सकल ज्ञेय मैं, राग दोष मैं नाँही ॥ २७ ॥
 तातैं विश्व सदाशिव तू ही, ब्रह्म गणेश महेशा ।
 सुगत बुद्ध दिनकर तमहर है, शक्ति स्वरूप जिनेशा ॥ २८ ॥
 क्षेप विक्षेप न तैरे कोई, करै कर्म विक्षेपा ।
 तत्वबोध कै अर्थ प्रकासै, नय परमाण निक्षेपा ॥ २९ ॥

— छंद पद्धड़ी —

क्षेत्र देह क्षेत्री जु जीव, तू जीवनाथ है जगत पीव ।
 क्षेत्र लोक क्षेत्री हि तू हि, तू सर्वक्षेत्र व्यापी प्रभू हि ॥ ३० ॥
 तू देव क्षेम शासन सुमूल, तू क्षेम रूप त्रैलोक्य चूल ।
 क्षोणीधर भूधर तू दयाल, पृथ्वी अनंत तैरे विशाल ॥ ३१ ॥
 क्षोहणिदल सेना गुन अनंत, अक्षोभ तू हि राजै प्रसंत ।
 तू सर्व क्षोभ हर बोध धार, देवाधिदेव स्वामी अपार ॥ ३२ ॥
 तू क्षीम रहित भूषन वितीत, है देव दिगंबर अखिल जीत ।
 मुनि क्षीर विवर्जित लुंच केश, ध्यावैं जु तोहि धरि नगन भेस ॥ ३३ ॥
 क्षंतउ दंतउ क्षांती स्वरूप, तू क्षाति (क्षति) विवर्जित लोकभूष ।
 है क्षौं क्षौं क्षुं क्षौं क्षः विभास, तू मंत्री मंत्र स्वरूप भास ॥ ३४ ॥
 धर्मीन मैं आदि क्षमा जु नाथ, तू उत्तम क्षम भासक अनाथ ।
 तैरे न नाथ तातैं अनाथ, त्रैलोक नाथ अतिभाव साथ ॥ ३५ ॥

अथ द्वादश मात्रा एक कवित्त मैं ।

— सवैया ३१ —

क्षमा कौ स्वरूप तू हि क्षायक स्वरूप नाथ,
 क्षिष्ट परैं रागादिक तेरे ही सु ध्यान तैं ।

क्षीण मोह तू अक्षुण क्षुद्रभाव तैं विभिन्न,
 क्षूँ प्रकाश मंत्र भास पूरण विग्यान तैं।
 क्षेमंकर क्षेत्रनाथ क्षैम रूप क्षोणी नाथ,
 क्षौमनाहि भूषन न तेज अति भान तैं।
 क्षंतउ तू क्षांति रूप क्षः प्रकास है अनूप
 भूप सब लोकनि कौ भिन्न छल मान तैं॥ ३६॥

— कुंडलिका छंद —

क्षायक सम्यक भासिनी, पारिणामिका शक्ति,
 मिथ्यारूप क्षपा हरै, अक्षुणा अव्यक्ति।
 अक्षुणा अव्यक्ति, क्षुण कीये सब कर्मा,
 क्षीर समाना विमल, चेतना भूति सुधर्मा।
 क्षमा अंघिका देवि, लछिमी रमा अमायक,
 भासैं दौलति ताहि, भासिनी सम्यक क्षायक॥ ३७॥
 स्वामी तेरी कांति जो, क्षांति रूप अति शांति,
 सोई गौरी शुद्धता, नित्य प्रसन्न प्रशांति।
 नित्य प्रसन्न प्रशांति, परम ज्योति द्युति आभा,
 प्रभा प्रभावति सोइ, तत्त्वता वस्तु महाभा।
 सत्ता सिद्धि विशुद्धि, ऋद्धि राधा अभिरामी,
 स्यामा दौलति रूप, कांति जो तेरी स्वामी॥ ३८॥

— दोहा —

चेतन देव सुचेतना, देवी एक स्वरूप।
 वह सुद्रव्य वह परणती, गुन रूपा चिद्रूप॥ ३९॥
 नाम अनंत सुदेव के, देवी नाम अनंत।
 आपुन माहैं पाइए, भगवति अर भगवंत॥ ४०॥
 सब अक्षर मात्रानि मैं, सकल ज्ञेय मैं देव।
 देवी हू सब मैं लसै, विरला बुझी भेव॥ ४१॥

मणि सुवर्ण मैं क्रांति जो, तिन तैं भिन्न न जोय।
त्यों वह दौलति द्रव्य तैं, है अभिन्न रस सोय ॥४२॥

इति क्षकार संपूरणं । इति श्री भक्त्यक्षर मालिका अध्यात्म बार षडी नाम ध्येय उपासना तंत्रे सहश्रनाम एकाक्षरी नाम मालाद्यनेक ग्रंथानुसारेण भगवद्भजनानंदाधिकारे आनंदराम सुत दौलति रामेन अल्प बुद्धिना उपायनिकृते यकारादि क्षकारांत नवाक्षर प्ररूपको नाम पंचम परिच्छेद ॥५॥ इति ग्रंथ संपूरणं ॥

— दोहा —

अक्षर मात्रा नादि की, करता सरवगि देव।
प्रतिकरता गनधर मुनी, परंपराय अछेव ॥१॥
सर्व ग्रंथ अक्षरमई, मात्रा रूप बखान।
अक्षर मात्रा जे लखैं, ते पावैं निखान ॥२॥
नाम अनंत अनादि के, अक्षर मात्रा रूप।
संसकृत प्राकृत में, गावैं मुनिजन भूप ॥३॥
या युग में बुधि घटि गई, नहि ग्रंथनि कौ ग्यान।
संसकृत प्राकृत कौ, बिरला करै बखान ॥४॥
उदियापुर में रुचि धरा, कैयक जीव सुजीव।
प्रथीराज चतुर्भुजा, श्रद्धा धरहि अतीव ॥५॥
दास मनोहर अर हरि, द्वै बखता अर कर्ण।
केवल केवल रूप कौ, राखैं एक हि सर्ण ॥६॥
चीमां पंडित आदि ले, मन में धरिउ विचार।
बारषडी है भक्तिमय, ज्ञान रूप अविकार ॥७॥
भाषा छंदनि मांहि जो, अक्षर मात्रा लेय।
प्रभु के नाम वषांनियें, समुझैं बहुत सुनेय ॥८॥
इह विचार करि सब जना, उर धरि प्रभु की भक्ति।
खोलैं दौलति राम सौं, करि सनेह रस व्यक्ति ॥९॥

बारषड़ी करिये भया, भक्ति प्ररूप अनूप।
 अध्यात्म रस की भरी, चरचा रूप सुरूप॥ १० ॥
 साधर्मिनि की देसना, लहि करि दीलति राम।
 अविनासी आनंदमय, गायो आत्म राम॥ ११ ॥
 वसुवा कौ वासी इहै, अनुचर जय कौ जानि।
 मंत्री जय सुत कौ सही, जाति महाजन मान॥ १२ ॥
 न्याति खंडेल जु वाल है, गोत कासिलीवाल।
 सुत है आनंदराम कौ, जाकौ इष्ट दयाल॥ १३ ॥
 गुरु दिगंबर साध हैं, वीतराग है देव।
 दया धर्म लखै आसिरी, साधर्मिनि गति देख॥ १४ ॥
 अध्यात्म रीचीनि कौ, दासा मन बच काय।
 भजन करै भगवंत कौ, भगति भाष चित लाय॥ १५ ॥
 जय को राख्यो रांण पै, रहै उदैपुर मांहि।
 जगत सिंह किरपा करै, राखैं अपुनै पांहि॥ १६ ॥
 छंद भेद जानैं नहि, समुझि न ग्रंथनि मांहि।
 अलंकार विज्ञान कौ, अलंकार हू नांहि॥ १७ ॥
 कोसनि मैं लेस न धैरै, परिचय काव्य न ज्ञान।
 शब्द युक्ति परमागमा, ए त्रय धरे न कान॥ १८ ॥
 श्रुति सिद्धांत सुनें नहीं, देखे नांहि पुरांन।
 पेखे नांहि कदापि हू, सिंगारादिक आंन॥ १९ ॥
 स्व परन समय लखाव कछु, लौकिक कला न कोय।
 नहि पाई अनुभव कला, केवल चिनमय सोय॥ २० ॥
 योगाभ्यास अभ्यास नहि, यम नियमादिक आठ।
 वृद्धि न तत्वातत्व की, सूत्र न शास्त्र न पाठ॥ २१ ॥

बुद्धिबल हूँ औसौ नहीं, तपबल श्रुति बल नाहि।
 दानादिक कौ बल नहीं, छल बल नाहि जु पाहि ॥ २२ ॥
 केवल अध्यात्म धरा, रुचिधर प्रभु के दास।
 दासनि के दासनि की, क्रम रज शभ मति भास ॥ २३ ॥
 ताकी भक्ति प्रसाद तैं, पूरन कीनीं ग्रंथ।
 वीतराग प्रभु गाइया, गायो भक्ति सुपंथ ॥ २४ ॥
 मंगल रूप अनूप प्रभु, मंगल करौ सदैव।
 चउविधि संगनि कौ महा, तत्व प्रकासक देव ॥ २५ ॥
 धर्म प्रवर्तौ बद्धौ, जीव दयामय शुद्ध।
 विघन टरौ संसार कौ, होहु दशा प्रतिबुद्ध ॥ २६ ॥

— छंद —

दौलति करौ देहुरा वाली, निरभय रूप अनूपा।
 जिनदासनि के दास करौ प्रभु, अजित सुधर्म सुरूपा ॥ २७ ॥
 शंभु अदंभ अखंड धरापति, करौ नाथ अविनासी।
 जादौं पति नियमादि सुनाथा, करौ सय सुखरासी ॥ २८ ॥
 जंबू दीप क्षेत्र है भरत जु, आरज खंड निवासा।
 देस नाम मेवाड उदैपुर, रची तहां इह भासा ॥ २९ ॥
 संवत सत्रह सै अठ्याणव, फागुन मास प्रसिद्धा।
 शुक्ल पक्ष दुतिया गुरुवारा, भायो जगपति सिद्धा ॥ ३० ॥
 जबै उत्तरा भाद्र नक्षत्रा, शुक्ल जोग शुभकारी।
 वालव नामकरण तव वरतै, गायो ज्ञान विहारी ॥ ३१ ॥
 एक महूरत दिन जब चढियो, मीन लगन तव सिद्धा।
 भगति माल त्रिभुवन राजा, कौं भेट करि परसिद्धा ॥ ३२ ॥
 अमल अचल अविनासी संपति, दौलति कमला पति तैं।
 चाहहि ज्ञान चेतना परणति, थिरचर पति अति छति तैं ॥ ३३ ॥

इति श्री भक्त्यक्षर मालिका अध्यात्म बारषडी संपूर्ण । शुभं
 भवतु ॥ श्री ॥ संवत् १८०० का भाद्रमासे कृष्णपक्षे तृतीय
 तिथौ गुरुवारे इदं अध्यात्म बारषडी दौलरांम कृत पं. महात्मा
 स्वैताबंर मया रांम महैपालाणी लिखतमस्ति ॥ श्रीः ॥

Digitized by srujanika@gmail.com

परिशिष्ट

ग्रन्थ में आये शुद्ध आत्मा के कतिपय नाम केवल राम, अनाम, हर (बंधन हरने वाला), हरी (पराक्रम रूप), दिनकर देव (अज्ञान अन्धकार हरने वाला), गणनायक, जगभूष, बुध (प्रतिबोधक), विरंचि (विधिकर्त्ता), जिनवर, मदनजीत, जगजीत, अभिराम, रम्यरमण, भगवान, ज्ञानवान, रमाकंत (स्वयं की शक्तियों के नाथ) चर, परम आल्हादक, सुरपति, क्षेत्राधीश, नरपति, आदीश, आदिपुरुष, संत, महंत, अनंत, अरिहंत, शुद्ध चेतना, आतमराम, अकाम, कामरूप (आनन्दमान), मतराम, सुंदर, सरस, विराम, विद्वान, महाराज, द्विजराज, भवनाव, क्षितिपालक, भयटालक, आखण्डल (एकछत्र स्वामी), क्षेत्रपाल (स्व-परक्षेत्र पालक), नटवरलाल (विमल भावों का नाटक करनेवाला), त्रिभंगी लाल (अस्ति, नास्ति, अवक्तव्य का अवभासक), कृष्ण (सर्व भाव प्रकाशन करते हुए भी निजभाव का आकर्षक होने से कृष्ण), महारुद्र (कर्म शत्रु का नाशक होने से), अमर, ऊर्णनाभि (मकड़ी की भाँति पृ. २२-२३ पर 'आप ही मैं खेले तार सौँ बहुरि सकाँचे सार' (१/१७), अवितर्क, ऊहापोह वितीत, देव (नित्य गुणों में रमने से कवि 'करे क्रीड भव सिंधु मैं तातैं जीव हु देव' तक कह देते हैं (५६/५)।)

कठिन शब्दावली

पृ. २२-२३		फहा	- फँसा
असम	- कोई बराबर नहीं	अब्ध	- जल
महासम	- सबके बराबर अकेला	अतनु प्रहारी	- कामनाशक
अलेसी	लेश्या रहित	भेदा	- भेद, रहस्य
अभू	अजन्मा	सुअनाश्री	- किसो के आश्रय नहीं
स्वभू	- स्वयं से पथियों का उत्पाद	अविगत	= अविनाशी
अरज	ज्ञानावरणादि रहित	पृ. २५ अनिजाश्री	= निज वैभव में उत्पाद
विरज	- विरक्त	भोगीसा	= शोषनाग, भरणेन्द्र
अरुज	- निरोग	पृ. २७ अछेप	- बाधा रहित
		विमोष	- चोरी रहित
		अषोभ	- क्षोभ रहित

	अनीन	-	अन्यून, कम नहीं
	अच्छीन	=	अक्षीण
	इकंग	=	दिगम्बर
पृ. २७	अपात	=	पतन रहित
	अधात	=	धातु रहित देह
	अमाम	=	ममता रहित
	अवाम	=	स्त्री रहित
	अभाम	=	स्त्री रहित
	अजूहो	=	अभी है
	अपायो	=	अप्राप्त
	प्रणीता	=	कहा गया
	निकंद	=	नष्ट करने वाला
	असोष	=	चिन्ता रहित, शोषण रहित
	अन्नादी	=	वचन रहित
	अथापो	=	किसी ने स्थापना नहीं की
	दुपक्षो	=	निश्चय व्यवहार- पक्षवाला
	ठाम	=	स्थान
	विधात	=	धातु रहित
पृ. २८	अपर	=	अन्य
	अरुण	=	सूर्य
	चार	=	आचारण, परिणमन करने वाला
	अतुल अतूल	=	भारी, हल्का
	नादि	=	अनादि
पृ. २९	करा	=	किरण
	सुगमक	=	समझने में सरल
	अतिक्षम	=	महासमर्थ
	क्षमाकर	=	क्षमाशील
पृ. ३०	अलापित	=	अलिप्त
	नागर	=	चतुर

पृ. ३६	पाथा	=	पानी
	आसेव्या	=	सेवा योग्य
	च्छति	=	शक्ति
पृ. ४३	असाथ	=	अकेला
पृ. ४४	उपधि	=	परिग्रह
	उत्तपधि	=	गलत राह
पृ. ४५	उनमान	=	अल्पता
	अपासि	=	बंधन रहित
पृ. ५३	दायाद	=	कुटुंबी
पृ. ६२	ओपासक	=	उपास्य
	अंवर	=	आकाश
	अमानो	=	अनंत
	रूपनी	=	उत्पन्न हुई
पृ. ७४	कैतव	=	छल
	करमामय	=	कर्मरूपी रोग
	धू	=	उड़ाने वाला, ध्वंस करने
पृ. ७५	कदरजता	=	कंजूसी
	हरत	=	हरा होना, खुश होना
	कलभ	=	हाथी
	खोषा	=	इन्द्रियों में लिप्त
पृ. ८५	खात	=	संध
	खुभ्यो	=	प्रविष्ट
	खुटै	=	छूटे
	खुस्यो	=	छीना गया
	मदत्ती	=	मस्ती
	खेल	=	पानी की खेल
	क्षोणी	=	पृथ्वी
	खैरलभ्य	=	इन्द्रियों से अप्राप्त
पृ. ८८	गमक	=	ज्ञान
	ग्राम	=	गाँव, समूह
	ग्रामणी	=	गाँव का स्वामी

पृ. ९० गिरानाथ - बृहस्पति	छिनक प्रवादो = बौद्ध
गिरपति = सुमेरू	छिक छक - छिद्र, दोष
गिलै - निगलता है	छोति = क्षति
धरधारी = धारकों को धारण करनेवाली	पृ. ११७ छीतल - शिथिल
अमाय - असीम	पृ. ११८ क्रम - चरण
धुरु - गाड़ी का धुरा	पृ. १२० जात रुपाभ = स्वर्ण की चमक
पृ. ९२ छंद = कपट, छंद	जुटित = जुड़े हुए
पृ. ९३ गंज = मौहल्ला, बाजार	क्रमाब्ज - चरण कमल
गंजै - गंजा करना	मान - ताप
गंतव्य = जाना चाहिए	पृ. १२१ जहै = छोड़े
पृ. ९४ धूसरौ - धूल भरा	भिषक - वैद्य
पृ. ९८ उदर = उदर, पेट	चित्र = अद्भुत
पृ. ९९ सिखी - मोर	पृ. १२२ जातुचित = किंचित
घौरक - घुडक	जित = विजयी
चंचत्कांचरन = चमकता हुआ सोना	पृ. १२३ डेडर = मेंढक
पृ. १०२ चतुः शरण = आरहत, सिद्ध, साहू और केवली कथित धर्म रूप चार शरण	पृ. १२४ जुवो - अलग
पृ. १०५ चारचारी = आचार का आचरण करनेवाला	जेहली - आलसी
निकूपा - निकम्मा	जेर = हल्के
चार = दूत	पृ. १२५ जैत - जीत
पृ. १०६ असक्ती = आसक्ती, राग	जौन्ह - चौदनी
बोट - आढ	पृ. १२६ झषध्वज = कामदेव
चीलै - मार्ग	पृ. १२७ झाण = ध्यान
धालि - छोड़कर	झिकाय - तृप्त
पृ. १०७ चादि = बेकार	करिमा = कालिमा
पृ. ११० भोर = भ्रम	पृ. १२९ झोक - ऊँघ
पृ. ११४ डक = लालसा	पृ. १३० भूति - वैभव, राख
छत्र - ढका हुआ	पृ. १३८ ठट्ट - ठाठ, वैभव
दादिका = दाद, शाबासी	ठालिय = ठालापन, फालतुपन
छिपा - रात्रि	पृ. १३९ दूणा - औलंभा
	पृ. १४२ डाबा = ओंस
	डाबर - गड्डा
	पृ. १४३ डूङ्गर - जदुगर

	अब्ज	= बादल
पृ. १४६	डाहा	= तट
	छाण	= कुये का ढाणा
पृ. १५२	णीय	= नीति
	अणोइ	= अनीति
	मुय	= छोड़ दे
पृ. १५३	तूप	= स्तूप
	हर्ष्यावली	= भवनों की पंक्ति
पृ. १५४	तटिनी	= नदी
पृ. १५६	तार्णै	= लक्ष्य लेते हैं
	त्रिदशाधिप	= देवों की स्वामी
पृ. १५८	तुल	= समान
	हुतभुग	= अग्नि
पृ. १५९	तेह	= तेज
पृ. १६७	दवियान	= दबनेवाले,
	दत्तव	= दाता
पृ. १६९	द्विप	= हाथी
पृ. १७३	दंगल	= जंगल
पृ. १७५	धिषणा	= बुद्धि
पृ. १७६	धज	= धीरज

पृ. १८१	नाकपति	= इन्द्र
पृ. १८७	पिनाकि	= महादेव
	पिडच	= प्रत्यंचा
	पिधान	= वस्त्र
पृ. १९२	निकूप	= दुष्ट
पृ. २००	फीटी	= थोथी
पृ. २०२	वर्मा	= रक्षक
पृ. २०७	विहाय	= आकाश
पृ. २०८	चेता	= ज्ञाता
पृ. २१०	वैतस्वत	= काल
पृ. २११	तापह	= ताप नष्ट करने वाला
पृ. २२७	यियासी	= इच्छा
पृ. २४९	वलम	= संक्लेश
पृ. २५३	देसा	= उपदेश
पृ. २६५	ब्रोडा	= लज्जा
पृ. २६७	षंड	= तपुंसक
पृ. २७०	स्थवीयान	= अचल
पृ. २८६	हच्छपकरि	= हस्तक्षेपकारक
पृ. २८८	वारन	= हाथी
पृ. २९०	क्षौम	= रेशमी वस्त्र